

Mbia Cheẽ Nuevo Testamento

The New Testament in Siriono

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society for non-commercial use. This Bible is available for free download in a variety of digital formats at dbs.org/bibles.

Language:
Country:
Publisher:
Copyright: © 1977, Wycliffe Bible Translators, Inc.
Last Updated: 2023-10-20
ID: cfe1d7bb-bcab-4a0f-92e4-633057666e38
ISO: srq
ISBN:

SAN MATEO.....	4
SAN MARCOS.....	37
SAN LUCAS.....	57
SAN JUAN	92
HECHOS	117
ROMANOS.....	151
1 CORINTIOS	166
2 CORINTIOS	180
GALATAS	189
EFESIOS	194
FILIPENSES.....	199
COLOSENSES	203
1 TESALONICENSES	207
1 TESALONICENSES	210
1 TIMOTEO.....	212
2 TIMOTEO.....	216
TITO	219
FILEMON	221
HEBREOS.....	222
SANTIAGO	233
1 PEDRO	237
2 PEDRO	242
1 JUAN	245
2 JUAN	249
3 JUAN	250
JUDAS.....	251
APOCALIPSIS	253

SAN MATEO

Jesucristo i ñiinda amei

1 Ñ ndei Jesucristo i ñiinda ã. David rei ei tuchi. Abraham abe no.

2 Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru. 3 Judá rei Fares ndu. Zara ru abe no. (Tamar rei ũquĩsi.) Fares ndei Esrom ndu. Esrom ndei Aram ndu. 4 Aram ndei Aminadab ndu. Aminadab ndei Naasón ndu. Naasón ndei Salmón ndu. 5 Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru. 6 Isaí rei David ndu. David ndei ererecua. David ndei Salomón ndu. (Urías ninisi rei esi.) 7 Salomón ndei Roboam ndu. Roboam ndei Abías ru. Abías rei Asa ru. 8 Asa rei Josafat ndu. Josafat ndei Joram ndu. Joram ndei Uzías ru. 9 Uzías rei Jotam ndu. Jotam ndei Acáz ru. Acáz rei Ezequías ru. 10 Ezequías rei Manasés ru. Manasés rei Amón ndu. Amón ndei Josías ru. 11 Josías rei Jeconías ru. Jeconías nongue abe ru. ũquĩ ngue siqui abae judíos rerao mose Babilóniaa nda.

12 Jeconías rei Salatiel ndu no. Salatiel ndei Zorobabel ndu. 13 Zorobabel ndei Abiud ndu. Abiud ndei Eliaquim ndu. Eliaquim ndei Azor ndu. 14 Azor ndei Sadoc ndu. Sadoc ndei Aquim ndu. Aquim ndei Eliud ndu. 15 Eliud ndei Eleazar ndu. Eleazar ndei Matán ndu. Matán ndei Jacob ndu. 16 Jacob ndei José ru. José quia María quereco nguiã. María rei Jesús si. Cristo, i equia ee.

17 Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

18 Jesucristo chaacuquia tasenei na jėje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguiirĩ ngue eteachõ nguie ye ra. Siquiã ndaque José rese. Espíritu Turã ae que eriirĩ mondo erie ye ra. 19 José turãte que eriqui rei ra. Eireñte que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui reĩ nguia emo ndese ee reaẽ. 20 José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. —David riirĩ

ño nde re. María eisi turã ño neninisirã. ¡Ndeireĩ ngũĩã ño jėje! Emo ngue siqui ãte quia erese ra. Espíritu Turã ae que eriirĩ mondo erie ye ra. 21 Nguiirĩ nda etea.

“Jesús” ere chõ eriirĩ je. Ae quia ra mbia sirõ tuchi eicuã si, i que ángel ñee José je cuu ra. 22 Eñ nda Dios cheẽ io cote. Ae Dios cheẽ mbuchecuaasa mbesa cose nae, ũquĩ nda io cote. Ñ ndei embesa ji ã:

23 ¡Sã jėje! Nyucuaaque ruã nda nguiirĩ tea.

Emanuel, i ra eriirĩ je.

Dios riqui nanderese co, i ñi Emanuel nde, i que embesa ji cose ra.

24 José que ñumumba cote ra. Angel cheẽ ndui si que María rerequia turã cote ra. 25 José que siqui eã mbei erese ra. Nguiirĩ ndea chee. Jesús i que José eriirĩ je ra.

Mbia aquiatu nyoi Jesús itãquieĩ ndea

2 Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. 2 ũquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuua. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. 3 Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. 4 Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. 5 ũquĩ ngue ñee Herodes je ra. —Nyaacuquia ra Belén de Judea. I que embesa ji ra:

6 Sucha ñetẽ tuchi rei Belén.

Belén de Judea.

Mbia chĩcua tuchi ra Belén cote.

Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote, i que Dios cheẽ embesa ji ra, i que sacerdotes ñee Herodes je ra.

7 Nyebe Herodes “jenyu” i nguiã ũquĩ mbia aquiatu je. Ñee ngue ũquĩ ísaa ra. —¿Manosete nyasitata embae rese jemaẽ nde? i que ñee ee ra. 8 Herodes que

ũquĩ mbia aquiatu mondochoi Belén cote ra. —Jëso Belén. Nyaacuquia ramo je rese jëirandu tuchi. Jë erea mose, sembiirandu se. ĩ nda se abe aso mae erese. ĩ nda acoi senia ndese se abe ñee ee, i rei que Herodes ñee ee ra. ⁹ Mbia aquiatu que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rëta ra. Tiba que ee Belén arõ cote ra.

¹⁰ Nyebe mbia aquiatu ia tuchi nguiã mae mose nyasitata tiba rese cote. ¹¹ Mbia aquiatu que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que ngúĩã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbusa abe no. Mirra abe no. ¹² Dios que ñee mbia aquiatu je cote ra. —Jësochĩ nda ñee Herodes mbiirandu jë, i que Dios ñee ee cuu ra. Nyebe echoi nguiã Herodes abi nguécuaa.

José nyoĩ uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serĩte equia co. Jëso uchã. ãquẽ jendao sunuña Egíptoo. Esi rese. Huee jëingochõ. Acheẽ jee ra ndeje huee, i que Dios ñee José je ra. ¹⁴ José que ñumumba juã cote ra. ãquẽ ngue ecuruchoi isa usi rese ra. Nyoĩ que Egípto qiti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra:

Seriirĩ ngue aru Egípto si ra,
i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiatu sembiirĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia riiĩ nacue iquia ja cote ra. ãquẽ itãquieĩ ngu e equia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquẽ itãquieĩ iquia ja. ¹⁷ Herodes ũquĩ iquia mose que Dios cheẽ ique cote ra. Ae Jeremías mbesa quia:

¹⁸ Mbia Ramá jenda nyeseo tuchi.

Eya eã tuchi nguiĩ ndese.

Emo embia aroneãte.

Eriirĩ nguia mano jate nguiã ee, i que embesa ji ra.

¹⁹ José chi mose Egípto que Herodes mano nyee ra. Nyebe Dios ángel mo mondo nguiã ñee e José je.

²⁰ —José, echumumba rã. Jëso Israel cote. ãquẽ abe erao. Esi rese. Ae ãquẽ iquia serĩte quia nae, ũquĩ ngue mano cote ra, i que ángel ñee José je cuu ra.

²¹ José que ñumumba cote ra. Nyoĩ que nyebi Israel qiti cote ra. ãquẽ ngue equerao esi rese ra.

²² Herodes riiĩ ngue siqui Judea jenda rerecuarã cote

ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguiã Galilea cote.

²³ Sucha tubiriã mo ngue chi Galiléaa ra. Nazaret, i que hue je ra. José que nyoĩ bei hue, hue jendarã cote ra. Nyebe Dios cheẽ mbesa ji ique nguiã cote. ĩ ngue Dios cheẽ nda: Nazaret jenda ra Jesús, i que Dios cheẽ nda.

Juan el Bautista Dios chë senei senei

3 Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ² —Jendua si jëicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³ Sã Isaías embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenye si chõ nguia jë abe icoquiato nandererecua je”, i equia turúquiaa hue,

i que Isaías embesa ra. Juan ñi si que embesa ra.

⁴ Quiicuã mbuaera chõ ngue Juan irao ra. Mbae ire chõ ngue enumbicuaa no nda. Tucu mbuae chõ ngue eu quia no nda. Irao quiaa riinda abe. ⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶ Mbia huĩcuã nenei nenei mose Dios je, ũquĩ mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaẽ ngaẽ tuchi quia Juan ndea ra. Saduceos tubiriã abe no. Juan ngue ñee asite ũquĩ je ra. —Mbei rã ño jëingo nguiã ã. Mbae icuã nda tu mbia je nae, ũquĩ ñi ño jenyu quia uchã serea core? ⁸ Jë mbae icuã ndecha mose Dios je, mbae turã jësaã saã mbei quiatu quia ee cote. ⁹ “Abraham ndiirĩ nducucha chõ nande re. Nyebe ra Dios nandemingo be” jjenyechĩ nda jë! Dios Abraham ndiirĩ nducucha chao arõte raque sita je. ¹⁰ Ira rã si chõ mbia riqui nguiã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguiã mbia je co, mbia mbae turã naa eã mose.

¹¹ I je chõ aico nguiã bautizar i mbia je co. Jë ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espíritu Turã je. Mbia chiã mbitirõ sacua. Sã tata riqui mbae mbitirõ no. ¹² Ae ra mbia umbae mii icúe. Eaturã achõ ño embae re. Ae embae eã nae, ũquĩ nda eséi cote. ũquĩ ndeisa ra ua eã mbei tata. Sã mbia quiata a chiqui chiqui no. Sã ea mii icúe no. Sã echuruique mombo táta no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra. ¹⁵ Jesús que ñee ee ra. —Bautizar ere rei seje. Dios cheẽ ndui si mbae nandesaã turã ja quia, i que Jesús ee ra. Juan ngue eno i chee ee ra. ¹⁶ Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espiritu Turã ngue nguichi nyurushi rã nda. Nguichi que eu Jesús rese ra. ¹⁷ Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

Jesús tambücuã, i raque Satanás

4 Turúquiaa que Espiritu Turã Jesús rerao ra. “Tã tae Jesús je”, i sacua diablo Jesús je. ² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³ Aque mose tuchi que diablo si ee ra. Embücuã sacua. —Nde Dios ririĩ mose, mbichae esaã ã sita je. Ñ nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheẽ nguia ra mbia mingo nguiã”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate ereco mose ra. —Nde Dios ririĩ mose, eo oso íbii no. Dios ra ndereaquiato. Sã embesa ji riqu i ñee no: Dios ra ángeles mondo ndereaquiato sacua. Oje ra ndeisi. Nambuquichi mingue rae. Sita ra cua iã ndei je, i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “Ma Dios sereaquiato. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que oso erecha cote ra. Angeles que ngaẽ Jesús reaquiato cote ra.

Jesús mbia mbaaquiato quiato ramo

¹² Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabolón abe ji. Nef-

talí abe ji. Huee que Jesús si siri ra. ¹⁴ Isaías chimbesea Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵ Mbia hue jenda ja que siqui itondáruu nyii ra. Zabolón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ñquĩ abe no.

Ñquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷ Aque mose bei chõ ngue

Jesús riqui ñee mbia je cote ra. —Jendua si Dios rese.

Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jëingo serui, i Jesús uchimbbaaquiaturã je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. Ñ que eu sira mbuasa mondo mondo ii ra. Sira resenda bei rei ñquĩ. ¹⁹ Jesús que ñee ee ra. —i Serui bei chõ jëingo jë! Taembbaaquiato quiato. Mbia teendu endu bei quia seje cote, i que Jesús ee ra. ²⁰ Nyoĩ ja que erui ra. Sira mbuasa si que echoi hui ra. ²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitirõ tirõ nda. —Jëingo serui, i que Jesús Jacobo je ra. Juan je abe. ²² Jesús cheẽ nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiato

²³ Jesús que ngata tuchi quia Galilea rĩ nda. Mbia que embaaquiato quiato quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴ Mbia Siri a jenda que jirandu tuchite chee erese ra. Nyebe eriqui nguiã erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. ²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

Jesús mbia mbaaquiato quiato ibi ibate

5 Mbia tubiriã ngu e chi Jesús rese ra. Nyebe Jesús nyui nguiã ibi ibate mo ndese ra. Ngoĩ que huee ra. Echimbbaaquiato que esi chã ngaẽ nda. ² Jesús que embaaquiato quiato ra.

Ae eyate riqui

³ Eĩ ngue ñee ee ra:
—Ae siqui mingue quia nae, eya chõ ùquĩ nde. Ùquĩ nda siqui Dios rese.

⁴ Ae nyeseo quia nae, eya chõ ùquĩ nde. Dios ra embia tuchi.

⁵ Ae eseteäte riqui nae, eya chõ ùquĩ nde. Ibi ja ra embae cote.

⁶ Ae siqui turã sete quia nae, eya chõ ùquĩ nde. Dios ra embucuata turã nguia.

⁷ Ae eya eäte riqui mbia rese nae, eya chõ ùquĩ nde. Dios ia eäte ra ùquĩ ndese.

⁸ Ae echiã turãte riqui nae, eya chõ ùquĩ nde. Ùquĩ nda mae Dios rese.

⁹ Ae mbia mingo turã nguia nyiese nae, eya chõ ùquĩ nde. “Seriiĩ” ì ra Dios ùquĩ je.

¹⁰ Mbia icuã icuã mose jêturã je, jêya tuchi rae. Jenderecua tuchi chõ Dios riqui nguiã co.

¹¹ Mbia ñee icuã mose jêje serĩ, jêya tuchi rae. Mbia icuã icuã mose jêje serĩ. Mbia ñee ñooño mose jeni, jêya tuchi rae. ¹² Jeñimbia chõ nguia ùquĩ mose. Dios quia ra mbae turã tuchi mondo jêje ibate. Mbia icuã icuande jêje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³ Embiquesa rã ño jêingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jêingo nguiã mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵ Sã nandeico lámpara mendi no. Sã nandeico eati eã no. Sã nandeico emi eã mbaequi re no. Erendi checua chõ nda nandemi nguiã. Mbia resae ja sacuã. ¹⁶ Eĩ jenyee si chõ nguia tata turã na. Mbae resae turã mbia je. Eĩ jenyee mose ra mbia mae jêturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbesa rĩ

¹⁷ Dios cheẽ ique ja sacuã ño achu nguiã co. Moisés cheẽ mbutiã sacuã eã ño ngue achu nguiã. Dios cheẽ mbuchecua cheẽ mbutiã sacuã eã ño ngue achu nguiã. ¹⁸ Tacheẽ nyecua jêje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguia ra ua eã mbei. Ique ja chee rae. ¹⁹ Dios cheẽ tubiriãte raque mbia je, mbia echeẽ mumbayã sacuã. Emo echeẽ mi mumba mose, Dios biãte ra ùquĩ, Dios siqui mose errecuarã tuchi cote. “Dios cheẽ mi emumba”, ì mose emo, Dios biãte ùquĩ. Ae echeẽ mumbayãte quia nae, Diosbi tuchi chõ ùquĩ nde. Ae ñee nguia mbia je nae, “Dios cheẽ jemumbayã ja” ì quia mbia je nae, Diosbi tuchi chõ ùquĩ nde. ²⁰ Tacheẽ nyecua jêje. Fariseos

uturã saã saã tuchi raque. Embesasa abe uturã saã saã tuchi raque. ¡Jê nguia jêingo turã tuchi ùquĩ si jê! Jê jêingo turã eã mose ùquĩ si, jêingo eã nda Dios rese, Dios siqui mose mbia rerecuarã.

Paama jenyechĩ nda emo je, ì Jesús

²¹ Amei ñee ngue jeñandu rei ra. “Mbia mo nda ereiquiachĩ. Nde mbia mo ìquia mose, nde abe ra mbia ndeiquia arõte”, ì rei que amei nda. ²² Se quia tacheẽ nyecua jêje. Jê paama ì chooño mose jenongue je, mbia ra jeiquia arõte. “Ndeaquiatuã nde” jenyee mose jenongue je, mbia ra jêiquia arõte. “Ndearacuayã nde” jenyee mose jenongue je, jêso arõte ra tata cuasu. ²³ Nembae ofrenda rerao mose Dios je, endua rã nyii, emondo nonde ee. Ndenongue mo paama ì mose ndeje, ofrenda esecha rã oso ñee ndenongue je. Jeñimbuturã na nguia nyii. Aquere quiatu eso nyebi ofrenda mee Dios je cote. ²⁵ Emo mbia rerecua mbuqueta queta mose nderĩ, ndeturã ño ee. Echeẽ turã ño ee. Jê ae chõ jeñimbuturã jenyue. Ì nda ndererao icuã eã. Ndererao mose ra ndetarõ mbei cárcel.

²⁶ Huee ra ereico bei. Nembae mondo ja tuchi chee ee.

Emo mae mose cuña mo oseĩ oseĩ, adulterio ì ùquĩ je

²⁷ Amei ñee ngue jeñandu rei ra. “Emo ninisi rese ra jêingochĩ”, ì rei que ra. ²⁸ Se quia tacheẽ nyecua jêje. Emo mae icuã mose cuña mo ndese, “aque rese nda aico raã ña” ì mose, ùquĩ abe eicuãte. Siqui raanguia erese chõ ùquĩ nde. ²⁹ Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa mi eremombo nguiã. Ì nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguiã. Ndequiato cutinda raque. Ì nda nderete osoã tata cuásuu.

Jeninisi ra jemombochĩ jê, ì Jesús

³¹ Amei ñee ngue jeñandu rei ra. “Emo ngüinisi mombose mose, sã emombo chõ. Papel mbesa ji emondo ee”, ì rei que amei nda. ³² Se quia tacheẽ nyecua jêje. ¡Jeninisi ra jemombochĩ jê! Jeninisi siqui mose emo ndese, ùquĩ mose mi ño jeninisi jemombo arõte raque. Jê emombo chooño mose, jêingo jeninisi mingo adulterio rese ùquĩ. Ae emombo ji quereco cote nae, ùquĩ abe eicuãte no. Adulterio, ì chõ ùquĩ je re.

Jurar jenyee jirichĩ nda jê

³³ Amei ñee ngue jeñandu rei ra. “Jurar jenyee mose Dios je, jeñee nda jembuchichĩ ee”, ì rei que amei nda. ³⁴ Se quia tacheẽ nyecua jêje. ¡Jurar jenyee eã mbei tuchi jê! Ibei rĩ abe jurar jenyee eã jê. Dios recua chõ ibei re. ³⁵ Ibi rĩ abe jurar jenyee eã jê. Dios ironguia chõ ibi re. Jerusalén ni abe jurar jenyee eã jê. Dios mbae

tuchi chõ Jerusalén nde. ³⁶ Jeãquĩ ñi abe jurar jenyee eã jẽ. Jẽa mĩ mo jembushĩ aroneate. Co mĩ jemondei aroneate no. ³⁷ Jjurar jenyee eã jẽ! “Ae” jenyee chõ. “Tei” jenyee chõ. Ũquĩ mĩ ño jeñee. Jurar jenyee mose, eicuãte ũquĩ.

Emo icuã mose jẽje, jẽturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo nderẽ siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jẽje. Mbae icuã nda jẽsaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebe jiri erao ee. ⁴² Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jẽje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderĩ nae, echeẽ turã ño nguia nde ee. Ae eicuãte riqui ndeje nae, ũquĩ ñi eico ñee turã Dios je. ⁴⁵ Eĩ jenyee mose ra Ibatenda riirĩ turã tuchi jẽ. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶ Ae eturãte riqui mbia jẽje nae, ũquĩ achõ je jẽturã mose, eicuãte ũquĩ. Mbia icuã abe mbae turã saãte uquiato achõ je. Eĩ jenyechĩ nda jẽ. ⁴⁷ Jẽquiato achõ je jeñee turã mose, aba biãte ũquĩ. Eĩ ño Dios quiatoã abe nguia ñee turã uquiato je. ⁴⁸ Jẽ nguia jẽingo turã mbei mbia ja je. Sã jendu Ibatenda turã mbei riqui no.

Mbae turã jẽsaã nyecuayã ño nguia

6 “Sã mbia mae ja sechiao turã ndese”, jenyechĩ nda mbae turã naa mose. Mbia resaa achõ nda mbae turã jẽsaã saãchĩ jẽ. Ũquĩ jẽsaã saã mose ra jendu Ibatenda mbae turã mee eã jẽje. ² Jẽingo mose mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ũquĩ na nda jẽingochĩ. Dios ra mbae turã mee eã ũquĩ je. “Sã mbia mae ja sechiao turã ndese”, jenyechĩ nda jẽ. ³ Mbae turã jẽsaã mose, jẽsaã mingue chõ. ⁴ Mbae turã jẽsaã nyecuayã ño. Jẽingo mose mbae turã naa naa nyecuayã, Dios ae ra mae jẽturã ndese. Ae quia ra mbae turã mee nyecua jẽje cote.

Eĩ jenyee chõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jẽingochĩ. Ũquĩ ndiqui nyoĩ choi mbiásaa ñee sacua Dios je ũquĩ. “Sã mbia mae ja serese secheẽ mose Dios je”, i equia ũquĩ. Mbia riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jẽ. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios ureandu”, i rei nguia. ⁸ Ũquĩ na nda jẽingochĩ. Ae mbae ãte riqui jẽje nae, ũquĩ Dios icuate quia co. Jeñee nonde ee. “Mbae embu ure je”, jẽ i nonde ee. ⁹ Eĩ jenyee chõ nguia ñee Dios je:

Paba Ibatenda, sã mbia ñee turã mbei quia nderĩ.

¹⁰ Mbia rere cuarã ja sacua echu jei íbii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ũquĩ embu rã urechĩurã.

¹² Ae uresaã icuã icuã ndeje nae, ũquĩ embutiã ná uresi. Sã ureico tesarei mbia icuã icuã mose ure je no.

¹³ “Mbae icuã jẽsaã” jichĩ nda emo ure je jẽ!

Urereaquiato bei quia mbae icuã si.

Nde mĩ ño mbia rerecuarã nde.

Nde mĩ ño ndequirãcuã nde.

Nde mĩ je mbia ñee turã sacua mbei. Amén.

Eĩ jenyee chõ ñee Dios je. ¹⁴ Mbia icuã icuã mose jẽje, jẽtesarei chõ esi. Eĩ jenyee mose ra Dios Ibatenda abe jeicuã mbutiã jẽsi. ¹⁵ Jẽtesarei eã mose mbia icuã si, Dios abe ra jẽicuã mbutiã eã jẽsi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jẽhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jẽ. Eĩ ño uturã naa naasa nguia. Mbia nda mae ja rei nguia erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranuã nderiãcuã ndese. Sã Dios ae jirandu nderiãcuã ndese. Dios quia mbae icua jate nguia. Ae quia ra mbae mee ndeje cote.

Jembaerã ibatenda rese quia jẽingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jẽ. Chicuaquiareĩ nda eu arõte. Emo embuquiachã arõte jẽsi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã

mbei. Ibate quia ra emo embuquiachã eã jësi. ²¹ Jembaerã chi mose ibate, Dios rese ra jëingo ndua turã. Jembaerã chi mose íbii, ibi jenda mi ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã. ²³ Nanderesa icuã mose, nanderete abe ra oso icuã icuã no. Tat a rendi rã jëingo bei. Ûquĩ mose ra jëingo jiri jiriã itondáruu.

Mbae isiquia Dios quiato eã

²⁴ Erimba mi mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ùquĩ siqui aroneate Dios rui. Ae siqui beite quia Dios rese nae, ùquĩ nguiarei ndua eã jiri mbae isiquia rese.

Dios uquiato teaquiato bei

²⁵ “¿Mbae ra nandeu re?” jenyechĩ nda quicoi coi jë. “¿Ma tiru ra nandemingue re?” jenyechĩ nda quicoi coi no jë. Mbua chiu ae ra mbua mingo eã. Mbua irao abe ra mbua mingo eã no. ²⁶ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jë nguiarei Dios queteamba tuchi nguireĩ si. Dios ae jembuquiaru nguiã jë no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbua mbutiarõ nguiã. ²⁸ “¿Ma tiru ra nandemingue re?” jenyechĩ nda pare pare i jë. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. ²⁹ Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jembuiraõ eã jë nde no? ¿Mbaerã jëingo Dios icuayãte re? ³¹ “¿Mbae ra nandeu re?” jenyechĩ nda pare pare i jë. “¿Mbae ra nandembei re?” jenyechĩ nda pare pare i jë. “¿Ma tiru ra nandemingue re?” jenyechĩ nda eno jë. ³² Eĩ ño Dios quiatoã nguiã. Jë nguia jendu Ibatenda tesareiã mbeite nguiã jësi. ³³ Jë nguia jëingo tuchi Dios rese jendecuarã. Sã Dios turãte no. Ûquĩ na ño jëingo. Ûquĩ mose ra Dios mbae mee mee mbei jëje. Jenyiturã. Jëñimbeirã abe no. Jëiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jë. Isamaminda rese ra jendua nduachĩ namo jë. Namonda mi ndese jendua namo no. Isamami nguiatu jendua isamaminda rese.

“Eicuãte que co ra”, jenyechĩ nda emo ni

⁷ “Co que eicuãte ra”, jenyechĩ nda emo ni. “¿Jëicuãte” iã nda Dios jëje chã. ² Mbua icuã mose, jeñeechĩ nda ee. Jëturã mose ee, Dios abe ra eturã jëje. Mbae jeme mee turã mbua je. Dios abe quia ra mbae mee tuchi jëje cote. Jë embisẽ mee mose emo je, Dios abe ra embisẽ mee jëje no. ³ ¿Mbaerã jëingo “eicuã” i emo je re? Jë jëicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jë mbae cuasu rerequia mose jendésaa jë nguiatu. ⁴ “Mbae turã ndese chõ jëingo”, jenyechĩ nda jë jëicuã mose jë. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jë. Jë nguia jëturã jësaã saã ñote nguiã aque. Jë nane nguia jëturã ndiqui. Aquere quia jeñee emo mingo turã cote. ⁶ Sã mbua mo ndiqui perro rã si no. Teasu socoi quia rã abe no. Ûquĩ nguiarei mbua icuã mbei Dios cheẽ andure. Dios cheẽ isi teã teã. Dios cheẽ jësenei eã ùquĩ je cote. Emo je quia jësenei cote.

Jeñee mose Dios je, mbae ra emondo jëje

⁷ Jeñee mbei mose Dios je, mbae ra emondo jëje. Jë mbae mo ndequia mose, jëtea rae. Jë eiquesa mbuu mbuu mose, ùquĩ mose ra embuquiata jëje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirĩ “mbichae embu seje” i mose, ¿sita ra eru mee ee re? ¹⁰ Jendiirĩ “sira embu seje” i mose, ¿mbei ra eru mondo ee re? ¹¹ Mbua icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jëje, jeñee mose ee. ¹² Sã jëyate riqui mbua siqui turã mose jëje no. Eĩ jenyee si chõ nguia siqui turã mbua je no. Moisés chimbesa tuchi chõ ùquĩ nde. Dios quiato cose ndare chimbesa ja chõ ùquĩ nde.

Eiquesa chumumbi

¹³ Eiquesa chumumbi rĩ ño jëso ique jë. Aque ñeenda oso quia tata cuasu nae, eicoi chõ aque re. Ae eiquesa ngasẽ nguia tat a cuasu nae, eicoi chõ aque no nde. Hue rĩ mbua tubiriã ndiqui nguiã ùquĩ. ¹⁴ Ñeenda nongue rui quiatu ngasẽ nguiã Dios je. Aque ñeenda quiarei echumumbi. Echumumbi chõ aque ñeenda iquesa re. Mbua mi mi ño siqui nguiã aque ñeenda rui. Ûquĩ nguia ra Dios mingo bei.

Sã ira ae ia ae ae no

¹⁵ Ae Dios cheẽ senei ñooño nguia nae, aba mbuĩrĩ irĩsa chõ ùquĩ nde. Ûquĩ ndei Dios quiato raã ñooño. Mbua mbuĩrĩ irĩsa Dios rĩrĩ. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. ¹⁷ Eĩ si chõ mbua no

nde. Mbia turã nda siqui mbae turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a icuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheẽ nenei neneisa chõ jëicua rã. Dios cheẽ ndui si eriqui turã mose, Dios quiato chõ ùquĩ nde. Dios cheẽ ndui eã mose, Dios quiato eã ño ùquĩ no nde.

Mbia ra ique ja eã

²¹ “Sererecua” i rei mbia tubiriã nguiã seje ã. Ùquĩ nguia nda ique ja eã nguiã serécuaa. Ae siqui Seru Ibatenda cheẽ ndui nae, ùquĩ mii ño nda ique serécuaa. ²² Aque mose ra mbia ñee tuchi seje. “Jesús, ndecheẽ ngue urembuchecua checua tuchi quia mbia je resẽ. Aba checuayã ngue urejea jea tuchi quia mbia si nderĩ ndesẽ. Mbia mae sayã ngue uresaã saã tuchi quia nderĩ ndesẽ”, i tuch i rei ra mbia seje. ²³ Ùquĩ je ra acheẽ. “Co aico jëicuayã mbeite co resẽ. Jëso serecha. Mbae icuã aosa chõ jë nde”, ae ra ee.

Tuchua nyeremo

²⁴ Ae siqui serese, ae secheẽ mumbayã nguia nae, ùquĩ nguiarei eturã tuchi. Tuchua ãtã aosa rã ño ùquĩ nde. Sã eaquiato mo tuchua ao sita turã arõ no. ²⁵ Ama nyaaquí mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchucha a ao nguiã. Eẽ si chõ secheẽ mumbasa rã a nde. Tuchu a ãtã aosa rã si. ²⁶ Ae secheẽ mumba quia eandu mose nae, eaquiata ña ño ùquĩ nde. Sã eaquiata ña mo uchucharã ao no. Aque quiarei ibi ribicoi tuchiã. Sita quiishĩ arõchi chõ uchuchua ao nguiã. ²⁷ Ama nyaaquí mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eẽ si chõ secheẽ mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruirã tuchi echeẽ andu ra. ²⁹ Ererecua rã ño ngue eriqui nguiã mbia mbaaquiato quiatu.

Jesús mbia leproso mbucherõ

8 Jesús que nguichi ibi ibate si cote ra. Mbia cuabête que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi ngũiã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra. ³ Jesús que oco erese cote ra. —Echerõ cote, i que ee ra. Echeẽ mosebe que nyerõ nda. ⁴ Jesús que ñee ee ra. —jErecheẽchĩ nda mbia mo je jë! Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eẽ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵ Jesús que oso sucha tubiriã Capernaum cote ra. Soldado rerecua mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷ —Taso embucherõ, i que Jesús echeẽ mose ra. ⁸ Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹ Se abe sererecua riqui co. Echeẽ amumba aroneate quia co. Se abe soldados rerecua aico nguiã co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jëje. Capitán ndiqui seicua tuchite co. Seicua tuchite equia judíos mo si co. ¹¹ Tacheẽ nyecua jëje. Ae judíos eã emo jenda ja nae, ùquĩ tubiriã nda siqui Dios rese. Dios siqui mose mbi a rerecuarã. Ùquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ùquĩ. ¹² Dios quia ra judíos mombo itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos rĩ nda. ¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguiã nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ùquĩ ndurucuaẽ tuchi Jesús je. Aba checuayã ngue usẽ nguia mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷ Ùquĩ mose que Isaías cheẽ io cote ra. Eẽ ño ngue Isaías embesa cose ra: “Dios rucucha que nandeicuã sirõ nandesí ra. Dios rucucha que nanderasi sirõ nandesí no nda”, i que Isaías embesa ra. Ùquĩ ngue io cote ra.

Jesús rui taico, i raque emo

¹⁸ Mbia cuabête que Jesús mamate ra. Nyebe Jesús ñee nguiã uchimbaaquiato je. —Nyao rã sobei, i rei que ee ra. ¹⁹ Aque mosete que embesasa mo ñee ee

ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra.

²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ²¹ Echimbaaquiato mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. ²² Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiato rese. ²⁴ Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵ Nyebe echimbaaquiato Jesús mumba nguia. —Urembaaquiatusa, echumumba. Ureraaro nã. Nandemanochĩ nda re, i que ñee Jesús je ra. ²⁶ Jesús que ñee uchimbaaquiato u je ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. ²⁷ Echimbaaquiato que nyuruira tuchi mae Jesús quirãcuã ndese ra. —Quiririã echeẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea

²⁸ Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguia ãquĩ ñiangui re ra. Aba checuayã ño ãquĩ mbicuã tuchi nguia. Nyebe mbia mo hue rurubiã mbei nguia. ²⁹ ãquĩ ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi jei sacua ño erechu aa re? i que ñee tuchi Jesús je ra. ³⁰ Chiasu socoi tubiriã ngue chi quiaru huee rurubi ra. ³¹ Nyebe aba checuayã icuã ñee jate nguia Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra.

³² —Eno, i que Jesús ee ra. Nyebe aba checuayã usẽ ja nguia amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³³ Chiasu raarõsa mundite que ra. Mae mose erese. Nyoĩ que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. ³⁴ Nyebe hue jenda nyoĩ ja nguia ñee Jesús je. —Eso rã urerecha urerecua si, i jate que hue such a jenda ñee Jesús je ra.

Jesús emi sayã mo mbucherõ

⁹ Jesús que ua canoa ye cote ra. Nyoĩ que sobei ra. Ngasẽ ngue uchuchúaa cote ra. ² Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ãquĩ, i que Jesús ñee uchiangui re ra. Nyebe ñee nguia emi sayã je. —Echimbã chõ, Echo. Ndechisaã mbae icuã ambutiã nguia ndesi a, i que Jesús ñee umi sayã je ra. ³ Embe-sasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. ⁴ Jesús que ãquĩ ndua ndua icuate quia ra. Nyebe ñee nguia ee cote. —¿Mbaerã jëingo ndua ndua icuã nde? ⁵ ¿Ma mbaranguiatuã eã jiri jëje re? ¿Mbia icuã mbutiã esi ere? ¿Mbia rasi mbucherõ ere no? ¿Ma mbaranguiatuã eã jiri jëje re? ⁶ Dios rucucha rei se. Mbia chiao icuã mbutiã aquiato chõ se re. Sequirãcuã tateacuquia jëje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ⁷ Emi sayã ngue juã asi oso ra. ⁸ Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñi cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasẽ ee cote ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Mateo juã oso nguia erui. ¹⁰ Emo mose que Jesús nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiato abe rese. Mbia icuã mo abe que chi quiaru erese no nda. ¹¹ Fariseos que ñee icuãte Jesús chimbaaquiato je ra. —¿Mbaerã Jesús riqui quiaru mbia icuãte rese re? i que ñee nda. ¹² Nyebe Jesús ñee nguia ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ¹³ ¿Ã embesa ji jëicuayãte re? “Mbae mo jemee seje”, ae eã nguia jëje co. “Jëya eã ño mbia rese”, ae chõ nguia jëje co, i que embesa ji ra. ãquĩ embesa ji jëicua jiri ae. “Jenyu seje”, aeã ngue u nguia mbia turã je. Mbia icuã je chõ ngue achu nguia “jenyu seje” i, i que Jesús ñee ee ra.

Jesús chimbaaquiato hui ãte uchiu si

¹⁴ Juan ñimbaaquiato que ngasẽ ñee Jesús je ra. —Ure quia ureico nguia hui hui urechiu si ã. Fariseos chimbaaquiato abe hui hui quia uchiu si no. ¿Mbaerã ndechimbaaquiato riqui hui ãte uchiu si ã nde? i que ñee Jesús je ra. ¹⁵ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. Sã eru riqui mano emo mose no. Aque mose quiato ra equiato hui uchiu si cote. ¹⁶ Sã emo ndiqui

tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. Mbaeri yasu quia nda equerecoquiato nguiã mbae ire yasu ye. Soroã sacua, i que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸ Jesús cheẽ mose que judío rerecua mo ngasẽ ee ra. Jesús jii que ngoi ñee ee ra. —Qui seriiĩ si mano namote qui. Nyao rã erea. Ndeoco mose erese, quera si rae, i que ñee Jesús je ra. ¹⁹ Jesús que juã oso erese ra. Echimbbaaquiuiatu abe nyoĩ erese. ²⁰ Ari rasi mo abe que oso quia mbia ite rĩ nda. Eruqui nda uchẽ mbei quia ee ra. Doce años nyee. Eruqui nda tibayã mbei ee ra. Ari que tu Jesús quite qiti eriichã nda. Jesús irao ai rese que oco cote ra. ²¹ —Seoco mose Jesús irao rese ra acherõ, i nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasẽ nyee judío rerecua chuchua ra. Mbua que nyeseo seo quia ãquẽ ndaaque rese ra. Mbua que irasei rasei eraaque tiquia nonde ra. ²⁴ Jesús que ñee ee ra. —¡Qui jẽ! Jẽso ja itaicuee. Eriirĩ mano eã ño nguiã. Uque chõ ñene, i que ñee mbia je ra. Mbua que iquia iquia echeẽ mose ra. ²⁵ Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶ Mbua hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbua resayã nyeremo ngue nyoĩ eruĩ ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jẽ! i que ñee Jesús je ra. ²⁸ Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequirãcuã jembucherõ arõte reĩ nguiã jẽje re? i que Jesús ñee ee ra. —Ae, i que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, i que ra. ³⁰ Eresa que nyerõ ja ee cote ra. —Sã mbua jiranua serese, i tuchi rei que Jesús ñee ee ra. ³¹ Eresayã ngue Jesús cheẽ mumba tuchi ra. Nyoĩ que mbua mbiirandu tuchi Jesús rese hue rĩ ja ra.

Jesús echeẽ nguiã mbucherõ

³² Jesús so mose que mbua echeẽ nguiã mo curucuaẽ ee ra. Aba checuayã icuã ngue siqui aque chianguĩ re ra. ³³ Jesús que aba checuayã icuã jea esi ra. Echeẽ nguiã ngue ñee turã cote ra. Nyebe mbua tubiriãte chi

nguiã nyuruira mae erese. —Emo ngue ãquẽ saã eã mbeite quia aa Israel ra, i que nyuruira jate ra.

³⁴ Fariseos quiatu que ñee icuãte Jesús rĩ nda. —Satanás quirãcuã je chõ Jesús riqui nguiã aba checuayã jea jea mbua si co, i rei que fariseos ñee nda.

Jesús ia eã tuchi mbua tubiriã ndese

³⁵ Jesús que nyoĩ sucha mbuchesea sea ja ra. Mbua mbaaquiato quiatu ja ra. Mbua chumunua nuásaa jate. Dios cheẽ ngue esenei senei tuchi quia ee ra. Mbua rasi chumumbara que embucherõ cherõ nguia ra. ³⁶ Mbua rasi rasi tuchi que ee ra. Mbua ia eã tuchi que ee ra. Mbua quiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbua nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchimbbaaquiato je ra. —Secheẽ andusa reã ndei etubiriã jiri. Secheẽ nenei neneisa quia rei co mii jiri. ³⁸ Jeñee nguia Dios je. “Dios, ndecheẽ nenei neneisa mo emondo tuchi. Mbua mbiirandu randu sacua”, jenyẽ chõ nguia Dios je. Sã mbaecha mbua mo mondo mbae a ireĩ ishao shao equiche mose no, i que Jesús ñee ee ra.

Jesús mbua doce irabo uchimbbaaquiaturã

10 Jesús que “jenyu” i uchimbbaaquiato doce je ra. Uquirãcuã ngue emee uchimbbaaquiato je cote ra. Aba checuayã icuã jea jea sacua mbua si. Mbua rasi chumumbara mbucherõ cherõ sacua abe no. ² ã ño echimbbaaquiato ã nde:

Simón (Pedro, i abe que mbua quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbua icuã je ra.)

Õquẽ ja que Jesús irabo ra.

Jesús uchimbbaaquiato doce mondo ucheẽ nenei nenei sacua

⁵ Jesús que ãquẽ mondo ja ucheẽ nenei nenei sacua nda. Emondo nonde que ñee ee ra. —Judíos achõ jembaaquiato quiato quia. Jẽsochĩ nda judíos eã je. Samaria jenda chuchua abe ra jẽsochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jẽso mose, secheẽ jẽsenei senei mbei quia ee. “Mbua rerecuarã tuchi ra Dios cote”, jenyẽ oso

secheẽ nenei nenei judíos je. ⁸ Mbia ire rasi jem-bucherõ cherõ nguia. Mbia rasi chumumbara jem-bucherõ cherõ nguia. Mbia raaque abe jembuquera quera quia. Aba checuayã icuã abe jêjea jea quia mbia si. Sequirãcuã ngue amee ñooño jêje. “Mbae mo jemee na seje eribishorõ”, ae eã tuchi se quia jêje co. Nyebe jê abe mbae turã jêsaã ñooño mbia je. “Mbae embu se”, iã mbia je. ⁹ Mbae mo nda jendaochĩ icua jêso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no. Jêirao nongue abe ra jendaochĩ no. Jêiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jêsaã saã nae, sã ùquĩ ae riqui jembuquiaru quiaru turã mingo. ¹¹ Jengasẽ mose sucha tubiriã mo, mbia turã mo jêtea huee. Aque chuchua mi ño jêingo uque. Tuchua ra jembuchesea seate chĩ jêingo mose huee. Ae ra jengue nyii nae, hue tuchia bei chõ jêingo uque. ¹² Jêique mose emo nyuchúaa, hue jenda je jeñee turã no. Saludar jenye turã ee no. ¹³ Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jêisibe esi. ¹⁴ Hue jenda jêisi sereã nea mose, jêhui chõ esi. Hue jenda jeñee andu sereã mose, jêso chõ hue si. Jêi tubi jembutomoto tomo ee. ¹⁵ Tacheẽ nyecua jêje. Ae ra jeñee isi sereã nae, ùquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ùquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jêje, i Jesús

¹⁶ A aico jemondo secheẽ nenei nenei sacua mbia je a. Sã nyacua icuãte riqui oveja je no. Eĩ si ra mbia icuã icuãte jêje. Oveja seteã na ño jêingo. jêaracua chõ nguia jê! Sã mbei aracuate riqui no. Mbae icuã mo nda jêsaãchĩ jê. Sã nyurushi riqui mbae icuã naa eã mbeite no. ¹⁷ jê! Sã jê! Mbia icuã icuãte ra jêje. Jembiĩrĩ irĩ ndae. Jemee mee icuã nda mbia rerecua je. Jêiruã nua nda mbia chumunuásaa. ¹⁸ Mbia icuã icuãte ra jêje serĩ. Mbia rerecua je ra jenderao icuã. Eĩ jenye mbia rerecua mbiirandu randu serĩ. Judíos eã abe mbiirandu randu serĩ. ¹⁹ Jemee mose mbia rerecua je, pare pare jenyechĩ nda jê. “¿Manyae ra ùquĩ ñee ndibishorõ nde?” jenyechĩ nda pare pare i jê. Dios ae chõ nda jembucheẽ turã nuiã nguia mbia je aque mose. ²⁰ Jê ae ra jeñee eã. Espíritu Turã ae nda jembucheẽ nguia mbia je. ²¹ Jenongue ra jemondo chee mbia icuã je. Jêiquia sacua. Jendu abe ra jemondo chee mbia icuã je. Jendi-irĩ abe ra jemondo chee mbia icuã je. Mbia icuã nda jemo iquia iquia chee. ²² Mbia ra jêucua yã jate serĩ. Ae ra siqui bei serese, ùquĩ nda Dios mingo bei. ²³ Mbia icuã icuã mose jêje sucha moo, jêso chõ sucha tubiriã nónguee. Tacheẽ nyecua jêje. Achu jeibe ra se. Sucha

Israel jenda jembuchesea sea ja eã mose chõ nda achu jei.

²⁴ Jengasu ra jêsaã saãchĩ sesi jê. Se chõ jembaaquia-tusa re. Embaaquiatusa quia ecuasú jiri echim-baaquiatu si re. Ererecua quia ecuasú jiri erimba si re. ²⁵ Coche jêingo nguia se rá si. Sã mbia icuã icuãte riqui seje no. Eĩ si ra eicuã icuã jêje no. Sã mbia “Satanás” i ñee icuã seje no. Eĩ si ra ñee icuã icuã jêje no. Serimba je no.

Dios riqui jendeaquiatu bei co

²⁶ Jêsiquiche quichechĩ nda ñee icuã icuã je si jê. Ae mbia saã nyecuayã cuayã nguia nae, ùquĩ nda nyecua ja cote. ùquĩ nda mbia icua ja cote. ²⁷ Ae rĩ aico ñee nyecuayã cuayã jêje nae, ùquĩ jêseni senei turã mbuchecua mbia je cote. Ae asenei senei nguia jêisaa nae, ùquĩ jêseni senei turã mbuchecua mbia je cote. ²⁸ Ae “taiquia” i quia jenĩ nae, jũquĩ si ra jêsiquichechĩ jê! Ae aba mombo serĩte quia tata cuasu nae, aque si quiatu jêsiquiche. Aque si quiatu jêsiquiche tuchi jê. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareia nguireĩ mo si. Nguireĩ mo ngoi mose íbii, Dios riqui eicua jate ã. ³⁰ Dios riqui jê miĩ miĩ icua jate co. Jêa miĩ miĩ abe eicua jate quia co. ³¹ Jêsiquichechĩ nda jê. Dios quiatu queteã tuchi nguia jendese nguireĩ mo si.

Jesús quiato chõ se re, jenye checua chõ nguia mbia je

³² “Jesucristo quiato chõ se re”, ae i quia mbia je nae, ùquĩ niĩ nda acheẽ turã se abe. “Sequiato chõ ã nde”, ae ra Paba Ibatenda je. ³³ “Jesucristo quiato chõ se re”, ae i ãte quia mbia je nae, ùquĩ niĩ nda acheẽ turã eã se abe. “Sequiato eã ño ùquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jêje re? Tei. Achu chõ ngue mbia mbuchao chao nyesi resẽ. Mbia icuã icuã nda uchue serĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je serĩ. Cuña mo nda eicuãte usi je no. Acuanĩ mo nda eicuãte uchari je serĩ no. ³⁶ Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ùquĩ nda serimbarã eã. Ae nyesequa tuchi quia usi rese sesi nae, ùquĩ nda serimbarã eã no. Ae nyesequa tuchi quia nguiĩrĩ ndese sesi nae, ùquĩ abe ra serimbarã eã no. ³⁸ Ae ra siquiã serui, ùquĩ nda serimbarã eã. Ñe mano sereãte serĩ, ùquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ùquĩ nda nyoi eãte ibate. Ae ndua eãte quia nyiese nae, ùquĩ nguia ra nyoi ibate.

Dios ra mbae turã mondo mbia turã je

⁴⁰ Ae ra eturã ndiqui jêje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguiã. ⁴¹ Ae eturã ndiqui Dios cheë mbuchecuasa je nae, Dios ra mbae turã mondo ee. Sã mbae turã mee ucheë mbuchecuasa je no. Ae eturã ndiqui echiã mbuquishĩ ji je nae, ũquĩ je abe ra Dios mbae turã mondo no. ⁴² Tacheë nyecua jêje. Emo sechimbaaquiату isei mbiu turã mose seriĩ, mbae turã abe ra Dios mondo aque je no, i que Jesús ñee uchimbaaquiату je ra.

Juan el Bautista mbia mondo ñee Jesús je

11 Jesús que hui ñee uchimbaaquiату doce je cote ra. Aquere que esi Dios cheë nenei nenei hue rubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbaaquiату nyeremo ngue emondo Jesús rea ra. Ñee sacua ee. ³ —Jêso ñee Jesús je. “Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyé oso Jesús je, i que Juan uchimbaaquiату mondo erea ra. ⁴ Jesús que ñee Juan nimba je ra. —Ae rese jemae nae, ũquĩ jêsenéi oso Juan je. Ae jeñandu nae, ũquĩ abe no. ⁵ Eĩ jenyé chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheë turã ngue esenei senei tuchi quia mbaecha reã je ra”, jenyé oso Juan mbiirandu. ⁶ Emo hui eã mbei mose sesi, aque ia tuchi ra siqui cote, i que Jesús ucheë mondo Juan je ra.

⁷ Juan ñimondo que nyebi nyoĩ Juan ndea cote ra. Jesús que ñee mbia ja je Juan ñii cote ra. —¿Mbae rese mae jêso turúquiaa re? ¿Quiriã idioi ichu ichu rese chõ jêso mae nde? Quiriã ndese mae eã ngue jêso resê. ⁸ ¿Emo irao turã ndese jêso mae nde? ũquĩ ndese eã ngue jêso mae ndesê. Eirao turã siquiã nguiã turuquia ñi. Ae siqui quia mbia rerecua chuchua nae, ũquĩ nguia eirao turã ndiqui nguiã. ⁹ Juan ndese mae ño ngue jêso turúquiaa resê. Dios cheë nenei neneisa tuchi chõ ae mbia mo si re. Ae chõ mbia mingoquiату quiату nguiã se ñee sacua mbia je. ¹⁰ Sã embesa ji riqui ñee no:

Secheë nderaosa tamondo ndenonde.

Ae ra mbia mingoquiату ndeje, nde ñee sacua ee, i que embesa ji ñee nda. Juan ñii ño embesa ji riqui nguiã ñee. Nyebe Juan ndu nguiã senonde. ¹¹ Tacheë nyecua jêje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ũquĩ nguia ra i tuchi Juan si cote. ¹² Juan Dios cheë nenei nenei namo mosenda bei chõ mbia riqui nguiã ngaë ngaë Dios cheë andu ã. Mbia bite Dios siqui

mose mbia rerecuarã. ¹³ Juan tu nonde chõ embesa ji riqui nguiã ñee j a seriĩ. “Dios rucucha ra tu emo mose”, i seriĩ. Sechu eã mose. Juan nane ngue “co eru quia co” i ñee nda. ¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñii ño eriqui nguiã ñee. ¹⁵ Jêisa mose, i secheë jeñandu turã na!

¹⁶ Mbia namonda siqui turã eãte quia aba cheë ndui ã. Mbia riirĩ na ño eriqui nguiã ã. Sã mbia riirĩ ndiqui ñumbusarei sarei no. ¹⁷ Sã eriqui ñee ñee nyue no. “Flauta que ambucheë ñee ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue ambucheë ñee ndei jêje resê. ¿Mbaerã jêyate erese re?” sã i chõ mbia riirĩ nyue no. ũquĩ na si chõ mbia riqui nguiã aba cheë mumba ã. ¹⁸ Juan el Bautista que tu rei mbia je ra. Mbia que eisi turã ã a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbia quia ee ã. “Aba checuayã ndesenda”, i chõchĩ equia ee ã. ¹⁹ Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”, i chõchĩ seje. “Mbae mbeisa”, i abe que seje no nda. “Mbia icuã quia-to chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbia sucha tubiriã jenda rese

²⁰ Ae mbia je Jesús uquirãcuã ndeacuquia cuquia tuchi nae, ũquĩ ngue Jesús isi eã mbei ra. Nyebe Jesús riqui nguiã ñee asi asi mbia hue jenda je. ²¹ —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jêje nae, ũquĩ naa mose Sidón jenda je, eĩ nda Sidón jenda huicua secha rei. Eĩ nda Tiro jenda abe huicua secha rei. Eĩ nda eya eãte rei huicua ndese. ²² Jê nguia jêicuã jêsecha sereãte rei. Nyebe ra Dios jembasi mbasi tuchi ũquĩ si quiatu. Dios mbia icuã mbasi mbasi mose. ²³ Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ũquĩ naa mose Sodoma jenda je, eĩ nda Sodoma jenda huicua secha rei. Eĩ nda Dios hue sucha cuasu mbutiã eã ndei. ²⁴ Jê nguia jêicuã jêsecha sereãte rei. Nyebe ra Dios jembasi mbasi tuchi Sodoma jenda si. Dios mbia icuã mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheë ngue erembuchecu a eã mbia aquiату je ra. Mbia riirĩ naanguia je chõ ngue ndecheë erembuchecu nguiã.

²⁶ Ūquĩ ño ngue eturã ndeje ra, Paba, i que Jesús ra.
²⁷ —Seru que mbae mondo ja seje ra. Paba miĩ ño seicua tuchi nguiã. Paba riirĩ miĩ tuchi chõ se re. Se miĩ ño Paba aicua tuchi nguiã no. Ae je ra Paba ateacuquia nae, ūquĩ miĩ ño nda Paba icua tuchi nguiã serese.
²⁸ Jenguenea mose, jenyu chõ seje. Jenguenea tamboseĩ na jësi. Taambia mingo. ²⁹ Seseteã ño aico nguiã se. Aico mingue chõ nguiã se co. Jeñimbaaquiatu jiri serĩ. Jeñimbucha chõ serese. Eĩ jenyu mose ra jeñia pare pare i eã cote. Jëya bei ra jëingo cote. ³⁰ Ae siqui serimbarã nae, ūquĩ iate riqui ã. Secheẽ mbaranguiatuã eãte aba je, i que Jesús ñee nda.

Jesús chĩmbaaquiatu mbae a ishao shao sábadu mose

12 Sábado mose que Jesús si quia mbiaco ite ite rĩ emo mose ra. Echĩmbaaquiatu riãcuãte que eriqui ra. Nyebe que quiata a ucua miĩ miĩ nyoĩ quia ecuã mose ra. Equiti quitire oo je que echoĩ quia eachãaña cote ra. ² Fariseos mo ngue ñee ee ra. —¿Mbaerã ndechĩmbaaquiatu riqui mbae ishao shao sábadu mose re? Co mose chõ mbia riqui uquenea ucua resẽ, i que fariseos ñee Jesús je ra. ³ Jesús que ñee ee ra. —¿Embasa ji rese jemaẽ eã David rĩ riyi re? David riãcuãte que aque mose ra. Eresenda abe riãcuãte que eriqui aque mose no nda. ⁴ David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiatu ngue re. Sacerdote achõ mbaerã ndaque mbichae. ⁵ ¿Moisés chĩmbesa rese jemae ãte sacerdote rĩ nde? Sábado mose que quieĩ quieĩ rei Dios chuchua ra. “Dios cheẽ mumbasa”, i ãte quia mbia nguiã ñee ee. ⁶ Tacheẽ nyecua jëje. Secheẽ nguia i tuchi jiri nguiã Dios chuchua si co. ⁷ Co embasa ji jëicuayãte quia ã. “Sebite jëya eã jëingo mose mbia rese. Sebiãte ofrenda jemee ñooño mose”, i Dios quia co. Jëingo ūquĩ icuayãte ã. Eĩ nda jeñee icuã eãte rei mbia turã je. ⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábadu mose re? ¿ĩ ere? Echeẽ ure je jë, i que mbia ñee Jesús je ra. ¹¹ Jesús que ñee ee ra. —Sã jenimba oveja mo ndiqui jaã no. Ngoĩ oso ibicua mo ye no. ¿Sábado mose ra jenosẽ ibicua si re? Ae. Jenosẽ jei rae. Sábado mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadu mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra.

¹⁴ Nyebe fariseos paama i nguiã Jesús je. Mbia mbucherõ mose sábadu mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaías chĩmbesa ique Jesús rĩ

¹⁵ Jesús que jirandu ūquĩ ñee ndese ra. Nyebe esi nguiã hue si. Mbia tubiriã ngue nyoĩ eruĩ ra. Jesús que mbia rasi mbucherõ cherõ ja quia ra. ¹⁶ —¿Mbia ra jembiiranduchĩ serese jël i que Jesús ñee ee ra. ¹⁷ Aque mose que Isaías chĩmbesa ique cote ra. Eĩ ngue Isaías embesa miĩ Jesús rĩ nda:

¹⁸ Serimba chõ co re. Co que airabo ra. Sechesequa chõ ae re. Seyate aico erese co. Espĩritu Turã tamondo tuchi ee. Ae ra secheẽ turã senei senei ja mbia je. ¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je. ²⁰ Siqui turãte ra equia equirãcuã nea je. Siqui turãte ra equia eaquiatuã je no. Mbia ra siqui turã nyee eruĩ ererecuarã. ²¹ Mbia ja ra ndua turã mbei erese cote, i que Isaías embesa cose ra. Ūquĩ ngue ique cote ra.

Aba checuayã quirãcuã Jesús quereco co, i raque mbia

²² Mbia que eresayã mo curucuaẽ Jesús je ra. Echeẽ aquiatuãte abe que ra. Aba checuayã icuã nguiatu ngue siqui nguiã echiangui re. Jesús que embucherõ nda. Nyebe mae turã nguiã cote. Ñee turã abe cote no. ²³ Mbia que nyuruĩra ja mae erese ra. —David rucucha chõ Jesús riqui re, i chõ ngue mbia quia ndua ndua ra. ²⁴ Fariseos que echandu ja ra. Nyebe ñee icuã icuã nguiã Jesús je. —Ab a checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã jea jea mbia si co, i rei que fariseos ñee icuã Jesús je ra. ²⁵ Jesús que ūquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷ “Satanás quirãcuã je chõ Jesús riqui nguiã aba checuayã jea jea mbia si”, jenyu chõchĩ nguia seje ã. ¿Aba uquirãcuã mee jenimba je jë nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyu eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ūquĩ ndiqui nguiã seje.

Ae secheẽ senei senei eãte quia mbia je nae, ũquĩ icuã ño eriqui nguiã seje. ³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espíritu Turã ñi, ũquĩ icuã nguiatu ra Dios mbutiã eã mbei esi. ³² Emo ñee icuã mose seriĩ, Dios echeẽ icuã mbutiã arõte. Emo ñee icuã mose Espíritu Turã ñi, ũquĩ icuã nguia ra Dios mbutiã eã mbei. Mbae ua ja mose chee ra Dios ũquĩ ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ũquĩ ñi sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ũquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mii ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huiicuã ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu ishõ si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucuã mo etea eãte. ⁴⁴ “Tasobe

rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Etubiriãte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resẽ

⁴⁶ Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra. ⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús ñee nda. ⁴⁹ Jesús que o mee uchimbacuaquiato cuti ra. —¿Je chõ aico nguiã “taĩ” i. ¿Je chõ aico nguiã “senongue” i no. ⁵⁰ Ae Paba Ibatenda cheẽ mumbayã nguia nae, ũquĩ je chõ aico nguiã “senongue” i. ũquĩ je chõ aico nguiã “taĩ” i no, i que Jesús ñee ee ra.

Emo mbae eĩ mombiquia mbiquia

13 Aque mose sí que Jesús si usẽ tuchia si ra. Tuchua si que esi ngoi ama ndish a nimíaa nda. ² Mbia que ngaẽ ngaẽ ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichõ ama nimíaa ndese ra. ³ Jesús que embacuaquiato quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda ruĩ no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi u eriquisã nda. ⁸ Sã emo ndiqui uqui uqui ibi túraã no. ũquĩ nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jẽisa mose, ¡secheẽ jeñandu turã na!

Dios riqui ucheẽ mbiasa jaaja jẽje co, i uchimbacuaquiato je

¹⁰ Jesús chimbacuaquiato que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbacuaquiato ñee ee ra. ¹¹ Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheẽ mbiasa asa ja jẽje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. ¹² Emo umbae rerequia mose, Dios ra emo mondoe ee. Emo embae eã mose, Dios

ra embae sirõ ja esi. ¹³ Nyebe aico nguiã ejemplos achõ nenei nenei mbia je co. Eanduchõ sacua. Eicua turã ndocoĩ. ¹⁴ Mbia eanduchõ mose que Isaías chimbese ique cote ra:

Mbia ra secheẽ ñandu raque.

Ícuayã nguiatu rae.

¹⁵ Eãquĩ átãte riqui ã.

Secheẽ andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei,

í que Dios cheẽ Isaías chimbese rese ra. ¹⁶ Jẽ nguiatu Dios cheẽ jeñandu turãte nguiã ã. Jẽ nguiatu jemae serete nguiã Dios chiao rese ã. Nyebe jẽyate jẽingo nguiã ã. ¹⁷ Tacheẽ nyecua jẽje. Ae jeñandu quia secheẽ ã nae, Dios cheẽ mbuchecua ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jẽ ae chõ jẽingo nguiã eandu ã cote. Jẽ ae je chõ echecua riqui nguiã.

Jesús ucheẽ mbiase uchimbacuaquiatu je mbae eĩ ñi

¹⁸ Secheẽ tambiasa jẽje cote. Mbae eĩ mombiquia mbiquia ji rĩ. ¹⁹ Ae uqui uqui ñeenda rui nae, Dios cheẽ andu choñosa rã ño ñquĩ nde. Ícua eãte quia ñene. Nyebe diablo ru nguiã Dios cheẽ ndirõ echian-gui si. ²⁰ Ae uqui uqui sita arõ nae, mbia mo na ño ñquĩ no nde. Dios cheẽ andu mose, isi turã ndaque. Eyate raque erese. ²¹ Mbia icuã icuã mose ee Dios cheẽ ñi, hui jei chõ nguiã esi. Mbae rao eã naanguia chõ ñquĩ nde. ²² Ae uqui uqui nyu réndaa nae, mbia mo na ño ñquĩ no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, í bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ía eã mbeite ee. ²³ Ae uqui uqui ibi túraã nae, mbia mo na ño ñquĩ no nde. Ñquĩ nguiatu Dios cheẽ ñandu turã nguiã. Ícua ícua turã ño nguiã. Nyebe eriqui bei nguiã erese. Ía ía bei raanguia cote. Emo emo ía cien. Emo ía sesenta no. Emo ía treinta no, í que Jesús ucheẽ mbiase ñee nda.

Mbae icuã suri trigo turã ndese

²⁴ Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ñquĩ na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ erombiquia mbiquia reĩ nguiã seje. ¿Mbaerã nyu abe riqui suri suri erese re?” í que ererecua je ra. ²⁸ Ererecua que ñee ee ra. “Seucuãyãsa chõ ñquĩ nde. Nyu eĩ mombiquia mbiquia chõchĩ trigo eĩ mumbara mbara”, í que ererecua ñee nda. —¿Ureso

ra eriqui riqui re? í rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, í que echa ñee nda, í que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ñquĩ mĩ ndaque nyii. Ñimbeta tuchi cote. Mbae eĩ na, í que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, í que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbacuaquiatu quiatu ejemplos je ra. Ejemplos achõ ngue esenei senei mbia mbacuaquiatu sacua nda. ³⁵ Nyebe Dios cheẽ mbuchecua chimbese ique cote. Eĩ ño echimbese re: Ejemplos je mbia tambacuaquiatu quiatu. Ae mbia ícuayã mbeite quia nae, ñquĩ tambuchecua mbia je, í que embesa ji ra, í que Jesús ñee nda.

Jesús ejemplo mbuchecua nyu eĩ ñi

³⁶ Jesús que mbia mondo ja cote ra. Aquere que esi ique tucha a mo nda. Echimbacuaquiatu que ecurubite ñee ee ra. —Ae ejemplo eresenei mbia je nyu eĩ ñi nae, ñquĩ embiasa jiri ure je, í que ñee ee ra. ³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re. ³⁸ Ae íbii emombiquia mbiquia nae, mbia ja rã ño ñquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia nae, aba checuayã nderecua rã ño ñquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo táta nae, eĩ si ra Dios uquiatoã mombo táta ibi ua ja mose no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ñquĩ sirõ ja. ⁴² Serimba ra ñquĩ mombo mondo tata cuásuu. Nyeseo seo tuchi ra táta. Huee ra ureĩ quiti quiti

tuchi. ⁴³ Ae Dios mbaturã nae, ùquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiĩrĩ nĩ ndei eturã tuchi mbae ja si. Eturã tuchi tesoro si no. Sã amei mo tesoro ati ji rea fbii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacua. Tesoro mĩ ndese ndua.

Dios cheẽ ndei perla turã na

⁴⁵ Dios cheẽ nguiĩrĩ nĩ ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mĩ ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumubarate que embua ra. ⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacua. ⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacua mbia turã si. ⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹ ¿Secheẽ jẽicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ùquĩ ejemplos senei ja mbia je ra. Hue si que esi cote ra. ⁵⁴ Oso que ngasẽ nguecua Nazaret cote ra. Oso que mbia mbaaquiato judfos chumunuásaa ra. Nyebe mbia nyuruirã tuchi nguiã ñee nyue. —¿Mangue eriqui ñimbaaquiato tuchite re? Nandemae sayã esaã saã tuchichĩ nguia re. ⁵⁵ Ira mbitirõ tirõsa riirĩ ño ndaque. María abe riirĩ ño ndaque no. Jacobo nongue chõ ndaque. José abe no. Simón abe no. Judas abe no. ⁵⁶ ã echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuaa ishonda cheẽ nguia ra mbia isi turã mbei. Nguecua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguecua jenda je ra. ⁵⁸ Hue jenda mbia que

Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

Mbia Juan el Bautista iquia

14 Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ² Juan el Bautista Jesús riqui reĩ ee reaẽ. Ae que ñee ngũimba je Jesús rĩĩ nda. —Sechĩquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rĩĩ nda. ³ Herodes que Juan isi icuã nyii ra. Nyucua que mondo tarõ nda. Paama i nda Juan je ra. —¡Nde nde-nongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵ —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuaa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose. ⁶ Herodes mbae cumpleaños mose, Herodías riirĩ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷ —¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguiã ndeje a, i que Herodes ñee nyucuaaque je ra. ⁸ Esi quia ñee ñee nguia nyucuaaque je nyii reaẽ. Nyebe nyucuaaque ñee nguiã Herodes je. —Juan el Bautista ãquĩ emee na seje mbia chiu riru ye, i que nyucuaaque ñee ererecua Herodes je ra. ⁹ Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ãquĩ emee ee, i que ngũimb a je cote ra. ¹⁰ —Juan ãquĩ jendoso oso cárcel. Jemondo nyucuaaque je, i que ra. ¹¹ —Juan ãquĩ ngue ecurucuaẽ mbia chiu riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹² Juan ñimbaaquiato que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae mĩje

¹³ Jesús jirandu mose Juan ndese que esi turúquiaa ra. Ama ndui que esi canoa ye ra. Mbia que jirandu randu erese ra. Nyebe nyoĩ ja nguiã erui ibi rĩ. Sucha ja ja jenda. ¹⁴ Jesús que usẽ canoa si cote ra. Mbia tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵ Tenda nyesecco mose que echimbaaquiato ñee ndei ee ra. —Mbae ãte a turúquiaa. Tenda abe nyeseccote. Mbia emondo rã sucha tubiriã ñia. Sã echoi bei uchiurã isi, i rei que echimbaaquiato ñee Jesús je ra. ¹⁶ —Sã echoi eã. Jeño

mbae jemondo ee echiurã, i que Jesús ñee ee ra.
 17 —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiato ñee Jesús je ra. 18 —Jembu rã seje, i que Jesús ra. 19 Ñee ngue mbia tubiriã je cote ra. —Jen- goi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiato je ra. Echim- baaquiato que emee mee mbia ja je cote ra. 20 Mbia que embuquiaru ja tuchi cote ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra. 21 Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbia riirĩ abe etubiriã no.

Jesús ngata i arõ

22 Aquere que Jesús uchimbaaquiato mondo ja canoa ye ra. —Jẽ nane jẽso sobei. Mbiamambu turã na mon- do uchuchúaa se nyii, i que ra. 23 Jesús que mbia tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Huee que ae ae riqui itondaru chee ra. 24 Canoa yenda que chi bei quia ama ite rĩ nda. Quiririã ngue tu icua icua ee ra. I rebera que tu asi asi tuchi ee ra. 25 Ngaira cheẽ mose que Jesús ngasẽ ee ra. I arõ ngue esi quia ngata ra. 26 Echimbaaquiato que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra. 27 —Jẽsiquichechĩ nguiã. Se chõ nyeresẽ, i jeite que Jesús ñee ee ra.

28 Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. 29 —Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. 30 Pedro mae mose quiririã icua ndese que esiquichete ra. I que oso quia ñimĩ nda. —iSererecua! ¡Senonosẽ na se! i que ñee Jesús je ra. 31 Ae Jesús o mondo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. 32 Ua mose canoa ye que quiririã tiba cote ra. 33 Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jẽ! i que ee ra.

Jesús mbia Genesaret jenda mbucherõ cherõ

34 Ngasẽ nyee que sobei cote ra. Genesaret, i que hue ibi je ra. 35 Hue jenda que jirandu ja erese ra. Hue rurubinda abe que mbia mbiirandu erese ra. Mbiam que er asi curucuaẽ cuaẽ ja Jesús je cote ra. 36 —Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ùquĩ ngue nyerõ nyerõ ja ra.

Mbia chiangui renda ae chõ embicuã nguiã

15 Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùquĩ ja re. 2 Ùquĩ ngue ñee Jesús je ra. —¿Mbaerã ndechimbaaquiato riqui nanderamei ñee mumba mumba beite re? Ehoi quiiriã mbei chõ quiaru nguiã, i que ñee asite Jesús je ra. 3 Jesús que ñee ee ra. —¿Mbaerã jẽingo Dios cheẽ mumba mumba jẽ nde? Jenamei ñee ndese chõte jẽingochĩ nguiã ã. Siqui rocoĩ Dios cheẽ ndese. 4 Dios que ñee mbia je cose ra. “Jẽ- turã ño jẽingo jendu je. Jẽsi je abe no. Emo ñee icua mose ngu rĩ, ùquĩ jẽiquia. Emo ñee icua mose usi abe rĩ no, ùquĩ abe jẽiquia no”, i quia que Dios ñee mbia mbaaquiato cose ra. 5 Dios cheẽ jenyabi tuchi chõchĩ nguiã mbia mbaaquiato quiato ã. “Ae nda amee neĩ jẽ- je, ùquĩ ngue amee ja Dios je ra”, i mose emo ñee ngu je, “coche ñene” jenyechõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiato icua icua ùquĩ. Jenamei ñee achõ ño jẽsenei senei nguiã mbia je ùquĩ. Dios cheẽ nenei nenei ndocoĩ ee. 7 Jẽturã jẽsaã ñooño ño nguiã ùquĩ. Jenii tuchi chõ ngue Isaías embesa nguiã cose. Eĩ ngue Isaías embesa cose ra:

8 ã mbia ñee turã ndaque quia seje ã.
 Uchiangui re quia eriquiãte nguiã serese ã.

9 Ñee turãte raque equia seje ã.

Amei ñee achõ ño esenei seneichĩ nguiã mbia je.
 Dios cheẽ mi nenei nenei ndocoĩ ee,
 i que Isaías embesa jenii nda, i que Jesús ñee ucuasu raã naasa je ra.

10 —Jenyu rã secheẽ andu, i que Jesús ñee mbia tubiriã je ra. —Secheẽ jẽicua rã jeñiangui re. 11 Mbiam chiu embicuã eã nguiã. Echiangui renda chõ embicuã nguiã. Echiangui renda chõ usẽ nguiã echuru rĩ echeẽ mose. Ùquĩ ño embicuã nguiã, i que Jesús mbiam baaquiato ra. 12 Echimbaaquiato que ngaẽ ñee Jesús ísaa cote ra. —¿Ereicuayãte ere? Ndecheẽ ngue fariseos mbupaama ite ra, i que echimbaaquiato ñee nyecuayã ee ra. 13 Jesús que ñee ee ra. —Ae ira Paba Ibatenda chutã eã nae, ùquĩ nda esiqui ja erao resebe. Ùquĩ ira rã ño fariseos riqui nguiã ã. 14 Eresayã na ño fariseos riqui nguiã. Sã eresayã mo “ñeenda tateacuquia jẽje” i raque emo je no. Quiachã ja chõ ndae, i que Jesús ñee ee ra. 15 Pedro que ñee ee cote ra. —Erecheẽ ngue namo, “ùquĩ nda mbiam bicuã” ere que, ùquĩ embuchecua rã ndecheẽ ure je, i que Pe- dro ee ra. 16 Jesús que ñee ee ra. —¿Jẽ abe jẽicuayãte quia re? 17 Ae mbiam u quia nae, oso chõ nguiã erie ye. Echique rui chõ eriqui nguiã oso oso. Usẽ nyee.

18 Mbiam chiangui renda chõ embicuã nguiã usẽ mose echuru rĩ. 19 Aba chiangui renda quia aba mundua icua icuaẽte nguiã. Nyebe mbiam riqui nguiã emo iquia. Siqui

siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no. ²⁰ Mbia chiangui renda ja chõ ùquĩ nde. Ùquĩ ño mbia mbiicuã icuã nguiã ùquĩ ao ao mose. Uchoi quiiriã mose quiaru, ùquĩ nguia ra mbia mbiicuã eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¡Ndeyayã ño serese jẽ! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra. ²³ Jesús que ñee ãte ee ra. Echimbaaquiātu que ngaẽ ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiātu ñee Jesús je ra. ²⁴ Jesús que ñee ee ra. —Sã ovejas mo quiachã no. Ùquĩ na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵ Ari que tu ngoi ngũĩã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra. ²⁸ —Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sítã ibate cote ra. Huee que ngoi huee ra. ³⁰ Mbia que ngaẽ ngaẽ tuchi quia ee huee ra. Erasi chumumbara rurucuaẽ cuaẽ tuchi ee. Ecuatayã. Eresayã. Echeẽ ngũĩã. Eo icuã. Mbia que ùquĩ ndasi chono ja Jesús i jii ra. Jesús que ùquĩ mbucherõ ja ra. ³¹ Nyebe mbia riqui nguiã nyuruira tuchi mae erese. Echeẽ ngũĩã ñee turã mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbia ñee turã ja nguiã Dios rĩ.

Jesús mbichae tubiriã saã mbichae mii je

³² Jesús que ñee uchimbaaquiātu ísaa cote ra. —Seyayãte aico ã mbia tubiriã ndese co. A echi arete serese tres días a. Embae mo eãte echiurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiātu que ñee ee ra. —Turúquiaa chõ nandeico a resẽ. ¿Mañi nda aba ã mbuquiaru ja re? Mbae eã tuchite a resẽ, i que echimbaaquiātu ñee Jesús je ra. ³⁴ —¿Manya mbichae jem-

bae re? i que Jesús ee ra. —Siete mbichae. Sira ñetẽ mo ndese, i que ee ra. ³⁵ Jesús que mbia mbucoi ja íbii ra. ³⁶ Mbichae que eisi ja o je ra. Sira ñetẽ abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiātu je cote ra. Ùquĩ ngue emee mee mbia ja je cote ra. ³⁷ Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisẽ nyee ra. ³⁸ Mbichaecua rei mbia cuatro mil. Cuña abe abe. Mbia riirĩ abe abe no. ³⁹ Jesús que mbia mondochoi ja cote ra. Jesús que ua canoa ye cote ra. Oso que Magdala quti cote ra.

Mbia mae sayã etecuquia ure je, i fariseos

16 —Tã nande rã Jesús je, i que fariseos ñee nyue ra. Saduceos rese. Nyebe ùquĩ ngaẽ nguiã ñee Jesús je. —Mbia mae sayã esaã na ure je. Í nda “Dios chimbu” ure tuchi ndeje, i rei que ñee Jesús je ra. ² Jesús que ñee ee ra. —Ibei jẽicuate raque ùquĩ. Ibei ireĩ ndese jemae mose eresaitõ, “ama nda nyaaquíã” jenyẽ chõ nguiã eicua. ³ Ibei ireĩ ndese jemae mose eresaitõ ndabe, “nyaaqui rae”, jenyẽ chõ nguiã eicua ùquĩ no. Ibei jẽicuate raque quia ã. Ae Dios teacuquia jẽje nae, ùquĩ jẽicuayã mbei chõchĩ nguia ã. Ae ra tu icuãte mbia je nae, ¿mbaerã jẽingo ùquĩ nguiatu icuayãte re? ¿Mbaerã jẽingo jëaracua raã naa nde? ⁴ Mbia icuã ja chõ ã nde. Ae siqui ibi rĩ namo nae. Hui jate equia Dios si ã. “Mbia mae sayã esaã ure je”, i chõchĩ equia seje ã. Aque mii nda asaã jẽje. Jonás na si ra asaã jẽje, i que Jesús ñee nda. Oso que erecha cote ra.

Fariseos mbia mbaaquiātu icuã, i Jesús

⁵ Jesús chimbaaquiātu que uchiurã curuchoi eã nda. Tesarei que esi nyoĩ mose sobei ra. ⁶ Jesús que ñee ee ra. —Mbichae mbuchimatãsa rã ndei fariseos cheẽ. Saduceos cheẽ abe no. Ùquĩ ñee ndese ra jẽingochĩ jẽ, i que Jesús ee ra. ⁷ —Mbichae quiātu ngue nanderuã nguiã. Nyebe eriqui nguiã ñee nande je ùquĩ, i rei que echimbaaquiātu ñee nyue ra. ⁸ Jesús que echeẽ ñee icuate ra. Nyebe ñee nguiã ee. —¿Mbaerã jẽingo “mbichae nanderuãchĩ” i re? ¿Mbaerã jẽingo seicuayãte re? ⁹ Ae rĩ aico ñee jẽje nae, ¿ùquĩ jẽicuayã mbeite quia re? Se mbichae mbeta mose ¿ùquĩ si jẽtesarei chõ nde? Cinco mbichae mbeta mose mbia cinco mil je, ¿manya iru jemombisẽ mbichae sique sique je re? ¹⁰ Siete mbichae mbeta mose mbia cuatro mil je ¿manya iru jemombisẽ mbichae sique sique je no? ¹¹ Secheẽ mose jẽje nyii, “mbichae mbuchimatãsa rã ndei fariseos cheẽ”, i mose jẽje, secheẽ jẽicua rã. Mbichae rĩ aico ñee ãte jẽje co. Fariseos cheẽ ndese jẽingo eã sacua ño aico nguiã ñee jẽje. Saduceos cheẽ ndese abe jẽingo eã sacua, i que Jesús ra. ¹² Echim-

baaquiato que eicua chee ra. —Mbi chae mbuchi-matãsa riĩ eã ño eriqui ñee nande je re. Ae fariseos senei senei icuã nguia mbia mbaaquiato nae, ùquĩ ñi ño eriqui ñee nde. Saduceo ñee ñi abe no, i que echimbaaquiato eicua ramo cote ra.

Cristo chõ nde resẽ, i Pedro Jesús je

¹³ Jesús que nyoĩ Cesarea de Filípoo cote ra. Huee que ñee uchimbaaquiato je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra. ¹⁴ Echimbaaquiato que ñee ee ra. —Juan el Bautista ereico reĩ nguĩã mbia je co. Elías ereico reĩ nguĩã emo je no. Jeremías ereico reĩ nguĩã emo je no. Dios cheẽ nenei neneisa mo ereico reĩ nguĩã emo je no, i que echimbaaquiato ñee Jesús je ra. ¹⁵ —¿Aba aico reĩ jẽje co re? i que Jesús ee ra. ¹⁶ —Cristo chõ nde resẽ. Dios riiĩ ño nde resẽ, i que Pedro ee ra. ¹⁷ Jesús que ñee Pedro je cote ra. —Ndeyate ereico co, Simón. Mbiamo nembiiirandu eãte quia serese co. Paba Ibatenda mĩ ño nembiiirandu nguĩã serese. Jonás ndiĩĩ ndei nde. Tacheẽ tuchi ndeje. “Pedro” i chõ equia ndeje co. “Sita” i ñi Pedro je re. Aque sita arõ ño nda sembae iglesia achao. Satanás nda esiquisã eãte. Satanás quirãcuãte raque. Mbiamo iquiasa raque ae no. Ae ra sembae iglesia siquisã eã mbei. ¹⁹ Mbae tamee ndeje. Llave tamee ndeje. Aque je ra Dios recua iquesa erembuquiata quiata mbiamo je. Mbiamo ique sacua. Ae je ra erembuquiata, ùquĩ nda ique. Ae je ra erembuquiata eã, ùquĩ nda ique eã, i que Jesús ra. ²⁰ Jesús que ñee uchimbaaquiato ja je cote ra. —“Jesús rei Dios chimondo” jenyechĩ nda emo mbiirandu jẽ, i que ee ra.

Mbia ra seiquia, i Jesús

²¹ Aque mose bei que Jesús umano nonde senei senei uchimbaaquiato je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²² Pedro que Jesús querao pe jiri ñee sacua ee ra. —Mbiamo ra jẽ jẽchĩ ndeje jẽ. Mbiamo ndeiquiachĩ jẽ, i rei que Pedro ñee asi ee ra. ²³ Jesús que uba ñee Pedro je ra. —Ehuĩ chõ sesi, Satanás. ¿Mbaerã ereico seriquisã quisã nde? Mbiamo ndua rã ño ereico nguĩã ndua. Dios ndua rã eã, i que ñee Pedro je ra.

²⁴ Jesús que ñee uchimbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵ Emo ndua bei mose ngueco rese, ereco ra ua esi. Emo hui mose ngueco si seje, ùquĩ nda siqui bei. ²⁶ Emo ngueco mumba chooño mose, eya eã mbei rae. Mbaecha rete raque. Emo ngueco mumba chooño mose, mbae mo eãte ereco ribishorõ sacua. ²⁷ Dios ra sembu si íbii

uquirãcuã je. Ibatenda rese ra achu ángeles. Ae mbae turã saã saã nguia nae, ùquĩ je ra mbae turã amondo se tu mose. Ae mbae icuã saã saã nguia nae, ùquĩ je ra mbae icuã amondo no. ²⁸ Tacheẽ nyecua jẽje. A jengu a nae, jemo nda jemaie sechu rese. Achu ra mbiamo rerecuarã tuchi cote. Jemo jemano eã mose r a achu mbiamo rerecuarã tuchi cote, i que Jesús ra.

Jesús nyĩcuabo uchimbaaquiato resaa

17 Tenda seis uare que Jesús uchimbaaquiato monderao sita íbátee ra. Pedro. Jacobo. Juan abe no. Jacobo nongue rei Juan. ùquĩ ngue equerao ja mbiamo tiãsa ra. ² Jesús que nyĩcuabo eresaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra. ³ Mbiamo nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴ Pedro que ñee Jesús je ra. —Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nembiaerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵ Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriiĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra. ⁶ Echimbaaquiato que siquichete eandu mose ra. Echeẽ mose que echoĩ nyaara nguie quti ra. ⁷ Jesús que esiichã oco erese ra. —Jẽhuã na. Jẽsiquichechĩ nda jẽ, i que ñee ee ra. ⁸ Echimbaaquiato soboiba mose que mae Jesús mĩ ndese cote ra.

⁹ I ecuaẽ nguia nguichi mose sita ibate si que Jesús ñee ee ra. —Ae rese jemaie namo nae, ùquĩ nda jẽsenei seneichĩ emo je jẽ. Seraaque quera si mose, aque mose ramo ño jẽsenei senei mbiamo je cote, i que Jesús ñee ee ra. ¹⁰ Echimbaaquiato que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹ Jesús que ñee ee ra. —Ae bei. Coche Elías rane tu nguĩã mbae mbitirõ ja. ¹² Elías que tu ra. Mbiamo que eicuayãte ra. Mbiamo icuã icuã seje no, i que Jesús ee ra. ¹³ Echimbaaquiato que Jesús cheẽ icua ramo cote ra. —Juan el Bautista riĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbiamo riiĩ mo si

¹⁴ Ngasẽ ngue mbiamo ja je cote ra. Emo ngue ngoi ngũĩã ndese ñee Jesús je ra. ¹⁵ —Seriiĩ embucherõ na, Serererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶ “Seriiĩ embucherõ na”, ae rei ngue nguĩã ndechimbaaquiato je. Mbiamo mbucherõ aquiato ño eriqui re, i que eru ñee Jesús je ra. ¹⁷ Jesús

que ñee cote ra. —¿Mañi jentye quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra. ¹⁸ Jesús que ñee asite aba checuayã je cote ra. Aba checuayã ngue usẽ eriiirĩ si cote ra. Aque mose tuchi que eriiirĩ nyerõ cote ra.

¹⁹ Aquere que echimbaaquiatu ñee Jesús ísaa ra. —¿Mbaerã ureico aba checuayã jea aroneate mbia si re? i que ñee Jesús je ra. ²⁰ Jesús que ñee ee ra. —Seicuayãte jiri quiatu nguia ã. Tacheẽ nyecua jẽje. Sã mostaza eĩ ñetẽte riqui raque no. Jẽ seicua ñetẽ mose, mbae ra asaã ja jẽje. “Eso pe jiri”, jentye mose co sita ibate je, siri ra oso pe jiri jeñee nguire. Jẽ seicua mose, mbae jẽ saã ja arondete. ²¹ Aba checuayã ngue ajae namo, ùquĩ nda jẽjea eã jeñee eã mose Dios je. Ùquĩ nda jẽjea eã, jẽhui eã mose jenyiu si, i que Jesús ñee ee ra.

Mbia ra seiquia, i si Jesús

²² Galilea rĩ ngue Jesús riqui ngata uchimbaaquiatu rese ra. Jesús que embaaquiatu quiatu quia ra.

—Mbiarã ngue achu ra. Mbia ra semee mbia icuã je.

²³ Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiatu ia eã tuchi que echeẽ mose ra.

Jesús mbae isiquia mondo impuestos pagar i sacuã

²⁴ Ngasẽ ja que Capernaum cote ra. Ae impuestos isi isi quia Dios chuchua jenda nae, ùquĩ ngue nyoĩ ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra.

²⁵ —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —I ere, Pedro. ¿Aba je mbia rerecua riqui “impuestos jemee na seje” i re? I eã nda nguiriĩ je. Mbiamo je chõ nda ñee nguia, i que Jesús ee ra.

²⁶ —Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷ Dios riiirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiatu ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacuã. Nembae sacuã abe no, i que Jesús ñee Pedro je ra.

Ererecua tuchi ra se, i jaaja Jesús chimbaaquiatu nyue

18 Aque mose que echimbaaquiatu ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ² Jesús que ãquẽ mo mbucoi mii eite re ra. ³ Ñee ngue mbia je cote ra. —Tacheẽ nyecua jẽje. Dios quiti jemba eã mose ra jenderecua eã mbei Dios. Mbia riiirĩ na jẽingoã mose ra jenderecua eã mbei Dios no. ⁴ Ae siqui quia cocheete nae, ùquĩ nda mbia

rerecuarã nyee Dios rese. Ae siqui quia mbia riiirĩ n a nae, ùquĩ nda mbia rerecuarã nyee Dios rese. ⁵ Ae eturã ndiqui mbia riiirĩ je serĩ nae, seje abe chõ eturã ndiqui nguia.

Mbae icuã nda nandesaã uquiachĩ emo je

⁶ Ae ra mbae icuã saã uquia seicua mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. I nda mbae icuã naa uquia eãte rei seicua je.

⁷ Mbae icuã nguiarei siqui bei tuchi mbia mbiicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ùquĩ nde. Ae “mbae icuã esaã” i nae, ùquĩ nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii nderequia, siqui bei sacuã huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei mii nderequia, siqui bei sacuã huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa mii nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Seriiirĩ ñetẽ mo nda jëucuãyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jẽje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque mii quiachã eã seriiirĩ ñetẽ mo, i chõ Dios nguia co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eísa. Ndecheẽ andu turã mose, nderesenda que eremitirõ turã nda.

¹⁶ Ndecheẽ andu sereã mose, emo abe erao ñee sacuã ee. Aque mii nda reae. Nyeremo nda re no ae. Ùquĩ abe ñee sacuã ee. Jeñee ja mose ee hue rĩ ja, jẽandu turã arõte. ¹⁷ Ùquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Ùquĩ ñee andu sereã mose, jemombo chõ cote. Dios quia-toã naanguia jësaã ño ee cote. Mbia icuã naanguia jësaã ño nguia ee cote. ¹⁸ Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no.

¹⁹ Tacheẽ nyecua jẽje. Jẽ nyeremo ndua turã mose hue

rĩ sí, “co embu ure je” jentye turã ja mose Dios je, Paba Ibatenda ra emondo jêje. ²⁰Jẽ nyeremo ñumunua mose serĩ, aico chee nguiã jendese jêite re huee, i que Jesús uchimbaaquiatu je ra.

²¹Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra. ²²Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jêtesarei

²³Sã ererecua mo ndiqui no. Dios rã si chõ ererecua re. Sã ererecu a cuenta raã naa ja ngũimba je no.

²⁴Cuenta raã naa mose que erimba mo ndurucuaẽ ee ra. Aque que deber i tuchi quia ee ra. ²⁵Mbae äte que erimba mbae pagar i sacuaã nda. Nyebe ererecua ñee nguiã. “Embae je vender nande ja rã. Eriirĩ abe je vender nande. Eninisi abe no. Ae abe je vender nande. Ĩ nda cuenta ua jiri”, i rei que ererecua ñee nda. ²⁶Erimba ia eã tuchi que echeẽ andu ra. Ngoi que ngũĩã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷Ererecua ia eã tuchi que erese ra. “Mbae emondo eã ndei seje pagar i sacuaã”, i chõ nyee que ee ra. Hui chõ nyee que esi ra. ²⁸Erimba que usẽ ndei oso quia ra. Aque mosechi que ngasẽ nguesenda mo je ra. Deber i miite rei ee reaẽ. “Pagar ere rã seje”, i que echosoi isi ra. ²⁹Eresenda que ngoi ngũĩã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰“Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee. ³¹Eresenda ataque ia eã tuchi que mae erese ra. Nyebe echoi nguiã ñee ererecua je. ³²Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ũquĩ nii ngue acheẽ eãte ndeje. Seya eãte que nderese nde ñee mose seje nyii. ³³¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴Ererecua que paa ma i tuchi ee ra. “Jẽiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiatu quiatu ra. ³⁵—Eĩ sí ra Paba Ibatenda paa ma i jêje, jêtesareia mose jendesenda icuã si, i que Jesús mbi a je ra.

Jesús ñee mbia ngũinisi mombo je ri

19 Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ²Mbia que nyoi ja tuchi quia erui ra. Huee que mbia rasi mbucherõ cherõ tuchi ra. ³Fariseos mo ngue nyoi Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee

Jesús je cote ra. ⁴Jesús que ñee ee ra. —¿Embesa ji rese jẽingo mae äte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵Nyebe ra emo ndiqui ngũinisi rese bei. Ngu si isho. Usi si abe no. Ngũinisi rese siqui bei sacuaã. Co miĩ na siqui sacuaã nyiese”, i ñi embesa ji re. ⁶Nyeremo siqui rã eã ño cote re. Co miĩ siqui rã ño ũquĩ cote re. Ae Dios mbucha nyiese nae, sã ũquĩ huĩ eã mbei nyesi, i que Jesús ñee ee ra ⁷Fariseos que ñee ee cote ra. —¿Mbaerã Moisés ñee ũquĩ nde? “Jeninisi jea nonde, papel mbesa je jemondo ee”, i ee re, i que ra. ⁸Jesús que ñee ee ra. —Jëaquẽ ätãte quiatu ngue re. Nyebe Moisés embesa nguiã jêje ũquĩ. ũquĩ i äte que Dios mbia ao ramo mose nyii ra. ⁹Ae ngũinisi jea nae, eninisi siquiã ndaque emo ndese, eicuã tuchi chõ ũquĩ nde. Ae ngũinisirã mo ndeabe mose, adulterio i que ũquĩ je ra, i que Jesús ñee ee ra.

¹⁰Echimbaaquiatu que ñee ee ra. —Mbaeiaie mose ngũinisi jea mose ¿mbaerã nguiatu ra ngũinisirã ndea re? i rei que echimbaaquiatu ñee nda. ¹¹Jesús que ñee ee ra. —Mbia ja riqui ũquĩ icua eãte ã. Ae Dios mbaaquiatu quiatu nae, ũquĩ miĩ ño siqui nguiã eicua ã. ¹²Ae eninisi sereã mbeite nae, ũquĩ nda siqui turã, eninisiã ndaque rae. Emo nyia o ji mose, ũquĩ abe ra siqui turã, eninisiã ndaque rae. Emo ngũinisirã nderequia eã mose Dios rĩ, ũquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

¹³Mbia que nguiirĩ ngurucuaẽ cuaẽ nguia Jesús je ra. Jesús o noono sacuaã eãquĩ arõ. Jesús ñee sacuaã Dios je erĩ. —¿Mbaerã jendiirĩ jendu quia co re? i rei que Jesús chimbaaquiatu ñee mbia je ra. ¹⁴Jesús que ñee nda. —Tei. Jẽhui chõ esi. Sã nguiirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra. ¹⁵Jesús que o chono ñono mbia riirĩ arõ nda. Aquere que esi ngata cote ra.

Acuanĩndu mbaecha mo ñee Jesús je

¹⁶Acuanĩndu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁷Jesús que ñee ee ra. —¿Mbaerã ereico eturã i seje re? Dios miĩ ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸—¿Mbae ra amumbayã Dios cheẽ nde? i que acuanĩndu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheẽ ñooñoichĩ nda emo niĩ. ¹⁹Ndeturã ño nderu je. Ndeturã ño ndesi abe je. Sã erchesequa ndechiese no nae, eĩ ere si chõ nyesequa

nde ji jenda rese". Dios cheẽ ja chõ ùquĩ nde. Mbia echeẽ mumbayã sacua, i que Jesús ñee acuanĩndu je ra. ²⁰ Acuanĩndu que ñee ndei ee ra. — Ùquĩ ngue amumbayã ja bei quia ra. Señetẽ mosenda bei. ¿Mbae mo abe ra asaã nde? i que acuanĩndu ñee Jesús je ra. ²¹ Jesús que ñee ee ra. — "Taico turã tuchi", nde i mose, ã abe esaã. Nembae emondo mondo ja mbia mbaecha reã je. Nde ùquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echosoi oso serĩte cote ra. Eyayãte que oso ra. Mbaecha tuchite quiatu ngue ae re.

²³ Jesús que ñee uchimbaaquiato je cote ra. — Tacheẽ nyecua jẽje. Mbaranguiatu ãte mbaecha je ngasẽ sacua ibate siqui bei sacua huee. ²⁴ Sã ticuasú mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiato que nyuruira tuchi echeẽ andu ra. — ¿Aba quia ra oso Dios rea ibate re no? i que echimbaaquiato Jesús je cote ra. ²⁶ Jesús que mae erese ñee ee ra. — Ae mbia saã aroneate quia nae, Dios miĩ ño nda esaã, i que Jesús ee ra. ²⁷ Pedro que ñee Jesús je ra. — Ure que urembae uresech a ja ra. Siqui sacua nderui. ¿Mbae ra eremeẽ ure je re? i que Pedro ñee nda. ²⁸ Jesús que ñee ee ra. — Tacheẽ nyecua jẽje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jẽ abe ererecua. Jẽ doce. Trono jaaja ra jembraerã cote. Judíos rerecua ja ra jẽ. ²⁹ Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngũinisi secha. Ae ngui-irĩ secha. Ae umbae ibi secha no. Ùquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. ³⁰ Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote, i que Jesús ra.

Ae rane eriqui nyii nae, ùquĩ nda siqui mbia rui tuchi cote

20 Jesús que mbia mbaaquiato quiatube no nda. — Dios rei mbia rerecua tuchi. Sã mbaecha mo ndiqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacua no. Nyaashĩ namo mose. ² "Denario miĩ tamondo mondo ja jẽje. Sembae ishao shao sacua tenda mondo chee", i que emondochoi úcoo cote ra. ³ Tenda chui mose que mae emo ndecoteã eã ndese ra. ⁴ — Jẽ abe jẽso sembae ishao shao. Mbae mo tamee jẽje, i que ee ra. Nyoĩ que echeẽ mose ra. ⁵ Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo

mose no nda. ⁶ Tenda ireĩ mose abe que mae emo ndecoteã eã ndese no nda. "¿Mbaerã jẽingo tenda mondochooño siqui rocoĩ mbae mo ndese a re?" i que echa ñee ee ra. ⁷ "Emo ngue 'mbae mo esaã seje' i ãte ure je ra", i que ee ra. "Jẽso jẽ abe sembae ishao shao. Mbae mo tamee jẽje", i que echa ee ra. ⁸ Itondaru ramo mose que echa ñee mbia reaquiatusa je ra. "Jenyu' ere sembae ishao shaosa je. Pagar ere rã ùquĩ ja je. Ae ique ramo eresaitõ nae, ùquĩ nane je pagar ere. Ae rane ique nyii nae, ùquĩ je pagar ere hui bei cote", i que echa ñee nda. ⁹ Ae ique eresaitõ nae, ùquĩ nane je que denario miĩ mee mee nda. ¹⁰ Ae rane ique nyii nae, ùquĩ ngue ñee ñee u nyue ra. "Eata jiri ra emee nande je reae. Nande rane ngue uva a nandeishao shao", i rei que eu ñee ñee nyue ra. Ùquĩ je abe que denario miĩ mee mee nda. ¹¹ Pagar i mose ee que ñee asi asi echa je ra. ¹² "Ae ique ramo eresaitõ nae, ùquĩ ngue mbae ishao shao eã jiri resẽ. Eresaitõte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia eremeẽ ee ure rã si chõ nde?" i que ñee echa je ra. ¹³ Echa que ñee ùquĩ mo je ra. "Mbae icua mo asaã eãte ndeje resẽ. 'Denario miĩ', nande que ñee nyii resẽ. ¹⁴ Quiatu nembae denario rerao cote. Ae ique ramo nae, ùquĩ je abe denario tamee mee nde rã si. ¹⁵ Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿nde-biãte ùquĩ nde?" i que echa ñee ee ra. ¹⁶ Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote. "Jenyu serui" i tuchi Dios quia mbia ja je co. Mbia miĩ miĩ ño eisirõ sirõ nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quti ra. Uchimbaaquiato que equerao mbia tiãsa ñee sacua ee ra. ¹⁸ — Co nyao quia Jeursalén co. Huee ra mbia semee sacerdotes rerecua je. Embesasa abe je. "Jesús jẽiquia", i ra serĩ. ¹⁹ Semee nda judíos eã je cote. Seiquia sacua. Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús riichã nda. Jacobo si. Juan si. Zebedeo ririĩ ngue ùquĩ nda. Ari que oso Jesús riichã nguiirĩ ndese ra. Ngoi que ngũiã ndese ñee Jesús je ra. — Mbae mo esaã na seje, i que ee ra. ²¹ — ¿Mbae ra aba saã ndeje re? i que Jesús ñee ari je ra. Ari que ñee ee ra. — Ndeico mose ererecua tuchi, sã seriirĩ abe riqui ererecuarã nderese. Sã seriirĩ ngoi ja u ndejii. Enongue chĩ ngoi ndequito cuti. Enongue ndequiato cutiã no, i rei que ari ñee Jesús je ra. ²² Jesús que ñee ee ra. — Ae

rĩ jẽingo ñee seje nae, jẽirandu turã eãte ùquĩ ndese. Ae rasi ra asaã tuchi nae, ¿ùquĩ ndasi ra jẽsaã jẽ abere? i que Jesús ee ra. “Ae”, i que ari riirĩ ñee ee ra. ²³ Jesús que ñee ee ra. —Ae bei. Ae rasi ra asaã tuchi nae, ùquĩ ndasi ra jẽsaã tuchi raque jẽ abe. “Ererecuarã ure”, jenyee que seje, ùquĩ asaã aroneate se jẽje. Paba ae quiatu ra ùquĩ saã. Ae ebite, ùquĩ nda emĩ ererecuarã, i que Jesús ra. ²⁴ Echimbaaquiato ataque que jirandu erese ra. Echimbaaquiato diez. Paama i que Juan je ra. Jacobo je abe. ²⁵ Jesús que “jenyu” i ñee uchimbaaquiato ja je cote ra. —Mbia ataque rerecua riqui ucuasuraã naa tuchi ngũimba je ùquĩ. ²⁶ Ùquĩ nda jẽsaãchĩ jẽ. “Ererecua ra se”, i mose jemo, sã aque riquichõ uataque rimbarã. ²⁷ Jemo “se rane jẽ” i mose, sã ùquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbaaquiato rese. Mbia tubiriã ngue nyoĩ quia erui ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucua rese ra. Ñeemombo mombo que Jesús je ra. —¡Sererecua! ¡David rucucha! ¡Ndeya eã ño urerese jẽ! i que eresayã ñee Jesús je ra. ³¹ —¡jẽquiriri chõ jẽ! i tuchi rei que mbia ñee ee ra. —¡Sererecua! ¡David rucucha! ¡Ndeya eã ño urerese jẽ! i be que eresayã ñee Jesús je ra. ³² Jesús que tiba ñee ee cote ra. —Jenyu rã. ¿Mañi ae ra jẽje re? i que Jesús ñee eresayã je ra. ³³ —Ureresa embuturã na, Urererecua, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoĩ quia cote ra.

Jesús ngasẽ Jerusalén

21 Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchimbaaquiato nyeremo mondo ra. ² Ñee ngue ee ra. —Achi súchaa chõ jẽso rã. Burro cuasa ra chĩ nguiirĩ ndese jẽje huee. Ùquĩ jenyura seru seje. ³ Emo ñee mose jẽje, “¿mbaerã nda jenyura re?” i mose jẽje, jeñee ee. “Nandererecua que ‘jendu’ i ra. Mondo jeibe ra jẽje”, jenyee ee, i que Jesús ñee ùquĩ nyeremo mondo ra. ⁴ Embesa ji cheẽ io sacua ño ngue ùquĩ nda. I embesa ji huĩ a: ⁵ Jeñee Jerusalén jenda je. “¡Sã jẽ! Jenderecua ru quia jẽje burro ato co. Ucuasu esaã saã eãte u quia co. Burro riirĩ átoo eru quia co”, jenyee ee,

i que embesa ji huĩ nyii ra. ⁶ Ùquĩ nyeremo ngue Jesús mondo cote ra. Ae rĩ Jesús ñee ee nae, ùquĩ ngue nyecua ja ee cote ra. ⁷ Burro que ecuruchoĩ Jesús je ra. Huĩrao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huĩrao mbiitee tee nyoĩ quia ibi rĩ enonde ra. Emo emo ngue sindo mbiitee tee ee no nda. Jesús oso sacua hue rĩ. ⁹ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoĩ quia Jesús nonde nae, ùquĩ. Ae nyoĩ quia erui nae, ùquĩ abe no. ¹⁰ Jesús que ngasẽ Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús rĩ nda. ¹¹ Mbia ataque que echeẽ sibishorõ nda. —Dios chimondo chõ co re. Jesús i equia ee. Nazaret de Galilea jenda chõ ae re, i que ñee nda.

Jesús mbia mbusẽ Dios chuchua si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ùquĩ ja que Jesús mombo hue si ra. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorõ nae, ùquĩ nenda abe que embuchiichere chere ra. ¹³ Jesús que ñee ùquĩ ja je ra. —“Mbia cheẽsa Dios je”, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchu a je re. Mbae mbuquiachãsa chuchua jẽsaãte chĩ nguiã ee, i que Jesús ñee asite ùquĩ je ra.

¹⁴ Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ùquĩ mbucherõ ja ra. ¹⁵ Ererecua cuabẽte que chi mae icuã icuã erese ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. —David rucucha turãte riqui co, i mose mbia riirĩ Jesús rĩ, ùquĩ mose que ererecua paa ma i ja Jesús je ra. ¹⁶ —¿Mbia riirĩ ñee erechandu quia re? i que ùquĩ ñee Jesús je ra. Jesús que ñee ee cote ra. —Ae. ¿Embesa ji rese jemaee eãte re? “Dios ra mbia riirĩ mbucheẽ turã uturã ñh”, i que embesa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriã abe recha. Oso que Betániaa nda. Huee que itõ nda.

Jesús ñee icuã higo i je

¹⁸ Isamamimbe que Jesús choi sĩ quia sucha tubiriã nda. Eriãcuãte abe que nyoĩ quia ra. ¹⁹ Higo i mo ndese que mae ñeenda jie ra. Síchã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee

nguiã higo i je. —Ndea eã mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echimbaaquiatu que nyuruira tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheẽ nyecua jêje. Ae asaã higo i je nae, jê abe ra ùquĩ jêsaã serã sí, jê Dios jêicua tuchi mose. Jeñee nyee ra sita ibate mo je. “Esiri rá oso am a ndisha ye”, jenyee chee ra sita ibate mo je. Sita ibate ra jeñee mumbayã jê Dios jêicua tuchi mose. ²² “Ã emondo seje”, jenyee mose Dios je, mondo r a jêje. “Dios ra emondo seje”, jenyee mose jeñiangui re, Dios ra emondo jêje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiatu quiatu ra. Sacerdote rerecua que nyoi ñee ee amei ndese ra. —¿Mbaerã ereico mbia mbaaquiatu quiatu Dios chuchúaa re? ¿Aba “ùquĩ esaã saã” i ndeje re? i que ererecua ñee ja Jesús je ra. ²⁴ Jesús que ñee ee ra. —Se rane tacheẽ jêje. Se rane preguntar tae jêje. Secheẽ jêsbishorõ turã mose, ùquĩ mose quiatu ra jeñee asibishorõ turã se abe. ²⁵ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jêingo eãte eruĩ re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i que ererecua u ñee ñee nyue ra. ²⁷ Ererecua que ñee nyee Jesús je cote ra. —Ure-icuayãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque riĩ nda acheẽ eã jêje no, i que Jesús ererecua je ra.

Acuanindu ndua ndua si

²⁸ Jesús que ñeembe ee ra. —I ra ã jêje reae. Sã amei mo ndiirĩ nyeremo no. “Quiatu rá uvas ishao shao seje”, i que amei nguiirĩ ndiquii je ra. ²⁹ “Nya” i rei que eririirĩ ndiquii ñee ngu je ra. Aquere que ndua si chõ oso uvas ishao shao ra. ³⁰ “Quiatu rá uvas ishao shao seje”, i rei que amei ñee nguiirĩ nduinda je cote ra. “Se quiatu taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ùquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jêsi ã. Impuestos isi isiquia abe riqui Dios cheẽ andu turã jêsi ã. Ùquĩ nda siqui tuchi Dios rese jêsi. ³² “Eĩ jenyee chõ siqui turã Dios je”, i rei que Juan el

Bautista jembaaquiatu quiatu ra. Jê nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ùquĩ ndese mae mose abe que jêya eã eã jêicuã ndese no nda. Jê echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jêsaarõ”, i que emo je cote ra. Ae que oso isho itõte cote ra. ³⁴ Uva quiche mose que ngũimba mo mondo rei umbaerã ndea ra. ³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echeĩ chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seririĩ si”, i rei que ra. ³⁸ Uva raarõsa mae mose erese que ñee nyue ra. “¿Co eririĩ ndu quia co cote jê! ¿Nandeiquia rei jê! Ñ nda uvas nandembaerã ae tuchi cote”, i que ñee nyue ra. ³⁹ Eraarõsa que eririĩ isi icuã cote ra. Curuchoĩ que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Ùquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿Ã embesa ji rese jemaẽ ate re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere Dios emundua si erese. “Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiaõ chõ ùquĩ nde.

Dios chiaõ turã tuchi riqui nande je ã,

i ñi embesa ji re. ⁴³ Tacheẽ nyecua jêje. Jenderecua eã nyee ra Dios cote. Ae mbiamo nda Dios icua nae, ùquĩ nderecua quia ra Dios cote. ⁴⁴ Ae ra ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano no, i que Jesús ra. —Aque sita rá ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra. ⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

Jenyu quiaru serese, i raque emo uquiato je

22 Jesús que ejemplo mo senei mbia je ra.
² —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngũinisi rea ramo mose. ³ Mbae quiche ja mose que ngũimba mo mondo rei mbia mbiirandu ra. Mbia que ngaẽ sereã nea ja chõ erea ra. ⁴ Ngũimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngũinisirã isi ramo ndese jẽso mae. Jẽso quiaru erese”, i rei que erimba mbia je ra. ⁵ Ae je “jenyu” i nae, ũquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶ Mbia que teã teã ja ra. Ererecua rimba iruã nua ño ngue ra. Eiquia chee. ⁷ Ũquĩ mose que ererecua paa-ma i tuchi ra. Soldados que emondo ngũimba iquiasa iquiasa ra. Echuchua abe rei rei. ⁸ Ererecua que ñee ngũimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ũquĩ ngaẽ eã. Eicuãte quia ñene. ⁹ Jẽso ñee mbia ja je. Ishonda ja je. ‘Jenyu ja ererecua riirĩ ngũinisi rerequia ramo ndese mae’, jenyne oso quia mbia mbuchesea sea”, i que ererecua ñee nda. ¹⁰ Erimba que nyoĩ mbia mbiirandu randu ja ra. Mbia turã mbiirandu. Mbia icuã abe mbiirandu randu no. Mbia que ngaẽ tuchi cote ra. Tuchua itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chĩ ee huee ra. Tiru ererecua chimondo emingue eã ñochĩ nguia reaẽ. ¹² Ererecua que ñee ee ra. “Seriirĩ ndiqui ngũinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. ¹³ Ererecua que ñee ngũimba je cote ra. “Co jẽisi jẽ. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. ¹⁴ “Jenyu seruĩ” i tuchi Dios quia mbia ja je co. Mbia miĩ miĩ ño eisirõ sirõ nguĩ co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheẽ icuã na. ĩ nda mbia paama i ee, i que fariseos ñee ñee nyue ra. ¹⁶ Nyebe fariseos uchimbacuatú mo mondochoi nguĩ Jesús rea. Herodes chimbacuatú rese. Jesús mbucheẽ icuã sacuã ño ũquĩ nde. Uturã ngue esaã ñooño Jesús je ra. —Jesús, co ereico mbia mbacuatú quiatu turãte co. Ndeturãte ereico mbia ja je co. Co ereico turãt e mbia mbuchiabiã co. Mbia erembacuatú quiatu turãte quia Dios icha rĩ co. ¹⁷ Nyebe urechu nguĩ ñee ndeje a. ¿Coche mbia mbae isiqui a mee mee Romano

nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸ Jesús que ũquĩ icuã icuate ra. Nyebe ñee nguĩ ee. —¿Mbaerã jẽingo “ĩ nda Jesús ucheẽ nyabi”, i serĩ nde? ¹⁹ Mbae isiquia mo jẽteacuquia imbu seje, i que ee ra. Mbia que eteacuquia ee ra. ²⁰ —¿Aba mbae nombre ñi mbae isiqui a rese a re? ¿Aba ãquĩ aingue abe ñi a re? i que Jesús ee ra. ²¹ —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbia que nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³ —Mbia raaque ra quera eã mbei, i que mbiamo nguia ñee nda. Saduceos i que ũquĩ je ra. Ũquĩ mo ngue nyoĩ ñee Jesús je ra. ²⁴ —Sererecua, ã ngue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. ²⁵ Eriqui mo ngue siqui urereserã. Seis que eribi ra. Eriqui que ngũinisirã quereco rei ra. Mano ño ngue tiirĩ ndocoĩ ngũinisi recha ra. Enongue que nguiqui checha quereco rei cote ra. ²⁶ Ae abe que mano ño tiirĩ ndocoĩ no nda. Ũquĩ seis que ngõngue checha quereco ja rei ra. Mano ja chõ ngue tiirĩ ndocoĩ no nda. ²⁷ Eninisi eru checha que mano nyee chõ cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re. ²⁹ Jesús que ñee ee ra. —¿Mbaerã jẽingo Dios cheẽ icua eãte ã nde? Jẽingo Dios cheẽ abi tuchi ã. Jẽingo Dios quirãcuã icua eãte ã. ³⁰ Ae raaque ra Dios mbuquera si nae, ũquĩ nda ngũinisi quereco eã mbei huee cote. Ũquĩ nda ngu quereco eã mbei huee cote no. Angeles rã mbei ra mbia riqui huee ibate cote. ³¹ Mbia raaque quera si rĩ ño ngue Dios jembiirandu rei ra. ¿Embesa ji rese jemae ãte re? ³² ã ño Dios cheẽ embesa ji re: Abraham nderecua chõ aico nguĩ se co. Isaac nderecua abe. Jacob rerecua abe no, i que embesa ji ra. ã ngue mano ndei nyii ra. Eresco siqui bei chõ nguĩ namo ã. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra. ³³ Mbia tubiriã ngue chi nyuruira tuchi eandu ra. Jesús mbae icua ja mose.

Echesequa tuchi quia Dios rese

³⁴ Jesús cheẽ aquiatu tuchi que ra. Nyebe saduceos cheẽ mbutiba nguĩ. Fariseos jirandu mose erese que ñumunua ñee nyue ra. ³⁵ —Se chõ tacheẽ Jesús je. Ma Jesús ñee icuã, i rei que fariseo mo nda. Embesasa que ae ra. ³⁶ —Jesús, Dios cheẽ tubiriãte riqui ã ndesẽ.

Mbia echeẽ mumbayã sacua. ¿Ma Dios cheẽ ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —Ã ño Dios cheẽ ndiita ã nde: “Echesequa tuchi quia Dios rese. Ndechĩã je. Neaĩ je abe. Nendua ndua je abe”. ³⁸ Ūquĩ ño Dios cheẽ ndiita ūquĩ nde. Ūquĩ ño Dios cheẽ ñiinda ūquĩ nde. ³⁹ ã abe rei ūquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”. ⁴⁰ Moisés chimbese tuchi chõ ūquĩ nde. Dios quiato cose ndare chimbese ja chõ ūquĩ nde, i que Jesús ra.

¿Aba rucucha Cristo re?

⁴¹ Fariseos chichõ mose ñumunua ngue Jesús ñee ee ra. ⁴² —¿Aba rucucha Cristo re? ¿Aba jenyee equia ee re? i que Jesús ñee ee ra. —David nducucha chõ ñene, i que fariseos ñee nda. ⁴³ Jesús que ñee ee cote ra.

—¿Mbaerã David “sererecua” i ee re no? Espiritu turã embucheẽ mose. ⁴⁴ ã ngue David ñee nda:

Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuyãte quia nae, ūquĩ je ra ndequirãcuã ateacuquia tuchi.

Ndequirãcuã tuchi chee ra ūquĩ si”, i que Dios ñee sererecua je ra,

i que David ra. ⁴⁵ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra. ⁴⁶ Ūquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

Jesús ñee asi fariseos je

23 Jesús que ñee uchimbaaquiato je ra. Mbia tubiriã je abe no. ² —Fariseos rã nda jëingochĩ jë. Embesasa rã abe ra jëingochĩ jë. “Ure quia Moisés chimbese ureicuate nguiã ure ã”, i chõ nguiã. ³ Coche jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiatu nguiã. ⁴ Dios cheẽ embeta mbeta tuchichĩ nguiã mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. ⁵ Mbae turã naa mose, mbia mae sacua erese chõ ūquĩ nde. Tiru huĩrao ibi quitinda ai mbiicoi tuchi equia ã. Dios cheẽ mbese ji echucua bei quia uchiba cúa rese ã. Mbia mae sacua erese chõ eriqui nguiã ūquĩ naa naa ã. ⁶ Aba mbia eã tuchi fariseos. “Serendarã turã nguiatu se jë”, i tuchi equia mbia chumunua nua mose ã. ⁷ “Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. ⁸ “Mbia mbaaquiatusa rei se”, jenyechĩ nda jë. Se mii ño jembaaquiatusa re. Nyiesenda chõ jë nde. ⁹ “Paba” jenyechĩ nda mbia mo je jë. Jendu mii ño siqui nguiã ibate pe. ¹⁰ “Ererecuarã se”, jenyechĩ nda eno. Se mii ño jenderecua re. ¹¹ Jemo siqui mingue mose, mbae raã naa mose uataque je,

aque quia ra ererecuarã. ¹² Ae ucuasu raã naa nguiã nae, mbia ñetẽ nda Dios saã ño ūquĩ je. Ae siqui mingue quia nae, mbia rerecuarã ño nda Dios saã ūquĩ je.

¹³ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Jëingo sereãte quia Dios rese ã. Mbia siquise mose Dios rese, jëingo emingo eãte erese ã no. ¹⁴ Aba mbia eã tuchite jë. Eru cheecha mbae jembutiã tiã ñochĩ nguiã ã. Ūquinde jëingo chõchĩ ñee oco oco Dios je ã no. “Ĩ nda mbia mae nanderese” jenyee chõchĩ equia ã. Nyebe ra Dios jembasi tuchi cote. ¹⁵ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. “Jëingo ure rui” jenyee bei chõchĩ equia mbia je ã. Ūquĩ mo siqui mose jendui, eicuã tuchi chõ ūquĩ abe cote re.

¹⁶ Aba mbia eã tuchite jë. Sã eresayã mo ndiqui emo ndesayã mbuti echiba rese no. Ūquĩ na ño jë nde. Jëaquiata ño mbia mbaaquiato quiatuchĩ nguiã. “Jurar jenyee mose Dios chuchua riĩ, coche jeñee jembuchebe nguiã”, jenyee chõchĩ nguiã mbia je ã. “Jurar jenyee mose oro Dios chuchua jenda riĩ, ūquĩ mose quiatu jeñee jembuchebe aroneate nguiã”, jenyee chõchĩ nguiã mbia je ã. ¹⁷ ¿Oro quiatu i tuchi jiri Dios chuchua si re? ¿Mbaerã jëaquiataũte riqui re? ¹⁸ “Jurar jenyee mose altar riĩ, coche jeñee jembuchebe nguiã”, jenyee chõchĩ nguiã mbia je ã. “Jurar jenyee mose ofrenda altar jenda riĩ, ūquĩ mose quiatu jeñee jembuchebe aroneate nguiã”, jenyee chõchĩ nguiã mbia je ã. ¹⁹ Eresayã na tuchi chõ jëingochĩ nguiã. ¿Mbaerã jëaquiataũte riqui re? ¿Ofrenda quiatu i tuchi jiri altar si re? ²⁰ Jurar jenyee mose altar riĩ, earonda abe riĩ ño jëingo nguiã jurar i ofrenda. ²¹ Jurar jenyee mose Dios chuchua riĩ, Dios abe riĩ ño jëingo nguiã jurar i. Dios abe quia siqui nguiã uchuchua huee. ²² Jurar jenyee mose ibei riĩ, Dios renda abe riĩ ño jëingo nguiã jurar i. Dios sí riĩ abe no.

²³ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Décimo jemee mee ndaque quia Dios je mbae ñetẽ ñi. Comino. Menta. Anís. Dios cheẽ ndiita quiatu jemumba mumbate nguiã. Dios jëicua rã nyii. Jëingo turã na nyii. Jëya eã na mbia rese nyii. Aquere quiatu mbae ñetẽ jësaã cote. ²⁴ Sã eresayã mo ndiqui emo ndesayã mbuti echiba rese no. Ūquĩ na ño jë nde. Mbae ñetẽ jësaã turã turãte raque quia ã. Dios cheẽ ndiita quiatu jemumba mumbate nguiã. ²⁵ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jë no nde. Jëturã aba reã ño jëaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶ Eresayã na tuchi chõ jëingochĩ jë nde,

Fariseos. Jeñiangui renda rane nguiatu jëirei. Jëaronda abe ra equishĩ cote.

²⁷ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Mbia raaque tãsa rã ño jëingo nguiã. Eati ji turãte raque. Eimi ye quiatu mbia raaque quiangue chi nguiã hue. Eroo cuí abe no. ²⁸ Eĩ si chõ jë nde. Jëaronda turãte aba reã ndiqui raque mbia je. Jeñiangui rend a quiatu eicuãte re.

²⁹ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Ae mbia turã mano cose nae, ùquĩ tãsa jembiiã turã mbeite raque quia ã. Dios cheë mbuchecuada tãsa abe no. ³⁰ “Cose ureico mose, ã nda ureicuã eãte rei Dios quiato je. Uramei na eã”, jenyete raque equia ã.

³¹ “Mbia iquia iquiasa riirĩ ño ure re”, jenyete equia ùquĩ. Jendu rã si tuchi jë. Mbia i quiasa. ³² Jenamei icuã na si chõ jëingo no. ³³ Mbei tásie rã tuchi chõ jë nde. Eĩ jenyete bei oso quia aque ngasë nyee tata cuasu.

³⁴ Nyebe ra Dios cheë mbuchecuada amondo mondo quia jëje. Mbia mbaaquiatusa ra amondo jëje. Mbia aracua abe no. Jë nda sechimondo emo emo jëiquia. Emo emo nda jëiruã nua mbia chumunuásaa no. Jëico ico ra equia erese equia chee. ³⁵ Ae Dios quiato iquia iquia quia cose nae, ùquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequías riirĩ ndei aque. Sã mbia Dios quiato iquia iquia bei cose no. ³⁶ Ùquĩ ja riĩ nda Dios jembasi cote. Acheë nyecua quia jëje a.

Jesús ia eã tuchi Jerusalén jenda rese

³⁷ Tacheë na jëje, Jerusalén jenda. Seya eãte aicochĩ jendese co. Hue jëingo mbia iquia iquia beite hue. Dios cheë mbuchecuada iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jëje co. Secheë jëisi sereã mbei chõchĩ nguia ã. ³⁸ ¡Aico jendecha a cote jë! ³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jë!” i ra mbia seisi turã aque mose cote, i que Jesús ñee nda.

Mbia ra Dios chuchua mbucoi ja, i Jesús

24 Jesús que oso usë Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jë, i que ñee ee ra. ² Jesús que ñee ee ra. —Tacheë nyecua rã jëje. Ae rese jëingo mae ã nae, ùquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasë ñee eísaa ra. —¿Manosete ra ùquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra. ⁴ Jesús que ñee ee ra. —Jëtesa jiri quia jë. Mbia mo nda jembiiĩ irĩchĩ ñee jëje jë. ⁵ “Cristo chõ se re”, i ra mbia ñee ata atate jëje. Ùquĩ ñee nda jeñanduchĩ jë. Ùquĩ nda mbia mbiiĩ irĩ jate. Ñee ñooño je chõ ùquĩ nde. ⁶ Mbia ra guerras saã saã tuchi. Mbia ra ñee ñee tuchi quia nyiiquia iquia je riĩ. Ùquĩ mose ra jësiquichechĩ jë. Ùquĩ ja rane nda nyecua raque. Aque mose ra mbae ua eã ná. ⁷ Mbia ra guerras saã tuchi chee. Nyiiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. ⁸ Jembasi ramo mose chõ nda ùquĩ nde. Aquere ra jembasi tuchi cote.

⁹ Mbia icuã icuã tuchi r a jëje serĩ. Nguerecua je ra mbia jenderao rao tuchi. Jëiquia chee rae. Mbia mangue chooñoa jenda ra jëucuayã tuchi serĩ. ¹⁰ Ae siqui quia serui nae, ùquĩ tubiriã nda hui sesi ùquĩ mose cote. Ùquĩ nda nyiucuayã. Ùquĩ nda nguerecua mbuqueta queta tuchi ngõngue riĩ. ¹¹ “Dios cheë mbuchecuada chõ se re”, i ra mbia ñee ata atate jëje. Ùquĩ nda mbia mbiiĩ irĩ tuchi. ¹² Mbia icuã icuã tuchi ra cote. Aba cheë mumba mumba beite ra cote. Mbia ra nyecua eã tuchi nyiese cote. ¹³ Ae ra siqui bei serese, ùquĩ nda Dios mingo bei. ¹⁴ Sequiato r a Dios cheë turã senei senei ná mbia ja je nyii. Mangue chooñoã jenda ja je. Aquere ra mbae ua ja cote.

¹⁵ Dios cheë mbuchecuada rei Daniel. Ae que embesa Mbae Mbutiãsa İcuã ñi nda. “Dios rendaque re taico se quiato”, i ra equia huee. (Ae ra mae nguia sechimbesa rese nae, sã ùquĩ eicua.) ¹⁶ Jemae mose Mbae Mbutiãsa İcuã ndese, jeña esi. Ae siqui quia Judéaa, sã ùquĩ uchã jei choi ibi ibátee mo. ¹⁷ Ae ra siqui tuchia quite rese, sã ùquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocõĩ. ¹⁸ Ae ra siqui úcoo, sã ùquĩ nyebiã ngaë huĩrao rea. Sã hue si bei chõ echoi uchã. ¹⁹ Aba mbia eã tuchi ra emo ãquë ndiru rerequia mose aque mose. Nguiirĩ mbuquiambu je abe no. ²⁰ “Nyiseĩ mose eã urechã” jenyete Dios je. “Sábado mose eã abe urechã”, jenyete abe Dios je no. ²¹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²² Ae rasi ra mbia saã tuchi nae, ùquĩ nda Dios mbujua jiri uquiato riĩ. İ nda emo ñimbirãcuã eã tuchi rei ùquĩ ndasi je. ²³ “A Cristo riqui a jë” i mose emo jëje, “nyia” jenyechĩ nda ùquĩ ñee mose jë.

“Hue Cristo riqui hue jě” i mose emo jěje, “nyia” jenyechĩ nda eno jě. ²⁴ “Cristo chõ se re”, ichõiño nda mbia ñee ata atate jěje. “Dios cheẽ mbuchecuasa chõ se re”, ichõiño nda mbia ñee ata atate jěje no. Mbia mae sayã nda esaã saã tuchi mbia mbiĩrĩ irĩ sacuã. Ūquĩ Dios quiato abe chee mbiĩrĩ irĩ arõte. ²⁵ Ūquĩ nonde chõ aico nguiã jembiiirandu randu co. ²⁶ “Hue Cristo riqui turuquia hue”, ichõiño nda mbia jěje serĩ. “A Cristo riqui tuchia a”, ichõiño nda emo jěje serĩ no. Ūquĩ mose ra “nyia” jenyechĩ jě. ²⁷ Sã ama ndiqui pirirã i ibei resae ja no, eĩ nda sechu mose. Mbia ra mae ja serese. ²⁸ Sã urubu riqui mae ja mbae raaque rese no. Eĩ si ra seicuasa mae ja sechu rese no.

Dios riirĩ nda tube ibate s̃

²⁹ Mbia ūquĩ ndasi raã ja mose r a tenda checuayã mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese. ³¹ Angeles serimba ra amondo corneta mbucheẽ sacuã. Ūquĩ nda mbia sechiisirõ munua nua ja seje cote. Ishonda ja. Mangue chooñoa jenda ja.

³² Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, i chõ mbia nguiã aque mose. ³³ Eĩ s̃ ra mbae ua ja nonde. Ae riĩ aico ñee jěje nae, ūquĩ ndese jemaie mose, “mbae ra ua ja cote” jenyera cote. ³⁴ Tacheẽ nyecua jěje. ã mbia riqui ngata ibi ã nae, ūquĩ emo emo nda manoã mbae ua ja nonde. ³⁵ Ibei ra ua. Ibi abe ra ua no. Secheẽ nguia ra ua eã mbei.

³⁶ Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba m̃ ño eicua nguiã co. ³⁷ Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no. ³⁸ Sã Noé mosenda mbia quiaru chooño no. Ndua rocoĩ Dios rese. Ngũinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia nyeremo siqui úcoo. Co m̃ nda arao. Enongue ra siquichõ. ⁴¹ Cuña nyeremo nd a chi raque mbua tocho no. Co m̃ nda arao. Enongue ra siquichõ. ⁴² Jětesa bei quiatu quia serese. Ae mose ra achu, aque tenda rese jěiranuate riqui ã. ⁴³ Mbaecha mo jirandu mose mbae mbuquiachãsa rese, “co isa ra eru” i mose, ūquĩ mose nda uqueã nde chaẽ. Ĩ nda mbae mbuquiachãsa mbae sirõ eã ndei. ⁴⁴ Jěingoquiato bei quiatu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

⁴⁵ Dios rimba aba cheẽ mumbayã je aico ñee a. Dios rimba aquiato je aico ñee a. Sã ererecua mo ñee ngũimba turã je no. “Sembae esaarõ turã ja quia secutiã. Serimba ataque embuquiari quiaru turã secutiã”, i que ererecua ee ra. ⁴⁶ Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngũimba m̃ umbae raarõ mbei sacuã cote. ⁴⁸ Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹ Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icuã ndese cote. ⁵⁰ Sã ererecua ruchĩ nguia ngũimba mbuate aque mose cote jě. ⁵¹ Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ūquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quiti tuchi.

Nyucuaaque icoquiato je

25 Nyucuaaque icoquiato je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoĩ ja quia ra. ² Cinco que icoquiato je ra. Cinco que icoquiato je no nda. ³ Ae icoquiato nae, ūquĩ ngue mbae quira curuchoĩ eã umbae lamparina mombisẽ sacuã nda. ⁴ Ae icoquiato nae, ūquĩ ngue mbae quira curuchoĩ botella ye ra. Lamparina ye abe. ⁵ Ae ra ngũinisi isi reĩ nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jě. Jěso mae erese cote”, i que mbia tasẽ tasẽ ee ra. ⁷ Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸ Ae icoquiato nae, ūquĩ ngue ñee ndei icoquiato je ra. “Urembae uque uquete. Mbae quira ñetẽ jemee mee na ure je”, i rei que uataque je ra. ⁹ “Ateẽ. Nande ja chayãte ra resẽ. Emo jěisi chõ oso icua”, i que icoquiato je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiato je que nyoĩ ique erese ra. Ngũinisirã isi ramo ndese mae. Quiaru abe que echoĩ erese ra. Eiquesa que ematã cote ra. ¹¹ Icoquiato je abe que ngaẽ nyee ra. I que eiquesa matã ji m̃ ee ra. “Embuquiata rã ure je”, i rei que ñee eru je ra. ¹² Eru que ñee ee ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ —Jěingoquiato bei quia jě. Ae mose ra achu, ūquĩ jěicuayãte quia ã.

Ererecu a mbae isiquia mbuchao chao ngũimba je

¹⁴ Sã ererecua mo mbae isiquia mee mee ngũimba je no. Eĩ si chõ Dios nguiã mbae mee mee ngũimba je.

Ererecua oso serĩ mose que umbae mbae isiquia mee mee ngũimba je ra. Embaata ata sacua ño ngue emee nguiã ee. ¹⁵ Cinco mil que emee emo je ra. Dos mil enongue je no. Un mil que enongue je no nda. "Jenya chõ tamee mee jẽje jẽ", i que ñee ee ra. Secha que oso isho cote ra. ¹⁶ Ae je ererecua cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. ¹⁷ Ae je ererecua dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. ¹⁸ Ae je ererecua un mil mondo nae, aque que ibi sibi-coi mbae isiquia rerecoquiato sacua nda. ¹⁹ Emo mose tuchi que ererecua ru cote ra. Ñee ngue ngũimba je cote ra. "Jenyu sembiirandu sembae mbae isiquia rese cote", i que ñee ee ra. ²⁰ Ae je cinco mil mondo nae, aque rane ngue tu ñee nguerecua je ra. "Cinco mil que ereme ndei seje nae, ũquĩ ngue ambaata ra. Cinco mil que aisibe ra", i que emee ja nguerecua je ra. ²¹ Ererecua que ñee ee ra. "Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote", i que ererecua ñee ee ra. ²² Ae je ererecua dos mil mondo nae, aque que tu ñee nguerecua je cote ra. "Dos mil que ereme ndei seje nae, ũquĩ ngue ambaata ra. Dos mil que aisibe ra", i que emee ja nguerecua je ra. ²³ Ererecua que ñee ee ra. "Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote", i que ererecua ñee ee ra. ²⁴ Ae je ererecua un mil mondo nae, aque que tu rei ñee nguerecua je cote ra. "Nde que ere queteãte quiato nguiã mbae rese. Ndechitiquia eã abe ereishao shaote quia co. ²⁵ Nyebe asiquiche tuchi nguiã mbae isiquia mee mose seje. Nyebe ahati nguiã ibi je. Co é co resẽ", i que ñee nguerecua je ra. ²⁶ Ererecua que ñee ee ra. "Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? ²⁷ Sembae mbae isiquia eremonaõ ñochĩ banco. Ñ nda eata jiri sechu mose cote re chã", i que ererecua ñee asite ee ra. ²⁸ Ererecua que ñee mbi a hue jenda je cote ra. "Mbae isiquia jẽsirõ na esi un mil. Ae diez mil quereco nae, aque je jemondo. ²⁹ Ae embae tubiriãte nae, aque je mbae tamondobe. Ae embae ãte nae, embae ñetẽ tasirõ ja esi. ³⁰ Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Ureĩ nda equiti quiti tuchi", i que ererecua ñee nda.

Jesús ra mbia emo emo mingo icúe umbaerã

³¹ Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. ³² Mbia mangue chooñoa jenda ja ra chi

ñumunua huee aque mose. Mbia emo emo nda achono icúe sembaerã aque mose. Sã oveja raarõsa riqui ovejas no icúe chivos si no. ³³ Uquiato cuti ra ovejas no. Uquiato cutiã nda chivos no no. ³⁴ Eĩ ae ra se mbia rerecua tuchi mose. Acheẽ nda mbia sequiatio cutinda je. "Jenyu serese. Jenderecua turã tuchi ra aico jẽje. Paba turãte riqui jẽje co. Paba que jẽirabo nyii mbae ao nonde ra. Jẽingo sacua serese. ³⁵ Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. ³⁶ Seirao eã mose que tiru jemee seje ra. Serasi mose que jẽso mae serese ra. Seico mose cárcel que jẽso mae serese no nda", ae ra ñee sequiatio cutinda je. ³⁷ Sequiatio cutinda ra ñee seje cote. "¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?" i tuchi ra ñee seje. ⁴⁰ Aque mose ra acheẽ ee. "Tacheẽ nyecua jẽje. Senongue mo mbaech a reã ndaque. Ae turã jẽsaã senongue mo je nae, seje eraã naanguia chõ ũquĩ nde", ae ra ñee ee. ⁴¹ Acheẽ nda sequiatio cutiã quitinda je cote. "Jẽso sesi. Mbae turã nda jẽisiã seo jenda. Jẽso tata cuásuu. Ae Dios chiao tata, diablo mbasi sacua. Diablo rimb a abe mbasi sacua. ũquĩ tata ra uqueã mbei. ⁴² Seriãcuã mose que mbae mo jemee eãte seje ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jẽso eãte mae serese ra. Seico mose cárcel que jẽso eãte mae serese no nda", ae ra sequiatio cutiã quitinda je. ⁴⁴ Sequiatio cutiã quitinda ra ñee seje cote. "¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?" i ra sequiatio cutiã quitinda ñee seje. ⁴⁵ Acheẽ nda ee. "Mbae turã jẽsaã eã mose emo je, seje eraã eã naanguia chõ ũquĩ nde", ae ra sequiatio cutiã quitinda je. ⁴⁶ ũquĩ nda nyoi ja tata cuasu cote. Huee ra mbae rasi raã mbei tuchi cote. Sequiatio cutinda quia ra siqui turã mbei ibate cote, i que Jesús ñee nda.

Jesús nandeisi tarõ, i ja ererecua nyue

26 Aquere que Jesús ñee uchimbaaquiato je cote ra. ² —Dos días mose ra fiesta de la pascua cote.

Aque mose ra mbia icuã semee ererecua je seiquia sacua, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. ũquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ũquĩ

nyi ñee ñee Jesús rĩĩ nda. —Jesús nandembĩĩĩ irĩĩ jě. Eisi sacuaã. Etarõ sacuaã. Eiquia sacuaã cote, i que u ñee ñee nyue ra. ⁵ —Fiesta mose eã ño nandeisi jě. Mbia ra paama i tuchi nande je, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

⁶ Jesús que siqui Simón Leproso chuchúaa ra. Beta-nia, i que hue je ra. ⁷ Cuña mo ngue tu erea hue ra. Aba mbusimbusa mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ũquĩ nda. Ichusẽ ja que Jesús ãquĩ ndese equiaru mose ra. ⁸ Echimbaaquiato que chi ja mae erese ra. Paama i que cuña je ra. ⁹ —¿Mbaerã eichusẽ ñooño nde? Mbae isiquia ribishorõ ño nda aba emondo re. Mbaecha reã je emee mee sacuaã, i que echim-baaquiato ñee nyue ra. ¹⁰ Jesús que echeẽ ñandu ra. Ñee ngue ee ra. —¿Mbaerã jěingo ñee ũquĩ nde? Sã cuña ae riqui ae. Ae esaã seje nae, eturãte seje ũquĩ. ¹¹ Mbaecha reã nguia ra chi arete íbii a. Se quia nda aico bei eã nguia jendese aa. ¹² Seati nonde chõ ngue cuña aba mbusimbusa ichusẽ nguia serese. ¹³ Tacheẽ nyecua jěje. Mbia Dios cheẽ turã nenei nenei mose mangue chooño jenda ja je, cuña nyisaã abe ra esenei senei. Mbia ndua turã ja sacuaã echisaã abe rese, i que Jesús ñee uchimbaaquiato je ra.

Jesús tamee jěje, i Judas mbia icuaã je

¹⁴ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. ¹⁵ —Jesús tamee jěje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶ —Mbia eãsa quiato Jesús tamee jěje, i que Judas ñee ee ra.

Jesús quiaru uchimbaaquiato rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiato ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jěso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiato rese semano nonde’, i que Jesús ucheẽ mbu ndeje ra”, jenyee aque je, i que Jesús ñee nda. ¹⁹ Echimbaaquiato que nyoĩ erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiato rese huee cote ra. ²¹ Quiaru mose que Jesús ñee ee cote ra. —Tacheẽ nyecua jěje. Jemo nda semondo mbia icuaã je, i que ñee uchimbaaquiato je ra. ²² Echimbaaquiato ia eã tuchi que echeẽ mose ra.

—¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chĩ quiaru serese aque plato ye sí a nae, aque tuchi ra semondo mbia icuaã je. ²⁴ Dios cheẽ ndui sí tuchi ra amano ndaque. Ae ra semee mbia icuaã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra. ²⁵ —¿Se ra aremondo mbia icuaã je re? i que Judas ñee Jesús je ra. Jesús rĩĩ ñeende mbia icuaã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —¿Mbichae jěu. Serete chõ ã nde, i que Jesús ñee ee ra. ²⁷ Vino mbeisa que esirõ cote no nda. Gracias i que Dios je ra. Mondo que uchimbaa quiato oo cote ra. —Jembeĩ mbei ja. ²⁸ Seruqui chõ ã nde. Mbia icuaã mbutiã sacuaã ño seruqui re. Dios cheẽ yasu rui si chõ seruqui riqui nguia mbia icuaã mbutiã co. ²⁹ Tacheẽ nyecua tuchi jěje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia jendese cote, i que Jesús ñee nda.

Jesús aicuayãte resẽ, ichõño nda Pedro serĩĩ, i Jesús

³⁰ Irasei rasei que cote ra. Nyoĩ que Monte de los Olivos ra. ³¹ Jesús que ñee uchimbaaquiato je ra. —Jěireĩ ireĩte ra serĩĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoĩ cote”, sã embesa ji riqui i no. ³² Seraaque quera sire ra aso se rane jendaarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩĩ namo, Pedro. “Jesús aicuayãte resẽ”, ere chooño ño nda serĩĩ, i que Jesús ñee ee ra. ³⁵ Pedro que ñee ee ra. —Mbia seiquia arõte raque nderĩĩ, acheẽ ñooño eã nda nderĩĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemaní cote ra. Uchimbaaquiato rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷ Pe quiti jiri que Pedro rerao ra. Zebedeo riirĩ nyeremo ndese. Eya eã ndasi tuchi que tu ee aque mose ra. ³⁸ Ñee ngue ũquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jě aa. Jětesa tesa bei u aa, i que Jesús ñee ee ra. ³⁹ Jesús que oso pe quiti jiri cot e ra. Nyibi que u ngũĩã ndese ñee Dios je ra. —Paba, ũquĩ ndasi asaã sereãte raque quia co. Ae sebite riqui nae, ũquĩ ndese semingo eã. Ae ndebite riqui nae, ũquĩ ndese quiato semingo, i que Jesús ñee Dios je ra. ⁴⁰ Nyebi que u uchimbaaquiato je cote ra. I que eu uque ja ee cote ra.

Ñee ngue Pedro je ra. —Jëingo areã ñochĩ tesa serese se ñee mose Dios je. ⁴¹ Jëtesa tesa u. Jengue eã u ñee Dios je. Mbae icuã tã i eã sacuã jëje. Jëingo serete raque serese. Mbae icuã nguiatu jembuti mbutite nguiã, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra esaã” nde i mose seje, asaã nda se, i que ñee Dios je ra. ⁴³ Nyebi que u uchimbaaquiatu je cote ra. I sí que u uque ee no nda. Eresa quiatu ngue eshiu shiute nguiã. ⁴⁴ Jesús que osobe erecha ñee Dios je ra. Tres veces que aque cote ra. Hue rĩ si que ñee Dios je ra. ⁴⁵ Uchimbaaquiatu jii que esi ñee ee cote ra. —Jengue cote. Jenguenea jëucua cote. Semondo ra mbia icuã je cote. Sei quia sacuã. ⁴⁶ Jëhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchimbaaquiatu je ra.

Mbia icuã Jesús isi suruchoi

⁴⁷ Jesús cheẽ mosebe tuchi que Judas ru erea ra. Jesús chimbaaquiatu rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ùquĩ mbucuaẽ nguia reaẽ. Amei abe. ⁴⁸ Judas ñee nyecuayã nguiatu quia ùquĩ je nyii reaẽ. —Ae ritii ra asiite, aque chõ ñene. Aque jëisi serao, i quia equia ee nyii reaẽ. ⁴⁹ Jesús rĩchã ngue esi saluda i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra. ⁵¹ Ùquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuu-ru emingue chõ eriru ye. Nde emo nyiisha mose tiquise je, nde abe ra emo ndeisha. ⁵³ ¿Ndeiranuate án-geles rese re? Se ñee mose Paba je, ángeles tubiriã tuchi nda embu seje re chaẽ. Sereaquiatu sacuã. ⁵⁴ “Ángeles embu rã sereaquiatu”, ae eã nda Paba je. Ùquĩ mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiatu quiatu bei rei quia huee resẽ. ¿Mbaerã seisiã nyucua aque mose re? ⁵⁶ Embesa ji ique sacuã ño jëicuã icuã ndiqui nguiã seje ã, i que Jesús ra. Echimbaaquiatu que nyoĩ ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ùquĩ ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasẽ nyee que sacer-

dote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huĩ ngoi eraarõ arõ nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandei quia, i rei que ñee ñee nyue ra. —¿Mbae i ra aba mbia je Jesús rĩcharã nde? i rei que u ñee ñee nyue ra. ⁶⁰ Emo emo ngue ngaẽ ndei ñee icuã icuã Jesús rĩ nda. Ùquĩnde que mbia nyeremo ngaẽ ñee ñooño Jesús rĩ nda. ⁶¹ —Jesús que ñee ñooño Dios chuchua rĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ùquĩ ñee ñooño Jesús rĩ nda. ⁶² Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que Jesús je ra. ⁶³ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Diósaa echeẽ ure je, i que sacerdote rerecua ñee ee ra. ⁶⁴ Jesús que ñee ee ra. —Ae. Dios rucucha chõ se re. Tacheẽ nyecua jëje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵ Sacerdote rerecua que paa- ma i tuchi Jesús cheẽ mose ra. Huĩrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ⁶⁶ ¿I jëje re? ¿Mañi nande ra equia re? i que sacerdote rerecua ñee ererecua ataque je ra. —Eicuã tuchi que ra jë. Sã mbia ei quia, i jate que ererecua ñee Jesús rĩ nda. ⁶⁷ Mbia que ñinimbu nimbu Jesús ruba rese cote ra. Ucua ucua abe que erese ra. Emo emo ngue eritii mbeete ete o je ra. ⁶⁸ Ñee ngue ee ra. —“Cristo chõ se re”, ere ñi equia. Aba chõ ucua nderese chã. Ma eicua no, i que mbia ñee icuã icuã ee ra.

Jesús aicuayãte reseẽ, ichõño Pedro

⁶⁹ Pedro que chĩ mbeite ngoi itaicuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõño ngue Pedro mbia résaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbia je erĩ nda. —Co abe que Jesús resenda ra. Nazaret jenda, i que ñee mbia je ra. ⁷² —Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ùquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chi cuate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serĩ, sã Jesús i ee nyii no. Ùquĩ ndese que

Pedro ndua cote ra. Nyebe esi nguiã usẽ nyeseo tuchi.

Mbia Jesús curuchoi Pilato je

27 Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacuaã. ² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchoso mumbi nyĩquia

³ Mbia ra Jesús iquia, i mose Judas je, eya eã tuchi que ũquĩ mose ra. —Jesús amee jirichĩ nguiã mbia je, i que ra. Nyebe mbae isiquia mondobe nguiã sacerdote rerecua je. Amei ererecua je abe no. ⁴ —Mbae icuã tuchi asaãchĩ. Jesús seteã tuchi ameechĩ jẽje. Eiquia sacuaã, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo íbii ra. Dios chuchúaa. Oso que uchoso mumbi nyĩquia cote ra. ⁶ Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacuaã nda. Ñionga, i que hue ibi je ra. ⁸ Nyebe eriqui nguiã “mbia ruqui rua” i bei hue je. Namu nyee. ⁹ Aque mose que Jeremías ñimbasa ique cote ra. ã ndei Jeremías ñimbasa ã:

Ūquĩ mbae isiquia treinta que eisi cote ra.

Ūquĩ ndei mbia ribishoronda ũquĩ.

¹⁰ Ūquĩ mbae isiquia que emondo hue ñionga ribishorõ cote ra.

Dios ñee nguia erĩ seje nyii nae, ũquĩ ndui si, i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra.

¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra.

¹³ —¿Erechanuãte equia ñee mose nderĩ nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pasqua mose ra. Co mii ngue embusẽ mbusẽ mbei quia pasqua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra.

¹⁶ Barrabás, i que etarõ ji mo je ra. Mbia chũcua tuchi que ae ra. ¹⁷ Mbia ñumunua ja mose que Pilato ñee ee ra. —¿Aba ra ambusẽ mondo jẽje re? ¿Barrabás ra re?

¿Jesús ra re? i que Pilato ñee ee ra. ¹⁸ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹⁹ Pilato que chĩ ngoi ndua ndua ngũenda tose ra. Eninisi que ucheẽ mondo ñee ee ra. —Ehui chõ Jesús si jẽ. Mbae icuã ngue esaã eãte resẽ. Atea que seque re isa ra jẽ. Seque re icuã tuchi que aa ra jẽ, i que Pilato ninisi ñee ngu je ra.

²⁰ Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusẽ mondo jẽje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuã esaã nde? i que Pilato ee ra. —Embucha ira rese jẽ, ibe que mbia tasẽ tasẽ ee ra.

²⁴ —Mbia riqui “Jesús eiquia” i i tuchichĩ, i que Pilato ndua ndua ra. —I mo embu seje, i que mbia je cote ra. Nyoĩ que mbia résa cote ra. —A aico nyoĩ a. Se ra Jesús aiQuiayã. Eseteãte quiatu ngue re. Jẽ nguiatu jẽingo erese, i rei que Pilato ñee mbia je ra. ²⁵ Mbia que ñee ja Pilato je ra. —¿Eiquia jẽ! Eicuãte que eriqui ra jẽ. Dios ra paama i eã eiquia mose. Dios paama i mose, sã ure je quiatu paama i. Ureirĩ je abe no, i jate que mbia Pilato je ra. ²⁶ Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸ Jesús irao que embui esi ra. Tiru ireĩ nguiatu ngue emingue nguiã ee cote. ²⁹ Nyu ritiméi uma ji que emii eãquĩ ndese corona nda. Ira ñetẽ mo abe que emondo éoo ra. Ngoi ja que u ngũĩã ndese Jesús nonde ra. Ñee icuã icuã ngue u erĩ nda. —Judíos rerecua tuchi chõ nde re, ichõño ngue soldados Jesús je ra. ³⁰ Ñinimbu nimbu abe que erese ra. Ira abe que euru uru eãquĩ ndese no nda. ³¹ Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacuaã pe, i que soldados ee ra. Nguerao que ee cote ra. ³³ Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote

ra. ³⁵ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetẽ mbaba mbabare o je, i que embesa ji ra. ³⁶ Aquere que soldados chi ngoi Jesús raarõ cote ra. ³⁷ Mbia que letrero mhi Jesús ãquĩ nguĩtĩ ibate ra. *JESUS REI JUDIOS RERECUA*, i que embesa mhi nda. Ûquĩ ñhi ño eriqui nguĩã ei quia hue. ³⁸ Mbia nyeremo abe que embucha ira rese Jesús chabe ra. Jesús rereco chobei que emhi ira rese ra. Mbae mbuquiachãsa tuchi que ùquĩ nda. ³⁹ Mbia que iquia iquia chõ nguia echeẽ naa naa ecuã nda. Ñee icuã icuã ee. ⁴⁰ —“Dios chuchua ra ambucoi. Tres días mose ra ambuchuruambe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ûquĩ ngue ñee icuã icuã ja quia erĩ nda. ⁴² —Mbia que embuquera quera rei nyii ra. Ae si quia quera aroneate nguĩã aque. Judío rerecua mose ae, sã ae ae nguichi ira si. Ì nda ureicu a cote, i ja que ererecua ñee icuã icuã e erĩ nda. ⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erĩ nda. ⁴⁴ Ae mbuchai chi ira rese mbae mbuquiachãsa nae, ùquĩ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda cheseco mose que Jesús ñeemombo cote ra. —Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguĩã. ⁴⁷ —Elías je eriqui “quiatuchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chũruu cote ra. ⁴⁹ —Esecha rei. ¿Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda. ⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ùquĩ ndaaque usẽ nyoĩ cote ra. Nyoi que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chĩ mae Jesús rese ra. Soldados abe no. Ûquĩ ngue siquichete Jesús mano mose ra. Ibi chere mose. Mae mose mbae ja rese.

—Dios ririĩ ño eriqui re, i jate que soldados ñee erĩ cote ra.

⁵⁵ Cuña ngue chi jate mae Jesús rese isho ra. María Magdalena abe que chĩ huee ra. María abe no. María rei Jacobo si. José abe si. Zebedeo ririĩ si abe que chĩ erese huee ra. Ûquĩ ngue siqui bei quia Jesús rui ra. Echiurã ngue emhi mhi mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸ —Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Ñuma ngue tirushĩ mo je ra. ⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoi que erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ûquĩ ngue nyoĩ ñee Pilato je Jesús rĩ nda. —Urendua nduachĩ nguĩã ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echi bei tres días eraarõ huee. Ì nda echimbaaquiatu eraaque siroã suruchoi. “Quera si que ra” ¡chĩ nda ñee ñooño mbia je jẽ! Ûquĩ mose ra mbia mbiĩrĩ irĩ tuchi cote, i que ñee Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jẽ, i rei que soldados je cote ra.

Jesús raaque quera si

28 Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdaaleña, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³ Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴ Soldados que titi titi i tuchi chõ mae ùquĩ ndese ra. Emundi tuchi que ra. ⁵ Angel que ñee cuña je ra. —Jësiquiche quichechĩ nguĩã. Jëingo raque Jesús raaque requia ã. ⁶ Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷ Jëso asi rã echimbaaquiatu mbiirandu equera si rese. “Jenonde ra esi Galilea. Jemae nda erese huee”, jenyebiirandu. Ûquĩ ae chõ ngue u nguĩã jëje, i que ángel cuña je ra.

⁸ Cuña ngue siquichete echeẽ andu ra. Eyate abe que ra. Uchã ndei que echoi quia Jesús chĩmbaaquiatu mbiirandu ra. ⁹ Ñeenda cúa chõ ngue Jesús nyecua saludar i ee ra. Cuña ngue nyoĩ oo erese ra. Jesús i que equiaama ama nda. ¹⁰ Jesús que ñee ee ra. —Jẽsiquichechĩ nguiã sesi. Jẽso ñee seresenda je. “Jẽso rã Galilea. Hue ra jemaẽ Jesús rese”, jenyẽ oso ee, i que Jesús ñee cuña je ra.

Soldados ñee ñooño Jesús raaque rĩĩ

¹¹ Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae nae, ãquĩ ngue esenei ja ee ra. ¹² Sacerdotes rerecua que nyoĩ ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³ —Jeñee ñooño mbia je jẽ. “Ureque mose Jesús re-senda eraaque suruchoi rei sirõ”, jenyẽ chooño mbia je jẽ. ¹⁴ Pilato jirandu mose jendese, urecheẽ nda ee. Paa-ma iã nda jẽje chã, i que ererecua ñee ja soldados je

ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chĩmbaaquiatu que eraaque sirõ cose ra, nyebe eriqui nguiã i bei ã cote.

Jesús uchĩmbaaquiatu mondo mbia mbiirandu

¹⁶ Jesús chĩmbaaquiatu once que nyoĩ ja Galilea ra. Ibi ibate mo ngue echoi Jesús cheẽ nguire ra. ¹⁷ Jesús que nyecu a ee huee ra. Jesús rese mae mose que ngoi ngũĩã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si eriichã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jẽso mbia mbaaquiatu quiatu ja serĩĩ. Mbiamangue chooñoa jenda ja. Bautizar jenyẽ ee Paba rĩĩ. Serĩĩ abe. Espiritu Turã ñi abe no. ²⁰ Jembaaquiatu quiatu tuchi secheẽ ñi. Ae asenei senei nguia jẽje nae, ãquĩ jẽsenei senei ja ee. Secheẽ mumbayã sacua. Aico bei ra se quia jendese. Mbae ua ja chee, i que Jesús ñee ee ra. Amén.

SAN MARCOS

Juan el Bautista Dios cheẽ senei senei

1 ã tasenei na jẽje. Dios cheẽ turã Jesucristo riĩ. Jesucristo rei Dios riirĩ. ² Sã Isaías Dios cheẽ mbesa cose no:

Secheẽ nderaosa amondo quia nderẽta aque.

Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenyẽ si chõ nguia jẽ abe ico quiatu nandererecua raarõ arõ”, i equia turúquiaa hue,

i que Isaías embesa ra. ⁴ Juan el Bautista que tu ùquĩ ñee nguire cote ra. Dios cheẽ ngue esenei senei nguia turúquiaa cote ra. —Jendua si Dios rese. Jẽhui chõ jẽicuã si. Dios jẽicuã mbutiã sacua. Ùquĩ mose nda bautizar ae jẽje chã, i beite que Juan nguia ñee nda.

⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Mbia huĩcuã nenei nenei mose Dios je, ùquĩ mose que Juan ndiqui bautizar i ee ra. Ama Jordán ye. ⁶ Quiicuã mbuaera chõ ngue Juan irao ra. Camello. Mbae ire chõ ngue enumbicuasa no nda. Tucu mbuae chõ ngue eu eu quia ra. Irao quiaa riinda abe. ⁷ Dios cheẽ ngue esenei senei nguia ra: —I achõ je chõ aico nguia bautizar i mbia je co. Co chi emo ndu quia serui co. Dios riirĩ tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usẽ oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rã ngue eru nguichi erese ra. ¹¹ Ibei jenda que ñee ee ra. —Serirĩ ño nde re. Sechesequa chõ nde re. Seyate nderese, i que Dios ñee ee ra.

Jesús tambii cuã, i raque Satanás

¹² Espiritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia riichare ja ite re. Satanás que tu rei tã

i ee cote ra. Angeles que ngaẽ ngaẽ nguia ereaquiaturã.

Jesús mbia mbaaquiaturã quiatu ramo

¹⁴ Mbia rerecua que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra. ¹⁵ —Achite Dios ñi tu mbia rerecuarã a. Jendua sí Dios rese. Jẽhui chõ jẽicuã si. Dios cheẽ turã jẽicua. Ì nda Dios jemingo bei, i que Jesús quia ñee mbia je ra.

Jẽingo serui, i Jesús uchimbaaquiaturã je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ùquĩ. ¹⁷ Jesús que ñee ee ra. —Serui bei chõ jẽingo jẽ. Taembaaquiaturã quiatu. Mbia teendu endu bei quia seje cote, i que ee ra. ¹⁸ Nyoĩ ja que erui ra. Sira mbuasa si que echoi hui ra. ¹⁹ Pe jiri que mae Jacobo rese ra. Enongue rese abe. Juan, i equia ee. Zebedeo riirĩ ja rei ùquĩ. Huee que echi ja canoa ye sira mbuasa mbitirõ tirõ nda. ²⁰ —Jẽingo serui, i que Jesús ñee ee ra. Echeẽ nduibe tuchi que echoi erui ra. Ngu que esecha choi ra. Eru que siquichõ canoa ye ngũimba rese ra.

Jesús aba checuayã icuã jea mbia mo si

²¹ Nyoĩ que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiaturã quiatu sacua. ²² Mbia rerecua rã ño ngue eriqui mbia mbaaquiaturã quiatu ra. Embesasa rã eã. Nyebe mbia riqui nguia nyuruira tuchi echeẽ andu. ²³ Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra. ²⁴ —¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã ñee asite ee ra. ²⁵ Jesús que ñee asi ee cote ra. —¡Equiriri chõ jẽ! Esẽ oso amei ñiangui si, i que ee ra. ²⁶ Jesús cheẽ mose que aba checuayã amei mburirite cote ra. Tasẽ ngue oso usẽ amei si cote ra. ²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiaturã

quiatu ucheẽ namonda je co. Equirãcuã ae ñee nguiã. Mbia rerecua rã ño eriqui nguiã ñee aba checuayã icuã je co. Sã aba checuayã echeẽ mumbayãte jẽ, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹ Jesús que usẽ nyoï mbia chumunuasa si cote ra. Nyoï que Simón nyuchua ra. Andrés abe que siqui rei huee tuchia ra. Jesús que ique nyoï huee ra. Jacobo rese. Juan ndese abe no. ³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

³² Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco quia nae, ùquĩ abe que ecurucuaẽ cuaẽ tuchi quia ee ra. ³³ Sucha tubiriã jenda ja que chi ñumunua eiquésaa ra. ³⁴ Mbia rasi chumumbara que embucherõ cherõ ja ra. Aba checuayã icuã tubiriã ngue ejea jea quia mbia si ra. Aba checuayã ngue Jesús icuate rei ra. Nyebe Jesús riqui nguiã echeẽ ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiãsaa ra. Ñee sacua Dios je itondaru bei mose. ³⁶ Simón ngue oso erui emuña nda. Nguesenda rese. ³⁷ Ngasẽ ngue ee ra. —Pe mbia chi nderequia jate pe, i que ee ra. ³⁸ Jesús que ñee ee ra. —Nyao sucha tubiriã mbuchesea sea achi jenda. Dios cheẽ nda asenei senei ee chã. Nyebe achu nguiã, i que ee ra. ³⁹ Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasẽ Jesús je ra. Leproso, i que ùquĩ erasi je ra. Tu que ngoi ngũĩã ndese ñee Jesús je ra. —Nde sembucherõse mose, sembucherõ se, i tuchi que ñee ee ra. ⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra. ⁴² Echeẽ nduibe tuchi que nyerõ cote ra. ⁴³ Jesús que ñee ee ra. —Sã jẽ. Erecheẽchĩ nda emo je jẽ. Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

Jesús emi sayã mo mbucherõ

² Emo mose jiri que Jesús nyebi Capernaum nda. Echuchua ereco mose que mbia jirandu erese ra. ² Mbia tubiriã ngue ñumunua ee ra. Mbia chayã tuchi que ra. Ei quesa abe itãyã tuchi que ra. Dios cheẽ ngue esenei senei tuchi quia ee ra. ³ Mbia cuatro que erasi mo curucuaẽ ee ra. Emi sayã. ⁴ Mbia tubiriã ngue tuchia mbiitãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra. ⁵ —Erurucuaẽsa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuã ambutiã nguia ndesi a, i que ee ra. ⁶ Embesasa mo abe que chi echeẽ andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ùquĩ nde? Ñee icuã icuã ñochĩ equia Dios rĩĩ co. Dios ibatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús rĩĩ nda. ⁸ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹ ¿Ma mbaranguiatuã eã jiri jẽje re? ¿Mbia icuã mbutiã esi ere? Mbia rasi mbucherõ ere no ae. ¿Ma mbaranguiatuã eã jiri jẽje re? ¹⁰ Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra. ¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuraira erese ra. Mbia que ñee turã jate Dios quirãcuã ñi cote ra.

Serui bei eico, i Jesús Leví je

¹³ Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiato quiatu ra. ¹⁴ I que Jesús oso quia ra. Mae ngue Leví rese ra. Alfeo ririĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguiã erui.

¹⁵ Jesús que nyoï quiaru erese ra. Impuestos isi isiquia ata que chi quiaru erese huee ra. Echimbaaquiato abe rese. Mbia icuã mo abe que chi quiaru erese no nda. ùquĩ tubiriãte que siqui erui ra.

¹⁶ Fariseos que ñee icuãte Jesús chimbaaquiato je ra. Embesasa abe que ñee icuãte ee ra. —¿Mbaerã Jesús riqui quiaru mbia icuãte rese re? i que ñee nda.

¹⁷ Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ra.

Jesús chimbbaaquiato hui áte uchiu si

¹⁸ Juan ñimbbaaquiato que hui uchiu si aque mose ra. Fariseos chimbbaaquiato abe no. Nyebe mbia ngaë nguiã ñee Jesús je. —¿Mbaerã ndechimbbaaquiato abe riqui hui áte uchiu si re? i que ñee Jesús je ra. ¹⁹ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. ²⁰ Sã eru riqui mano emo mose no. Aque mose ramo nguiatu ra equiato hui uchiu si cote. ²¹ Sã emo ndiqui tiru yasu miñ aroneate tiru ima sorei rese no. Eyasu ra nyaacua quiata eima si. Soro icoi tuchi chõ nda cote. ²² Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. Mbaeri yasu quia nda equerecoquiato nguiã mbae ire yasu ye. Soroã sacua, i que Jesús ñee ee ra.

Jesús chimbbaaquiato mbae a ishao shao sábadó mose

²³ Sábadó mose que Jesús si quia mbiaco ite ite rĩ emo mose ra. Echimbbaaquiato que quiata a nyiqui nyiqui choi quia eru ra. ²⁴ Fariseos mo ngue ñee ee ra. —¿Mbaerã ndechimbbaaquiato riqui mbae ishao shao sábadó mose re? Co mose chõ mbia riqui uquenea ucua resẽ, i que fariseos ñee Jesús je ra. ²⁵ Jesús que ñee ee ra. —¿Embasa ji rese jemae eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abiatar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiatu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷ —Sábadó que Dios chao mbia mbaerã nda. Sábadó mbaerã eã ño Dios mbia ao nguiã. ²⁸ Sábadó rerecua bei chõ se re, i que Jesús ñee fariseos je ra.

Jesús emo o tomei mo mbucherõ

3 Jesús que oso mbia chumunuásaa cote ra. Hue que eo tomei mo ndiqui ee ra. ² Mbia que mae nguiatute quia Jesús rese ra. —Ma Jesús eo tomei mbucherõ. Sábadó mose raque co. Sã embucherõ. Nandechẽ icuã icuã nda ee chã, i que eu mae nguiatute Jesús rese ra. ³ Jesús que ñee eo tomei je cote ra. —Ehuã na u aa mbia ite re, i que ee ra. ⁴ Jesús que ñee mbia je ra. —¿Mbae eturãte jẽje co tenda sábadó mose re? ¿Coche nandeico mbae turã naa naa sábadó mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee áte echeẽ mose ra. ⁵ Jesús

que paama i mae mbia rese ra. Eya eãte que eriqui mbia chiã átã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶ Nyebe fariseos paama i nguiã Jesús je. Mbia mbucherõ mose sábadó mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoí Jesús rui

⁷ Jesús que oso ama ndisha quiti ra. Uchimbbaaquiato rese. Mbia tubiriã Galilea jenda que nyoí quia eru ra. ⁸ Mbia que jirandu ja tuchi Jesús chisaã turã ndese ra. Nyebe eriqui nguiã ngaë ngaë erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ūquĩ ja que ngaë ngaë nguia erea ra. ⁹ Nyebe Jesús ñee nguiã uchimbbaaquiato je. —Canoa mo jendu rã ino mbuquiche co rĩ, i que ee ra. Mbia quiatu ngue emumbite nguiã. ¹⁰ Mbia que embucherõ cherõ tuchi quia nyii ra. Nyebe erasi ataque riqui nguiã “taoco erese” i raque. Nyebe eriqui nguiã ñimaña maña tuchi. “Nandeoco Jesús rese” i. ¹¹ Aba checuayã icuã mae mose Jesús rese que ngoi ngoi quia ngüiã ndese ñee ee ra. —Dios riiĩ ndei nde, i que equia ñeemombo mombo ee ra. ¹² Jesús que ñee asite ee ra. —“Co rei Dios riiĩ co” jenyechĩ nda jẽ, i que ee ra.

Jesús mbia doce irabo uchimbbaaquiaturã

¹³ Jesús que nyuĩ oso sita ibate mo ndese ra. “Jenyu” i que uchirabobi je ra. Nyoí que erea ra. ¹⁴ Ūquĩ doce que eirabo nguesendacuã nda. Embuchao chao sacua mondo Dios cheẽ nenei nenei. ¹⁵ Uquirãcuã ngue emondo ee ra. Aba checuayã jea jea sacua mbia si. Mbia rasi chumumbara mbucherõ cherõ sacua. ¹⁶ ã ndei mbia echirabo ã:

Simón (Pedro, i abe que ee ra.)

¹⁷ Jacobo (Zebedeo riiĩ ndei Jacobo.)

Juan (Jacobó nongue rei Juan. Boanerges, i que Ūquĩ ja je ra. “Ama sieu je riiĩ” i chõ nguiã ee.)

¹⁸ Andrés

Felipe

Bartolomé

Mateo

Tomás

Jacobo (Jacobó rei Alfeo riiĩ.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ūquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoi que ique tuchúaa cote ra. Uchimbaaquiatu rese. ²⁰ Mbia que ngaë ngaë tuchi quia erea no nda. Equiaru mose rocoĩ. Echimbaaquiatu abe quiaru mose rocoĩ. ²¹ Jesús nongue jirandu mose que echoi erea ra. Equiachã eriqui reĩ nguiã ee. Nyebe eriqui rei nguiã “nanderao” i raque. ²² Embesasa ngaë nguia Jerusalén si nae, ũquĩ ngue ñee ñee mbia je ra. Mbia mbuqueta queta Jesús rĩ. —Satanás quirãcuã je chõ Jesús riqui nguiã aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheë jêje, i que Jesús ee ra. —¿Mañi nda Satanás aba checuayã icuã jea mbia si re? Erimba chõ nyesesẽ. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte e quia esi co. Dios Satanás quirãcuã mbutiã ja arõte quia co.

²⁸ Tacheë nyecua jêje. Emo siqui icuã mose, Dios eicuã mbutiã arõte esi. Emo ñee icuã mose, Dios echeë icuã mbutiã arõte no. ²⁹ Emo ñee icuã mose Espiritu Turã ni, ũquĩ icuã nguiatu ra Dios mbutiã eã mbei esi, i que Jesús ee ra. ³⁰ —Jesús chiangui re aba checuayã icuã ndiqui co, i quiatu ngue mbia nguiã. Nyebe Jesús ñee nguiã ũquĩ.

Jesús nongue ngaë erea usi rese

³¹ Jesús nongue que ngaë ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³² Mbia que chi jate ngoi Jesús jii ra. ũquĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra. ³³ —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús mbia je ra. ³⁴ Jesús que mae ucheë andusa rese ra. —Ã je chõ aico nguiã “taĩ” i. Ã je chõ aico nguiã “senongue” i no. ³⁵ Ae Dios cheë mumbayã nguia nae, ũquĩ je chõ aico nguiã “senongue” i. ũquĩ je chõ aico nguiã “taĩ” i no, i que Jesús ñee ee ra.

Emo mbae eĩ mombiquia mbiquia

4 Jesús que mbia mbaaquiatu quiatu si ama nimia ndese ra. Mbia que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiatu quiatu ra. Mbia que chi jate ama nimia ndese ra. ² Jesús que mbia mbaaquiatu quiatu tuchi quia ra. Ejemplos que esaã saã tuchi ee ra. ³ —Jenyisaquia rã serese. Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaë eu no. ⁵ Sã emo

emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaë eriquisã nda. Nyebe ia eã ño nguiã. ⁸ Sã emo ndiqui uqui uqui ibi turã no. ũquĩ nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jëisa mose, secheë jeñandu turã na, i que Jesús ra.

Jesús ucheë mbiasa uchimbaaquiatu je mbae eĩ ni

¹⁰ Mbia ataque nyoi mose que Jesús ji jenda ñee ee ra. Echimbaaquiatu doce rese. —Ndecheë embiasa tuchi rã ure je mbae eĩ ni, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei Ibatenda. Ae chõ asenei senei nguiã jêje ã. Secheë ambiasa asa bei tuchi quia jêje co. Mbia ataque quia siqui sereã erese co. Mbia ataque je aico ejemplos achõ naa naa mbei co. ¹² Eanduchõ sacua eicua turã nonde rocoĩ. Sã eriqui uba eãte Dios icha rui no. Dios eicuã mbutiã eã sacua esi, i que Jesús ñee nda. ¹³ Jesús que ñee ee ra. —¿Secheë jëicuayãte mbae eĩ ni ñee mose jêje re? ¿Mañi jenye quiatu ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheë nenei neneisa rã ño aque re. ¹⁵ Ae uqui uqui ñeenda rui nae, mbia Dios cheë andu chooñosa rã ño ũquĩ nde. Ae Dios cheë andu chooñote quia nae, ũquĩ ñiangui si chõ Satanás ndiqui nguiã Dios cheë ndirõ. ¹⁶ Ae uqui uqui sita arõ nae, mbia mo na ño ũquĩ no nde. Dios cheë andu mose, isi turã ndaque. Eyate raque erese nyii. ¹⁷ Mbia icuã icuã mose ee Dios cheë ni, hui jei chõ nguiã esi. Mbae rao eã naanguia chõ ũquĩ nde. ¹⁸ Ae uqui uqui nyu réndaa nae, mbia mo na ño ũquĩ no nde. Dios cheë andu turã ndaque. Siqui bei eã ño nguiã erui. ¹⁹ Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheë si. Nyebe Dios cheë ndiqui nguiã ia eã mbeite ee. ²⁰ Ae uqui uqui ibi túraã nae, mbia mo na ño ũquĩ no nde. ũquĩ nguiatu Dios cheë ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emi eã mbaequi re no. Erendi checua chõ nda nandemhi. Mbia resae ja sacua. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jëisa mose secheë jeñandu turã na. ²⁴ Secheë nda jeñandu chooñochĩ jê. Jê secheë mumbayã mose,

taembaaquiatu i i tuchi. ²⁵ Emo umbae rerequia mose, Dios ra embaerã mo mondobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no. ²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque.

²⁸ Dios ae chõ embusuri nguiã. Eracói rane. Ìa chee. Ea ñetẽ nane. Ea cuasute cote. Ea ireĩ cote. ²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jẽ-je. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ûquĩ mii ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiatu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiatu quiatu ejemplos je ra. Mbia quenea tuchi chee que ra.

³⁴ Ejemplos achõ ngue esenei senei mbia mbaaquiatu sacuã nda. Uchimbaaquiatu je quiatu que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiatu je ra. —Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiatu quiatu nae, aque ye sĩ que echimbaaquiatu Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñimi serĩ tuchi ee. ³⁸ Jesús que uque rei oso quia canoa ndiita quti ra. Uãquĩ ndua arõ ngue esi rei quia ra. Echimbaaquiatu que emumba ra. —Urembaaquiatu, echumumba. Nandemanochĩ nda re, i que Jesús je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiatu je cote ra. —¿Mbaerã jẽsiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruira tuchi que mae Jesús quirĩcuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

Jesús aba checuayã icuã jea

5 Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoĩte rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Ìsho que mae Jesús rese ra. Uchã asi que eu ngoi ngũíã ndese enonde ra. ⁷ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios ririĩ ño nde re. ¿Sembasichĩ nda se jẽ! i tuchi que ee ra. ⁹ —¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús je ra. ¹⁰ —Ìsho ra uremondochĩ, i tuchi que aba checuayã ñee Jesús je ra. ¹¹ Chiasu socoi tubiriã ngue chi quiaru huee ibi ibátee ra. ¹² Nyebe aba checuayã icuã ñee ja nguiã Jesús je. —Uremondo ja rã chiasu socoi chiangui re, i tuchi que equia Jesús je ra. ¹³ Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyi-ichere ama nimia mbucu rĩ nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ìshonda abe mbiirandu no. Mbia que ngaẽ ngaẽ nguia jirandu turã cote ra. ¹⁵ Ngasẽ ngue ecuaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huiirao resebe que eñi ngoi ra. Earacuate que ee cote ra. Nyebe mbia riqui nguiã siquichete. ¹⁶ Ae mae erese nae, ùquĩ ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷ —Eso rã urerecha urerecua si, i jate que hue jenda ñee Jesús je ra. ¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰ Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sem-

bucherō nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherō; ari mo abe mbucherō

²¹ Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimíaa eriquibe mose. ²² Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi ngũĩã ndese ñee ee ra. ²³ —Qui seririĩ si quia mano qui. Nyao rã ndeo terechono earō. Embucherō sacua, i tuchi que equia Jesús je ra. ²⁴ Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerō jiri jiriã tuchi que ra. Erasi i i tuchi chõ ngue ra. ²⁷ Jirandu chee que Jesús rese ra. Equite quti que esi mbia joõ nda. Oco que oso eirao rese ra. ²⁸ —Eirao achõ ndese se oco mose, acherō nda se, i nda ra. ²⁹ Aque mose tuchi que eruqui ti i ee cote ra. Ngasiã ngue eicua uchiangui re cote ra. ³⁰ —Sequirãcuã ngue mbia mo mbucherō nda, i que Jesús uchiangui re ra. —¿Aba oco seirao rese re? i que mae uquite quti ra. ³¹ Echĩmbaaquiatu que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra. ³² Jesús que nyuruba ruba mae nda. —¿Aba oco serese re? i. ³³ Ari que jirandu tuchi ucherō ndese ra. Eireĩte que titi titi i huĩ ee ra. Ngoi que ngũĩã ndese Jesús resa quti ra. Mbae que esenei ja ee cote ra. ³⁴ Jesús que ñee ee ra. —Seicuate que se ra. Nyebe arembucherō nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. —Ndeya eã techĩ nda jẽ. Seicua chõ se jẽ, i que Jesús ee ra. ³⁷ Jesús que oso eraaque rea cot e ra. Uchĩmbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. Ũquĩ mĩ ño ngue equerao erea ra. ³⁸ Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? ãquẽ manoãte resẽ. Uque chõ u co resẽ, i que Jesús ñee mbia je ra. ⁴⁰ Mbia que iquia iquia chõ ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. —Echuruã, ãquẽ, i que ee ra. ⁴² Echeẽ mose tuchi que ãquẽ juã ngata cote ra. Etiarõte que ra. Doce años que

ra. Mbia que nyuruirate tuchi mae erese ra. ⁴³ —“Jesús que co raaque mbuquera ra”, jenyechĩ nda emo je jẽ, i que Jesús mbia je ra. —Nderiirĩ embuquiaru cote, i que ee cote ra.

Mbia Nazaret jenda Jesús isiteã

6 Hue si que esi nguécuaa ra. Echĩmbaaquiatu abe que nyoĩ erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruirate ja tuchi u echeẽ andu ra. Ñee ñee ngue u nyue ra. —¿Mangue eriqui ñĩmbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirō tirõsa chõ ndaque. María riirĩ ño ndaque. Jacobo nongue chõ ndaque. José abe no. Judas abe no. Simón abe no. ã echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguiã. ⁴ Jesús que ñee ee ra. —Dios cheẽ mbuchecuaa ishonda cheẽ nguia ra mbia isi turã mbei. Nguécua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguécua jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi mĩ mĩ arō embucherō nda. ⁶ Hue jenda mbia que chi Jesús icua eãte ra. Nyebe Jesús nyuruirate tuchi nguiã mae erese. Sucha tubiriã mbuchesea sea que equia mbia mbaaquiatu quiatu ra.

Jesús uchĩmbaaquiatu doce mondo ucheẽ nenei nenei sacua

⁷ “Jenyu” i que uchĩmbaaquiatu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chiangui si. ⁸ —Mbae mo nda jendaochĩ icua. Mbae riru mo abe ra jendaochĩ. Jenyurã mo abe ra jendaochĩ no. Mbae isiquia abe ra jendaochĩ. Jẽiyao nongue mo nda jendaochĩ. Jẽirao nongue mo abe ra jendaochĩ no. Jenyitochoquia mĩ ño jendao. ¹⁰ Jengasẽ mose sucha tubiriã mo, aque tuchia mĩ ño jẽingo uque. Tuchia ra jembuchesea seate chĩ jẽingo mose huee. Ae ra jengue nyii nae, hue tuchia bei chõ jẽingo uque. ¹¹ Sucha tubiriã jenda mo jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. Hue jenda huicua icua sacua. Tacheẽ nyecua jẽje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si, i que Jesús ñee uchĩmondobi je ra. ¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue eja jea tuchi quia mbia

chianguí sí ra. Mbae eĩ quira que equiti quiti quia mbia rasi rese ra. Mbucherõ ja que ra.

Mbia Juan el Bautista iquía

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera sí ra. Nyebe eriqui nguiã mbae raã jate, i rei que Herodes ra. ¹⁵ Elías Jesús riqui reĩ emo je reaẽ. Dios cheẽ mbuchecuaa ñiinda Jesús riqui reĩ emo je re no aẽ. ¹⁶ Herodes que jirandu Jesús rese ra. Juan el Bautista eriqui reĩ nguiã ee. —Juan ño eriqui re. Ae ãquĩ achisia. Quera sí chõchĩ ere, i rei que Herodes ra. ¹⁷ Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —iNde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan ñi nda. Nyebe eriqui nguiã ireĩ ireĩte esi. Nyebe Herodías Juan iquía aroneate nguiã. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías ririĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee nde je re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguiã ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ãquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista ãquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. Ñ seandu ja chõchĩ. Nyebe ra secheẽ ambuchebi eã ee, i que Herodes uchianguí re ra. ²⁷ Soldado mo ngue emondo cote ra. —Quiatu Juan iquía. Eãquĩ eru seje, i que ñee soldado je ra. ²⁸ Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñimbaaquiātu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mii je

³⁰ Ae Jesús mondo quia uchimbaaquiātu, ùquĩ ngue ngaẽ sí ee cote ra. Uchisaã ngue esenei senei cuaẽ ee

ra. —Eĩ ure que mbia mbaaquiātu quiatu ra, i que euaẽ Jesús mbiirandu ra. ³¹ Mbia tubiriãte que ngaẽ ngaẽ nguia ñindecua ndecua erea ra. Equiaru mose rocoĩ abe. Nyebe ñee nguiã uchimbaaquiātu je. —Nyao rã mbia eãsa, jenguenea ucua mbirĩ, i que ra. ³² Ae ae que nyoĩ canoa ye mbia eãsa ra. ³³ Mbia tubiriã tuchi ngue mae ñochĩ nguiã echoi rese. Jesús icua chõ ngue ra. Mbia que nyoĩ uchã ibi rĩ nda. Sucha jenda ja. Ùquĩ nane ngue nyoĩ ngasẽ Jesús raarõ ama nimia nda. ³⁴ Jesús que usẽ canoa sí cote ra. Mbia tubiriã ndese que mae nda. Eya eã tuchite que erese ra. Oveja raarõ iriã na nguiatu que mbia chi ee ra. Mbia que embaaquiātu quiatu tuchi cote ra. ³⁵ Tenda oso mose que echimbaaquiātu ñee ndei ee ra. —Tenda osote resẽ. Mbia chuchua mo ãte a resẽ. ³⁶ Mbia chiurã eã abete a resẽ. Mbia embui mondo uchiurã ndequia requia sacua sucha achi jenda rea rea, i que ñee Jesús je ra. ³⁷ —Jeño mbae jemondo ee echiurã, i chõ ngue Jesús ñee ee ra. —Tei. Mbae quia ra aba mondo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbia chayãte chõ eno nde, i que ñee Jesús je ra. ³⁸ —¿Manya mbichae jendeco ùquĩ nde? Jẽso mae erese no, i que Jesús ee ra. Emo ngue oso mae erese eicua ra. —Cinco mbichae riqu i co. Sira nyeremo abe, i que echimbaaquiātu mo ñee ee ra. ³⁹ —Sã mbia ngoi ngoi ja quiata tose. Echesea sea, i que Jesús ra. ⁴⁰ Mbia que ngoi ngoi ja nyesea sea cote ra. Cincuenta jaaja. Cien abe no. ⁴¹ Jesús que mbichae cinco sirõ cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee ngue uchimbaaquiātu je ra. —Jemee mee mbia je, i que uchimbaaquiātu je ra. Sira nyeremo abe que esiquio quio mbia ja je ra. ⁴² Mbia ja que eu tuchi ra. Ñimbio chee que ra. ⁴³ Mbia chi u sique tubiriã tuchi que ra. Mbichae rire. Sira rire abe no. Doce iru que mbia mombisẽ esique sique je ra. ⁴⁴ Cinco mil hombres que mbia mbichaecua ra.

Jesús ngata i arõ

⁴⁵ Aquere que Jesús uchimbaaquiātu mondo ja canoa ye ra. —Jẽ nane jẽso Betsaida sobei. Mbia tambui turã na mondo uchuchúaa se nyii, i que ra. ⁴⁶ Jesús que mbia mbui turã mondo cote ra. Ae ae que oso sita ibátee cote ra. Ñee sacua Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echimbaaquiātu que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Ngaira ñee mose que esi eriichã nda. I arõ ngue esi quia ngata ra. Nyucuaño nda eña nde. ⁴⁹ Mbia aingue eriqui reĩ nguiã echimbaaquiātu je. Ngata mose i arõ. Nyebe tasẽ tasẽ nguiã. ⁵⁰ Echimbaaquiātu chiã ngue cuãacuã i tuchi mae erese ra.

—Jēsiquichechĩ nguiã. Jěya chõ ae. Se chõ nyeresẽ, i que Jesús ñee ee ra. ⁵¹ Ua que canoa ye embirõ cote ra. Quiririã ngue tiba cote ra. Echimbaaquiatu que nyuruira tuchi u mae erese ra. ⁵² Jesús mbichae mbeta quia nae, ũquĩ ngue echimbaaquiatu icuayãte uchiangui re ra. —Dios riirí ño eriqui reaẽ, i ãte que eicuayãnda. Eãquĩ ãtãte chõ ngue ra.

Jesús mbia Genesaret jenda mbucherõ cherõ

⁵³ Ngasẽ nyee que sobei cote ra. Genesaret, i que hue ibi je ra. ⁵⁴ Jesús usẽ mose canoa si que mbia eicua jei ra. ⁵⁵ Mbia que nyoĩ ja uchã tuchia mbuchesea sea ra. Erasi rurucuaẽ cuaẽ sacua Jesús je, erua resebe. ⁵⁶ Jesús cuatásaa que mbia riqui erasi rurucuaẽ cuaẽ ee ra. Sucha tubiriã jenda jaaja. Sucha miĩ miĩ jenda jaaja abe no. Turuquia jenda abe no. Ũquĩ ja que erasi curucuaẽ cuaẽ nguia ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ũquĩ ngue nyerõ ja ra.

Mbia chiangui renda ae chõ embĩcuã nguiã

7 Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ² Jesús chimbaaquiatu mo ngue quiaru quiaru echoĩ quiiriã ee ra. —¿Mbaerã jěingo quiaru jenyoi quiiriã nde? Nanderamei ñee ndui si eã ño jěingochĩ nde, i que ñee asite ee ra. ³ Fariseos quiarei nyoĩ bei quiaru nonde. Judíos ja abe no. —Nandechoĩ eã mose ra nandechiã mondeite, i rei equia ã. Ngãmei ñee nguire eriqui ũquĩ naa naa mbei ã. ⁴ Echoĩ quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Ñio abe no. Irachaẽ abe no. Uquisa abe no. ⁵ Nyebe fariseos ñee nguiã Jesús je. —¿Mbaerã ndechimbaaquiatu riqui eĩ eã nanderamei ñee nguire re? ¿Mbaerã eriqui quiaru uchoĩ quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jeniĩ cose ra. Eĩ ngue embesa ra:

Ã mbia riqui ñee turãte raque seje ã.

Uchiangui re quia eriquiãte nguiã serese ã.

⁷ Ñee turãte raque equia seje ã. Amei ñee achõ ño esenei seneichĩ nguiã mbia je.

Dios cheẽ miĩ nenei nenei ndocoĩ ee, i que Isaías embesa jeniĩ nda. ⁸ Jenamei ñee achõ ño jesenei seneichĩ nguiã mbia je ũquĩ. Dios cheẽ nenei nenei ndocoĩ ee.

⁹ Dios cheẽ jemumba mumba chõ chĩ nguiã ã. Nanderamei ñee ndese chõ jěingochĩ oote ã. ¹⁰ Moisés cheẽ ndui turã eã ño jěingochĩ ã. Sã Moisés ñee mbia je no: “Jeturã ño nguia jendu je jẽ. Jěsi je abe no. Emo ñee icuã mose ngu je, ũquĩ jěiquia chõ. Emo ñee icuã mose usi abe je, ũquĩ abe jěiquia no”, sã i Moisés no.

¹¹ Jẽ nguia jěingo nguiã Moisés cheẽ abi abite ã. Sã jěingo ñee no. “Ae nda amee nei jěje, ũquĩ ngue amondo ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu je. Usi abe je. Nyebe jěingo nguiã mbia mbaaquiatu icuã icuã ũquĩ. ¹² ¿Mbaerã jěingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jěsenei seneichĩ nguiã jendiirĩ je ã. Nyebe jěingo nguiã Dios cheẽ mbuquiachãte jendiirĩ si ã. Mbae icuã atate jěsaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jěicua rã. ¹⁵ Mbia chiu embĩcuã eã nguiã. Echiangui renda chõ embĩcuã nguiã. Echiangui renda chõ usẽ nguiã echuru rĩ echeẽ mose. Ũquĩ ño embĩcuã nguiã. ¹⁶ Jěisa mose, secheẽ jeñandu turã na, i que Jesús ra. ¹⁷ Jesús que mbia secha oso ique tuchiaa ra. Echimbaaquiatu que ñee ee cote ra. —Erecheẽ ngue namo, “ũquĩ nda mbia mbĩcuã” ere que, ũquĩ embuchecua rã ndecheẽ ure je, i que ñee Jesús je ra. ¹⁸ Jesús que ñee ee ra. —¿Jẽ abe jěicuayãte quia re? Ae mbia u quia nae, ũquĩ mbia mbĩcuã eã nguiã. ¹⁹ ¿Iqueã nda oso echiangui re. Erie ye chõ eriqui nguiã oso. Echiique rui chõ eriqui nguiã oso. Usẽ nyee, i que Jesús ñee uchimbaaquiatu je ra. —Mbia chiu turã ja, i chõ nguiã. ²⁰ —Mbia chiangui renda chõ embĩcuã nguiã usẽ mose echuru rĩ. ²¹ Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia. ²² Mbae abe mbuquiachã quiachã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbia abe mbĩrĩ rĩ no. Mbae icuã oseĩ oseĩ bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño. ²³ Mbia chiangui renda icuã ja chõ ũquĩ nde. Ũquĩ ño mbia mbĩcuã icuã nguiã ũquĩ ao ao mose, i que Jesús ra.

Ari mo Jesús icua

²⁴ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵ Ari mo abe que jirandu erese ra. Eriirĩ ngue aba checuayã nguereco uchiangui re ra. Ari que tu Jesús rea ra. Ngũiã ndese que ngoi ejii ra. ²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icuã ejea rã seriirĩ si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raã naa. Ahuĩ aronea judíos si, mbae raã naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriirĩ embucherõ seje ae, i que ari ñee ee ra. ²⁹ Jesús que ñee ee ra. —Erecheẽ

turâte. Quiatu rei. Nderiirĩ ngue nyerõ no, ì que ee ra. ³⁰ Ari que oso uchuchúaa cote ra. Ì que eriirĩ u ngua ye ee cote ra. Aba checuayã icuã usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³² Eisayã mo ngue mbia curucuaẽ ee ra. Echeẽ aquiatuãte abe que ra. —Ndeo echono earõ embucherõ, ì tuchi que mbia Jesús je ra. ³³ Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngũendi je ra. Mondo que echuru rĩ cote ra. ³⁴ Soboiba que ibate cote ra. Jiabute que ñee ee ra. —Esoro, eisacua, ì que ee ra. ³⁵ Eisacua que soro cote ra. Echuru abe que nyerõ cote ra. Ñee ngue cote ra. ³⁶ —Emo nda jembiranduchĩ jẽ, ì rei que Jesús ñee mbia je ra. Mbia que ñimbiirandu ì ì tuchi ra. ³⁷ Mbia que ñee ñee nyue Jesús rĩ nda. —Mbae raã turã turã ja tuchichĩ equi a co. Eisayã abe isa ndoro chee no. Echeẽ ngũĩã abe mbucheẽ nyee no, ì ja tuchi que mbia quia nyuruirã mae erese ra.

Jesús mbichae tubiriã saã mbichae mii je

8 Mbia que ñumunua tuchi Jesús je aque mose ra. Ñee ngue uchimbbaaquiato je ra. ² —Seya eãte aico ã mbia tubiriã ndese co. A echĩ arete serese tres días a. Echiurã mo eãte mbae mo aa. ³ Eriãcuã amondo sereãte echuchúaa. Ngasẽ ãte chõ ndae. Ishote si ecuaẽ aa resẽ. Nandembuquiaru chõ aa, ì que Jesús ra. ⁴ Echimbbaaquiato que ñee ee ra. —Turuquia re chõ nandeico a resẽ. ¿Mañi nda aba ã mbuquiaru ja re? ì que ñee Jesús je ra. ⁵ —¿Manya mbichae jendeco re? ì que Jesús ee ra. —Siete, ì que ee ra. ⁶ Jesús que mbia mbucoi ja íbii ra. Mbichae siete que eisi ja o je cote ra. Gracias ì que Dios je cote ra. Mbichae qu e esiquio quio mee uchimbbaaquiato je cote ra. Ûquĩ ngue embuchao chao mbia tubiriã je cote ra. ⁷ Sira ñetẽ mii abe que equereco ra. Gracias ì que Jesús Dios je cote ra. —Sira abe jembuchao chao mbia je, ì abe que ee ra. ⁸ Mbia que eu ja ñimbio chee ra. Echiu sique que emunua nua ja ra. Siete iru que emombisẽ nyee ra. ⁹ Mbichaecua rei mbia cuatro mil. Jesús que embui turã mondo cote ra. ¹⁰ Canoa ye que Jesús ua uchimbbaaquiato rese cote ra. Nyoĩ que Dalmanútaa ra.

Mbia mae sayã eteacuquia ure je, ì fariseos

¹¹ —Tã nande rã Jesús je, ì que fariseos cuaẽ ñee ñee ee ra. —Mbia mae sayã esaã na ure je. Ì nda “Dios chĩmbu” ure tuchi ndeje, ì rei que ñee Jesús je ra. ¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” ì tuchi re? Tacheẽ nyecua jẽje. Mbia mae sayã mo nda ateacuquia eã tuchi jẽje, ì

que Jesús ñee ee ra. ¹³ Oso que mbia recha cote ra. Iasa que echoi sobei cote ra.

Fariseos mbia mbaaquiato icuã, ì Jesús

¹⁴ Jesús chimbbaaquiato que uchiurã curuchoi eã nda. Tesarei que esi ra. Mbichae mii tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbbaaquiato cheẽ abe no. Ûquĩ ñee ndese ra jẽingochĩ jẽ, ì que Jesús ee ra. ¹⁶ —Mbichae quiato ngue nanderuã nguiã. Nyebe eriqui nguiã ñee nande je Ûquĩ, ì rei que echimbbaaquiato ñee nyue ra. ¹⁷ Jesús que echeẽ ñee icuate ra. Nyebe ñee nguiã ee. —¿Mbaerã jẽingo “mbichae nanderuãchĩ” ì re? ¿Ae rĩ aico ñee jẽje nae, Ûquĩ jẽicuayã mbeite quia re? ¿Jeñia ãtã mbeite eriqui re? ¹⁸ Jẽisate raque. ¿Secheẽ jeñanua mbeite quia re? Jendesate raque. ¿Sechisaã jẽicuayã mbeite quia re? ¹⁹ Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? ì que Jesús ee ra. Doce, ì que ee ra. ²⁰ —Mbichae siete mbeta mose mbia cuatro mil je, ¿manya iru jemombisẽ esique sique je re no? ì que Jesús ee ra. Siete, ì que ee ra. ²¹ —¿Jẽingo secheẽ icuayã ì ite ã nde? ì que Jesús ee ra.

Jesús eresayã mo mbucherõ

²² Nyoĩ que Betsaida cote ra. Mbia que amei ndesayã mo ngurucuaẽ Jesús je ra. Oco sacua ere se embucherõ. ²³ Jesús que eo isi serao pe jiri sucha si cote ra. Ngũendi que equiti eresa rese ra. O que echono earõ nda. —¿Eremaete mbae rese cote re? ì que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, ì que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jẽ, ì que ee ra.

Cristo chõ nde resẽ, ì Pedro Jesús je

²⁷ Jesús que nyoĩ Cesarea de Filípoo cote ra. Huee que ñee uchimbbaaquiato je cote ra. —¿Aba aico reĩ mbia je re? ì que ee ra. ²⁸ Echimbbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, ì que echimbbaaquiato ñee Jesús je ra. ²⁹ —¿Aba aico reĩ jẽje co re? ì que Jesús ee ra. —Cristo chõ nde resẽ, ì que Pedro ñee ee ra. ³⁰ —Jeñeechĩ nda mbia mo je Ûquĩ jẽ, ì que Jesús ee ra.

Mbia ra seiquia, ì Jesús

³¹ Jesús que umano nonde senei senei uchimbbaaquiato je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra

aquera si, i que ñee uchimbaaquiatu je ra. ³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ùquĩ nde? Mbia ra ndeiquiyã, i rei que Pedro ñee asite Jesús je ra. ³³ Jesús que uba mae uchimbaaquiatu rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbaaquiatu ja je cote ra. Mbia abe je. —Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui serui bei cote.

³⁵ Emo ndua bei mose nguico rese, ereco ra ua esi. Emo hui mose nguico si seje, ùquĩ nda siqui bei.

³⁶ Emo nguico mumba chooño mose, eya eã mbei rae. Mbaecha rete raque. ³⁷ Emo nguico mumba chooño mose, mbae mo eãte ereco ribishorõ sacua. ³⁸ Emo ireĩ ireĩ mose sesi mbia icuã ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquirãcuã je aque mose. Ibatenda rese ra achu ángeles, i que Jesús ee ra.

9 —Tacheẽ nyecua jêje. A jengu a nae, jemo nda je-mae sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyicuabo uchimbaaquiatu résaa

² Tenda seis uare que Jesús uchimbaaquiatu mo nderao sita ibátee ra. Pedro. Jacobo. Juan abe no. Ùquĩ ngue equerao ja mbia tiásaa ra. Jesús que nyicuabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ùquĩ nda. Elías rese. ⁵ Pedro que ñee Jesús je ra. —Sererecua, nandecu turãte a. Sucha ñetẽ uresaã saã na. Enongue nembaerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbaaquiatu siquichete quiatu ngue re. Nyebe Pedro riqui nguiã “mañi nda aba re” ite. ⁷ Ibeishĩ ngue tu nguichi eite re cote ra. Moisés mbuchecuayã ee. Elías abe no. Echeẽ mo ngue ehandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbaaquiatu mae mose que Jesús miñ ndiqui ee cote ra. Moisés que nyecuayã asi ee ra. Elías abe.

⁹ Ecuaẽ mose nguichi sita ibate si que Jesús ñee ee ra. —Ae rese jemae namo nae, ùquĩ je jenyecuachõ jê. Sequera si mose quiatu teñee ñee mbia je cote. Semano nonde eã, i que Jesús ñee uchimbaaquiatu je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra.

¹¹ Ñee ngue Jesús je cote ra. —¿Mbaerã embesasa ñee

nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesa ji quia Cristo riñ ña? “Mbae rasi ra esaã tuchi”, i chõ nguiã. “Mbia ra eucuyã tuchi”, i chõ nguiã no. ¹³ Elías que tu no. Mbia icuã icuã tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia riirĩ mo si

¹⁴ Ngasẽ ngue echoi echimbaaquiatu ataque je cote ra. Mbia tubiriã tuchi que chi echimbaaquiatu mama huee ra. I que embesasa u ñee icuã icuã echimbaaquiatu je huee ra. ¹⁵ Jesús ngasẽ mose que mbia nyuruirã tuchi mae erese ra. Oo tuchi que erese ra.

¹⁶ —¿Mbae riñ jëingo ñee icuã icuãte jenyue re? i que Jesús ñee mbia je ra. ¹⁷ Emo ngue ñee Jesús je ra.

—Sererecua, seriirĩ aru quia ndeje co. Nde embucherõ sacua. Aba checuayã icuã equereco uchiangui re co. Nyebe eriqui nguiã ñee eãte co. ¹⁸ Aba checuayã icuã ndiqui seriirĩ isi isi beite co. Mbucoi coi beite equia íbii co. Echuru abe mbichoite. Ureĩ abe qiti quitite. Nyebe equirãcuã neate riqui nguiã co. “Aba checuayã jêjea seriirĩ si”, ae rei que ndechimbaaquiatu je ra. Eaquiataũte chõ ngue ra, i que eru ñee Jesús je ra.

¹⁹ Jesús que ñee cote ra. —¿Mañi jenyue quia seicuayãte re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ²⁰ Eriirĩ ngue ecurucuaẽ ee cote ra. Aba checuayã ngue eriirĩ

mburirite Jesús rese mae mose ra. Mbucoi que íbii ra. Mbuchiishao shao tuchi que ra. Echuru mbicho tuchi que ra. ²¹ —¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²² —Tátaa eriqui emondo mondo beite co. Ama ye abe. Ericharã. Nde ejea aquiatu mose, ejea rã esi ure je, i que eru ñee Jesús je ra. ²³ Jesús que ñee ee ra.

—¿Mbaerã ereico “ndeaquiatu mose” i seje re? Ae seicua quia nae, ùquĩ je aico mbae raã aquiatu jate co resẽ, i que Jesús ee ra. ²⁴ Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵ I que mbia cuaẽ

nguiã ñumunua nua tuchi huee ra. Nyebe Jesús ñee asi nguiã aba checuayã icuã je. —Aba checuayã, mbia isa erembitaote quia hue. Erebuheẽ nguiãte abe equia hue. Esẽ oso esi. Ereique sichĩ nda oso echiangui re jê, i que Jesús ee ra. ²⁶ Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyi cote ra. Mano nei nguiã mbia je. ²⁷ Jesús que emua eo rese ra. Juã turã ngue cote ra. ²⁸ Jesús que oso ique tuchúaa cote ra. Echimbaaquiatu que ñee ee mbia tiámbaa cote ra. —¿Mbaerã aba checuayã useã oso urecheẽ mose ure re? i que ñee ee ra. ²⁹ Jesús que ñee ee ra. —Jeñee eã mose Dios je, ã jêjea aroneate.

Jêhui eã mose jenyiu si, ã jêjea aroneate no, i que Jesús ee ra.

Mbia ra seiquia, i si Jesús

³⁰ Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiato je ra. ³¹ Uchimbaaquiato ae que embaaquiato quiato oso quia ñeenda rui ra. —Emo nda semee mbia icuã je seiquia sacuã. Seiquia ji ra aquera si tres días mose, i que equia embaaquiato quiato ñeenda rui ra. ³² Echimbaaquiato que echeẽ icuayãte quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireĩte quiato que equia esi ra.

Ererecua tuchi ra se, i jaaja Jesús chimbaaquiato nyue

³³ Ngasẽ ngue Capernaum nda. Tuchúaa ique mose que ñee uchimbaaquiato je ra. —¿Mbae rĩ jenyu quia ñee icuã icuãte jenyue ñeenda rui re? i que ee ra. ³⁴ Quiriri ja chõ ngue u ñee ndocoĩ ee ra. —Ererecuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵ Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiato doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶ ãquẽ mo ngue emi eite re cote ra. Sui que ñee uchimbaaquiato je ra. ³⁷ —Ae siqui turã nguia mbi a ririĩ je seriĩ nae, seje abe chõ eriqui nguia siqui turã. Ae eturã ndiqui seje nae, semondosa abe je chõ eturã ndiqui nguia, i que Jesús ee ra.

Emo icuã eã mose nande je, nanderesenda chõ ũquĩ nde

³⁸ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe ure-siquisã nguia, i que Juan Jesús je ra. ³⁹ Jesús que ñee ee ra. —Tei. ¡Jêsiquisã quisãchĩ nda jê! Emo mbia mae sayã naa mose seriĩ, ñee icuã eã nda seje aquere. ⁴⁰ Emo icuã eã mose nande je, nanderesenda chõ ũquĩ nde. ⁴¹ Emo sechimbaaquiato iseĩ mbiu turã mose seriĩ, Dios abe ra mbae turã mondo aque je.

Mbae icuã nda nandesã uquiachĩ emo je

⁴² Ae ra mbae icuã saã uquia seicuasa mo je nae, ũquĩ nda mbae rasi saã tuchi cote. ũquĩ nda aba mombo chõ ama ndisha ye nyii re chã. Sita resebe ecua ji mondo. ĩ nda mbae icuã naa uquia eãte rei seicuasa je. ⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mĩ Nderequia, siqui bei sacuã huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴ Mbae rosei ra manoa mbei huee. Tata ra uqueã mbei huee no. ⁴⁵ Ndei nemingo

mose mbae icuã ndese, ndei echisia mombo. Coche rei ra ereso ibate ndei mĩ nderequia, siqui bei sacuã huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶ Mbae rosei ra manoa mbei huee. Tata ra uqueã mbei huee no. ⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa mĩ nderequia. Nemombo rocoĩ tata cuásuu, nderesa nyeremo nderao. ⁴⁸ Mbae rosei ra manoa mbei huee. Tata ra uqueã mbei huee no. ⁴⁹ Tata ra mbia sei bei huee. ⁵⁰ Embiquesa rã ño jẽingo nguia mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jẽingo mbia je. Jẽingo turã ño nguia jenyiese, i que Jesús ee ra.

Jesús ñee mbia ngüinisi mombo je rĩ

10 Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiato quiato que equia ra. Sã eriqui mbia mbaaquiato quiato beite no. ² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquĩ ãtãte quiato ngue re. Nyebe Moisés ũquĩ mbesa nguia jêje. ⁶ ũquĩ i ãte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi mĩ ndese siqui bei sacuã. ⁸ Co mĩ na siqui sacuã nyiese cote. Nyeremo siqui rã eã ño cote re. Co mĩ siqui rã ño ũquĩ cote re. ⁹ Ae Dios mbucha nyiese nae, sã ũquĩ hui eã mbei nyesi, i que Jesús ñee fariseos je ra.

¹⁰ Ngasẽ mose tuchúaa que echimbaaquiato ñeembe ee ra. —Ndecheẽ embiasa turã na ure je, i que ee ra. ¹¹ Jesús que ñee ee ra. —Ae ngüinisi jea nae, emo ndese siqui sacuã nae, eicuã tuchi chõ ũquĩ nde. Adulterio i que ũquĩ je ra. ¹² Cuña mo ngu jea mose siqui sacuã emo ndese, eicuã tuchi chõ ũquĩ no nde, i que Jesús ee ra.

Jesús mbia ririĩ isi turã turã

¹³ Mbia que ngüiriĩ ngurucuaẽ cuaẽ nguia Jesús je ra. Jesús oco oco sacuã erese. —¿Mbaerã jendiiriĩ jendu quia co re? i rei que echimbaaquiato ñee mbia je ra. ¹⁴ Jesús que paama i ñee uchimbaaquiato je ra. —Jeñeechĩ nguia ee. Sã ae ae riqui ngüiriĩ ndurucuaẽ cuaẽ seje. Eĩ ño Dios rimba nguia. Ucuasu raã naa eã.

Mbia riirĩ na. ¹⁵ Mbia riirĩ na ño jëingo Dios isi turã. Ī mose ra Dios rimba tuchi jë cote, ĩ que Jesús ra. ¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je erĩ nda.

Acuanindu mbaecha mo ñee Jesús je

¹⁷ Acuanindu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? ĩ que ñee Jesús je ra. ¹⁸ Jesús que ñee ee ra. —¿Mbaerã ereico “eturã” ĩ seje re? Dios miĩ ño eturã ndesẽ. ¹⁹ Dios cheẽ emumbayã. Echeẽ ereicuate quia co resẽ: “Emo ninisi rese ra erei-cochĩ. Mbia ra ereiquiachĩ. Mbae ra erem-buquiachãchĩ. Ereceẽ ñoñochochĩ nda emo niĩ. Emo nda erembiirĩ irĩchĩ. Ndeturã ño nderu je. Ndesi abe je”, ĩ que Dios cheẽ nda, ĩ que Jesús ñee ee ra. ²⁰ Acuanindu que ñee ndei ee ra. —Ūquĩ ngue amumbayã ja bei quia ra. Señetẽ mosenda bei, ĩ rei que ñee Jesús je ra. ²¹ Jesús que nyesequa tuchi mae mose erese ra. —Ã miĩ mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, ĩ que Jesús ee ra. ²² Acuanindu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re. ²³ Jesús que mae mbia rese ra. —Mbaranguiatu ãte mbaecha je ngasẽ sacuaã ibate, siqui bei sacuaã huee, ĩ que ñee uchimbaaquiatu je ra. ²⁴ Echimbaaquiatu que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ũquĩ je oso sacuaã ibate Dios rese. ²⁵ Sã ticuas mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, ĩ que Jesús ee ra. ²⁶ Echimbaaquiatu que nyuruira tuchi be u eandu no nda. —¿Aba quiatu ra oso Dios rea ibate re no? ĩ que ñee nyue ra. ²⁷ Jesús que mae erese ñee ee ra. —Ae mbia saã aroneate quia nae, Dios miĩ ño nda esaã, ĩ que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacuaã nderui, ĩ que Pedro ñee nda. ²⁹ Jesús que ñee ee ra. —Tacheẽ nyecua jëje. Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no. ³⁰ Ūquĩ mbae ja ra asibishorõ tuchi cien veces ereco mose íbii. Echuchua ata. Enongue ata. Esi ata. Eriirĩ ata. Ibi ata abe no. Ūquĩ ja ra asibishorõ tuchi ee. Mbia icuaã icuaã tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, ĩ que Jesús ra.

Mbia ra seiquia, ĩ si Jesús

³² Jerusalén ngue echoi quia ra. Jesús que oso quia enonde ra. Echimbaaquiatu que siquichete nyoĩ quia ra. Nyebe Jesús ererao nguĩã mbia tiãsaã ñee sacuaã ee. ³³ —Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jëiquia”, ĩ ra serĩ. Semee nda judíos eã je cote. Seiquia sacuaã. ³⁴ Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, ĩ que Jesús ñee ee ra.

Ererecuarã se, ĩ raque Jacobo, Juan ndese

³⁵ Jacobo que oso Jesús riichã ngõngue rese ra. Juan, ĩ equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae riĩ nda urecheẽ ndeje nae, ũquĩ je “eno” ere rã ure je, ĩ rei que ee ra. ³⁶ —¿Mbae ra aba saã jëje re? ĩ que Jesús ee ra. ³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co miĩ chĩ ndequiato cuti. Enonge chĩ ndequiato cutiã no, ĩ rei que ñee Jesús je ra. ³⁸ Jesús que ñee ee ra. —Ae riĩ jëingo ñee seje nae, jëirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jësaã jë abe re? Bautizar ĩ ra seje, ¿eĩ nda bautizar ĩ jë abe je re? ĩ que Jesús ee ra. ³⁹ “Ae” ĩ que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ũquĩ ndasi ra jësaã tuchi rei jë abe. Bautizar ĩ ra seje, eĩ si rei ra bautizar ĩ jëje no. ⁴⁰ “Ererecuarã ure”, jenyere rei que seje, ũquĩ asaã aroneate se jëje. Pa-ba ae quiatu ra ũquĩ saã. A e ebite, ũquĩ nda emi ererecuarã, ĩ que Jesús ra. ⁴¹ Echimbaaquiatu ataque que jirandu erese ra. Echimbaaquiatu diez. Paama ĩ que Jacobo je ra. Juan je abe. ⁴² Jesús que “jenyu” ĩ ñee uchimbaaquiatu ja je cote ra. —Mbia ataque rerecua riqi ucuasu raã naa tuchi ngũimba je ũquĩ. ⁴³ Ūquĩ nda jësaã eã jë. “Ererecua ra se”, ĩ mose jemo, sã ũquĩ siquichõ uataque rimbarã. ⁴⁴ Jemo “se rane jë” ĩ mose, sã ũquĩ ndiqui bei mbae turã naa naa uataque je no. ⁴⁵ “Sã mbae mbae turã naa naa seje”, ae eã ngue u ra. “Se quiatu mbae turã tasaã saã oso mbae je”, ae u nguĩã. Co achu quia mano mbae tubiriã ndiquicharõ sacuaã co, ĩ que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiatu rese. Jesús ngata mose hue si, mbae tubiriãte que nyoĩ quia eruĩ ra. Eresayã mo ngue chĩ ñeenda jie huee ra. Ache ache ĩ que huĩ nda. Bartimeo, ĩ equia ee. Timeo ndiirĩ ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jë! ĩ que ee ra. ⁴⁸ —¡Equiriri chõ jë! ĩ tuchi rei que mbae ñee ee ra. —¡Sererecua! ¡David nducucha! ¡Ndeya eã ño serese jë! ĩbe que eresayã ñee Jesús je ra.

⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jẽ. Ehuã. Jesús riqui ñee ndeje a, i que ee ra. ⁵⁰ Juã asi que oso oo Jesús rese ra. Uchiatiquia recha. ⁵¹ —¿Mañi ae ra ndeje re? i que Jesús ñee ee ra. —Seresa embuturã na, Sererecua, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

Jesús ngasẽ Jerusalén

11 Jesús que Jerusalén curubite nyoï quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiatu nyeremo mo mondo ra. ² Ñee ngue ee ra. —Achi sucha chõ jẽso rã. Jengasẽ namo mose ra burro ririĩ cuasa mo ñi jẽje huee. Emo ngue nyui eãte eátoo ra. Jenyura seru seje. ³ Emo ñee mose jẽje, “¿mbarã nda jenyura re?” i mose jẽje, jeñee ee. “Nandererecua que ‘jendu’ i ra. Mondo jeibe ra jẽje”, jenyee ee, i que Jesús ñee ũquĩ nyeremo mondo ra. ⁴ Nyoï que erea cote ra. Burro ririĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra. ⁵ Ae mbia chi huee nae, ũquĩ mo ngue ñee ee ra. —¿Mbae rese jẽingo hue re? ¿Mbarã jẽingo era era re? i que ee ra. ⁶ Jesús cheẽ ndui si que ũquĩ ñee ee ra. “Eno” i que mbia ee cote ra. ⁷ Burro ririĩ ngue ecuruchoi Jesús je cote ra. Huĩrao que echono ñono earõ nda. Jesús que nyui eátoo cote ra. ⁸ Jesús que ngata oso quia burro átoo cote ra. Mbia tubiriã ngue huĩrao mbiitee tee nyoï quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. ⁹ Mbia ia tuchi que tasẽ tasẽ nyoï quia enonde ra. Eruĩ abe no. —Co nandererecua ru quia ngasẽte co. Co Dios chimbu ru quia ngasẽte nande je co. ¹⁰ David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. ¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiatu rese cote ra. Tenda quiatu ngue osote nguiã ee.

Jesús ñee icua higo i je

¹² I que Jesús choi quia Betania si isamami nda. Er-iaçuãte que oso quia ra. ¹³ I sho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. ¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiatu abe que echeẽ ñandu ra.

Jesús mbia mbusẽ Dios chuchua si

¹⁵ Ngasẽ ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. ũquĩ ja que Jesús mbusẽ mondo ra. Ae mbae isiquia sibishorõ shorõ nguia, ũquĩ mbae abe que embuchi-ichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ũquĩ nenda abe que embuchiichere chere ja ra. ¹⁶ Jesús que ñee ũquĩ je ra. —Dios chuchua ite rĩ jẽingo chĩ nguiã mbae rerao rao. ¹⁷ “Mbia cheesa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguiã ee, i que Jesús ñee asite ũquĩ je ra. ¹⁸ Sacerdote rerecua que chi Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiatu que oote Jesús cheẽ ndese ee ra. Nyebe eriqui nguiã Jesús ucuayãte. ¹⁹ Hue sucha qu e Jesús secha oso eresaitõ cote ra.

Higo i mano cote

²⁰ I que Jesús nyoï quia isamami nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. ²¹ Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. ²² Jesús que ñee ee ra. —Dios jẽicua tuchi. ²³ Tacheẽ nyecua jẽje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. ²⁴ “A emondo seje”, jenyee mose Dios je, mondo ra jẽje. “Dios ra emondo seje”, jenyee mose jeñiangui re, mondo ra jẽje. ²⁵ Emo mbae icua naa mose jẽje, ũquĩ ñee chĩ mose jendese, jẽtesarei chõ ũquĩ si. Jẽtesarei chõ esi ñee nonde Dios je. ũquĩ mose ra jendu ibatenda abe jẽicuã mbutiã no. ²⁶ Jẽtesareiã mose emo icua si, Dios abe ra jẽicuã mbutiã eã mbei jẽsi, i que Jesús ee ra.

¿Aba nembu re? i mbia ñee Jesús je

²⁷ Nyebibe que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoï ñee ee ra. Embesasa rese. Amei ndese. ²⁸ —¿Mbarã ereico mbia mbaaquiatu quiatu Dios chuchúaa re? ¿Aba “ũquĩ esaã saã” i quia ndeje re? i que ũquĩ ererecua ñee ja Jesús je ra. ²⁹ Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ na nyii. Aquere quiatu ra jeñee asibishorõ cote. ³⁰ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. ³¹ Er-

erecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jëingo eãte erui re no?” i quiarei ra nande je. ³² “Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. ³³ Ñee nyee que Jesús je cote ra. —Ure-icuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiatu tacheẽ eã jëje no. Ae “ã esaã” i seje nae, erĩ nda acheẽ eã jëje no, i que Jesús ùquĩ ererecua je ra.

Uva raarõsa icuã icuã nguerecua je

12 Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao no nda. Uco raarõ turã ja sacua. Ibicha que “sembae uvas jësaarõ” i emo je cote ra. Al partido. Ae que oso isho itõte cote ra.

² Uva quiche mose que ngũimba mo mondo rei umbaerã ndea ra. ³ Uva raarõsa que erimba mbucuasẽ icuã ño nda. Iruã nua ño ngue ra. Eochi chõ ngue emondo mbuchebi ra. ⁴ Echa que ngũimba mo mondobe rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵ Ngũimba mo ngue emondobe aquere no nda. Aque quiatu que eiquia tuchi cote ra. Eĩ eĩ mbei que eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque miĩ tuchi que siquichõ echa rese cote ra. Eriirĩ tuchi chõ ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarõsa ñee nyue ra. —iCo eriirĩ ndu quia co cote jẽ! iNandeiquia rei jẽ! Ì nda uvas nandembaerã ae tuchi cote, i que ñee nyue ra. ⁸ Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹ ¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacua cote. ¹⁰ ¿Ã mbesa ji rese jemae ãte re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere ndua si erese.

“Earonda sacua turambi chõ eriqui re”, i ndua si uchi-mombo rese.

Uchimombo que esirõ si cote ra.

¹¹ Dios chiao chõ ùquĩ nde.

Dios chiao turã tuchi riqui nande je ã,

i ñi embesa ji re, i que Jesús ee ra.

¹² —Nanderĩ ño eriqui nguiã ñee, i que ùquĩ ererecua ra. —Nandeisi rei serao jẽ, i rei que nyue ra. Jesús isi aronea tuchi que mbia résa ra. Eireĩte quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

¹³ Ùquĩ ererecua que fariseos mo mondochoi ñee Jesús je ra. Herodes chimbaaquiatu abe mondochoi erea. —Jesús nandembucheẽ icuã na. Ì nda mbia paama i ee, i rei que ra. ¹⁴ Uturã ngue esaã ñooño Jesús je ra. —Jesús, co ereico mbia mbaaquiatu turãte co. Mbia jaje ndeturãte riqui co. Co ereico turãte mbia mbuchiabiã co. Mbia erembaaquiatu quiatu turãte quia Dios icha rĩ co. Nyebe urechu nguiã ñee ndeje a. ¿Coche mbia mbae isiquia mee mee Romanos nderecua je re? Impuestos. ¹⁵ ¿Uremee mee nda ee re? ¿Uremee eã nda ee re no? i que ñee Jesús je ra. Jesús que ùquĩ icuã icuate ra. Nyebe ñee nguiã ee. —¿Mbaerã jëingo “ĩ nda Jesús ucheẽ nyabi”, i serĩ nde? Mbae isiquia jëteacuquia imbu seje. Tamae erese, i que ee ra.

¹⁶ Mbia que eteacuquia ee ra. —¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. Romanos nderecua, i que mbia ee ra.

¹⁷ Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbia que nyuruira jate u Jesús cheẽ andu ra.

Mbia raaque ra quera si, i Jesús

¹⁸ —Mbia raaque ra quera eã mbei, i que mbiamo nguiã ñee nda. Saduceos i que ùquĩ mbia je ra. Ùquĩ mo ngue nyoĩ ñee Jesús je ra. Tã i sacua ee. ¹⁹ —Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. ²⁰ Eriqui mo ngue siqui ureres ra. Seis que eribi ra. Eriqui que ngũinisiã quereco rei ra. Mano ño ngue tiirĩ ndocoĩ ngũinisi recha ra.

²¹ Enongue que nguiqui checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda. ²² Ùquĩ seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda. ²³ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

²⁴ Jesús que ñee ee ra. —Jëingo Dios cheẽ icuayãte ã. Jëingo Dios cheẽ abi tuchi ã. Jëingo Dios quirãcuã icuayãte ã. ²⁵ Ae raaque ra Dios mbuquera si nae, ùquĩ nda ngũinisi quereco eã mbei huee cote. Ùquĩ nda ngu quereco eã mbei huee cote no. Angeles rã mbei ra mbia riqui huee ibate cote. ²⁶ ¿Moisés chimbesa rese

jemae äte re? Mbia raaque quera si rĩĩ ño ngue embesa nguiã. Ira ruri sendi quia, aque mose que Dios Moisés mbiirandu ũquĩ ndese ra. “Abraham nderecua chõ aico nguiã se co. Isaac nderecua abe. Jacob nderecua abe no”, i que Dios Moisés je aque mose ra. ²⁷ ã ngue mano ndei nyii ra. Eresco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re. ¿Ūquĩ jẽicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸ Embesasa mo ngue chĩ echeẽ andu ra. —Jesús ñee turã tuchichĩ saduceos je, i que uchiangui re ra. Nyebe esi nguiã ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. ²⁹ Jesús que ñee ee ra. —ã ño Dios cheẽ ndiita ã nde: “Secheẽ jeñandu rã, Israelitas. Dios miĩ tuchi chõ nandererecua re. ³⁰ Echesequa tuchi quia Dios rese. Ndechĩã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguiã. ³¹ ã abe rei ũquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”, i. Ūquĩ nyeremo ndei Dios cheẽ i tuchi ũquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios miĩ tuchi chõ nandererecua re. Emo abe mo eãte. ³³ Nandechesequa tuchi mose Dios rese, ũquĩ eturãte ee. Nandechesequa tuchi mose nandechĩã je. Nandendua ndua je. Nandeãĩ je. Nandequirãcuã je abe no. Nandechesequa tuchi mose mbia rese, ũquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiatute equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiato quiato quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra: “Ecoi sejii. Nde abe ra ererecua serese. Ae ndeucuayãte quia nae, ũquĩ je ra ndequirãcuã ateacuquia tuchi. Ndequirãcuã tuchi chee ra ũquĩ si”, i que Dios ñee sererecua je ra, i que Espíritu Turã David mbucheẽ nda. ³⁷ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiato mbaaquiato quiato ra. —Embesasa rã nda jẽingochĩ jẽ. Ūquĩ ucuasu saã saã mbeite quia ã. Huĩrao turã equereco beite quia ã. “Sã mbia ererecua i nande je”, i beite equia ã. ³⁹ Mbia randa turã abe eirabo rabo beite quia mbia si ã. “Fiestacha jii quia taĩ jẽ”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “ĩ nda mbia mae nanderese”, i chõ nguiã. Ūquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñĩ Dios chuchúaa ra. Ofrenda riru nonde que eñĩ ngoi ra. Mae ngue miĩ mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo miĩ mbuchecha tuchi que ra. ⁴³ Jesús que ñee uchimbaaquiato je ra. —Jenyu. Tacheẽ nyecua jẽje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiato que umbae rire ñetẽ mondo mondo ra. Eru cheecha quiato que umbae miĩ mondo ja ra, i que Jesús ra.

Mbia ra Dios chuchua mbucoĩ ja, i Jesús

13 Jesús que oso usẽ Dios chuchua si cote ra. Echimbaaquiato mo ngue ñee ee ra. —Sã Dios chuchua turã tuchite jẽ. Eao ji turã tuchi sita je, i que echimbaaquiato mo ñee ee ra. ² Jesús que ñee ee ra. —ã ndese jẽingo mae ã nae, ũquĩ nda mbia mbucoĩ ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoĩ ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuete que ee hue si ra. Echimbaaquiato que ngasẽ ñee ee ra. Pedro. Jacobo. Juan. Andrés. Ūquĩ ja que ñee eísaa ra. ⁴ —¿Manosete ra ũquĩ nde? ¿Mañĩ ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jẽtesa jiri quia jẽ. Mbia mo nda jembirĩ irĩchĩ ñee jẽje jẽ. ⁶ “Cristo chõ se re” i ra mbia ñee ata atate jẽje. Ūquĩ nda jeñanduchĩ jẽ. Ūquĩ nda mbia mbiirĩ irĩ jate. Ñee ñooño je chõ ũquĩ nde. ⁷ Mbia ra guerras saã saã tuchi. Mbia ra ñee ñee tuchi quia nyũquia iquia je rĩĩ. Ūquĩ mose ra jẽsiquichechĩ jẽ. Ūquĩ ja rane nda nyecua raque. Aque mose r a mbae ja ua eã ná. ⁸ Mbia ra guerras saã tuchi chee. Nyũquia iquia tuchi rae. Mbia riãcuã tuchi ra aque mose no.

Emo ñooñoa tuchi ra mbia rasi. Mangue chooñoa tuchi ra ibi nyere nyere. Jembasi ramo mose chõ nda ùquĩ nde. Aquere ra jembasi tuchi cote.

⁹ Sã jê! Mbia icuã icuãte ra jêje. Jembĩĩĩ irĩ ndae. Jemee mee icuã nda mbia rerecua je. Jëruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheẽ jësenei senei. ¹⁰ Sequiato ra Dios cheẽ turã senei senei ná mbia ja je nyii. Mangue chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jê. “¿Manyae ra ùquĩ ñee ndibishorõ nde?” jenyechĩ nda pare pare i jê. Espiritu Turã ae chõ nda jembucheẽ turã nguiã mbia je aque mose. Jê ae ra jeñee eã. Espiritu Turã ae chõ nda jembucheẽ nguiã. ¹² Jenongue ra jemondo chee mbia icuã je. Jëiquia sacuã. Jendu abe ra jemondo chee mbia icuã je. Jendi-irĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangue chooñoa jenda ra jëucuayã tuchi serĩ. Ae ra siqui bei serese, ùquĩ nda Dios mingo bei.

¹⁴ Daniel que embesa Mbae Mbutiãsa İcuã nii nda. Mbae Mbutiãsa İcuã nda siqui nguecuáyaã. “Dios renda que re taico se quiatu”, i ra equia huee. (Ae ra mae nguia sechimbasa rese nae, sã ùquĩ eicua.) Jemae mose Mbae Mbutiãsa İcuã ndese, jeña esi. Ae siqui quia Judéaa, sã ùquĩ uchã jei choi ibi ibátee mo. ¹⁵ Ae ra siqui tuchia quite rese, sã ùquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁶ Ae ra siqui úcoo, sã ùquĩ nyebiã ngaẽ huĩrao rea. Sã hue si bei chõ echoi uchã. ¹⁷ Aba mbia eã tuchi ra emo äquẽ ndiru rerequia mose aque mose. Nguirĩ mbuquiambu je abe no. ¹⁸ “Nyiseĩ mose eã urechã” janye Dios je. ¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ùquĩ nde. ²⁰ Ae rasi ra mbia saã tuchi nae, ùquĩ nda Dios mbujua jiri uquiato rĩ. İ nda emo ñim-birãcuã eã tuchi rei ùquĩ ndasi je. ²¹ “A Cristo riqui a jê” i mose emo jêje, “nyia” jenyechĩ nda ùquĩ ñee mose jê. “Hue Cristo riqui hue jê” i mose emo jêje, “nyia” jenyechĩ nda eno jê. ²² “Cristo chõ se re” ichõĩño nda mbia ñee ata atate jêje. “Dios cheẽ mbuchecuasa chõ se re” ichõĩño nda mbia ñee ata atate jêje no. Mbia mae sayã nda esaã saã tuchi mbia mbĩĩĩ irĩ sacuã. Ùquĩ Dios quiato abe chee mbĩĩĩ irĩ arõte. ²³ Ùquĩ nonde chõ aico nguiã jembiiirandu randu co.

Dios rirĩ nda tube ibate si

²⁴ Mbia ùquĩ ndasi raã ja mose ra tenda checuayã mbei cote. Nyasi abe no. ²⁵ Nyasitata ra ngoi ngoi. Ibei jenda abe ra quiata quiata chee cote no. ²⁶ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷ Angeles serimba

ra amondo mbia sechiisirõ munua nua sacuã. Ishonda ja. Mangue chooñoa jenda ja. Mbia sechiisirõ nda emunua nua ja seje cote.

²⁸ Sã higuera riqui no. Sã ira mo ndiqui no. Ero quira usẽ ja mose, “iraro itõ ndacu ra cote”, i chõ mbia nguiã aque mose. ²⁹ Eĩ sí ra mbae ua ja nonde. Ae rĩĩ aico ñee jêje nae, ùquĩ ndese jemae mose, “mbae ra ua ja cote” janye ra cote. ³⁰ Tacheẽ nyecua jêje. Ä mbia riqui ngata ibi ä nae, ùquĩ emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguia ra ua eã mbei.

³² Manosete chõ nda mbae ua ja. Aico eicuayãte co. Mbia mo abe eicuayãte quia ä no. Angeles abe eicuayãte quia ä no. Paba miĩ ño eicua nguiã co.

³³ Nyebe jëingo quiatu quia eraarõ arõ mbei. Jëtesa tesa bei quia. Ma nyaashĩ ño nda equeru. Jëicuayãte equia ä. ³⁴ Sã ererecua mo oso isho itõte no. Sã ñee ngũimba je oso nonde no. —Sembae jësaarõ ja. Ä ndese jëingo. Co rese eico nde. Qui rese eico nde no, i que ñee ngũimba miĩ miĩ je ra. —Etesa tesa bei quia, i que eiquesa raarõsa je ra. ³⁵ Manosete chõ nda tuchuacha ru. Jëicuayãte equia ä. Itondaru ramo mose eru arondete. Itondii mose eru arondete. Ngaira cheẽ mose eru arondete no. Eresaitõ ndabe mose eru arondete no. Nyebe jëtesa tesa bei quiatu quia. ³⁶ Jengue mose ra eruchĩ jembuate jê. ³⁷ “Jëtesa tesa bei quia” ae chõ nguiã mbia ja je co. Jê miĩ je eã, i que Jesús ra.

Jesús nandeisi tarõ, i ja ererecua nyue

14 Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacuã. ¿Mañi nande ra embĩĩĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ² —Fiesta mose eã nandeisi jê. Mbia ra paama ichĩ nande je jê, i que u ñee ñee nyue ra.

Cuña mo aba mbusimbasa turã ichusẽ Jesús äquĩ ndese

³ Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbasa mo ngue equeru ee ra. Sita ao ji ye que ereru ra. Embisẽ tuchi que equeru ra. Mbae isiquia mumbasa tuchi que ùquĩ nda. Eriru churui que esiquio eichusẽ nonde Jesús äquĩ ndese equiaru mose ra. ⁴ Mbia que chi ja mae erese ra. Paama i que cuña je ra. —¿Mbaerã eichusẽ ñooño nde? ⁵ Mbae isiquia ribishorõ ño nda aba emondo re. Mbaecha reã je emee mee sacuã, i que ñee icuã icuã cuña je ra. ⁶ Jesús que ñee cote ra. —¿Mbaerã jëingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ. ⁷ Mbaecha reã nguia ra chi arete ibii a. Jê mbae raãse mose ee, mbae jësaã turã mbei ee ae. Se quia nda aico

bei eã nguiã jendese aa. ⁸ Seati nonde chõ ngue cuña aba mbusimbusa ichusẽ ja nguiã serese. ⁹ Tacheẽ nyecua jẽje. Mbia Dios cheẽ turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacuaã echisaã abe rese, i que Jesús ñee mbia je ra.

Jesús tamee jẽje, i Judas mbia icuã je

¹⁰ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ùquĩ andu ra. —Mbae isiquia uremee tuchi ndeje jẽ, i que ee ra. Nyebe Judas riqui nguiã ndua ndua. —Mbia eãsa quiatu Jesús tamee ee, i.

Jesús quiaru uchimbaaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbaaquiato ñee Jesús je ra. ¹³ Ñee ngue uchimbaaquiato nyeremo je ra. —Jẽso sucha cuasu. Huee ra jemaemo i rerao rese. I ra equerao quia irasa mo ye. Aque rui jẽso. ¹⁴ Eique mose, aque tuchuacha je jeñee. “Jesús que urembu ñee sacuaã ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jentye tuchuacha je. ¹⁵ Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacuaã, i que Jesús ñee ee ra. ¹⁶ Nyebe echimbaaquiato nyoĩ nguiã sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbaa quiato ataque rese ra. ¹⁸ Quiaru mose que Jesús ñee ee cote ra. —Tacheẽ nyecua jẽje. A jẽingo quiaru serese a nae, jemo nda semondo mbia icuã je, i que ñee uchimbaaquiato je ra. ¹⁹ Echimbaaquiato ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²⁰ Jesús que ñee ee ra. —Doce jẽingo quiaru serese a nae, jemo ño ñene. Ae chĩ quiaru serese aque plato ye sí a nae, aque chõ ñene. ²¹ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembucuecua jirichĩ nguia curĩ”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Á mbichae jẽu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbaaquiato oo cote ra. Mbei mbei ja que cote ra. ²⁴ Jesús que ñee ee ra.

—Seruqui chõ ã nde. Mbia icuã mbutiã sacuaã ño seruqui re. Dios cheẽ yasu rui si chõ seruqui riqui nguiã mbia icuã mbutiã ã. ²⁵ Tacheẽ nyecua jẽje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã cote, i que Jesús ñee nda.

Jesús aicuayãte resẽ, ichõño nda Pedro seriĩ, i Jesús

²⁶ Irasei rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra. ²⁷ Jesús que ñee uchimbaaquiato je huee ra. —Jẽireĩte ra eriqui seriĩ. Jeñimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Nguira cheẽ nyeremo nonde ra erecheẽ ñooño tres veces seriĩ namo, Pedro. “Jesús aicuayãte resẽ”, ere chooño ño nda seriĩ, i que Jesús ñee ee ra. ³¹ Pedro que ñee ee ra. —Mbia ra seiquia arõte raque nderĩ, acheẽ ñooño eã nda se nderĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiato rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³ Pe quti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ùquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁵ Jesús que oso pe quti jiri cote ra. Nyibi que u ngoi ngũĩã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. Ùquĩ ndasi asaã sereãte raque quia co. Ae sebi riqui nae, ùquĩ ndese semingo eã. Ae ndebite riqui nae, ùquĩ ndese quiato semingo, i que Jesús ñee Dios je ra. ³⁷ Nyebi que u uchimbaaquiato je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jẽtesa tesa u. Jengue eã u ñee Dios je. Mbae icuã tã i eã sacuaã jẽje. Jẽingo serete raque serese. Mbae icuã nguia tuchiti mbutite nguiã, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchimbaaquiato je cote ra. I sí que u uque ee no nda. Eresa quiato ngue eshiu shiute nguiã. —¿Mañi nda aba ñee nde? i ja tuchi que echimbaaquiato ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchimbaaquiato je ra. —Jengue tuchi cote. Jenguenea jẽucua cote. Semondo ra mbia icuã je cote.

Seiquia sacuaã. ⁴² Jêhuã cote. Nyao cote. Ae ra semee mbia icuaã je, co eru quia semee sacuaã co cote, i que Jesús uchimbaaquiato je ra.

Mbia icuaã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chimbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ùquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecuayã nguiatu quia ùquĩ je nyii reaẽ. —Ae ritii ra asiite nae, aque chõ ñene. Aque jêisi quiatu tuchi serao, i quia equia ee nyii reaẽ. ⁴⁵ Jesús rĩchã ngue esi saludar i ee cote ra. Jesús ritii que esiite ee cote ra. ⁴⁶ Mbia que Jesús isi cuaẽ ecua cote ra. ⁴⁷ Ùquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. ⁴⁹ Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? Embesa ji i que sacuaã ño jêicuã icuaã ndiqui nguiã seje ã, i que Jesús ñee ee ra. ⁵⁰ Echimbaaquiato que nyoi ja chee uchã Jesús recha ra. ⁵¹ Acuanĩndu mĩ mo ngue oso erui ra. Tiru mĩ ngue equereco nyiati ra. Mbia que acuanĩndu abe isi rei ra. ⁵² Huiĩrao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesasa abe. Amei ererecua ja abe no. ⁵⁴ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús rĩcharã nde? i rei que u ñee ñee nyue ra. ⁵⁶ Emo emo ngue ñee icuaã icuaã ndei Jesús rĩ nda. Ucheẽ ngue etasa tasa tuchi chõ nda. ⁵⁷ Mbia mo abe que juã ñee ñooño erĩ nda. ⁵⁸ —Jesús cheẽ ngue urechandu ra. Ñee icuaãte que Dios chuchua rĩ nda. “Dios chuchua tambocoi mbia chiao. Tres días mose ra Dios chuchuarã asaã no. Mbia chiao eã nda ùquĩ cote”, i que urechandu Jesús cheẽ nda, i que ùquĩ ñee ñooño Jesús rĩ nda. ⁵⁹ Ucheẽ ngue etasa tasa bei chõ nda. ⁶⁰ Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que ñee Jesús je ra. ⁶¹ Jesús que ñee eã mbei

echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶² Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶³ Sacerdote rerecua que paama i tuchi Jesús cheẽ mose ra. Huiĩrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ¿I jêje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicua tuchi que ra jẽ. Sã mbia eiquia, i jate que ererecua ñee Jesús rĩ nda. ⁶⁵ Mbia que ñinimbu nimbu Jesús ruba rese cote ra. Eresa que echati mbae mo je ra. Ucuu ucuu tuchi que erese cote ra. —¿Aba ucuu ucuu u nderese a re? Eicua no, i que equia eresa ati ji je ra. Soldados abe que ucuu ucuu tuchi eresa rese ra.

Jesús aicuayãte resẽ, ichõĩño Pedro

⁶⁶ Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷ Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸ —Tei. Ndecheẽ aicuayãte, ichõĩño ngue Pedro ñee ee ra. Hue si que esi eiquesa quiti cote ra. Usẽ mose que nguira ñee cote ra. ⁶⁹ Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰ —Tei. Aicuayãte se, ichõĩño ngue Pedro ee no nda. Ae chi huee nae, ùquĩ mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹ Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷² Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces serĩ, sã Jesús i ee nyii no. Ùquĩ ndese que Pedro ndua cote ra. Nyebe nyeseo tuchi nguiã cote.

Mbia Jesús curuchoi Pilato je

15 Nyaashĩ namo mose que sacerdote rerecua ñumunua ja ra. Amei ererecua abe no. Embesasa abe no. Mbia rerecua jate que ñumunua nda. Jesús que echucua suruchoi Pilato je ra. Pilato rei mbia rerecua hue jenda ja. ² —¿Judíos rerecua chõ nde re? i que Pilato ñee ee ra. —Ae. Judíos rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús rĩ nda. Ñee icuaã tuchi que erĩ nda. ⁴ —Sã ñee icuaã icuaãte nderĩ jẽ. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jêiquia mbucha ira rese, i ererecua

⁶ Pilato que mbia tarō ji mo mbusē mbei quia pascua mose ra. Co mii ngue embusē mbusē mbei quia pascua mose ra. Ae je mbia riqui ñee, “aque embusē mondo” i nae, aque chō ngue embusē mbei quia ee ra.

⁷ Barrabás, i que etarō ji mo je ra. Emo abe que chi huee erese ra. Mbia iquiasa que ũquĩ nda. ⁸ Mbia que ñee ngaē Pilato je ra. —Mbia mii tarō ji que erembusē mbeite quia, einyere si emo mbusē namo, i ja que mbia ñee Pilato je ra. ⁹ —¿Judío rerecua ra ambusē mondo jêje Jesús re? i rei que Pilato ra. ¹⁰ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹¹ —Sã Pilato Barrabás mbusē mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusē mondo” i chee Pilato je ra.

¹² —¿Mañi ae quia ra Jesucristo je re no? i que Pilato ñee ee ra. ¹³ —Embucha ira rese, i ja que mbia ñee ee ra. ¹⁴ —¿Mbae icuã esaã nde? i que Pilato ñee ee ra. —¿Embucha ira rese jê! i bei bei que mbia ra. ¹⁵ —Mbia turã jiri nda seje chã, i chee que Pilato ra. Nyebe Barrabás mbusē mondo nguiã. Jesús quiatu que eiruã nua cote ra. —Jembucha iquiasa ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaē ja Jesús mama no nda. ¹⁷ Tiru ireĩ ngue emingue ee cote ra. —Ererecua chō nde re, ichōiño iquiasa ee. Nyu ritimeĩ uma ji que emi eãquĩ ndese corona nda.

¹⁸ —Judío rerecua tuchi chō nde re, ichōiño ngue iquiasa ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngũĩã ndese erimba raã naa ee ra. ²⁰ I quia iquiasa tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²² Ngasē ngue pee cote ra. Gólgota, i que hue je ra. Eresa cuare, i chō nguiã hue je. ²³ Huee que vino mondo rei Jesús je ra. Mirra je emumbarai. Mbei eã ngue ra. ²⁴ Soldados que Jesús mbucha ira rese ra. Aquere que sita ñetē mbaba mbaba o je cote ra. —Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mii Jesús ãquĩ nguiti ibate ra. JESUS REI JUDIO RERECUA i que embesa mii nda. ũquĩ nii ño eriqui nguiã equiasa hue. ²⁷ Mbia nyeremo abe que embucha

ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ũquĩ nda.

²⁸ Embesa ji cheē nguire que Jesús iquiasa mbia icuã ndese cote ra. Sã embesa ji i riqui ñee no: “Mbia icuã ndese ra equiasa, sã embesa ji i ñee nyii no. ²⁹ Mbia que iquiasa iquiasa quia Jesús cheē naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equiasa. ³⁰ Equiche u nde ae hue si no, i tuchi que mbia quia iquiasa iquiasa ee ecuã mose ra. ³¹ Sacerdote rerecua abe que iquiasa iquiasa chō nguiã ee ra. Embesasa abe no. ũquĩ ngue ñee icuã icuã ja quia erĩ nda. —Mbia que embuquera quera rei nyii ra. Ae sí quera aroneate nguiã aque. ³² Judío rerecua mose ae, sã ae ae nguichi ira si. Cristo mose ae, sã ae ae nguichi no. I nda uremae erese. I nda ureicua cote, i ja que ererecua ñee icuã icuã erĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chō ngue ñee nguiã.

³⁵ —Elías je eriqui “quiatuchu” i reae, i rei que echeē andusa mo nda. ³⁶ Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷ Jesús que tasē mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹ Soldado rerecua que chĩ Jesús nonde mae erese ra. Emano ndese que eñi mae nda. —Dios ririñ ño eriqui re, i que cote ra.

⁴⁰ Cuña ngue chi jate ma e Jesús rese isho ra. María Magdalena abe que chĩ huee ra. Salomé abe no. María abe no. María rei José si. Jacobo Ñetē si abe no. ⁴¹ ũquĩ ngu e siqui bei quia Jesús rui ra. Echiurã ngue emi mii mbei quia ee ra. Galiléaa eico mose bei. Cuña tubiriãte abe que chi mae Jesús mbuchai rese huee ra. Ae nyoi Jesús rese Jerusalén, ũquĩ.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitō mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equiasa eraarō arō nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondongiã José je cote.

⁴⁶ José que Jesús raaque mbuquichi cote ra. Tirushĩ turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

Jesús raaque quera si

16 Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ūquĩ ja que aba mbushimbusa isi rei eichusẽ chusẽ sacua Jesús raaque rese ra. ² Tenda nyui ramo mose que echoi eatísaa ra. ³ —¿Aba ra sita curuba nande je eatiquia re? i rei que echoi quia ñee ñee nyue ra. ⁴ I que sita rurubai u ee cote ra. Sita cuasute quiatu ngue re. ⁵ Ique rei que echoi sita imi ye ra. Acuanĩndu mo ngue chĩ ngoi huee equiatocuti quti ra. Huĩraoshĩ oco tuchi que ecunui huee ra. Cuña ngue siquiche tuchi ra. ⁶ Acuanĩndu que ñee ee ra. —¿Mbaerã jẽingo siquiche re? Jesús raaque jẽsequia raque quia ã. Emoate a resẽ. Eraaque que quera si no. Jemae eatisa rese ae. ⁷ Jẽso asi rã echimbaaquiatu mbiirandu erese. Pedro abe jembiiirandu. “Jenonde ra esi Galilea. Jemae nda erese huee. Sã ñee jẽje nyii no”, jenyẽ embiiirandu, i que acuanĩndu ee ra. ⁸ Cuña ngue siquichete echeẽ andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashĩ namo mose domingo mose ra. María Magdalena nane je que nyecua ra. Aque si chõ eriqui siete aba checuayã icuã jea nyii reaẽ. ¹⁰ Ae que oso Jesús quiato mbiirandu ja cote ra.

Ngasẽ mose ee que echi nyeseo jate eya eã ee ra.

¹¹ —Jesús que quera si ra. Amae ngue erese ra, i rei que embiiirandu ra. Quera aroneate que ūquĩ je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra.

¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiatu mondo mbia mbiirandu

¹⁴ Aquere que Jesús nyecua uchimbaaquiatu ja je no nda. Once je. Ūquĩ quiaru mose que nyecua ee ra. Ñee asi asi que ee ra. —¿Mbaerã jeñia ãtãte riqui re?

¿Mbaerã “nyia” jenyẽ eã jembiiirandu mose sequera rese re? i que ñee ee ra. ¹⁵ —Jẽso secheẽ nenei nenei mbia ja je. Mbiamangue chooñoa jenda ja je. ¹⁶ Mbiamo nda seicua icua. Ūquĩ je bautizar jenyẽ. Ūquĩ nda siqui bei cote. Ae ra seicuayã, ūquĩ nda mbae rasi saã mbei. ¹⁷ Seicuasa ra mbiamae sayã saã saã tuchi. Aba checuayã icuã nda ejea jea mbia si seriĩ. Mbiamcheemo nda esaã. ¹⁸ Mbei ra eisi isi o je. Aba iquiasa mbei mose ra erasiã. O ra echono ñono erasi arõ embucherõ sacua, i que Jesús uchimbaaquiatu mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacua Dios jii cote. ²⁰ Echimbaaquiatu que nyoi Dios cheẽ nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbiamae sayã tuchi que esaã saã nguia ra. MbiamDios cheẽ icua sacua. Amén.

SAN LUCAS

Lucas ucheẽ mbesa Teófilo je

1 Jesucristo que mbae saã saã tuchi quia huico mose íbii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ũquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ũquĩ ereicua tuchi sacua ño aico nguia embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngũinisi rese. ũquĩ ngue Dios cheẽ mumbayã mbei quia ra. Eicuãte, i aroneãte que mbia mo nguia eriĩ nda. ⁷ Eriiriã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espíritu Turã nda siqui tuchi erese. Esi rie ye ereco mose bei. ¹⁶ Nderiirĩ nda mbia Israel jenda mbuchebi ja Dios je. Dios ra ũquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ

je. Nderiirĩ nda mbia mbaturã turã nyiese. Eru mbaturã turã nguiriĩ ndese. Eriirĩ mbaturã turã ngu rese no. Nderiirĩ nda aba cheẽ mumbasa mbaaquiatu quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ũqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguia ñee turã sacua ndeje. ²⁰ “Nyia” ere eã ñochĩ secheẽ je. Nyebe ra ndeisyã. Ndecheẽ ngũia nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra. ²² Zacarías que usẽ nyee ra. Echeẽ ngũia. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra. ²³ Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso uchuchua cote ra.

²⁴ Aquere qu Eya uchi que cote ra. Eninisi que useã mbei tuchia si cinco meses ra. ²⁵ —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riirĩ nda nyecua u mbia je”, i que ángel mo nda

²⁶ Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra. ²⁷ —Eso rã ñee nyucuaaque María je, i que Dios ángel mondo ra. Emo ngue siquíã tuchi María rese ra. Eruã mbei. José ninisibi rei María. José siquíã ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuanĩ mo si, i que ángel María je ra. ²⁹ María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanimbae ra

nde cote. Nderiirina nda eretea cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riiirĩ mondo nderie ye. Espíritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia quia ee nyii nae, aque ra tiirĩ cote. ³⁷ Dios quiarei mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguiã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra. ⁴¹ Elisabet María cheẽ andu mose, erie yenda que umi nda. Espíritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umi nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra.

Acheẽ turã mbei quia Dios rĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiataũ ndaque.

Nyebe ra mbia ia jate serese cote. ⁴⁹ Dios quirãcuã ngue mbae turã saã tuchi seje ra.

Ae miñ ño eturã tuchi emo si re.

⁵⁰ Ae ndua turã nguia Dios rese nae, ñquĩ ndese chõ Dios ia eã tuchi riqui nguiã.

Eĩ mbei chõ Dios nguiã mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguiã.

⁵² Siqui mingue je chõ Dios miñ miñ nguiã mbia rerecuarã.

Ae ererecua uaqiata saã saã nguia nae, ñquĩ ño Dios sirõ nguiã.

Ererecua eã ño ñquĩ cote re.

⁵³ Dios que mbae mee mee nguia mbaecha reã je ra. Mbaecha quia emboochi nguiã.

⁵⁴ Dios que siqui tuchi judíos rese ra.

Tesareia mbei esi.

Eyayã mbei erese no. ⁵⁵ Sã Dios ñee Abraham je no, ñquĩ ngue embuchebiã mbei ra.

Ae ucheẽ mondo judíos jaje nae, ñquĩ ngue embuchebiã mbei no nda, i que María ñee turã Dios rĩ nda. ⁵⁶ María que siqui arete Elisabet rese ra. Tres meses. Aquere que eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra. Nyaa cuquia que cote ra. ⁵⁸ Mbia que nyoĩ ja Elisabet ndea cote ra. Ejii jenda. Eresenda ja. —Dios turã tuchi riqui ndeje co. Ñquẽ mondo ndeje, i ja que ee ra. Eya ja tuchi que erese ra. ⁵⁹ Ocho días mose que circuncisión naa eriirĩ je ra. Zacarías, i nda mbia eriirĩ je chã nde. Eru rã si.

⁶⁰ Esi quia que ñee nda. —Tei. Juan nande chõ ee, i que esi ra. ⁶¹ Mbia que ñee esi je ra. —¿Mbaerã nda “Juan” ere nderiirĩ je re? Juan mo eã nderesenda mo aa resẽ, i rei que mbia esi je ra. ⁶² Mbia que o mbaaba aba Zacarías je ra. —¿Mañi nda nderiirĩ je re? i ee.

⁶³ Zacarías que ñomee mbia je ra. Nyebe mbia embesa sacua mee nguiã ee. —Juan, i chõ seriirĩ je, i que Zacarías embesa ra. Mbia que nyuruira ja u mae erese ra. ⁶⁴ Aque ruibe que Zacarías ñee aquiato cote ra. Ñee turã tuchi que equia Dios rĩ cote ra. ⁶⁵ Zacarías cheẽ andure que mbia nyuruira jate ndua ndua hue jenda ra. Nyebe mbia ñimbiirandu ja nguiã sita ibate bate jenda. Judea, i que hue ibi je ra. ⁶⁶ Ae jirandu quia erese, ñquĩ ngue ndua tuchi quia erese ra. —Mañi nda Zacarías riiirĩ nguia reae. Nandemae nguia erese no, i que mbia quia ndua ndua ra. Dios que siqui tuchi Zacarías ndiirĩ ndese ra.

Zacarías ia tuchi ñee Dios je

⁶⁷ Espíritu Turã ngue siqui tuchi Zacarías rese ra. Nyebe Zacarías Dios cheẽ nenei nguiã.

⁶⁸ Sã mbia ñee turã Dios rĩ judíos rerecua rĩ.

Uturã ngue eteacuquia nande je ra.

Nanderirõ ngue mbae icuã si ra.

⁶⁹ Nanderirõ sacua nandeicuã si que Dios mondo nande je ra.

David riiirĩ nducucha que nanderirõ sacua nda.

⁷⁰ Sã Dios ñee cose no.

“Mbia rirõ sacua nda ambu íbii”, i cose no.

Ucheẽ nenei neneisa que embuchecua mbia je cote ra.

⁷¹ “Jëucuãyãsa si ra jendirõsa jendeaquiato bei”, i que Dios nande je ra.

⁷² Dios turâte que eriqui nandei ñiinda je ra. Abraham je abe que eturâte riqui ra. Ae Dios ñee Abraham je nyii nae, echeẽ ngue io cote ra.

⁷⁴ Dios que ñee Abraham je nanderĩ nyii ra. “Taendeaquiato jëucuãyãsa si, jësiquicheã sacua ico mose serese”, i que Dios nanderĩ cose ra.

⁷⁵ Nyebe ra nandeico turã mbei Dios je. Ae ra nandemingo bei icúe umbaerã.

⁷⁶ Nde ra Ibatenda cheẽ esenei senei nguia mbia je, Ñquẽ.

Dios riirĩ ndetã nda Dios cheẽ eresenei senei nguia mbia je, Ñquẽ.

Mbia icoquiato sacua Dios riirĩ je. ⁷⁷ Eĩ mose ra Dios mbia rirõ eicuã si.

Eĩ mose ra Dios mbia icuã mbutiã esi.

⁷⁸ Dios turâte quia eriqui nguia nande je.

Eriirĩ nda tu ibate si mbae mbuchecua nande je.

⁷⁹ Nandeaquiatoã mbaaquiato sacua ño eru nguia aque.

Nandemingo sacua nyaashĩ naanguia chõ eru nguia aque, i que Zacarías ñee ãquẽ je ra. ⁸⁰ Ñquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

Jesús nyaacuquia

2 Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbia mbae nombre mbesa mbesa ja mose, “censo” i que ñquĩ je ra. ² Censo raã namo mose rei ñquĩ. Cirenio ngue Siria jenda rerecua aque mose ra.

³ —Jenyusua sua jëso ja pueblo. Nombre mbesa mbesa ja sacua jembae, i que ererecua mbia ja je ra.

⁴ Nyebe José choi nguia Judea. Belén, i que sucha je ra. Belén ño David chusua re. José i chõ David re. Nyebe José choi nguia Belén. Umbae ibi recha. Nazaret recha. Galilea abe recha no. ⁵ José que nyoĩ Belén umbae nombre mii sacua nda. María rese. María que eninisibi ra. María riote que ra. ⁶ Siqui mose Belén ngue ãquẽ ndasi rasite María je ra. ⁷ Aque ramo ngue María ngui-irĩ mbua ra. Ñuma ngue tiru je ra. Ticuasú quiarusa ye que eno nda. Mbia chuchua quiato que eitãyãte ee ra.

Oveja raarõsa ngaẽ mae Jesús itãqueẽ ndese

⁸ Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda. ⁹ Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguia esi. ¹⁰ Angel que ñee ee ra. —¿Mbaerã jësiquichete riqui re? Mbae turã nii ño achu nguia ñee jëje co. Ae ra asenei jëje, mbia mbia sacua tuchi chõ ñquĩ nde.

¹¹ Dios riirĩ ngue nyaacuquia namo Belén nda. Cristo, i equia ee. Mbia rirõsa mbae icuã si chõ ae re. ¹² Aque echi ticuasú quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenyee ra cote, i que ángel ñee oveja raarõsa je ra. ¹³ Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rĩ nda. ¹⁴ Sã mbia ñee turã ja Dios ibatenda rĩ.

Sã Dios uquiato mbia ja ibi jenda, i que ángeles ñee nyecha ee ra. ¹⁵ Angeles que nyoĩbe ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguia nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra. ¹⁶ Nyoĩ asi tuchi que mae erese ra. Ngasẽ ngue María je ra. José abe je. Ñquẽ abe je. I que ãquẽ u ticuasú quiarusa ye ee ra. ¹⁷ Oveja raarõsa que mbia mbiirandu ja erese ra. Ae ángel senei senei nguia ee María riirĩ nii, ñquĩ ngue oveja raarõsa senei senei tuchi mbia je cote ra. ¹⁸ Eandusa que nyuruira ja tuchi eandu ra. ¹⁹ María que ndua ndua tuchi quia ñquĩ ja rese uchiangui re ra. ²⁰ Oveja raarõsa ia tuchi que nyoĩ nyebi ovejas je ra. Ñee turã turã tuchi que echoi quia Dios rĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa ãquẽ je cote ra. Jesús, i que ãquẽ je cote ra. Angel cheẽ ndui si tuchi chõ “Jesús” ichĩ ãquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riirĩ je. ²² Aquere que María ñimbitirõ Moisés cheẽ ndui si cote ra. Aquere que ãquẽ nduruchoi Jerusalén cote ra. Ñquẽ mee sacua Dios je. ²³ Embesa ji cheẽ ndui si que ãquẽ mee Dios je ra. —Ae eriirĩ i erãcuẽ nae, ñquĩ jemondo tuchi Dios je, i quiato ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee no: —Nyurusí nyeremo jemee Dios je. Ñquĩ eã mose, nyurusí ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icuã si. Espiritu Turã abe que siqui Simeón ndese ra. ²⁶ Espiritu Turã nguia ñee ndei Simeón je nyii. —Eremae nda Dios riirĩ ndese. Nde-mano nonde ra eretea. Dios ra embu íbii, i que Espiritu Turã ñee Simeón je nyii ra. ²⁷ Espiritu Turã ngue Simeón querao Dios chuchúaa ra. Embesa ji cheẽ ndui si que José ãquẽ nduruchoi Dios chuchúaa aque mose si ra. María reses. ²⁸ Simeón ngue ãquẽ sui ra. Eya tuchi que erese ra. —¿Co chõ jẽ! i que Simeón ñee turã Dios je ra.

²⁹ Dios, ndecheẽ ngue io seje cote ra. Seyate aico co cote Sererao se cote.
³⁰ Nderiirĩ ndese que amae cote ra.
³¹ Ae erembu mbia rirõ sacua mbae icua si nae, aque rese aico mae co cote.
³² Mbua resae sacua tuchi chõ nderiirĩ ndiqui re. Judíos eã abe ra etesae tuchi. Judíos abe je ra eturã tuchi no, i que Simeón ñee Dios je ra. ³³ Simeón ñee mose María riirĩ ñi, José que nyuruira tuchi echeẽ andu ra. María rese. ³⁴ Simeón ngue ñee turã María je ra. —Nderiirĩ nda judíos tubiriã mingo turã. Ae siqui sereãte quia erese, ùquĩ nguia ra emingo icua. Mbua ra ñee icua icua nguia nderiirĩ turã je. Eicua je rocoĩ. ³⁵ Ae ndua turãte quia nderiirĩ ñi nae, ùquĩ ndua ndua turã nda nyecua mbia je cote. Ae ndua ndua icua nguia, ùguĩ ndua ndua abe ra nyecua mbia je cote no. Mbua icua nda nemundite nderiirĩ ndese, i que Simeón María je ra. ³⁶ Huee que arite mo ndiqui ra. Dios cheẽ nenei neneisa que ae ra. Ana, i equia ee. Faniel, i que eru eiruã siasa je ra. Aser, i que ei ñiinda je ra. Ana yasu mose que ngurã ndea nyii ra. Siete años que eriqui ngu rese nyii ra. ³⁷ Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoĩ. Isa abe. ³⁸ Ana ngue mae ãquẽ Jesús rese Dios chuchua cote ra. —iCo chõ jẽ! i tuchi que Dios je ra. Ñee turã tuchi que ãquẽ ñi mbia jaje cote ra. Ae Dios riirĩ saarõ arõ nguia nae, ùquĩ jaje que Ana ñee turã turã ãquẽ ñi nda.

José nyebi Jesús rerao Nazaret

³⁹ José que mbae saã ja embesa ji cheẽ nguire ra. Aquere que echoi nyebi Galiléaa ra. Nazaret, i equia echuchua je. ⁴⁰ María riirĩ ngue tiarõ cote ra. Ñim-baaquiatu quiatu que equia cote ra. Ñimbirãcuã nacuate que equia cote ra. Dios turã ngue siqui tuchi quia erese ra.

Jesús ñim-baaquiatu quiatu Dios chuchúaa

⁴¹ Aque tenda bei que José riqui nyoĩ choi Jerusalén nda. Fiesta de la pascua mose bei. María rese. ⁴² Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³ Fiesta ua mose que ecuaẽ ndei quia nyebi ra. Jesús que siquichõ Jerusalén nda. Jesús abe oso reĩ nguia usi je. Ngu abe je. ⁴⁴ Jerusalén ño eriquichõ neaẽ. Mbua ataque rese eru reĩ nguia esi je. Mbua que ngaẽ ngaẽ bei quia tenda mumba chee ra. —Ma Jesús ñi, i rei que nguesenda je ra. ⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶ Tres días mose que erea huee cote ra. Dios chuchúaa que eriqui ee ra. Ñim-baaquiatu quiatu.

Mbua mbaaquiatu cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i que equia ee ra. ⁴⁷ Jesús cheẽ aracua tuchi que eriqui mbua je ra. Nyebe mbua nyuruira nguia echeẽ aracua andu. ⁴⁸ Eru erea mose huee, ae abe que nyuruira ra. Esi abe nyuruira no. Esi que ñee ee ra. —¿Mbaerã eresõ urerese re, Echo? Ureya eã tuchi que eriqui nderequia asi asi ra, i que María nguiri je ra. ⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ, i que Jesús usi je ra. ⁵⁰ María que Jesús cheẽ icuayãte ra. José abe echeẽ icuayã no. ⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ùquĩ Jesús chisaã ndese ra. ⁵² Jesús rete que siri siri oso quia cote ra. Ñim-baaracua racua que equia no nda. Dios iate que eriqui erese ra. Mbua abe iate que eriqui erese no nda.

Juan Dios cheẽ senei senei mbua je

3 ,2 Aquere que Dios ñee Juan je ra. Zacarías riirĩ je. Tiberio siqui bei mose mbua ja rerecuarã. Quince años ereco mose mbua rerecuarã. Poncio Pilato que Judea jenda rerecu a que mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisania que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ùquĩ ererecu si que mose que Dios ñee Juan je turuquia re ra. ³ Nyebe que Juan Dios cheẽ senei senei nguia mbua je ra. Ama Jordán ndurubinda jaje. Eĩ ño ngue Juan nguia ñee mbua je ra. —Jẽhui chõ jẽicuã si. Dios jẽicuã mbutiã sacua. Ùquĩ mose nda bautizar ae jẽje chã, i que Juan nguia ñee mbua ja je ra. ⁴ Isaías chimbesa io sacua ño ngue Juan Dios cheẽ nenei nenei nguia. Isaías chimbesa chõ ã nde:

Emo nda ñeemombo mombo quia mbua je turúquiaa. “Ñeenda nandererecu mbaerã jembuquiche. Jẽingo quiatu nandererecu tu nonde. ⁵ Ñeenda jembaturã turã nandererecu mbaerã. Ibi cuaacua jembato mbato. Ibi ati ati jẽsimiambo ambo. Ñeenda chaa chaa jeñeengo. Ibi rashĩ ndashĩ jẽiti iti.

⁶ ‘Mbua mingo beisa’, i ja ra mbua ñee Dios je cote”, i ra emo nguia turúquiaa, i que Isaías embesa cose ra. ⁷ Mbua que nyoĩ nyoĩ ja quia Juan ndea ra. Juan bautizar i sacua ee. Juan ngue ñee ee ra. —Mbei rã ño jẽingo nguia. Mbae icua nda jẽĩ jẽĩ mbua je, ùquĩ si jenyu quia seje co re? ⁸ Jẽ mbae icua ndecha mose Dios je, mbae turã jẽsaã saã mbei quia ee cote. “Abraham ndiirĩ nducucha chõ nande re.

Nyebe ra Dios nandemingo bei" jjenyechĩ nda jẽ! Dios Abraham ndiirĩ nducucha chao arondete raque sita je. ⁹ Ira rã si chõ mbia re. Sã ira mo ia eã no. Sã ea eã maña ño no. Sã eréi chõ no. Eẽ serĩ serĩ ño Dios mbia je, mbia mbae turã naa eã mose, i que Juan ñee mbia je ra. ¹⁰ —¿Mbae rese ra ureico Dios je re? i que mbia Juan je ra. ¹¹ Juan ngue ñee ee ra. —Ndeirao nyeremo mose, enongue emondo eirao eã je. Ndechĩurã mose, emo emondo mbaecha reã je, i que Juan mbia mbaaquiato quiato ra. ¹² Impuestos isi isiquia mo abe que nyoĩ Juan je ra. Juan bautizar i sacua ee. —¿Mbae rese ra ureico ure re? i que ñee Juan je ra. ¹³ —¿Mbae ra jembatachĩ jẽ! ¡Cobrar jenje turã ño jẽ! Jẽicua quiato chõ, i que Juan ee ra. ¹⁴ Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —¿Mbia mbae ra jẽisi chooñochĩ jẽ! "Co que mbae icua saã nda" jjenye chooñochĩ nda emo je jẽ! Jembae ae chõ jendeco, i que Juan ñee soldados je ra. ¹⁵ Mbia que mae quiato quiato quia Juan ndese ra. —Cristo chõ co reae, i raque mae quiato quiato erese. ¹⁶ Juan ngue ñee mbia jaje ra. —I achõ je chõ aico nguiã bautizar i mbia je co. Co chĩ emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹⁷ Ae ra mbia umbae miĩ icúe. Eeturã achõ ño embae re. Ae embae eã nae, ũquĩ nda esei cote. ũquĩ ndeisa ra ua eã mbei tata. Sã mbia quiata a chiqui chiqui no. Sã ea miĩ icúe no. Sã echurique mombo tátaa no, i que Juan ñee mbia je ra. ¹⁸ Eẽ ngue Juan nguia Dios cheẽ turã nenei nenei mbia je ra. Mbia mbaaquiato tuchi. ¹⁹ Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icua eresaã saã ja techĩ nguia re, i tuchi que Juan ee ra. ²⁰ Ererecua que Juan ñee mumba bei chõ nda. Ererecua que Juan tarõ nyee cár-cel nda.

Juan bautizar i Jesús je

²¹ Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra. ²² Espiritu Turã ngue nguichi Jesús rese ra. Nyurusĩ rã ño nguichi checua erese. Ibatenda que ñee ee ra. —Seriiĩ ño nde re. Sechesequa chõ nde re. Sey-ate nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que mbia mbaaquiato quiato ramo nda. —José riiĩ, i ja que mbia Jesús je ra. Elí riiĩ nguia José re. ²⁴ Elí rei Matat ndiirĩ. Matat ndei Leví riiĩ. Leví rei Melqui riiĩ. Melqui rei Jana ndiirĩ. Jana ndei José riiĩ. ²⁵ José rei Matatías riiĩ. Matatías rei

Amós ndiirĩ. Amós ndei Nahum ndiirĩ. Nahum ndei Esli riiĩ. Esli rei Nagai riiĩ. ²⁶ Nagai rei Maat ndiirĩ. Maat ndei Matatías riiĩ. Matatías rei Semei ndiirĩ. Semei ndei José riiĩ. José rei Judá riiĩ. ²⁷ Judá rei Joana ndiirĩ. Joana ndei Resa riiĩ. Resa rei Zorobabel riiĩ. Zorobabel rei Salatiel riiĩ. Salatiel rei Neri riiĩ. ²⁸ Neri rei Melqui riiĩ. Melqui rei Adi riiĩ. Adi rei Cosam ndiirĩ. Cosam ndei Elmodam ndiirĩ. Elmodam ndei Er riiĩ. ²⁹ Er rei Josué riiĩ. Josué rei Eliezer riiĩ. Eliezer rei Jorim ndiirĩ. Jorim ndei Matat riiĩ. ³⁰ Matat rei Leví riiĩ. Leví rei Simeón ndiirĩ. Simeón ndei Judá riiĩ. Judá rei José riiĩ. José rei Jonán ndiirĩ. Jonán ndei Eliaquim ndiirĩ. ³¹ Eliaquim ndei Melea riiĩ. Melea rei Mainán ndiirĩ. Mainán ndei Matata riiĩ. Matata rei Natán ndiirĩ. ³² Natán ndei David riiĩ. David rei Isaí riiĩ. Isaí rei Obed riiĩ. Obed rei Booz riiĩ. Booz rei Salmón ndiirĩ. Salmón ndei Naasón ndiirĩ. ³³ Naasón ndei Aminadab riiĩ. Aminadab rei Aram ndiirĩ. Aram ndei Esrom ndiirĩ. Esrom ndei Fares riiĩ. Fares rei Judá riiĩ. ³⁴ Judá rei Jacob riiĩ. Jacob rei Isaac riiĩ. Isaac rei Abraham ndiirĩ. Abraham ndei Taré riiĩ. Taré rei Nacor riiĩ. ³⁵ Nacor rei Serug riiĩ. Serug rei Ragau riiĩ. Ragau rei Peleg riiĩ. Peleg rei Heber riiĩ. Heber rei Sala riiĩ. ³⁶ Sala rei Cainán ndiirĩ. Cainán ndei Arfaxad riiĩ. Arfaxad rei Sem ndiirĩ. Sem ndei Noé riiĩ. Noé rei Lamec ndiirĩ. ³⁷ Lamec ndei Matusalén ndiirĩ. Matusalén ndei Enoc ndiirĩ. Enoc ndei Jared riiĩ. Jared rei Mahalaleel riiĩ. Mahalaleel rei Cainán ndiirĩ. ³⁸ Cainán ndei Enós ndiirĩ. Enós ndei Set riiĩ. Set rei Adán ndiirĩ. Adán ndei Dios riiĩ.

Satanás tã i Jesús je

4 Jesús que nyebi Ama Jordán si ra. Espiritu Turã ngue siqui tuchi quia erese ra. Turúquiaa que Espiritu Turã Jesús rerao ra. ² Huee que eriqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. —Tã tae rã Jesús je. Ma Jesús mbae icua naa, i rei que diablo Jesús rĩ nda. ³ —Nde Dios riiĩ mose, mbichae esaã co sita je no, i rei que diablo Jesús je ra. ⁴ Jesús que ñee ee ra. —Tei. Eẽ ngue embesa ji ñee nda: "Mbia chiũ achõ nda mbia mingo eã. Dios cheẽ nguia ra mbia mingo nguiã", i que embesa ji ra, i que Jesús diablo je ra. ⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia ja Jesús je ra. Ishonda abe reacuquia ja ee. Aque mose bei que ereacuquia ja ee ra. ⁶ Diablo que ñee Jesús je ra. —Sembae ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecuarã nda aremiĩ. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra. ⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? "Dios ae rese chõ jẽingo", i que

embesa ji ñee ndesë, i que Jesús diablo je ra. ⁹ Aquere que diablo Jesús rerao Jerusalén nda. Querao que surchui ibate Dios chuchua arõ nda. Ibate tuchi echuchua. —Nde Dios riirí mose, eo oso íbii. Dios ra ndereaquiato. Eremanoã nda oso ngoi. ¹⁰ Sã embesa ji riqui ñee no:

Dios ra ángeles mondo ndereaquiato sacuaã.

¹¹ Oje ra ndeisi.

Nembuquichi mingue rae.

Sita ra cua iã ndei je,

i que embesa ji ra, i rei que diablo Jesús je ra. ¹² Jesús que ñee diablo je ra. —Sã embesa ji ñee no: “Ma Dios sereaquiato. Tã tae ee no’, jenyechĩ nda Dios je”, i ñi Dios cheë nde, i que Jesús ñee diablo je ra. ¹³ Diablo Jesús mbũcua aronea mose, secha chee que oso ra. —Emo mose jiri ra tã aebe ndeje jẽ, i rei que uchiangui re ra.

Jesús mbia mbaaquiato quiato ramo

¹⁴ Jesús que oso nyebi Galilëaa cote ra. Espiritu Turã quirãcua ñgue siqui tuchi quia erese ra. Mbua hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbia mbaaquiato quiato ra. Mbua que ñee turã ja quia erĩ nda.

Nazaret jenda Jesús isiteã

¹⁶ Jesús que ngasë Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ñgue embesa ji renei nonde mbia je ra. ¹⁷ Mbua que Isaías chimbesea mundo Jesús oo ra. Isaías chimbesea que ee quia cote ra. ã embesa ji que esaã saã mbia je ra:

¹⁸ Espiritu Turã ndiqui tuchi serese co.

Dios que sererecúe ra.

Echeë turã nenei nenei sacuaã mbaecha reã je.

Etarõi mbusë sacuaã ño ñgue Dios sererecúe ra.

Eresayã ndesa ira sacuaã ño ñgue sererecúe no nda.

Ae je ererecua icuãte riqui nae, ñquĩ mbusë sacuaã ño ñgue Dios sererecúe nguiã no.

¹⁹ Mbua je ñee ñee sacuaã ñgue Dios sererecúe no nda.

“Namo ño Dios turã ndiqui nguiã”, i sacuaã mbia je, i que Jesús embesa ji mbuchecua mbia je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbua que mae mbei quia erese ra. ²¹ Jesús que ñee mbia je ra. —Embesa ji que ambuchecua jẽje namo, aque io quia jẽje a cote, i que Jesús mbia je ra. ²² Mbua que ñee turã ja quia Jesús rĩ nda. —Jesús cheë turã tuchi quia eriqui re, i ja tuchi que mbia nyurũra ra. —¿José riirí ño co re? i que mbia quia ee ra. ²³ Jesús que ñee mbia je ra. —“Mbua mae sayã ñgue eresaã saã Capernaum nae, ñquĩ mo esaã aa ndechuchúaa no”, jenye arõte seje sechuchúaa.

²⁴ Tacheë nyecua rã jẽje. Dios cheë mbuchecua

ishonda cheë nguia ra mbia isi turã mbei quia. Nguecua jenda cheë nguia ra eisi turã eã. ²⁵ Tacheë nyecua rã jẽje. Elías reco mose íbii, ama ñgue nyaaquã mbei ra. Tres años ndobei. Mbua riãcua ja que aque mose ra. Eru checha tubiriãte que chi rei hue Israel jenda ra.

²⁶ “Ñquĩ eru checha mo je mbae echao turã”, i ãte que Dios quia Elías je ra. “Sarepta jenda je quia mbae echao eru checha je”, i quiato que Dios ee ra. Judío eã je quiato que Dios Elías mundo ra. ²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguiato que embucherõ Siria jenda ra. Naamán, i que ee ra, i que Jesús ñee mbia je ra. ²⁸ Judíos chumunuasa que Jesús riqui ñee mbia je ra. Mbua Jesús cheë andu mose que paama i ee ra. ²⁹ Mbua paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbua Jesús rerao rei ra. Hue si nda emombo nguiã ña. ³⁰ Jesús que oso chee mbua tubiriã ite re si ra.

Jesús aba checuayã icuã jea amei mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbua mbaaquiato quiato ra. ³² Ererecua rã ño ñgue Jesús riqui mbua mbaaquiato quiato ra. Nyebe mbua riqui nguiã nyurũra tuchi echeë andu. ³³ Huee que amei mo ndiqui mbua chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erachu quia urerea co re, Jesús? Quiatúae urerecha ae. ¿Urerĩcharã ño erachu quia co re? Dios rucucha chõ nde re. Areicuate se, i rei que aba checuayã icuã Jesús je ra. ³⁵ Jesús que ñee ee ra. —Equirĩ chõ jẽ. Esë oso amei ñiangui si, i que Jesús ee ra. Jesús cheë mose que aba checuayã amei mombo íbii ra. Mbua tubiriãsa. Usë ñgue u amei mbasiã cote ra. ³⁶ Mbua turĩriã ñgue nyurũra ja u erea ra. —Jesús quirãcua ae ñee nguiã. Mbua rerecua rã ño eriqui nguiã ñee aba checuayã icuã je. ¿Sã aba checuayã echeë mumbayã jẽ! i tuchi que mbua nyurũra erea ra. ³⁷ Mbua que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usë mbua chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbua Jesús je ra. ³⁹ Jesús que oso nyibi earõ nda. Ñee ñgue eracu je ra. —Etiba, i que ee ra. Eracu que hui esi Jesús cheë nguire ra. Ari que juã cote ra. Mbae que echao chao mbua chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbua nguesenda rasi ruru-cuaë cuaë ja Jesús je ra. Erasi chumumbara tuchi que

ra. Jesús que o chono ñono ja erasi arõ embucherõ cherõ ja ra. ⁴¹ Aba checuayã icuã ngue usẽ usẽ nguia mbia si Jesús cheẽ mose cote ra. —Nde rei Cristo Dios riirĩ, i que usẽ usẽ mbia si ra. —jẽñee eã ño jẽ! i tuchi que Jesús quia aba checuayã icuã je ra. Ûquĩ ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbirĩ na, i rei que ra. Mbua que nyoĩ erui erea chee ra. —jEresochĩ nda urerecha jẽ! Ure rese bei chõ eico, i rei que mbua ñee Jesús je ra. ⁴³ Jesús que ñee ee ra. —Dios cheẽ tasenei senei pe quitinda je abe. Nyebe sembu nguia, i que Jesús ra. ⁴⁴ Jesús que mbua mbuchesea sea quia Galilea jenda ra. Dios cheẽ nenei nenei judíos chumunuásaa.

Jesús sira tubiriã mbua uquia mbia je

5 Emo mose que Jesús riqui ama ndisha rimia ndese ra. Genesaret, i que ama ndisha aque je ra. Mbua cuabẽ ngue ngaẽ ee huee ra. Dios cheẽ anduse rete que ra. Nyebe mbua tubiriã Jesús mumbi i i tuchi nguia. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiato quiatu ra. ⁴ Mbua mbaaquiato jare que ñee Simón je ra. —Eriquiraa rĩ canoa jendao. Huee tarafa jemondo ii. Sira mbuasa jemondo ii, i que Jesús ee ra. ⁵ Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simón Jesús je ra. ⁶ Mbua que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñiimi sira usi je. ⁸ Sira tubiriãchĩ sira eande nyii. Nyebe Simón Pedro nyuruiru tuchi nguia mae Jesús chimondo rese. Ngoi que ngũĩã ndese ñee ee ra. —Seicuãte aico co, Sererecua. Serecha rei se ae, i rei que Simón Pedro ñee Jesús je ra. ⁹ Echiã nguia cuaãcuã i tare nguia. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰ Zebedeo riirĩ abe que chi ja Simón ndese huee ra. Jacobo, i que enongue je ra. Juan, i que enongue je no nda. Ûquĩ chiã abe que cuaãcuã i ra. Jesús que ñee Simón je ra. —jEresiquichechĩ nda jẽ! Sira rese ra ereicoã cote. Mbua rareru reru bei quia seje cote, i que Jesús ee ra. ¹¹ Canoa yenda ngasẽ mose ama nimíaa, umbae que esecha ja nyoĩ bei nonde Jesús rese cote ra.

Jesús mbia leproso mbucherõ

¹² Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũĩã ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴ Jesús que ñee ee ra. —jErecheẽchĩ nda mbua mo je jẽ! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbua jirandu nderasiã ndese cote, i que Jesús ñee ee ra. ¹⁵ Mbua que ñimbiirandu i i tuchi quia Jesús rese ra. Ngaẽ ngaẽ ja que equia echeẽ andu ra. Umbucherõ cherõ sacua abe que eriqui ngaẽ ngaẽ erea ra. ¹⁶ Jesús que oso oso quia mbua tiãmbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbua mbaaquiato quiatu ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ùquĩ nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacua. ¹⁸ Mbua que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹ Tuchua mbaranguiatuãte que ee ra. Mbua tubiriã ngue tuchia mbiitãyã ee ra. Nyebe erasi ruruchoi nguia sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbua ite rĩ. ²⁰ —Ererucuaẽsa riqui seicua ùquĩ, i que Jesús ñee uchiangui re ra. Nyebe ñee nguia emi sayã je. —Ndechisaã mbae icuã ambutiã nguia ndesi co, i que Jesús ee ra. ²¹ Fariseos que ñee ñee nyue ra. Embesasa rese. —Jesús ñee icuã ñochĩ nguia Dios rĩ co. Dios ibatenda ae mbua chiao icuã mbutiã nguia esi. Jesús aquiato ño ñene, i rei que eu ñee ñee nda. ²² Jesús que ùquĩ ndua icuã icuate ra. Nyebe ñee nguia ee cote. —¿Mbaerã jẽingo ndua icuã nde? ²³ ¿Ma mbaranguiatuã eã jiri jẽje re? ¿Mbua icuã mbutiã ere? ¿Mbua rasi mbucherõ ere no? ¿Ma mbaranguiatuã eã jiri ùquĩ jẽje re? ²⁴ Dios riirĩ ndei se. Mbua chiao icuã mbutiã aquiato chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵ Jesús cheẽ ndurucha reã ngue emi sayã juã nda. Mbua que mae ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda. ²⁶ Mbua que nyuruiru ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbua u mae nguia erese ra. Mbua ñee turã ja Dios rĩ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasë ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae recha ja umbae. ²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuãte Jesús chimbbaaquiato je ra. Embesasa rese ñee icuã ee. —¿Mbaerã jëingo quiaru impuestos isi isiquia rese re? Mbia icuã ndese abe jëingochi nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui abambucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jëicuã si jëhui”, ae chõ ngue u nguiã eicuã je, i que Jesús ee ra.

Jesús chimbbaaquiato hui ãte uchiu si

³³ Mbia que ñee Jesús je ra. —Juanñimbbaaquiato hui hui uchiu si. Ñee nonde Dios je. Fariseos chimbbaaquiato abe hui hui uchiu si no. ¿Mbaerã ndechimbbaaquiato riqui hui ãte uchiu si re? i que mbia Jesús je ra. ³⁴ Jesús que ñee ee ra. —Sã emo ngüinisirã isi ramo mose no. Sã eresenda iate riqui quiaru erese no. Sã hui aroneate uchiu si aque mose no. ³⁵ Sã eru riqui mano emo mose no. Aque mose quia ra equiato hui uchiu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mñ aroneate tiru ima sorei rese no. Ñquã mose eicuãte cote. Eyasu ra quiata chõ esi. ³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato aronea. Eri rasi ra ñimatã ño mbae ire ndoro. Eri ra uchë ja. Mbae ire abe mbñicuãte ra cote. ³⁸ Eri yasu quia nda equerecoquiato nguiã mbae ire yasu ye. Soroã sacua. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheë yasu isi sereãte, i que Jesús ñee mbia je ra.

Jesús chimbbaaquiato mbae a ishao shao sábadu mose

6 Sábadu mo mose que Jesús si quia mbiaco ite rñ nda. Uchimbbaaquiato rese. Echimbbaaquiato que quiata a ucua mñ mñ nyoï quia ecuã mose ra. Equiti quitire oo je que echoi quia eachãaña cote ra. ² Fariseos mo ngue ñee ee ra. —¿Mbaerã jëingo mbae ishao shao sábadu mose re? Co mose chõ mbia uque-nea ucua resë, i que fariseos ee ra. ³ Jesús que ñee ee ra. —¿Embasa ji rese jemae eã David riñ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra.

Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sábadu rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sábadu nongue mose que Jesús si judíos chumunuasa ra. Mbia que embaaquiato quiato huee ra. Huee que eo tomei mo ndiqui ee ra. Equiato cutinda tomei ngue ra. ⁷ Fariseos que mae nguiato quia Jesús rese ra. Embesasa abe que mae nguiato quia erese ra. —Mañi nda Jesús quia eo tomei je reae. Co sábadu mose reae. Sã embucherõ jë. Nandecheë icuã nda ee chã jë, i que eu mae nguiato Jesús rese ra. ⁸ Ñquã ndua icuã ngue Jesús icua ra. Ñee ngue eo tomei je cote ra. —Ehuã na u mbia ite rñ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae eturãte jëje co tenda mose re? Sábadu mose bei. ¿Coche mbae turã naa naa sábadu mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheë mose ra. Aque mosechi que eo nyerõ cote ra. ¹¹ Nyebe fariseos paama i tuchi nguiã Jesús je. Sábadu mose mbia mbucherõ mose. —¿Mañi nande ra Jesús je re? Nandeiquia chõ nda reae, i tuchi que eu ñee nyue ra.

Jesús mbia doce irabo uchimbbaaquiaturã

¹² Jesús que oso mbia tiámbaa ra. Sita ibátee. Huee que eñi ñee mbei Dios je nyaashñ nyee ra. ¹³ Nyaashñ mose que uchimbbaaquiato munua ja cote ra. Ñquã doce mo ngue eirabo ra. —Sechimondo sacua jë. Jaemondo ra secheë nenei nenei sacua mbia je, i que ñquã doce je ra. ¹⁴ ã mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo ririñ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuã je ra.)

Ñquã ja que Jesús irabo ra.

Jesús mbia tubiriã mbaaquiato

¹⁷ Jesús que nguichi u sita si cote ra. Uchimbaaquiato rese. Ibi túraã ngue ecuaẽ ngasẽ cote ra. Mbia tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ũquĩ. ũquĩ ngue ngaẽ nyiisaquia Jesús cheẽ ndese ra. Jesús embucherõ abe sacuaã ngue ecuaẽ nda. ¹⁸ Ae rese aba checuayã icuaã ndiqui nae, ũquĩ abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra. Nyebe mbia riqui nguĩã ocose ja Jesús rese.

Ae eyate riqui

²⁰ Jesús que mae uchimbaaquiato rese ñee nonde ee ra. —Jeyate riqui ã. Jẽ mbaecha reã ndaque. Dios quiato ra jendecuarã tuchi cote. ²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia iquia ra emo mose cote. ²² Mbia jemo ucuãyã mose, jemo mombo mose, ñee icuaã mose jẽje serĩ, jẽyate jẽingo ũquĩ. ²³ Jeñimbia tuchi chõ aque mose. Mbia icuaã mose jẽje. Dios quia ra mbae turã mondo jẽje ibate. Mbia icuande jẽje nyii. Eẽ si que mbia icuaã nguia Dios rimba ñiinda je no nda.

Ae aba mbia eãte quia

²⁴ Aba mbia eã tuchichĩ jẽ, Mbaecha. Mbae icuaã nda tu jẽje. Jẽyare nyii. ²⁵ Aba mbia eã tuchichĩ jẽ, quiaru tuchi je. Jeniãcuã tuchi ra cote. Aba mbia eã tuchichĩ jẽ, iquia iquia je. Jenyeseo ra cote. ²⁶ Aba mbia eã tuchichĩ jẽ mbia ñee turã mbei mose jeni. Eẽ si rei que equia ñee turã turã dios abareã nimba je cose ra.

Jẽingo turã ño nguia jẽucuãyãsa je

²⁷ Aico ñee jẽje a. Ae eicuãte riqui jẽje, ũquĩ ndese jenyesequa chõ. Jẽingo turã ño nguia jẽucuãyãsa je. ²⁸ Emo ñee icuaã mose jeje, jeñee turã ño ee. Jeñee turã ño Dios je erĩ. ²⁹ Emo ucuã mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee. ³⁰ Emo ache ache i mose jẽje, jẽmondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbia siqui turã mose jẽje no. Eẽ jenyese si chõ nguia siqui turã mbia je no.

³² Ae eicuãte riqui jẽje nae, ũquĩ ndese jenyesequa chõ. Ae nyesequa quia jendese nae, ũquĩ mĩ ndese jenyesequa mose, eicuãte ũquĩ. Mbia ja rese quiato jenyesequa. ³³ Jẽingo turã nguia quia mbia ja rese. Ae eturã ndiqui jẽje, ũquĩ mĩ ndese jẽingo turã mose, eicuãte ũquĩ. Jesús quiatoã abe chee siqui turã uquiato je. ³⁴ Emo prestar i mose jembae je, jẽmondo chõ ee. Ae mbae mondo aroneate eribishorõ nae, jẽmondo

bei chõ ee. “Cobrar tae ee”, jenyechĩ ndae. Jesús quia-toã abe chee mbae mondo eribishorõsa je. “Mbae mo nda emondobe seje”, i. ³⁵ Eẽ jenyechĩ nda jẽ abe. “Mbae mo nda emondobe seje chã” jenyechĩ nda jẽ abe jẽ! Jẽmondochõ ño ee. Ae eicuãte riqui jẽje, ũquĩ ndese jenyesequa chõ. ũquĩ mose ra Dios mbae mee tuchi jẽje. Dios rã tuchi ra jẽ cote. Dios ia eãte quia eriqui nguĩã eicuã ndese. Dios turãte quia eicuã je re. Eicuã ñee turã eã ndaque ee. ³⁶ Jẽyayã ño mbia rese. Sã Dios abe eya eãte nanderese no.

“Eicuãte que co ra”, jenyechĩ nda emo nĩi

³⁷ “Co que eicuãte ra”, jenyechĩ nda emo nĩi. “Jẽicuãte”, iã nda Dios jẽje chã. iCondernar jenyechĩ nda emo je jẽ! Dios nda condernar iã jẽje chã. Emo icuaã mose jẽje, jẽtesarei chõ eicuã si. Dios nda tesarei jẽicuã si no ña. ³⁸ Mbae jemee mee ño mbia je. Dios quia ra mbae mee tuchi jẽje cote. Mee turã nda jẽje. Eñetẽ nda emee eã jẽje. Embisẽ ño nda emee jẽje. Jẽ embisẽ mee mose emo je, Dios ra embisẽ mee jẽje no, i que Jesús mbia mbaaquiato quiato ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie. ⁴⁰ Embaaquiatusa quiarei earacua tuchi uchimbaaquiato si. Embaaquiato ja ji mose, earacua tuchi cote. Um-baaquiatusa rã si cote. ⁴¹ ¿Mbaerã nda “eicuã” jenyese emo je re? Jẽ jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je. Mbae cuasu siqui mose jendésaa jẽ quiato. ⁴² “Mbae turã ndese chõ jẽingo”, jenyechĩ nda jẽingo icuaã mose jẽ. Jẽturã nda jẽsaã ñooñochĩ jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nane nguia jẽturã ndiqui. Aquere quiato jeñee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira icuaã mose, ea abe icuaã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde. ⁴⁵ Eẽ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguĩã ñee turã. Mbia icuaã nda ñee icuaã no. Echiangui renda quia eicuãte riqui nguĩã. Nyebe eriqui nguĩã ñee icuaã. Nandechuru achõ ñee eã nguĩã. Nandechiangui renda quia ñee nguĩã.

Tuchua nyeremo

⁴⁶ “Sererequa” jenyese chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ũquĩ nde. ⁴⁸ Sã emo uchucharã ao no. Sã ibi ribicoi tuchi no. Sita je ngasẽ nyee. Sita arõ tuchia ao cote. Nyebe echuchua ãtãte riqui nguĩã. Ama ndicuasú mose, iãcuã irãtã ndaque echuchua ite

rĩ. Tuchua mbuquiata aroneate iãcuã irãtãte raque. Si-ta arõ nguia ngue uchuchua ao nguiã. Eĩ si chõ secheẽ mumbasa reã nde. Tuchua ãtã aosa rã si. ⁴⁹ Sã emo uchucharã ao no. Aque quiarei ibi ribicoi tuchiã. Ibi arõchi chõ uchuchua ao nguiã. Iãcuã ngasẽ mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

Jesús soldados rerecua rimba mbucherõ

7 Jesús cheẽ ngue tiba mbia je cote ra. Oso que Capernaum cote ra. ² Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherõ, i que capitán ñee ndeje ra”, jenyee oso Jesús je, i que capitán nda. ⁴ Judíos ramei ngue ngasẽ Jesús je ra. —Capitán nimba embucherõ na oso ee. Capitán turãte quiatu ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacua ngue ae chao tuchua ra, i que amei ñee Jesús je ra. ⁶ Jesús que oso amei ndese ra. Capitán nyuchua rurubi mose que capitán uquiato mo mondo Jesús robeishĩ nda. —Seicuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherõ. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyuruirate ra. Uba que ñee nguesenda je ra. —Tacheẽ nyecua jẽje. Capitán seicua tuchite quia co. Israel jenda mo embuchecha aroneate quia co, i que Jesús ra. ¹⁰ Capitán nyimondo que nyebi nyoĩ uchuchúaa cote ra. Erimba mbucherõ ji que ee cote ra.

Jesús eru cheecha riirĩ ndaque mbuquera

¹¹ Isamami ngue Jesús choi quia Naín cote ra. Echim-baaquiato abe que nyoĩ quia erese ra. Mbia tubiriãte que nyoĩ quia erese ra. ¹² Sucha ata rurubi mose que ngasẽ mbia tubiriã je ra. I que eraaque ruruchoi quia etã sacua nda. Aque miĩ tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoĩ jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jẽ! i que ee ra. ¹⁴ Jesús que oco eraaque rese ra. Eruruchoisa que tiba ee cote ra. —Echuruã, Acuanĩndu, i que ñee eraaque je ra. ¹⁵ Eraaque que nyuruã ñee cote ra. Jesús que embuquera ji

mondo esi je cote ra. ¹⁶ Mbia que nyuruirate ja erea ra. Ñee turã ja Dios rĩ. —Dios chimondo chõ co re, i que mbia quia ñee Jesús rĩ nda. —Dios riqui tesareia nande si co, i que mbia quia nyue ra. ¹⁷ Jesús chumbucherõ ndese que mbia riqui ñimbiirandu jate ra. Judea jenda jirandu ja erese. Erobeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiao rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jẽso ñee Jesús je. “Cristo ra tu’, i bei equia nae, ¿ae chõ nde re?” jenyee oso ee. “¿Cristo ra uresaarõ arõ si quia re?” jenyee oso Jesús je, i que Juan ngũimba mondochoi ra. ²⁰ Juan ñimondo que nyoĩ ngasẽ Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasẽte mose que Jesús riqui mbia rasi mbucherõ cherõ nda. Erasi chumumbara. Erasi cuabẽ. Aba checuayã icuã abe que embusẽ mbusẽ nguia mbia si ra. Eresayã abe que embu cherõ nyerõ nguia ra. Juan nimba que mae ja quia ñquĩ mbucherõ ndese ra. ²² Jesús que ñee Juan nimba je ra. —Ae rese jemaee nae, ñquĩ jẽsenei oso Juan je. Ae jeñandu nae, ñquĩ abe no. “Jesús que eresayã mbucherõ nyerõ nguia ra. Ecuatayã abe mbucua-ta cuata. Eire ndasi abe mbucherõ nyerõ. Eisayã abe mbucherõ nyerõ. Eraaque abe mbuquera. Ucheẽ turã esenei senei tuchi mbaecha reã je”, jenyee oso Juan mbiirandu. ²³ Emo hui jei eã mose sesi, aque iate ra siqui cote, i que Jesús ucheẽ mondo Juan je ra.

²⁴ Juan ñimondo que nyoĩ nyebi ee cote ra. Jesús que ñee mbia ja je Juan niĩ cote ra. —¿Mbae rese mae jẽso turúquiaa re? ¿Quiririã idioi ichu ichu rese jẽso mae nde? ²⁵ ¿Mbae rese mae jẽso re? ¿Emo irao turã ndese jẽso mae nde? Tei. Eirao turã siquiã nguiã turuquia ñi. Ae siqui quia mbia rerecua chuchua nae, ñquĩ ño eirao turã ndiqui nguiã. ²⁶ Juan ndese mae ño ngue jẽso turúquiaa resẽ. Dios cheẽ nenei neneisa tuchi chõ ae emo si re. Ae chõ mbia mingoquiato quiatu nguiã se ñee sacua ee aque. ²⁷ Sã embesa ji riqui ñee no:

Secheẽ nderaosa tamondo nderẽta.

Ae ra mbia mingoquiato ndeje,

i que embesa ji ñee nda. Juan niĩ ño embesa ji ñee nguiã. ²⁸ Juan el Bautista quiarei i tuchi raque mbia ñi-inda ja si. Dios cheẽ nenei neneisa ataque si. Ae ra siqui tuchi Dios rese erimbarã cote nae, ñquĩ nguia ra i tuchi Juan si cote, i que Jesús ñee nda. ²⁹ Mbia que Jesús cheẽ ñandu turã ja ra. Impuestos isi isiquia abe chee que echeẽ ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra.

³⁰ Fariseos achõ ño ngue Jesús cheẽ isi sereã nda. Em-

besasa rese. Ūquĩ ngue siqui sereãte Dios cheẽ ndese ra. Nyebe Juan bautizar i eã nguiã ee.

³¹ Jesús que ñeembe ee ra. —Mbia namonda siqui turã eãte quia aba cheẽ ndui ã. Mbia ririĩ na ño eriqui nguiã. ³² Sã mbia ririĩ ndiqui ñumbusarei sarei no. Sã eriqui ñee ñee nyue no. “Flauta que asaã saã ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue asaã ndei jêje resẽ. ¿Mbaerã jêyate erese re?” sã i chõ mbia ririĩ nyue no. Ūquĩ na si chõ jëingo nguiã aba cheẽ mumba ã. ³³ Juan el Bautista que tu rei jêje ra. Jëisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyê chõchĩ ee. “Aba checuayã ndesenda”, jenyê chõ ngue ee ra. ³⁴ Se abe que achu rei jêje ra. Aquiaru rei quia jendese co. Mbae abe ambei rei quia jendese co. Se abe que jê seisi turãya nda. “Quiaru tuchi je”, jenyê chõchĩ seje. “Mbae mbeisa”, jenyê chõ ngue seje no nda. “Mbia icuã quia-to chõ ñene”, jenyê que seje resẽ. ³⁵ Ae earacuate nae, Dios aracua abe ra eicua, i que Jesús mbia je ra.

Jesús quiaru fariseo chuchua

³⁶ —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbusa que equerao erea ra. (Sita ao ji rei aba mbushimbusa riru.) ³⁸ Jesús quite quitu que eñi nyeseo ra. Nguesari je que Jesús i irei irei ra. Ua je que embiiru iru cote ra. Uchuru que embucha Jesús i rese eriite ra. Aba mbushimbusa que eicherẽ ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios ririĩ mose, ñ nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheẽ ndeje, Simón, i que ee ra. —Eno. Echeẽ seje no, Sererecua, i que fariseo ee ra. ⁴¹ Jesús que ñee ee ra. —Sã mbia ny-eremo deber i ererecua mo je no. Sã enongue deber i ee quinientos no. Sã enongue deber i ee cincuenta no. ⁴² Ūquĩ ja que pagar i aronea ja. Nyebe ererecua ñee nguiã ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa seique mose que sei ereirei eã nda. Co cuña nguiatu que sei irei nguesari je ra. Ua je que sei mbiiru ra. ⁴⁵ Nde quiatu que seritii eresiite eã ndesẽ. Cuña nguiatu que sei siite nguiã. ⁴⁶ Nde que aba mbushimbusa ereichereã sea rese resẽ. Cuña nguiatu ngue aba mbushimbusa icherẽ nguiã sei rese. ⁴⁷ Tacheẽ nyecua ndeje, Simón. Cuña icuã tuchi raque.

Eicuã ngue ambutiã ee namo nda. Nyebe eriqui nguiã nyesequa tuchi serese a. Ae “seicuã eã jiri se”, i quia nae, ūquĩ nguia ra nyesequa eã jiri serese. Se eicuã ambutiã ndaque, i que Jesús Simón je ra. ⁴⁸ —Ndeicuã ngue ambutiã ndesi ra, i que Jesús ñee cuña je cote ra. ⁴⁹ Ae que chi quiaru erese nae, ūquĩ ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue ra. ⁵⁰ Jesús que ñee cuña je ra. —Seicuasa chõ nde re. Nyebe arerirõ nguiã ndeicuã si. Ereico bei ra cote. Ndeya eso cote, i que Jesús cuña je ra.

Cuña mo nyoĩ ngata Jesús rui mbae raã naa ee

8 Jesús que sucha tubiriã mbuchesea sea quia ra. Dios cheẽ turã ngue esenei senei nguia mbia je ra. Echimbuaquiato doce abe que ngata quia erese ra. ² Cuña echimbucherõ mo abe que ngata quia erese ra. Ae si aba checuayã icuã ndirõ nyii, ūquĩ mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae. ³ Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ūquĩ ngue umbae mee mee mbei quia Jesús je ra.

Emo mbae eĩ mombiquia mbiqui

⁴ Mbia que ngaẽ ngaẽ ja quia Jesús rea ra. Suchamo jenda abe. Mbia ñumunua ja mose que Jesús ejemplo raã ee ra. ⁵ —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no. ⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñi-mama nguiã mano. ⁷ Sã emo ndiqui uqui uqui nyu rénda no. Sã nyu abe suri erese no. Nyu ruri que echati asi u eriquisã nda. ⁸ Sã emo uqui uqui ibi túraã no. Ūquĩ nguiatu que ia turã nda, i que Jesús mbia je ra. Aquere que ñee asite mbia je ra. —Jëisa mose ¡secheẽ jeñandu turã na! i que Jesús mbia je ra.

⁹ —Eresenei ngue mbae eĩ ñi, ūquĩ embiasa turã na ure je, i que echimbuaquiato ñee ee ra. ¹⁰ Jesús que ñee ee ra. —Mbia rerecua tuchi quiarei Dios. Ae riqui nguiã ucheẽ mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. Ejemplos achõ esenei senei nguiã ee co. Eanduchõ sacua. Eicua turã ndocoĩ.

Jesús ucheẽ mbiasa uchimbuaquiato je mbae eĩ ñi

¹¹ Secheẽ tambiasa jêje cote. Dios cheẽ na si chõ mbae eĩ nde. ¹² Ae uqui uqui ñeenda rui nae, ūquĩ ndei mbia Dios cheẽ andu chooñosa rã ūquĩ. Ae Dios cheẽ andu chooño nae, ūquĩ ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã

mbei. Nyebe Dios riqui nguiã emingo bei eã. ¹³ Ae uqui uqui sita arõ nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ùquĩ nde. ¹⁴ Ae uqui uqui nyu rëndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee. ¹⁵ Ae uqui uqui ibi túraã nae, mbia mo na ño ùquĩ no nde. Echiã quishĩ ño ùquĩ nde. Dios cheẽ andu mose, siqui bei erese. Ìa ia bei raanguia cote.

Tata rendi mbia resae ja

¹⁶ Sã nandeico lamparina mendi no. Sã nandeico eati eã no. Sã nandeico emi eã mbaequi re no. Erendi checua chõ nda nandemi nguiã. Mbia resae ja sacua. ¹⁷ Mbae checuayã nda nyecua ja emo mose. Ñeminde ra nyecua ja. ¹⁸ Secheẽ jeñandu tuchi. Aba mo umbae rerequia mose, Dios ra emo mondoobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Dios cheẽ andu turã nae, ae Dios cheẽ mumbayã nguia nae, ùquĩ je chõ aico nguiã “senongue” i. Ùquĩ je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchim-baaquiatu ja rese. —Nyao ama ndisha robei, i que Jesús ee ra. Nyoĩ que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ñimi serĩ tuchi nguiã ee. ²⁴ Nyebe mbia Jesús mumba nguiã. —Urem-baaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda. ²⁵ —¿Mbaerã jëingo siquichete re? ¿Seicuayãte equia re? i que Jesús uchim-baaquiatu je ra. Siquiche bei que equia ra. Nyuruira tuchi Jesús quiricuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha

rasa. ²⁷ Canoa si Jesús nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã. ²⁸ Tu que ngoi ngũĩã ndese Jesús resa quti ra. Ñee asite que eu ee ra. —¿Mañi ere ra seje re, Jesús? Dios ibatenda riirĩ ño nde re. ¿Sembasichĩ nda se jẽ! i que ñee tuchi Jesús je ra. ²⁹ —Esẽ esi, i chõ Jesús aba checuayã icuã je reaẽ. Aba checuayã ño aque amei isi isi bei quia embicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ. ³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabẽte quia ure re, i que aba checuayã ñee Jesús je ra. ³¹ —Uremondochĩ nda tata cuasu, i que aba checuayã ñee tuchi Jesús je ra. ³² Chiasu socoi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usẽ ja amei ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huiirao resebe cote. Earacuate que mbia je cote ra. Nyebe mbia nyuruira tuchi nguiã erea. ³⁶ —Jesús que amei mbucherõ aba checuayã ndirõ esi ra, i que mae-sa erese ñee mbia ataque je ra. Maesa erese que esenei ja mbia je ra. ³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ùquĩ nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seririĩ nguasu jiri si quia mano serĩte

seje qui. Seriiĩ mii tuchi se, i tuchi que Jesús je ra. Jesús que oso erese ra. Mbia cuabẽ ngue nyoĩ ja eru ra. Jesús mbiitãyaĩte que echoi quia ra. ⁴³ Ari mo abe que oso quia mbia ite rĩ nda. Eruqui nda uchẽ uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae mondo mondo ja raque quia ee. ⁴⁴ Ari que tu Jesús quite quti erĩchã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba ãte, i ja rei que mbia ee ra. Pedro que ñee ee ra. —Mbia tubiriãte nyeresẽ. Mbia cuaẽ nguia ñimaña maña jate co resẽ. ¿Mbaerã ereico “¿aba oco serese re?” i re? i que echimbaaquiato ñee ja ee ra. ⁴⁶ Jesús que ñee ee ra. —Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ —Jesús jiranduchĩ serese, i que ari uchiangui re cote ra. Nyebe ngoi nguia ngũĩã ndese Jesús resa quti. Titi titi i ete que ra. Ñee nyecua que ee ra. —Sembucherõ sacua ño aoco nguia nderese. Aque mose tuchi chõ acherõchĩ, i que ari erenei ja Jesús je ra. Mbia que echandu ja u ra. ⁴⁸ Jesús que ñee ee cote ra. —Seicuasa chõ nde re. Nyebe arembucherõ nguia. Ndeya tuchi eso cote, i que Jesús ee ra.

⁴⁹ Jesús cheẽ mosete que emo ndu Jairo chuchua si ra. —Nderiĩĩ ngue mano cote ra. ¿Mbaerã nda Jesús ererao ndechuchua cote re? i que ñee Jairo je ra. ⁵⁰ Jesús que echandu ra. Ñee ngue Jairo je ra. —iNdeya eã techĩ nda jẽ! Seicua chõ se. Nderiĩĩ nda quera si, i que eru je ra. ⁵¹ Ngasẽ ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Úquĩ achõ ngue emingue ra. ⁵² Mbia que chi ja nyeseo ãquẽ ndese ra. —Jenyeseochĩ nguia. Mano eã ño ñene. Uque chõ ñene, i que Jesús ñee mbia je ra. ⁵³ Mbia que iquia Jesús cheẽ mose ra. —Eraaquete nyeresẽ. ¿Mañi nda nyuruã nde? i que mbia ra. ⁵⁴ Jesús que eraaque o isi ra. —Echuruã na, Echo, i que ñee asite ee ra. ⁵⁵ Quera si que nyuruã cote ra. —Nderiĩĩ embuquiaru cote, i que Jesús ee ra. ⁵⁶ Eru que nyuruira tuchi mae erese ra. Esi abe nyuruira tuchi. —iEmo nda jembiiiranduchĩ jẽ! i que Jesús ee ra.

Jesús uchimbaaquiato doce mondo ucheẽ nenei nenei sacua

9 —Jenyu, i que Jesús uchimbaaquiato doce je ra. Uquirãcuã ngue emee mee ee ra. Aba checuayã icuã jea jea sacua mbia si. Mbia rasi mbucherõ cherõ sacua. ² —Jẽso Dios cheẽ nenei nenei mbia je. Jẽso mbia rasi abe mbucherõ cherõ. “Mbia rerecuarã tuchi ra Dios cote”, jenye oso secheẽ nenei nenei mbia je. ³ Mbae mo nda jendaochĩ icua. Jenyitochiquia ra jendaochĩ. Mbae riru mo abe ra jendaochĩ no. Jenyiurã

mo nda jendaochĩ no. Mbae isiquia mo abe ra jendaochĩ no. Jẽrao nongue abe ra jendaochĩ no. ⁴ Emo nyuchúaa jengue mose, hueechõ ño jẽingo uque. Jemba jembatechĩ nda uque tuchia raamba amba. Hue si chõ jẽso sucha tubiriã mo secheẽ nenei nenei cote. ⁵ Sucha tubiriã mo jenda jẽisi sereã mose, jẽsecha chõ. Jẽi tubi jembutomo tomo ee. Hue jenda huĩcuã icua sacua, i que Jesús uchimbaaquiato je ra. ⁶ Echimbaaquiato que nyoĩ choi bei quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiao rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguia mbia je. ⁸ Elías Jesús riqui reĩ nguia emo je no. —Dios cheẽ nenei neneisa ima quera si je chõ ñene, i rei que emo emo Jesús rĩĩ no nda. ⁹ Herodes que ñee nda. —Juan ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchite. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiãmbaa que Jesús ùquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoĩ eru ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiato ñee ndei ee ra. —Mbia emondo rã sucha tubiriã nia. Sã echoi bei quiaru huee. Uque bei abe huee no. Mbae ãte nandecu a, i rei que echimbaaquiato Jesús je ra. ¹³ —Jeño mbae jemondo ee echuurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiato Jesús je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ino íbii. Eata jaaja jeño mbucoi. Sã echĩ ngoi icúe cúe cincuenta jaaja, i que Jesús uchimbaaquiato je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiato je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echĩmbaaquiātu abe que chĩ huee ra. —¿Aba aico reĩ mbia je re? i que Jesús ee ra. ¹⁹ Echĩmbaaquiātu que ñee ee ra. —Juan el Bautista ereico reĩ nguiã emo je co. Elías ereico reĩ nguiã emo je no. Dios cheẽ nenei neneisa quera si je ereico reĩ nguiã emo je no, i que echĩmbaaquiātu ee ra. ²⁰ —¿Aba aico reĩ jẽje co re? i que Jesús ee ra. —Cristo chõ nde resẽ. Dios ririĩ ño nde resẽ, i que Pedro Jesús je ra.

Mbia ra seiquia, i Jesús uchĩmbaaquiātu je

²¹ —Ūquĩ nda jeñeechĩ emo je jẽ, i tuchi que Jesús ee ra. ²² Jesús que uchĩmbaaquiātu mbaaquiātu quiātu ra. —Mbiarã ngue Dios sembu ra. Mbia ra sembasi mbasi tuchi. Ameĩ nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra seiquia chee. Tres tenda mose ra aquera si, i que Jesús mbia eiquia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote.

²⁴ Emo ndua bei mose nguenco rese, ereco ra ua esi.

Emo hui mose nguenco si seje, ūquĩ nda siqui bei.

²⁵ Emo nguenco mumba chooño mose, eya eã mbei rae.

Mbaecha rete raque. ²⁶ Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã.

Dios quirãcuã nda sembu. Angeles rese ra achu aque mose. ²⁷ Tacheẽ nyecua jẽje. ã jẽingo serese ã nae, jemo nda jemaie Dios quirãcuã ndese jemanononde. Mbia rerecua tuchi ra Dios, jemo manononde, i que Jesús ee ra.

Jesús nyĩcabo uchĩmbaaquiātu je

²⁸ Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe. ²⁹ Jesús ñee mose Dios je que eruba ñimbiasu ra. Eirao abe que enininya ra. Eiraoshĩ nininya tuchi que ra. ³⁰ Mbia nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda. ³¹ Ūquĩ ja que enininya Jesús rese ra. —Mbia ra Jesús iquia mbucha ira rese Jerusalén, i que equia ñee nyue ra. ³² Pedro reesite raque. Eresenda abe reesi esite raque. Uqueã mbei quera. Jesús nininyate quiātu ngue ee re. Moisés abe nininyate quiātu ngue ee re. Elías abe nininya no. ³³ Ibatenda que nyoĩ quia Jesús recha cote ra. —¿Manyae ra ñee Jesús je re? i que Pedro ra. Nyebe ñee iru chõ nguiã ee. —Nandecu turãtea, Sembaaquiatusa. Sucha ñetẽ uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je

ra. ³⁴ Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuayã ee ra. Elías abe mbuchecuayã ee. Nyebe esiquiche nguiã. ³⁵ Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ee ibeishĩ qui re ra. ³⁶ Aquere que Jesús miĩ ndiqui uchĩmbaaquiātu rese ra. Umaesa que esenei eã ja emo je ra. Ñee ãte que emo je ra.

Jesús aba checuayã jea mbia riiri mo si

³⁷ Isamamimbe que euaẽ nguichi sita ibate si ra. Mbia tubiriã ngue ngaẽ Jesús rea ra. ³⁸ Ūquĩ mo ngue ñee Jesús je ra. —Seriirĩ ndese emae, Urembaaquiatusa. Seriirĩ miite que se co ra. ³⁹ Aba checuayã icuã ndiqui eisi isi co. Embaasẽ asẽ mbei. Emburiri riri.

Echuru mbichoĩ. Erete munumbi numbi. Aba checuayã hui sereã mbei seriirĩ si. ⁴⁰ “Aba checuayã embusẽ seriirĩ si”, ae rei ngue ndechĩmbaaquiātu je re. Embusẽ aroneate esi, i que eru ñee Jesús je ra. ⁴¹ —¿Mañi jenyẽ quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ñee ee ra. —Nderiirĩ eru rã seje, i que eru je cote ra.

⁴² Jesús rurubite mose que aba checuayã eriirĩ mbucoĩ mondo ra. Mburiri tuchi que ra. Jesús que ñee asite aba checuayã icuã je ra. Eriirĩ ngue embucherõ nda. Embucherõ ji que emondo eru je cote ra. ⁴³ Dios quirãcuã ndese mae ngue mbia nyuruira tuchi ra.

Mbia ra seiquia, i si Jesús

Jesús chiao rese mae ngue mbia nyuruira tuchi ra. Mbia nyuruira mose que Jesús ñee uchĩmbaaquiātu je cote ra. ⁴⁴ —Mbiarã ngue achu ra. Mbia ra semee mbia icuã je. Seriicharã. Ūquĩ si ra jẽtesareichĩ, i rei que Jesús uchĩmbaaquiātu je ra. ⁴⁵ Echĩmbaaquiātu que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecua tuchi ra se, i jaaja Jesús chĩmbaaquiātu nyue

⁴⁶ —Se quia ra ererecuarã tuchi jẽsi, i jaaja que echĩmbaaquiātu ñee nyue ra. Ñee icuã icuã nyee nyue. ⁴⁷ Jesús que ūquĩ ndua ndua icuate ra. Nyebe ãquẽ mo mbucoĩ miĩ nguiã ujii. ⁴⁸ Jesús que ñee ee ra. —Sã ãquẽ mo ndiqui siqui mingue no jẽ. Ae eturã ndiqui mbia riirĩ je seriĩ nae, seje abe chõ eturã ndiqui nguiã. Ae eturã ndiqui seje nae, semondosa je abe chõ eturã ndiqui nguiã. Ae ererecua sereãte riqui jemo nae, ūquĩ nguia sebi re. ¿Mbaerã jẽingo “ererecuarã se” i nyue re? i que Jesús ee ra.

Emo icuã eã mose nande je, nanderesenda chõ ùquĩ nde

⁴⁹ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe ure-siquisã nguiã, i que Juan Jesús je ra. ⁵⁰ Jesús que ñee ee ra. —Tei. ¡Jësiquisã quisãchĩ nda jê! Emo icuã eã mose nande je, nanderesenda chõ ùquĩ nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. Ùquĩ ngue ngasẽ sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguiã eisi sereã aa, i que hue jenda ñee icuã Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. Ùquĩ ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã i quia sacua nde? i que echim-baaquiatu ñee Jesús je ra. ⁵⁵ Jesús que uba ñee asite ee ra. —Jêsecha chõ. Aba mingosa riirĩ ño jëingo ã ndesẽ. ¿Jêtesarei chõ nguia ùquĩ si re? ⁵⁶ Mbia i quia sacua ngue achua ndesẽ. Mbia mingo bei sacua ño ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheẽ nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseã Dios je, i que ra.

Jesús mbia setenta mondo ucheẽ nenei nenei sacua

10 Aquere que Jesús mbia setenta irabo no nda. —Serëta chõ jëso jëso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheẽ andusa reã ndei etubiriã.

Secheẽ nenei neneisa rei co miĩ jiri. “Dios, ndecheẽ nenei neneisa mo emondo tuchi. Mbia mbiirandu rando sacua”, jenyè chõ nguia Dios je. Sã echa mbae a ishao shaosa mondo ea ireĩ mose no. ³ Jëso cote. Sã nyacua icuã ndiqui oveja je no. Eĩ si ra mbia icuã icuã jêje. Nyacua rã si. ⁴ Jëochi chõ jëso. Mbae riru ra jendaochĩ. Mbae isiquia abe ra jendaochĩ no. Jëiyao abe ra jendaochĩ. Jëitõ itõchĩ nda ñeenda cúa ñee sacua mbia je. ⁵ Jëique mose emo nyuchúaa, jeñee turã huee tuchia jenda je. “Dios nda jembia bei quia chã”, jenyè hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchia raamba amba. Jengue mocoĩ jiri quia huee. Ae hue jenda u u quia nae, jê abe jëu quia erese. Jëingo mose secheẽ nenei nenei mbia je, sã mbia mbae mondo mondo jêje. ⁸ Sucha tubiriã jenda jëisi turã mose, jëquiaru quiaru erese. ⁹ Hue jenda ndasi jembucherõ nyerõ ee. Hue jenda je secheẽ jësenei senei. “Namo jiri ra jenderecuarã Dios cote”, jenyè chõ hue jenda je. ¹⁰ Sucha tubiriã jenda mo jëisi sereã nea mose, jeñee asi ee etaicúee. ¹¹ “Urei tubi urembutomo nguia jendique jie a. Jêtesareĩ sacua urecheẽ si. Jenderecuase rete raque Dios. Jëisiã ñochĩ”, jenyè chõ hue jenda mbiirandu. ¹² Se mbia icuã mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

¹³ Seya eãte jendese, Corazín jenda. Seya eãte jendese, Betsaida jenda. Jendasí tuchi chõ ndae. Mbia mae sayã ngue asaã saã jêje nae, ùquĩ naa mose Sidón jenda je, eĩ nda hue jenda huĩcuã ndecha rei. Eĩ nda Tiro jenda abe huĩcuã ndecha rei. Eĩ nda eya eãte rei huĩcuã ndese. ¹⁴ Jê nguia jëicuã jêsecha sereãte rei. Nyebe ra Dios jembasi mbasi tuchi ùquĩ si quiatu. Dios mbia icuã mbasi mbasi mose. ¹⁵ Jëcuasu jësaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. ¹⁶ Secheẽ nenei neneisa chõ jê nde. Ae ra jeñee ñandu quia nae, secheẽ abe ra echandu. Ae ra jëucuãyãte quia nae, se abe ucuãyã ndae. Ae ra seucuãyãte quia nae, sembusa abe ucuãyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaẽ ee

¹⁷ Ùquĩ setenta nyebi si mose que eyate ra. —Aba checuayã icuã urecheẽ mumbayã ñochĩ nderĩ, Ure-rerecu, i que ñee Jesús je ra. ¹⁸ Jesús que ñee ee ra. —Satanás que ngoi tuchi u ibei si ra. Sã ama piriã i asi no, eĩ si que eu ngoi ra. Amae tuchi que ecoi rese ra. ¹⁹ Sequirãcuã ngue amee tuchi jêje ra. Jendeaquiatu sacua. Jëirõ sacua mbei tásie rese. Quiraẽ ndese. Seucuãyãsa riquisã sacua. Sequirãcuã nda jendea quiatu mingo. ²⁰ Ùquĩ ndesechĩ nda jëya. Serese quia jëya.

Aba checuayã jeñee mumbayã mose ñiquĩ ndesechĩ nda jëya no jë! Paba que nombre jembae mbesa mbesa mñ ibate ra. Ûquĩ ndese quia jëya, ì que Jesús ee ra.

Jesús ia tuchi

²¹ Aque mosete que Espíritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecuayã mbia aquiatu tuchi je ra. Mbia riirĩ naanguia je chõ ngue erembuchecua nguiã. Ûquĩ ño ngue eturã ndeje ra, Paba, ì que Jesús ra. ²² —Seru que mbae mondo ja seje ra. Paba mñ ño seicua tuchi nguiã. Paba riirĩ mñ ño se re. Se mñ ño Paba aicua tuchi nguiã no. Ae je ra Paba atacuquia nae, Ûquĩ mñ ño nda Paba icua tuchi nguiã serese, ì que Jesús ñee nda. ²³ Jesús que uba mae uchĩmbaaquiato rese ra. Eísaa que ñee nda. —Coche jemae nguiã ã sechiao rese. ²⁴ Mbia rerecua ñiinda mae ja bite raque ã sechiao rese. Dios cheẽ nenei neneisa abe mae ja bite raque ã ndese. Mae eã mbei que equia sechiao rese ra. Secheẽ andu bite raque. Secheẽ ngue echanuate ra, ì que Jesús ra.

Samaria jenda mo turã erasi je

²⁵ —Ma Jesús ucheẽ nyabi, ì que embesasa mo ñee oso Jesús rea ra. —¿Mbae rese ra aico siqui bei nonde re? ì que ñee Jesús je ra. ²⁶ —¿Mañi ño Voisés chĩmbesa re? ì que Jesús ee ra. ²⁷ Embesasa que ñee ee ra. —Eĩ ño ngue Moisés embesa ra: “Echesequa tuchi quia Dios rese. Ndechiã ja je chõ eico nyesequa erese. Neaĩ abe je. Ndequirãcuã abe je. Nendua ndua abe je. Sã erechesequa ndechiese no, eĩ ere si chõ nyesequa nde ji jenda rese”, ì que embesa ji ñee ndesẽ, ì que embesasa ñee Jesús je ra. ²⁸ Jesús que ñee ke ra. —Erecheẽ turãte. Ndkico mose Ûquĩ ndese, Paba ra nemingo bei, ì que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? ì que ñee Jesús je ra. ³⁰ Jesús que ñee ee ra. —Sã emo oso quia Jericó quiti no. Jerusaén si. Sã mbia icuã nyarõ erese ñeenda cúa no. Ucuu ucuu tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ño ñeenda cúa rĩ nda. ³¹ Aque ñeenda aui que sacerdote mo si ra. Maeño ngue ecura curái rese ra. Nyucuaño ngue oso ra. ³² Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguiia kcuãño no. ³³ Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguiã cote. ³⁴ Aque que tiba erese ra. Mbae quira que equiti quiti eiruã nua ji rese ra. Vino abe quiti erese. Esia ji que echucua chucua ee ra. Caballo umbae rese que erasi mbuchui cote ra.

Tuchia mo ngue ererao ra. Huee que eriqui eraarõ isa ra. ³⁵ Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, ì que Samaria jenda ñee tuchuacha je ra. ³⁶ ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? ì que Jesús embesasa je ra. ³⁷ Embesasa que ñee ee ra. —Samaria jenda chõ ngue nyesequa erese resẽ, ì que embesasa ñee Jesús je ra. Jesús que ñee ee ra. —Ae rã si chõ eico nyesequa, ì que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, ì equia ee. ³⁹ María, ì que Marta nongue je ra. Jesús ì ji bei que María riqui ngoi ra. Jesús cheẽ ndese nyiisaquia bei. ⁴⁰ Marta que mbae chao chao ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, ì rei que Marta Jesús je ra. ⁴¹ Jesús que ñee Marta je ra. —¿Mbaerã ereico siqui jate mbae rese re, Marta? ⁴² Aque mñ ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, ì que Jesús Marta je ra.

Jesús mbia mbaaquiato quiatu ñee tura sacua Dios je

11 Emo mose que Jesús chi ñee ngu je ra. Hui mose que echĩmbaaquiato ñee ee cote ra. —Urererecua, urembaaquiato rã ñee Dios je. Sã Juan uchĩmbaaquiato mbaaquiato no, ì que Jesús chimbaaquiato ñee ee ra. ² Jesús que ñee ee ra. —Eĩ jenyẽ chõ nguia Dios je ñee mose:

Paba ibatenda, sã mbia ñee turã ja bei quia nderiĩ. Mbia rerecuarã ja sacua echu jei fbii. Sã mbia ibatenda siqui beite ndebi rese no. Sã mbia ibi jenda abe riqui ndebi rese. ³ Ae ra ureu namo, Ûquĩ embu rã urechiurã. ⁴ Ae ursaã icuã icuã ndeje nae, Ûquĩ embutiã ná ure-si. Sã ureico tesarei mbia icuã icuã mose ure je no. “Mbae icuã jësaã” ìchĩ nda emo ure je jë! Urereaquiato mbae icuã si. Eĩ jenyẽ chõ ñee mose Dios je, ì que Jesús embaaquiato ra. ⁵ Jesús que ñeembe ee ra. —“Mbae embu seje”, jë ì mose jëquiato je, ¿mee nda jëje re? Sã jëingo oso jëquiato rea itondiite rete mose no. “Mbichae prestar ere rã seje. ⁶ Sequiato mo ngue tu serea ra. ¿Mbae ra amee ee re?” jenyẽ chõ ee. ⁷ Ae je jëingo ñee nae, ¿mee eã nda jëje re? Sã ñee jëje no. “Jëso rei. Seiquesa ãtãte. Co achu seriirĩ ndese quisa ye

co. Sehuã sereãte. Mbae mo amondo aronea tuchite ndeje", ¿i ra jêje re? ⁸ Mondo eã aroneate jêje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee. ⁹ Eĩ si chõ Dios no nde. Jeñee i i mose Dios je, mbae ra emondo jêje no. Jê mbae mo ndequia i i mose, jêtea rae. Jê eiquesa mbu i i mose, mbuquiata ra jêje cote. ¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee. ¹¹ Jendiirĩ "mbichae embu seje" i mose, ¿sita ra eru mee ee re? Jendiirĩ "sira embu seje" i mose ¿mbei ra eru mondo ee re? ¹² Jendiirĩ "nguira chia embu seje" i mose, ¿quiraẽ nda eru mondo ee re? ¹³ Mbia icuã nyee mbae turã mondo mondo quia nguiĩ je ã. Jendu Ibatenda quia ra mbae turã tuchi mee jêje. Jendu ra Espiritu Turã mee jêje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiataũte nguiã. Jesús embusẽ mose que ñee cote ra. Ñee mose que mbia nyuruira tuchi mae erese ra. ¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã mbusẽ mbusẽ mbia si co, i rei que emo emo nda. ¹⁶ —Ma Jesús aquiatute, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ñquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguiã seje ã. "Satanás quirãcuã je chõ Jesús riqui nguiã aba checuayã mbusẽ mbusẽ mbia si", jenyẽ chõchĩ nguiã seje ã. ¹⁹ ¿Aba jeñim-baaquiata mbirãcuã jê nde? Aba checuayã icuã mbusẽ nonde re. ¿Satanás jeñim-baaquiata mbirãcuã serese re? ²⁰ Dios quirãcuã je quiatu aico aba checuayã mbusẽ mbusẽ mbia si ã. "Dios quirãcuã ndese chõ ureico nguiã mae", jenyẽ eã ñochĩ nguiã ã. ²¹ Satanás quirãcuã tuchite raque. Umbae raarõ tuchite raque. "Sembae chi turãte a", i raque. ²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ²³ Ae siqui ãte quia serese nae, ñquĩ icuã ño eriqui nguiã seje. Ae mbae a ishao shao raanguia eãte quia seje nae, ñquĩ icuã ño eriqui nguiã seje.

Aba checuayã icuã nyebi u mbia chiangui re

²⁴ Aba checuayã icuã usẽ mose emo ñia si, ngata bei chõ nguiã. "¿Mangue ra sequenea aucua que re?" i chõ nguiã. Uquenea ucuã sacua ngue etea eãte ra. "Tasobe

rei nyebi. Ae si achu usẽ, aque chiã ye si taso", i que aba checuayã nda. ²⁵ Aba checuayã nyebi si mose u, mbia chiã ndecoteã eãte que ee ra. Tuchua tii ji raãte que ee ra. ²⁶ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que cote ra. Ñiinda si. Aba checuayã mii ngue siqui eye nyii ra. Etubiriãte cote, i que Jesús ee ra.

Dios cheẽ andusa je quiatu mbae roonde

²⁷ Jesús cheẽ mose que cuña mo tasẽ tuchi ñee mombo ra. —Mbae roonde tuchiñi ndesi je nye. Ae nembuquiambu quia, i que cuña mo ñee mombo Jesús je ra. ²⁸ Jesús que ñee ee ra. —Dios cheẽ andusa je quiatu mbae roonde riqui nguiã. Dios cheẽ mumbasa reã je quiatu mbae roonde riqui nguiã, i que Jesús ra.

Mbia mae sayã esaã ure je, i bei mbia Jesús je

²⁹ Mbia que ngaẽ tuchi Jesús riichã nda. Jesús que ñee mbia je ra. —Co mosenda mbia icuãte riqui ã. "Mbia mae sayã esaã ure je", i beite equia seje ã. Mbia mae sayã mii ño nda asaã ee. Jonás na si. ³⁰ Sã Jonás ndiqui raque sira rie ye tres días nae, sã mbia Nínive jenda echeẽ andu cote nae. Jonás na si ra asaã mbia je. Mbia co mosenda je mae sayã tasaã. ³¹ La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho tuchi si Salomón ñee andu no. Se quia acheẽ ndaque quia jêje. Searacua tuchi raque se quiatu Salomón si. Secheẽ jemumbate chõchĩ NGUIA ã: Nyebe ra Dios jembasi tuchi mbia icuã ndea rea mose. ³² Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huiãcuã ndecha Jonás ñee mose ee no. Ai-co raque ñee jêje, co mosenda je. Jê secheẽ jemumbate chõchĩ nguiã ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose.

Nanderesa quiarei mbae resae nanderete je

³³ Nande lámpara mendi mose, nandemii aroneate mbaequi re. Nandemii aroneate mbae mo ye. Nandemingo quia ibate erenda rese. Mbia resae ja sacuaã. ³⁴ Nanderesa quiarei mbae resae nanderete je. Nanderesa turã mose, nanderete abe ra oso turã. Naneeresa icuã mose, nanderete abe ra oso icuã icuã no. ³⁵ Tata rendi rã jëingo bei. ³⁶ Tata rendi rã jëingo bei mose, jemae turã nda mbae ja rese cote. Sã tata rendi riqui nanderesae no, i que Jesús mbia mbaaquiata ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rá sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra. ³⁸ Fariseo que ñee uchiangui re ra. —Jesús choi quiiriã ño quiaruchĩ, i que uchiangui re ra. ³⁹ Jesús que ñee asi ee cote ra. —Jẽo achõ ño jẽirei ireichĩ nguiã. Jeñiangui renda quia eicuãte re. Jeñiangui renda quia jẽirei ãte nguiã. Abei chiãte chõ jẽingochĩ jeñiangui re. ⁴⁰ Nandeo achõ eã ño ngue Dios saã nguiã. Nandechiangui renda abe chõ ngue Dios saã ndesẽ. ⁴¹ Abei chiãte chõ jẽingochĩ jeñiangui re ã. Jeñiangui renda turã mose, eĩ nda jẽturã ja rei. ⁴² Aba mbia eã tuchichĩ jẽ, Fariseos. Mbae a jemondo mondo tuchi raque Dios je. Jenyesequa eãte quia erese jeñiangui re re. Jẽingo turã eãte quia mbia rese no nde. Ũquĩ jẽsaã jiri ae. Mbae a abe jemondo Dios je. ⁴³ Aba mbia eã tuchichĩ jẽ, Fariseos. “iSerendarã turã nguiatu se jẽ!” jenyete chĩ nguiã mbia ñumunua mose. “Sã mbia sererecua i nande je”, jenyete chĩ nguiã no. ⁴⁴ Aba mbia eã tuchichĩ jẽ, Fariseos. Embesasa abe no. Jenguasu jẽsaã saã techĩ nguiã mbia je. Mbiamaaque tãsa rá ño jeñiangui renda re. Jeñiangui renda soõ ño nguiã. Erondeite. Sã eraaque tãsa yenda soõ no. Mbiam jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no. ⁴⁵ Embesasa mo ngue ñee Jesús je cote ra. —iMbaerã ereico ñee ure abe je re? i que ra. ⁴⁶ Jesús que ñee ũquĩ abe je ra. —Aba mbia eã tuchichĩ jẽ abe. Jeñee tuchite quia mbia je ã. Dios cheẽ jembeta mbeta tuchichĩ nguiã mbia je ã. Mbiam echeẽ mumbayã aroneate chee quia ã. Jẽ si chõ jeñee jemumba mumba nguiã ã. ⁴⁷ Cose ndare rá si jẽingo nguiã ã. Jenamei na si. Sã ñi jenamei icuã icuã ndiqui Dios cheẽ mbuchecuasa je cose no. Eĩ jenyete si chõ nguiã ã no. ⁴⁹ Dios quiarei earacua tuchi. Ae que ñee jẽje ra. “Secheẽ mbuchecuasa emo emo nda amondo mbiam je. Mbiam icuã icuãte ra secheẽ mbuchecuasa je. Secheẽ mbuchecuasa mo iquia chee, i que Dios ñee nda. ⁵⁰ Ae Dios quiato iquia iquia quia cose nae, ũquĩ ñi nda Dios jembasi cote. Sã mbiam Abel iquia cose no. Sã mbiam Zacarías abe iquia altar jii no. Sã mbiam Dios quiato iquia iquia bei cose no. Ũquĩ ja riĩ nda Dios jembasi cote. ⁵² Aba mbiam eã tuchichĩ jẽ. “Ure mi ño Dios cheẽ ureicua nguiã ã”, jenyete chooño ño nguiã ã. Dios cheẽ jẽisi turã eãte quia ã. Mbiam siquise mose Dios rese, jẽingo emingo eãte erese ã no. Jẽ abe chee jẽingo eãte erese ã no, i que Jesús ñee embesasa je ra.

⁵³ Jesús ñee jare que fariseos paama i tuchi ee ra. Embesasa abe paama i nguiã ee no. Ũquĩ ngue ñee ñee tuchi Jesús je ra. —Sã Jesús ucheẽ tasa tasa nande

je no. Ũquĩ mose nandeisi serao policiaa, i tuchi que ra. Nyebe eriqui nguiã Jesús rea chemi ñemi.

Jẽturã nda jẽsaã ñooño chĩ je

12 Mbiam tubiriã ngue ngaẽ ngaẽ nguia Jesús rea cote ra. Cuaacua i tuchi que equia nyuera. Mbiam tubiriã tuchi. Jesús que ñee uchimbacuaquiatu je cote ra. —iFariseos rá nda jẽingochĩ jẽ! Uturã naa ñooño mbei. ² Ae mbiam saã nyecuayã cuayã nguia nae, ũquĩ nda nyecua ja cote. Ũquĩ nda mbiam icua ja cote. ³ Ae jeñee nguia itondaru jẽingo mose, ũquĩ nda nyecua ja mbiam je cote. Jeñee equia nyiisa isa nae, ũquĩ abe ra nyecua ja mbiam je no.

Dios riqui jendeaquiatu bei co

⁴ Tacheẽ nyecua jẽje, Sequiato. Ae “taiquia” i quia jeni nae, i ũquĩ si ra jẽsiquichechĩ jẽ! ⁵ Ae abamombo serĩte quia tata cuasu nae, aque si quiatu jẽsiquiche. iAque si quiatu jẽsiquiche tuchi jẽ! ⁶ Nguireĩ ndei abam queteamba eã jiri. Mbae isiquia mumba eã jiri raque. Dios quia nguireĩ icua jate nguiã. Dios ra tesareĩã nguireĩ mo si. ⁷ Dios riqui jẽ mi mi icua ja co. Dios riqui ngueteã jiri jendese nguireĩ si co. Nyebe jẽsiquicheã mbae mo si.

Jesús quiato chõ se re, jenyete checua chõ nguia mbiam je

⁸ “Jesucristo quiato chõ se re”, ae i quia mbiam je nae, ũquĩ ñi nda acheẽ turã se abe. “Sequiato chõ ã nde”, ae ra se. Angeles ram ambiirandu ja ũquĩ ndese. ⁹ “Jesucristo quiato chõ se re”, ae iã nguia mbiam je nae, ũquĩ ñi nda acheẽ turã eã. “Sequiato eã ño ũquĩ nde”, ae ram se. Angeles nda ambiirandu ja sequiato eã ndese. ¹⁰ Emo ñee icuã mose serĩ, Dios ram echeẽ icuã mbutiã arõte. Emo ñee icuã mose Espiritu Turã ñi, ũquĩ icuã nguia ram Dios mbutiã eã mbei. ¹¹ Mbiam icuã icuã nda jẽje serĩ. Jenderao mose mbiam rerecua je, ijẽquicoi coichĩ nda jẽ! “iMañi nande ram ñee ee re?” jenyete chĩ nda jẽ! ¹² Huee quia ram Espiritu Turã ñee nguiã jẽje jem-bucheẽ sacua, i que Jesús ñee uchimbacuaquiatu je ra.

Mbaecha aracuayã

¹³ Emo ngue ñee Jesús je ra. —Sererecua, senongue icuã icuãte seje. Echeẽ ram senongueje. Ae ureru secha ure je nae, senongue embuchecha turã eãte seje, i que mbiam mo ñee Jesús je ra. ¹⁴ Jesús que ñee ee ra. —iMbaerã nda re? “Mbiam mbae embuchecha turã turã ee”, iã ngue Dios seje ram, i que Jesús ee ra. ¹⁵ —iEmo mbae rese ram jemaee maechĩ eosei sacua jẽ! “Sembacua tubiriã mose ram seyate cote”, jenyete chĩ nda jẽ! i que Jesús ee ra. ¹⁶ Jesús que ñee ee ra. —Sã mbaecha mo ndiqui no. Ibicha. Sã embae iam tuchite no. ¹⁷ “iMañi ae ram se re? iManguere ram abe ererecoquiatu re?” i tuchi que mbaecha uchiangui re ram. ¹⁸ “Sembacua ruacuã tam-

bucuasu tuchi. Quiata a ruacuã. Ì nda sembae ique ja tuchi huee. Ae arecoquiato quia ã nae, ùquĩ nda tenda ata jiri tea seje chã. ¹⁹ Aquiei quiei eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbia mbia chõ nda se quia cote”, i raque mbaecha ñee uchiangui re. ²⁰ Dios que ñee ee ra. “Ndeacuayãte ereico co. Co isa chõ nda eremano. Ae ererecoquiato quia nae, aba je chio nda ùquĩ cote”, i que Dios ñee mbaecha je ra. ²¹ Ae mbae munua nua mbei quia nae, ererecoquiato sacua nae, earacuayã tuchi chõ ùquĩ nde. Dios quiato eã ño ùquĩ nde, i que Jesús mbia mbaaquiato quiato ra.

Dios uquiato reaquiato bei

²² Jesús que ñee uchimbaaquiato je ra. —“¿Mbae ra nandeu re?” ijyechĩ nda quicoi coi jê! “¿Ma tiru ra nandemingue re?” ijyechĩ nda quicoi coi jê! ²³ Mbia chi u ae ra mbia mingo eã. Mbia irao abe ra mbia mingo eã no. ²⁴ Sã nguireĩ no. Mbae tiquiyã ndaque. Mbae ishao eã ndaque no. Mbae ruacuã eãte raque embae. Dios quiarei embuquiaru quiaru. Jê nguiarei Dios queteamba tuchi nguireĩ si. Nguireĩ ja si. Jê abe Dios ae jembuquiaru nguiã jê no. ²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguiã. ²⁶ Jê mbae ñetẽ naa aquiatoã mose, ¿mbaerã jëingo “mbae cuasu tasaã” i re? Dios quia ra mbae saã ja jêje. ²⁷ Sã mbae uti turãte riqui no. Mbae ao ao eã ndaque. Ñinyu mburirã eã ndaque. Mbae uti quiarei eturã jiri Salomón si. Salomón turãte raque. ²⁸ Sã Dios quiata mbuturã no. Quiata mano jeite raque. ¿Mañi nda Dios jembirao eã jê nde no? ¿Mbaerã jëingo Dios icuayãte re? ²⁹ “¿Mbae ra nandembei re?” jenyechĩ nda pare pare i jê! “¿Mbae ra nandembei re?” jenyechĩ nda quicoi coi no jê. ³⁰ Eĩ ño Dios quiatoã nguiã. Jê nguia jendu tesareia mbeite nguiã jêsi. ³¹ Jê nguia jëingo tuchi Dios rese jendecuarã. ùquĩ mose ra Dios mbae mee mee mbei jêje. Jenyurã. Jeñimbeirã abe no.

Jembae jemondo ja Dios je

³² Jësiquichechĩ nda mbae mo si, Seriiirĩ. Jendu ra umbae mondo ja jêje. Dios iate ra umbae mondo mose jêje. ³³ Jembae jemondochõ ño mbaecha reã je. Ì nda jembae tubiriã jëingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãya huee. Chicuaquiareĩ eãte ra huee no. ³⁴ Jê jembae mondo mondo mose ibate, jendua ra ibatenda rese cote. Jê jembae monoã mose emo je, ibatenda rese ra jendua eãte.

Jëingoquiato bei chõ nguia

³⁵ jëingoquiato bei quia jê! Itondaru abe jëingoquiato quia. ³⁶ Sã ererecua mo no. Oso ngüinisirã nderequia no. Huee erimba mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba eequia asi ee cote. ³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiaru turã. Ae sí chõ echara chara nguiã ngüimba je hue no. ³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese. ³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. ùquĩ mose ra erequeã. Nembae ra eresaarõ mbei esi. ⁴⁰ Eĩ jenyê jê abe icoquiato. Eĩ ae ra u ibate si. “Tu eãte rei rae”, i mose quia ra achu, i que Jesús ra.

Erimba echeẽ mumbayã mose, eya tuchi rae

⁴¹ Pedro que ñee Jesús je ra. —¿Aba je ereico ñee ùquĩ nde? ¿Ure mii je ere? ¿Mbia ja je ere? i que Pedro ee ra. ⁴² Jesús que ñee ee ra. —Dios rimba aba cheẽ mumbayã ñi aico ñee co. Dios rimba aracua riãico ñee co. Sã ererecua ñee ngüimba turã je no. “¿Sembae esaarõ ja jê!” i ee. “Serimba ataque embuquiaru quiaru ja quia no”, i ee. ⁴³ Erimba echeẽ mumbayã mose, ererecua ia tuchi ra tu mose. Erimba abe ra eya no. ⁴⁴ Ererecua ra ngüimba mii mbei cote, umbae raarõ sacua. ⁴⁵ Sã erimba ndua ndua uchiangui re no. “Sererecua ra tu jei ãte”, i ndua ndua. Hue ñee icuã icuã uataque je huee cote. Iruã nua cote. Quiaru chooño cote. Mbae mbei chooño abe cote. Quiacua quiacua cote. ⁴⁶ Sã ererecua ru quia ngüimba mbuate aque cote no. Ñee ee. “Mbae ra eresaarõ mbei seje cote”, i ngüimba je cote. Ngüimba iruã nua tuchi cote. Ae aba cheẽ mumbate quia, ùquĩ ndese ra mbae rasi raã naa cote. ⁴⁷ Ae nguerecua cheẽ icuate quia nae, ùquĩ nda ererecua mbasi mbasi bei ucheẽ mumba mose. ⁴⁸ Ae nguerecua cheẽ icua eãte quia nae, ùquĩ nguia ra ererecua mbasi mbasiã jiri ucheẽ mumba mose. Ae Dios cheẽ icua tuchi quia nae, ùquĩ je ra Dios “mbae esaã tuchi seje”, i. Ae je Dios mbae mondo tuchi nae, ùquĩ je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

⁴⁹ Ibate si que achu íbii ra. Mbia mae sacua sequirãcuã ndese. Mbia sequirãcuã icua eã ñochĩ namo nyee. ⁵⁰ Mbia ra sembasi tuchi cote. Pare pare aete se quia ndua erese co. ⁵¹ ¿Achu reĩ mbia mbuturã turã sacua serimba je jêje re? Tei. Achu chõ ngue mbia mbuchao chao nyesi resẽ. ⁵² Mbia chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi. ⁵³ Emo nda eicuãte

ngu je serĩ. Emo nda eicuãte nguiĩrĩ je serĩ no. Emo nda eicuãte usi je serĩ no. Acuanĩ abe ra eicuãte uchari je no. Ari mo abe ra eicuãte nguiĩrĩ ninisi je no. Eĩ si ra mbia icuã icuã uchue serĩ no, i que Jesús ra.

Ae ibatenda ra tu icuãte mbia je nae, aque jëicua eãte chõchi

⁵⁴ Jesús que ñeembe mbia je ra. —“Ama nda nyaaqui”, jenybe bei quia pã i mose ã. Ibei jëicuate raque quia ã. ⁵⁵ “Tenda rasite ra cote”, jenybe bei quia quiririã ichu ichu mose ã no. ⁵⁶ Ibei jëicuate raque quia ã. Tenda abe jëicuate raque quia ã no. Ama abe no. Dios rucucha ra tu mbia je, ¿mbaerã jëingo ùquĩ icuayãte quiatu re? ¿Mbaerã jëingo jëaracua raã naa nde?

Ae eicuãte riqui jëje nae, “nandeico turã ño nguia”, jenybe chõ nguia ee

⁵⁷ ¿Mbaerã jëingo mae sereãte mbae turã ndese re? ⁵⁸ Emo ñee icuã mose jeniĩ mbia rerecua je, jëturã ño ee. Jeñee turã ño ee. Jë ae chõ jeñimbuturã nguia erese. ĩ nda jenderao icuã eã. Jenderao mose ra jëtarõ mbei cárcel. ⁵⁹ Huee ra jëingo bei. Jembae mondo ja tuchi chee ee, i que Jesús ra.

Jëhui chõ jëicuã si

13 Aque mose que mbia Jesús mbiirandu Pilato rĩrĩ nda. Pilato nda mbia Galilea jenda mo iquia iquia ra. Mbia ticuasú iquia iquia mose Dios mbaerã. ² Jesús que ñee mbia je ra. —Ae Pilato iquia iquia quia nae, ¿ùquĩ icuãte riqui reĩ mbia ataque si re? Tei. Jëicuã ja chõ jëingo nguia ã no. ³ Jëhui eã mose jëicuã si, jemanó ja chõ nda jë abe. Ùquĩ na si. ⁴ Sã torre de Siloé ngoi mbia ati no. Dieciocho iquia. ¿Ùquĩ eicuãte riqui reĩ mbia ataque si re? Tei. ⁵ Eĩ ja chõ ñene. Jëhui eã mose jëicuã si, jemanó ja chõ nda jë abe. Ùquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chõ ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguia ngũimba je cote. “Ira a rea ngue aso rei nguia. Ia eã mbei chõchĩ seje tres años. ¡Echisia chõ oso jë! Ibi riqisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese. ⁹ Ma ia eãte co tenda. Ia eã mose, nandechisia chõ cote”, i que erimba amei je ra, i que Jesús mbia mbaaquiātu ra.

Jesús ari rasi mbucherõ

¹⁰ Sábado mose que Jesús chi mbia mbaaquiātu quiātu ra. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguia. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chõ nandeico mbae rese ae. Sábado eã mose chõ nandeico erasi mbucherõ ae. Sábado mose chõ Dios mbae resẽ. Erasi mbucherõ aroneate co mose resẽ, i rei que ererecua mbia je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jëingo ticuasú mbui eã mbei embui sacua nde? ¹⁶ ¿Mañi nande ra cuña ndasi mbucheroã co sábado mose re? Judía sí chõ nyeresẽ. Jë na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda. ¹⁷ Mbia ataque iate que Jesús cheẽ mose ra. Jesús chiao rese abe eyate no. Ae Jesús ucuãyãte quia, ùquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetẽte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chõ Dios rimba re. Ùquĩ miĩ ndaque nyii. Nimbeta tuchi cote. Mbae eĩ na.

Levadura rã ño Dios rimba re

²⁰ ¿Mbae rã ño Dios rimba chã? Levadura rã ño Dios rimba re. Sã mbia levadura ñetẽ mondo mbichae ao ramo mose no. Levadura oso quia mbichae mbuchi-matã ja no. Eĩ si chõ Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbia mbaaquiātu quiātu. ²³ Emo ngue ñee Jesús je ra. —Sererecua, ¿mbia miĩ miĩ ño nda siqui ibate nderese re? i que emo ñee Jesús je ra. ²⁴ Jesús que ñee ee ra. —¡Eiquesa chumumbi rĩ ño jëso ique jë! “Hue rĩ nda aso se abe ique”, i ja jate raque rae. Tei. Ique ja eã nguia nda re. ²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã

ure je", jenyeraque ra seje cote. Acheẽ nda jẽje.
 "¿Mangue jenda jẽ nde? Jaẽicuayãte se", ae ra jẽje cote.
 Eiquesa ra ambuquiatayã mbei jẽje cote. ²⁶ Jeñee tuchi
 raque ra seje cote. "Urequiaru que equia nderese. Nde
 que urembaaquiatu quia. ¿Mañi ere ra urerecha re?"
 jenyeraque ra seje cote. ²⁷ Acheẽ nda jẽje cote.
 "Jaẽicuayãte se. Jẽso serecha. Mbae icuã ngue jẽsaã
 saãte quia resẽ", ae ra se hue cote. ²⁸ Hue ra jenyeseo
 seo seje huee cote. Jeñee nda seje. "Abraham ño
 siquichĩ nderese hue. isaac abe no. Jacob abe no. Dios
 cheẽ mbuchecuasa ja abe no. Ure chõ urecuchĩ
 taicuee a", jenyera nyeseo seo seje huee. ²⁹ Mangue
 jenda chooñoa nda ngaẽ ngaẽ Dios rĩchã aque mose.
 Quiaru quiaru ra equia Dios rese. ³⁰ Ae eaquiatute
 riqui raque namo nae, ùquĩ mo nda eñetẽ na pee cote.
 Ae eaquiatuãte riqui raque namo nae, ùquĩ mo nguia
 ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

³¹ Aque nyaashĩ mose que fariseos ngaẽ ñee Jesús je
 ra. —¡Eso a si jẽ! Herodes ndeiquia serĩte quia co, i que
 Jesús mbiirandu ra. ³² Jesús que ñee ee ra. —Eoita rã
 ño Herodes re. Jẽso ñee ee. "Jesús que ñee ndeje ra.
 'Taico mbĩrimbe rã aba checuayã icuã jea jea mbia si.
 Taico mbĩrimbe rã mbia rasi mbucherõ cherõ. Namó.
 Isamami abe. Isamami nongue ra ahui erecha cote', i
 que Jesús ndeje ra", jenyera oso Herodes je. ³³ Taicobe jiri
 namo. Isamami. Isamami nongue abe no. Jerusalén
 nguia nda seiquia nguia. Sã Dios cheẽ mbuchecuasa
 mano ja Jerusalén no. ³⁴ Tacheẽ na jẽje, Jerusalén jen-
 da. Seya eãte aicochĩ jendese co. Hue jẽingo mbia
 iquia iquia beite hue. Dios cheẽ mbuchecuasa iquia
 iquia. Dios chĩmondo abe iquia iquia no. Sã nguira
 riqui nguiire reaquiato mondo ujeoqui re no. "Eĩ tae
 jendeaquiato", ae beite rei nguia jẽje co. Secheẽ jẽisi
 sereã mbei chõchĩ nguia ã. ³⁵ ¡Aico jendecha a cote jẽ!
 Jemae mae eã nda serese cote. "¡Co chĩ Dios rucucha
 ru quia co cote jẽ!" jenyera mose, hue ramo nguia ra je-
 mae serese cote.

Jesús mbia rete ruru mbucherõ

14 Jesús que oso rei quiaru fariseo rerecua mo
 nyuchúaa ra. Sábado mose. Fariseos mo ngue
 chĩ erea chemi ñemi nda. ² Huee que emo ndasi riqui
 Jesús je ra. Erete ruru ja que ra. ³ Jesús que ñee
 fariseos je ra. Embesasa je abe. —¿Eicuãte se erasi
 mbucherõ mose sábado mose re? ¡ ere. Jeñee seje, i
 rei que Jesús ee ra. ⁴ Jesús cheẽ mose que mbia mo
 ñee eãte ee ra. Jesús que erasi mbucherõ mondo cote
 ra. ⁵ Jesús que ñee fariseos je ra. —Sã jenimba ticuasú
 riqui jaã no, ngoi oso ibicua rie. ¿Sábado mose ra
 jẽsiquĩã nde? i que Jesús ee ra. ⁶ Fariseos que ñee
 sereãte echeẽ mose ra.

Jẽcuasu ra jẽsaã saãchĩ, i Jesús mbia je

⁷ Mbia que erenda turã isirõ sirõ nguia ra. Ngoi sacua
 ererecua ji. Ucuasu raã naa sacua. Nyebe Jesús ñee
 nguia ee. ⁸ —Jẽingo mose fiesta, jerecha turã mo nda
 jẽisirõchĩ jẽ! Mbia chĩcuate mo nda tu arõ ndeje cote.
⁹ Fiestacha ra ñee arõte ndeje. "Ehuã na nde. Erenda
 turã tamondo sequiato je", i arõte ra ndeje. Ndeireĩte
 ra huee cote. Pe quiti jiri ra nembucoi cote. ¹⁰ Jẽingo
 mose fiesta, pe quiti jiri chõ jengoi. Erenda turã isirõ
 nocoĩ. ¡ nda fiestacha ñee ndeje. "Quiatuchu a jiri, Se-
 quiato. Erenda turã tose", i sacua ndeje. ¡ nda mbia
 mae ja nderese. ¹¹ Ae ererecua saã saã nguia nae, ùquĩ
 nda siqui eñetẽ na cote. Ae siqui minguete quia nae,
 ùquĩ nda siqui ererecuarã cote, i que Jesús mbia je ra.
¹² Fiestacha abe je que ñee cote ra. —Nde fiesta raã
 mose, "jenyu quiaru serese", jerechĩ nda mbaecha jiri
 je jẽ! Erechĩ nda ndenongue je. Erechĩ nda ndequiato
 tuchi je. Ûquĩ mose ra embuchebi ndeje. Dios quia ra
 embuchebiã ndeje cote. ¹³ Nde fiesta raã mose, "jenyu
 quiaru serese", ere chõ mbaecha reã je. Ere chõ mbia
 rasi rasi je. Mbia cuatayã je. Mbia resayã je. ¹⁴ Nde fies-
 ta raã naa mose ùquĩ je, ùquĩ nda embuchebiã ndeje.
 Dios quia ra embuchebi ndeje, Dios quiato quera si
 mose. Ûquĩ mose ra ndeya tuchi, i que Jesús fiestacha
 je ra.

Ererecua quiaru mbaecha reã ndese

¹⁵ Ûquĩ andu mose que emo ñee Jesús je ra. —Ababi
 tuchi siqui Dios rese ae ererecua tuchi mose, i que
 emo ñee Jesús je ra. ¹⁶ Jesús que ñee ee ra. —Sã emo
 fiesta raã no. "Jenyu quiaru serese", i sacua mbia
 tubiriã je. Mbia chiurã ngue esaã tuchi ra. ¹⁷ Echiurã
 quiche ja mose que ngũimba mo mondo cote ra. "Ae je
 acheẽ, sã ecuaẽ quiaru cote", i que ngũimba je ra.
¹⁸ "Ateẽ. Aso eã nda se. Serecoteãte chõchĩ", i ja ja que
 ra. "Ibi mo ngue aisi ramote ra. Taso rã erea", i que
 emo ucheẽ mondo fiestacha je ra. ¹⁹ "Ticuasú mo ngue
 aisi ramote ra. Cinco yuntas. Taso rã erea", i que emo
 ucheẽ mondo no nda. ²⁰ "Seninisirã mo areco ramote
 co. Nyebe ra asoã quiaru nderese huee", i que emo ee
 no nda. ²¹ Erimba que tu nyebi ñee nguerecua je ra.
 "Erecoteã ja jate que ra. Quiaru eã nda nderese", i que
 erimba embiirandu ja ra. Ererecua que paama i ra.
 Ngaẽ eã mose erea. Ae ñeembe nguia ngũimba je.
 "Eso ñee ùquĩ je quiato no. Mbaecha reã je. Mbia rasi
 rasi je. Mbia cuatayã je. Mbia resayã je. Ûquĩ ja je
 echeẽ. Sã ecuaẽ quiaru serese", i que ererecua ra.
²² Emo mose jiri que erimba ru ñee nyebi ee ra. "Acheẽ
 ñee ja que ee ra. Co ecuaẽ ndaque nguia co. Mbia
 miite que ra", i que erimba ñee fiestacha je ra. ²³ Erere-
 cua que ñeembe ee ra. "Esobe ñee ñee emo je no. Eru
 ja sechuchua. Quiaru sacua serese. ¡ nda sechuchua

mbiitâyã jiri. ²⁴ Ae je acheẽ nyii, ùquĩ nda quiaruã tuchi serese cote", i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra. ²⁶ —Ae nyeseccua tuchi quia ngu rese sesì, ùquĩ nda serimba eã. Ae nyeseccua tuchi quia usi rese sesì, ùquĩ nda serimba eã no. Ak nyeseccua tuchi quia ngüinisi rese sesì, ùquĩ nda serimba eã no. Ae nyeseccua tuchi quia nguiirí ndese sesì, ùquĩ nda serimba eã no. Ae nyeseccua tuchi quia ngõngue ndese sesì, ùquĩ nda serimba eã no. Ae nyeseccua tuchi quia ngueco rese sesì, ùquĩ nda serimba eã no. Ùquĩ ja ra serimba eã. ²⁷ Ae mano sereãte serĩ, ùquĩ nda serimba eã no. Ae siqui sereãte quia serui, ùquĩ nda serimba eã no. ²⁸ Sã emo ñee no. "Sechuchua tasaã na", i. "¿Manyá mbae isiquia ra amumba sechuchua raã sacuaã nde?" i nyii eao nonde. ²⁹ Sã uchuchua raã naa ndaque no. Ihuaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ "Co uchuchua saã saã ndei cose. Saã ja eã mbei chõchĩ nae", i ra mbia iquia iquia ee. ³¹ Sã soldados rerecua icuã icuã emo je no. Guerra raã serĩ ee. Guerra raã nonde ra ndua ndua. "Ae quiatu que soldados tubiriãte embae sesi ra", i uchiangui re cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. "¿Nandeico turã ño nyiese jẽ!" i ee. ³³ ¡Eĩ jenyẽ si chõ nguia jẽ! Jendua rá nguia nyii. Jẽ jembae recha ja eã mose, serimbarã eã nda jẽ.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicuã tuchi cote. ³⁵ Nio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

Oveja quiachã je

15 Mbia icuã ngue Jesús siichã nguia ra. Ae impuestos isi isi quia, ùquĩ abe que Jesús siichã nguia ra. Echeẽ andu sacuaã. ² Nyebe fariseos ñee icuã icuã nguiã Jesús rĩ. Embesasa abe ñee icuã icuã nguiã erĩ no. —¿Mbaerã Jesús riqui mbia icuã isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaaquiato sacuaã.

⁴ —Sã emo nimba quiachã oveja no. Cien ndei erimba. Co miñ ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. "Quiatuchu rá", i uquiato je cote. Nguesenda je abe no. "Quiachã je que atea cote ra. ¡Sã jẽ! Jẽya tuchi serese cote", i que uquia-

to je ra. ⁷ Tacheẽ nyecua jẽje. Quiachã je mo nyebi mose, Dios iate riqui co. Mbia icuã tu mose ee, Dios iate riqui erese co. Ae uturã saã saã nguia nae, ae huicuaã secha sereãte quia nae, ùquĩ ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque miñ quiachã ndaque ee no. Lamparina ngue emendi eresae sacuaã nda. Sã uchuchua tii no. Mbae isiquia rea chee. ⁹ Ereare que ñee uquiato ja je ra. "Quiachã je que atea cote ra. ¡Sã jẽ! Jẽya tuchi serese cote, i que uquiato je ra. ¹⁰ Aico ñee nyecua jẽje a. Mbia mo hui mose huicuaã si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. —Sã amei mo eririñ nyere-mo no. ¹² Eriirí ndiqui que ñee ngu je ra. "Paba, mbae isiquia ataque embu rá se sembaerã. Ndemano nonde", i que ñee ngu je ra. Ae eru mbae isiquia mbuchecha nguiã ee. Mondo eo cote. ¹³ Isamami nongue que eririñ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ. ¹⁴ Hue jenda mbia chiu que uate cote ra. Amei ndiirí abe riãcuã nyee que ra. Umbae mumba chooño jare. ¹⁵ "Taquiei quieti rá oso ererecua mo je", i chee. "Teasu socoi esaarõ na serimba", i chee ererecua mo ee. ¹⁶ "Teasu chiu au chõ mbichĩ ira a. Seriãcuã tuchichĩ", i chee amei ndiirí. Emo ngue embuquiariuã mbei ra. ¹⁷ "Paba rimba chichĩ quiaru turãte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. 'Seicuã tuchite que ndeje curi ra, Paba. Paba ibatenda je abe no. ¹⁹ Seririñ ere eã seje cote. Nderimbarã taico cote', tae rá oso Paba je", i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiirí ndese oo ra. Equiaama. Eritii riite no. ²¹ Ngu je que eririñ ñee ndei cote ra. "Seicuã tuchite que ndeje curi ra, Paba. Paba ibatenda je abe no. Seririñ ere eã seje cote", i rei que ngu je ra. ²² Eru que ñee ngüimba je cote ra. "Eirao turã mo emondo seririñ je. Eiyaorã abe mo emingue ee. Anillo mo abe emingue eo rese. ²³ Ticuasú quira mo jẽquishĩ echo je. Nandequiariu tuchi erese. Fiesta nandesã ee. ²⁴ Seririñ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote", i que amei ngüimba je ñee nda. Eya tuchi cote. Nyebe fiesta raã nguiã nguiirí je.

²⁵ Amei ndiirí nongue que siqui úcoo ra. Ngasẽ ndaque u quia uchuchúaa cote. Tõotõ i que ehandu

ra. Mbia cheĩ cururi abe andu. ²⁶ Ñee ngue erimba mo je ra. “¿Mbaerã eriqui tođtõ i re? ¿Mbaerã mbia riqui nyuruqui re?” i que ameĩ ndiirĩ ndiqui ra. ²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú iquia nguiã ee”, i que erimba ñee ee ra. ²⁸ Ae enongue paama i nguiã ngu je. Ìque sereã nea ngu chuchúaa. Ae eru tu nguiã usẽ ñee ee taicuee. “Eique rá mae ndenongue rese”, i rei que eru ee ra. ²⁹ Eriirĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese. ³⁰ Ae tu ramo nderiirĩ, ¿mbaerã ticuasú mo ereiquia ee re? Umbae que emumba chooño oso curi resẽ. Siqui siqui cuña icua ndese. ¿Mbaerã ereico fiesta raã ee re?” i que eriirĩ ngu je ra. ³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiatu que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesã ee. Nandeya tuchi rá erese”, i que eru nguiirĩ nongue je ra, i que Jesús mbia je ra.

Ererecua rimba mo icoquiato

16 Jesús que ñee uchimbaaquiato je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembrae mbuquiachã quiachã nguia ra”, i que mbia mo ererecua mbiirandu cote ra. ² Ererecua que ñee ee ra. “¿Mbaerã mbia riqui ñee nderiĩ seje re? ¿Cuentas esaã saã mbae mbae ja jẽ! Sembae raarõsa eã nda nde cote”, i que ererecua ngũimba je ra. ³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quiei quiei sacua ndesẽ. Seireĩte ache ache i mbia je. ⁴ Ūquĩ ño nda asaã ee nda. Ì nda mbia seisi turã uchuchúaa sembae eã mose”, i que erimba uchiangui re ra. ⁵ Ae deber i quia ererecua je, ūquĩ je que erimba ñee nda. Co miĩ miĩ je. “¿Manya deber ere sererecua je re?” i que erimba emo je ra. ⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembrae cuenta nandemombo chõ. Emo nandesã asi. Cien eã nda cote. Cincuenta achõ ño nda cote”, i que erimba ee ra. ⁷ Ae deber i quia ererecua je, ūquĩ mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembrae cuenta nandemombo chõ. Emo nandesã asi. Cien eã nda cote. Ochenta achõ ño nda cote”, i que erimba ñee ee ra. ⁸ Ererecua que jirandu erese cote ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jẽje co. ¿Mbae isiquia jemondo mon-

do quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jẽje ibate. ¹² Jẽ Dios mbae raarõ turã eã mose, ¿aba quia ra mbae mondo jẽje jembaerã tuchi cote re? ¹³ Co miĩ erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ūquĩ siqui aroneate Dios rese. Ae siqui beite quia Dios rese nae, ūquĩ ndei ndua eã jiri mbae isiquia rese, i que Jesús ra.

¹⁴ Fariseos que chĩ Jesús cheẽ andu ja ra. Mbae isiquia quiato tuchi que ūquĩ nda. Nyebe ñee icua nguiã Jesús cheẽ mose. ¹⁵ Nyebe Jesús ñee asite nguiã ūquĩ je. —Jẽ nguiarei jẽturã jembuchecua tuchi mbia resaa. Dios quiarei jẽñiangui renda icua tuchi quia co. Ae eturã abareãte riqui mbia je nae, ūquĩ Dios ucuãya te quia co.

Dios cheẽ nda io ja

¹⁶ Moisés chimbesa que mbia mbaaquiato quiatu nyii ra. Dios cheẽ mbuchecuasa chimbesa abe que mbia mbaaquiato quiatu nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguiã ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngũinisi mombo mose

¹⁸ Mbia ngũinisi mombo mose, ngũinisirã mo nderequia mose, eicuã tuchi ūquĩ. Adulterio, i que ūquĩ je ra. Ae eru mombo, emo aque rerequia mose, eicuãte ūquĩ abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huiirao turã mingue mingue bei. Huiirao nininya mingue mingue bei. Fiesta que esaã saã mbei quia ra. Umbae mbae isiquia mumba chooño mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chiu rire nda au rá ña”, i tuchi que equia uchiangui re ra. Ñooño ngue ngaẽ ngaẽ nguia erete reechu rere rere ra. ²² Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe

que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. "Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacua", i rei que mbaecha ñeemombo Abraham je ra. ²⁵ Abraham ngue ñee ee cote ra. "Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no", i que Abraham mbaecha je ra. ²⁷ Mbaecha que ñeemombobe Abraham je ra. "Lázaro chõ emondo Paba chuchúaa no, Abraham. ²⁸ Hue senongue cinco chi hue. Sã Lázaro si ñee ee. Embiirandu. Ì nda ecuaẽ eã mbae rasi raã a", i rei que mbaecha ñee Abraham je ra. ²⁹ Abraham ngue ñee ee ra. "Ndenongue Moisés chimbese rerequia hue. Dios cheẽ mbuchecuaa cheẽ abe rerequia hue no. Sã ùquĩ mumbayã", i que Abraham ee ra. ³⁰ Mbaecha que ñeembe Abraham je ra. "Embese ji rerequia raque. Mano je oso mose ñee ee, aque cheẽ nguia ra emumbayã cote. Huñcuã nda esecha cote", i rei que mbaecha ñee Abraham je ra. ³¹ Abraham ngue ñee ee ra. "Ndenongue Moisés chimbese mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no", i que Abraham ñee mbaecha je ra, i que Jesús ra.

Mbae icuã nda nandesã uquiachĩ emo je

17 Jesús que ñee uchimbacuaquiato je ra. —Mbae icuã nguiarei siqui bei tuchi mbia mbiñcuã nonde. Ae ñee nguia mbia je nae, "mbae icuã esaã" i nae, eicuã tuchi chõ ùquĩ nde. Ae "mbae icuã esaã" i nae, ùquĩ nda mbae rasi saã tuchi cote. ² Ae ra mbae icuã saã uquia seicuaa mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisa ye nyii re chã. Sita resebe ecua ji mondo. Ì nda mbae icuã naa uquia eãte rei seicuaa je. ³ ¡Jẽingo chooñoa ño nguia jẽ! Nderesenda icuã mose ndeje, echeẽ ño ee. "Nandeico turã ño", ere ee. Huñ mose huñcuã si, eicuã si etesarei chõ nde. ⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. "Mbae icuã nda asaã eã ndeje cote", sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbacuaquiato que ñee ee ra. —Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, Ì nda mbae mo jeñee mumbayãte rei. Ì nda jeñee ndei ira je. "Nde ae echisiqui.

Nde ae si echitiquia ama ndisha ite re", i ira je. Ì nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenyẽ chõ nguia

⁷ Sã emo nimba mo ndiqui bei turuquia rĩ ticuasuararõ arõ no. Ecuasẽ mose tuchúaa, ¿mañi nda ererecua ñee jei ee re? "Equiaru rã", i jei ee re. ⁸ Tei. I jei eã nda ee. "Sechiurã esaã naa seje. Sequiaru eteaquiato rã nyii. Aquere quia terequiaru nde", i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene. ¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ùquĩ naa ja mose, ¡jẽingo mingue chõ nguia ee jẽ! "Ae rĩ Dios ñee nande je nae, ùquĩ mĩ ño ngue nandesã nda. Erimbachõ ño nande re", jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ùquĩ mbia rasi je ra. Erasi que chi icue isho jiri Jesús si ra. ¹³ Ùquĩ mbia rasi que ñeemombo mombo Jesús je ra. —¡Jesús! ¡Mbia mbacuaquiato! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacuaquiato sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co mĩ ndu nyebi ñee Jesús je ra. Eya tuchi que ñeemombo mombo Dios rĩ nda. ¹⁶ Ngoi que ngũĩã ndese Jesús resa quti ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. —Eataate que ambucherõ. ¿Ma eataate ma nde? ¿Ma nueve ma nde? Nyebiã ñochĩ ecuaẽ gracias i seje. ¹⁸ Co mĩ tuchi chõ tuchĩ nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguia, i que Jesús ee ra.

Mbia chiangui re quiato Dios riqui nguia mbia rerecuarã

²⁰ —¿Manosete ra Dios ru íbii mbia rerecuarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ "¡Aa chõ Dios riqui mbia rerecuarã jẽ!" iã ndae. "¡Pee chõ Dios riqui mbia rerecuarã jẽ!" iã nda eno. Mbia chiangui re quiato Dios riqui nguia mbia rerecuarã, i que Jesús ra.

²² Jesús que ñee uchimbacuaquiato je cote ra. —Namo jiri ra jẽ seosei osei setiã mose cote. "Jesús nda siqui mbiñ na nanderese chã", jenyẽ rei nda re. ²³ "Hue Cristo riqui hue", ichõño nda mbia jẽje serĩ. "Pe eriqui

pe", ichōiño nda jēje no. "Nyia" jenyechĩ nda ee jē. Ñeeñoño ndae. ²⁴ Sechecuayã nguia ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ũquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuasú tu cote no. Sã mbia mano ja no. ²⁸ Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae eĩ tiquia chooño no. Sã uchucharã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicuee se tu mose, ique eã nda uchuchua umbae rerecoquiato. Ae siqui úcoo, nyebiã nda u uchuchua no. ³² ¡Lot ninisi rã nda jëingochĩ jē! ³³ Ae ngueteãte quia nguico rese nae, ereco ra quiachã esi. Ae ngueteã eãte quia nguico rese nae, aque reco quia ra quiachãysi. ³⁴ Sechu mose, aque isa ra nyeremo chi uque quisa ye. Co mii nda arao. Enongue ra siquichõ. ³⁵ Cuña nyeremo nda chi mbua tocho no. Co mii nda arao. Enongue ra siquichõ no. ³⁶ Mbia nyeremo nda chi úcoo no. Co mii nda arao. Enongue ra siquichõ no, i que Jesús ra. ³⁷ —¿Mangue ra ũquĩ mangue re, Jesús? i que echimbaaquiato ra. Jesús que ñeembe ee ra. —Ae rĩ mbae raaque riqui chi nae, huee ra urubu choi ja tuchi, i que Jesús ra.

Eru cheecha ñee chiibe ibe ererecua mo je

18 Jesús que ñee uchimbaaquiato je ra. —Sã mbia riqui ñee mbei Dios je. Sã tesareĩã mbei ñee Dios je. ² Sã eru cheecha mo ndiqui no. Oso chiibe ibe ñee ererecua je no. "Ae sembae quereco nae, sã aque sembae meembe seje", i chiibe ibe ererecua je. Dios quiatoã ndaque ererecua. Mbia quiato biãte raque aque ererecua. ⁴ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. "Ari riqui ñee chiibe ibe tuchichĩ seje co. Echeẽ tamumbayã na", i chee que ererecua ra, i que Jesús ñee uchimbaaquiato je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque. ⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãysi riisu isu raque co. ⁸ Dios ra uquiato

cheẽ mumbayã nyee cote. Se tube mose íbii manya sequiato ra chi bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chi Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ũquĩ je. ¹⁰ —Sã mbia nyeremo nyoi ique Dios chuchua no. Ñee Dios je no. Co mii ngue fariseo ra. Enongue que impuestos isi isi quia ererecua mbaerã nda. Mbia mbiĩĩ irĩsa que ae ra. ¹¹ Fariseo que ñee ndei Dios je ra. "Dios, seturãte se. Mbia icuã na eã ño se re. Co mbia mbiĩĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia mbiĩĩ irĩ ãte quia co. ¹² Aquiaruã mocoĩte quia ndua bei nderese co. Diezmos amee mee mbeite quia ndeje co", i rei que fariseo ñee Dios je ra. ¹³ Aba mbiĩĩ irĩsa que chĩ isho ra. Uãquĩ ngue embucheseco ibi qiti ra. Uchiã ngue eisi ñee Dios je ra. "Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchichĩ seicuã ndese", i que ñee Dios je ra. ¹⁴ Tacheẽ nyecua rã jēje. Dios que aba mbiĩĩ irĩsa cheẽ isi turã nda. Ico minguete quiato nguiã ñee ñee Dios je. Fariseo quiato ngue uturã saã saã mbeite nguiã ñee Dios je. Nyebe Dios echeẽ ñanuante nguiã. Ae ucuasu saã saã nguia nae, ũquĩ nda Dios isiãte. Ae ico tochei quia Dios je, ũquĩ quiato ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiirĩ ngurucuaẽ cuaẽ nguia Jesús je ra. Jesús oco oco sacua ere. —¿Mbaerã jendiirĩ jendu quia co re? i rei que Jesús chimbaaquiato ñee mbia je ra. ¹⁶ Jesús quiato que ñee nda. —Tei. Jësecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jëingo Dios isi turã. Eĩ jenyee mose, Dios rimba tuchi ra jē cote, i que Jesús ra.

Acuanĩdu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatusa turãte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. ²⁰ Dios cheẽ ereicuate resẽ: "Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Erecehẽ ñooño chĩ nda emo nii. Ndeturã ño nderu je. Ndeturã ño ndesi abe je", i que Dios cheẽ nda, i que Jesús ñee ererecua je ra. ²¹ Ererecua que ñee ndei Jesús je ra. —Ūquĩ ngue amumbayã ja bei quia ra. Señetẽ mosenda bei, i rei que ererecua ra. ²² Jesús eandu mose que ñee ee ra. —Mbae mii mo abe eresaã eãte. Ñ abe esaã. Nembae

emondo mondo ja mbia mbaecha reã je. Nde ũquĩ naa mose, mbae tubiriã nda nde, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²³ Ererecua Jesús cheẽ andu mose que echosoi oso serĩte cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacua ibate Dios rese. ²⁵ Sã ticuas mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶ —¿Aba quia ra oso Dios rea re no? i que mbia Jesús je cote ra. ²⁷ Jesús que ñee ee ra. —Ae mbia saã aroneãte quia nae, Dios miñ ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ee ra. ²⁹ Jesús que ñee ee ra. —Emo umbae recha ja mose Dios rĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguiĩ secha. ³⁰ Ũquĩ mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹ Jesús que ñee icúee uchimbuaquiato doce je ra. —Co nandeso quia Jerusalén co. Ae Dios cheẽ mbuchecuasa mbesa mbesa quia serĩ nyii nae, ũquĩ nda io ja cote. ³² Mbia ra semee judíos eã je cote. Mbia ra secheẽ naa naa. Ñee icua tuchi ra seje. Ninimbu nimbu ra serese. ³³ Seiruã nua ndae. Seiquia ra cote. Tres nyaashĩ mose ra aquera si, i que ñee ee ra. ³⁴ Echimbuaquiato que echeẽ icuayãte ra. —¿Mbae rĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷ —Co Jesús coi quia co. Nazaret jenda coi quia co, i que emo eresayã je ra. ³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jẽ! i que eresayã ñee Jesús je ra. ³⁹ Ae rane nyoĩ quia, ũquĩ ngue ñee ndei eresayã je ra. —¡Equiriri chõ jẽ! i rei que ee ra. —Jesús, ¡ndeya eã ño serese jẽ! i bei bei que Jesús je ra. ⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩchã cote ra. ⁴¹ —¿Mañi ae ra ndeje re? i que Jesús ñee ee ra. —Serese embuturã na, Sererecua, i que eresayã nda. ⁴² Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguiã, i que Jesús ee ra. ⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã

turã tuchi que equia Dios rĩ cote ra. Ae mae erese nae, ũquĩ abe que ñee turã ja quia Dios je cote ra.

Taico nderese, i Zaqueo Jesús je

19 Jesús que ngasẽ Jericoo cote ra. Sucha tubiriã ite rĩ ngue esi quia ra. ² Mbia mbaecha mo ngue siqui ee huee ra. Zaqueo, i que ee ra. Aba mbĩrĩ rĩsa que ae ra. Impuestos isi isiquia rerecua que ae ra. ³ —Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. ⁴ Zaqueo que oso uchã Jesús nonde ra. Nyui que oso ira mo ñi nda. Jesús ucuã rese mae sacua. ⁵ Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. ⁶ Zaqueo que nguichi asi u cote ra. Eyate que Jesús rerao uchuchúaa ra. ⁷ Mbia que ñee ñee tuchi Jesús rĩ cote ra. —¿Mbaerã Jesús si quia mbia icua nyuchúaa aque re? i tuchi que mbia ñee nda. ⁸ Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩ mondo sacua mbia mbaecha reã je. Ae asirõ ñooño mbia si nae, ũquĩ tambuchebibe ee. Eata tambuchebibe ee, cuatro veces, i que Zaqueo Jesús je ra. ⁹ Jesús que ñee ee cote ra. —Arerirõ ngue mbae icua si namo nda. Judiote quiatu nde re. ¹⁰ Quiachã je requia chõ achu nguiã ibate si co. Quiachã je mingo bei sacua abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

¹¹ Mbia que Jesús cheẽ ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguiã ee. ¹² —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. ¹³ Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “¿Mbae isiquia jembaata ata oso quia. Sechu mose chee”, i que ngũimba je ra. ¹⁴ Sã hue jenda mbia aque ucuayãte no. Comisión ngue emondo ra. “Aque urebiãte urererecuarã”, i rei que comisión mondo ra. ¹⁵ Gobierno ngue emi mbei chõ ererecuarã nda. Nyebe uba bei u nguiã uchuchua cote. Ngũimba je que ñee cote ra. Ũquĩ diez. Ae je eriqui mbae isiquia mondo nae, ũquĩ. “¿Sechimee mbae isiquia jembaata ata rei re?” i jaaja que ngũimba je ra. ¹⁶ Erimba mo ngue ñee ee ra. “Ae. Aque miñ ngue ereme ndei seje nyii, ambaatate que se cote ra. Diez que cote ra”, i que nguerecua je ra. ¹⁷ Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rere-

cuarã nda nde cote”, i que ererecua ngũimba ñiinda je ra. ¹⁸ Erimba nongue que tu ñee ee cote ra. “Aque miñ ngue ereme e ndei seje nyii, ambaatate que se cote ra. Cinco que cote ra”, i que nguerecua je cote ra. ¹⁹ Ererecua que ñee ae abe je no nda. “Eno. Cinco pueblos rerecuarã nda nde cote”, i que aque ngũimba je ra. ²⁰ Erimba nongue que tu ñee ee cote ra. “Co nembae mbae isiquia co. Tiru ye que areco bei ra. ²¹ Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguiã ndeje”, i que aque nguerecua je ra. ²² Ererecua que paama i tuchi ñee ee ra. “Serimba icuã tuchichĩ nde re. Nde sĩ chõ erecheẽ nguiã sembi-irandu. ‘Nembae que ambaata eãte ra’, ere chõchĩ. ‘Areco quiatuchõ ño nguiã’, ere chõchĩ. Se ngueteã mose mbae rese ndeje ¿mbaerã secheẽ eremumba re? ²³ ¿Mbaerã sembae mbae isiquia eremondo eã banco re? Ñ nda ñimbaata jiri rei seje”, i que ererecua ñee asi aque ngũimba je ra. ²⁴ Ae chi huee, ùquĩ je que ererecua ñee nda. “Ae sembae quereco chooño nguia nae, jësirõ na esi. Ae diez quereco quia nae, aque je jemondo”, i que ererecua ra. ²⁵ Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua je ra. ²⁶ Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi. ²⁷ Seucuãyãsa jendu ja rã. Ae ñee nguia serĩ. ‘Aque urebiãte urererecuarã’, ae i quia serĩ. Ùquĩ jendu ja. Ùquĩ jëiquia ja sésaa”, i que ererecua ra, i que Jesús ñee mbia mbaaquiato ra.

Jesús ngasẽ Jerusalén

²⁸ Jesús cheẽ jare que ngata si Jerusalén icha rui ra. ²⁹ Jerusalén ndurubite que echoi ngasẽ nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chĩ huee ra. Monte de los Olivos, i que ee ra. Hue si que uchimbaaquiato nyeremo mondo cote ra. ³⁰ —Aichi súchaa chõ jëso rã. Burro riirĩ cuasa ra chĩ jëje hue. Ae ato emo nyui ãte. Jenyura seru seje. ³¹ “¿Mbaerã nda jenyura re?” i mose emo jëje, jeñee ee. “Nandererecua que jendu i ra”, jenyee ee, i que Jesús ùquĩ nyeremo mondo ra. ³² Nyoi que súchaa ra. Ae riñ Jesús ñee ee nae, ùquĩ ngue nyecua ja ee cote ra. ³³ Burro riirĩ ngue etea ra. Era mose que echa ñee ee ra. —¿Mbaerã jëingo era era re? i que ee ra. ³⁴ Jesús chimbaaquiato que ñee ee ra. —Nandererecua que jendu i ra, i que echa je ra. ³⁵ Burro riirĩ ngue ecuruchoi Jesús je cote ra. Echimbaaquiato que huĩrao chono ñono burro arõ nda. Mbia que Jesús mbuchui burro ato cote ra. ³⁶ Jesús ngata mose burro ato, mbia que huĩrao mbiitee ee ibi rĩ nda. Jesús nonde. Jesús oso sacua hue rĩ. ³⁷ Jesús quiato tubiriã

tuchi que nyoi quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra. ³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. Dios turã tuchite nande je, i que mbia ia tuchi ra. ³⁹ Fariseos mo abe que chi huee ra. Ùquĩ ngue ñee ndei Jesús je ra. —Ndechimbaaquiato embaasẽ asẽ eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose serĩ, eĩ ndei ra sita ñeemombo mombo serĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuete que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbiasa ereicuayã mbei chõchĩ nguia co. Echecuayã mbei chõ eriquichĩ ndeje co. ⁴³ Mbae rasi ra eresaã tuchi cote. Ndeucuãyãsa ra nderiquisã tuchi cote. Nemama nda ecuaẽ. ⁴⁴ Sucha ra embucoi ja ndeyenda. Sitara embucoi ja tuchi mbia chuchua si. Mbia ra mano ja ndeyenda cote. Dios quiatu ngue ereisiã mbeite nguiã. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mondo abe mbae isiquia ribishorõ. Jesús que ùquĩ mombo ja Dios chuchua si ra. ⁴⁶ Jesús que ñee mbia je ra. —“Mbia cheẽsa Dios je’, i ra mbia Dios chuchua je”, i que embesa ji ra. Jë nguia jëicuã tuchite Dios chuchua je re. Mbae mbuquiachãsa chuchuarã ño jësaãte chĩ nguiã Dios chuchua je, i que Jesús ùquĩ je ra. ⁴⁷ Jesús que mbia mbaaquiato quiato bei quia Dios chuchúaa ra. Ererecua cuabẽte que mae icuã icuã nguia erese ra. Sacerdote rerecua. Embesasa abe no. Mbia rerecua ja. Ùquĩ ererecua ja que ñee ñee nguia nyue ra. —¿Mañi nande ra equia Jesús iquia sacua nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbia tubiriãte quiato que Jesús chandu quia ra.

¿Aba nembu re? i mbia ñee Jesús je

20 Emo mose que Jesús riqui mbia mbaaquiato quiato Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no. ² Ùquĩ ngue ñee ja Jesús je ra. —¿Mbaerã ereico mbia mbaaquiato quiato re? ¿Aba “mbia embaaquiato quiato” i ndeje re? i que ererecua ja Jesús je

ra. ³ Jesús que ñee ee ra. —Se rane tacheẽ jêje. Se rane preguntar tae jêje. ⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee seje, i que Jesús ee ra. ⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jëingoãte erui re no?” i quiarei ra nande je. ⁶ “Dios eã ngue embu ra”, nande aroneate no. Mbia ataque ra paama i tuchi nande je. Nandei ei ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra. ⁸ Jesús abe que ñee ee cote ra. —Se abe ra acheẽ eã jêje no. Aba chõ “ã esaã” i se-je. Acheẽ eã nda jêje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiato quiato cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jësaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ùquĩ ngue eisi icuã tuchi ra. Ucuu ucuu que erese ra. Eochi que emondo mbuchebi ra. ¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucuu que aque abe rese no nda. Eochi que emondo mbuchebi ra. ¹² Echa que emo abe mondo rei ra. Aque abe que eiruã nua mondo mbuchebi no nda. ¹³ Echa ia eãte que ra. “¿Mañi ae ra se re? Seriiĩ quiato tamondo erea cote. Ùquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “¿Co eriiĩ ndu quia co cote jê! ¡Nandei quia rei jê! Ñ nda uvas nandembaerã ae cote”, i que ñee nyue ra. ¹⁵ Eraarõsa que eriiĩ querao pe jiri eiquia ra. Eriiĩ ngue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —¿Ùquĩ nda iquechĩ jê! i que mbia ra. ¹⁷ Jesús que mae erese ñee ee cote ra. —¿Ã embesa ji rese jemae ãte re?

Sã emo ndiqui tuchia ao sita je no.

Sã sita mo ndirirõ mombo no.

Eicuãte eriqui reĩ nguia ee.

Aquere Dios emundua si erese.

“Earonda sacua turambi chõ eriqui re”, i ndua si uchi-mombo rese.

Sã uchimombo rirõ si cote no, i que embesa ji ra. ¹⁸ Ae ra nyoĩ ngoĩ aque sita arõ nae, ùquĩ nda huẽ. Aque sita ngoĩ mose emo arõ, ùquĩ nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹ —Nanderiĩ ño Jesús riqui nguia ñee a. Nandei rei serao jê, i rei que sacerdotes rerecua ñee nyue ra. Embesasa abe no. Ùquĩ ngue paama i ja Jesús je ra. Jesús isi aronea tuchite que mbia résaa ra. Eireĩte quiatu ngue mbia tubiriã si re. ²⁰ Ererecua que mbia icuã mondo mondo quia Jesús cheẽ andu andu ra. —¡jêturã jësaã saã oso Jesús je jê! ¡Echeẽ ndese jenyiisaquia quiatu ure je jê! Mbae mo niĩ ñee icuã mose, ¡nandei rei jê! Ererecua tuchi je nandemondo cote, i ja que ererecua ñee nda. ²¹ Ae chi uturã naa naate Jesús je nae, ùquĩ ngue ñee ee ra. —Jesús, co ereico mbia mbaaquiato quiato turãte co. Mbia jaje ndeturãte riqui co. Mbia erembaaquiato quiato turãte quia Dios icha riĩ co. ²² Nyebe ureico nguia ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ²³ Jesús que ùquĩ icuã icuate ra. Nyebe ñee nguia ee. —¿Mbaerã jëingo “ĩ nda Jesús ucheẽ nyabi”, i seje re? ²⁴ Mbae isiquia mo jêteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua, i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra. ²⁶ Jesús que ucheẽ nyabi aroneate ee ra. Ùquĩ ngue nyuruirã jate u Jesús cheẽ andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ùquĩ mo ngue nyoĩ ñee Jesús je ra. ²⁸ —Ã ngue Moisés mbesa nande je ra: “Emo eriiĩã mano mose, ngũinisi recha mose, sã enongue mano je ninisi rerequia. Sã tiirĩ ngõngue raaque riĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngũinisirã quereco rei ra. Mano ño ngue tiirĩ ndocoĩ ngũinisi recha ra. ³⁰ Enongue que nguiqui checha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ùquĩ seis ja que ngõngue checha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru checha abe que mano ño nyee cote ra. ³³ Siete que eru nyii resẽ. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguia ngũinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae, ùquĩ nda ngũinisi quereco eã mbei huee

cote. Ūquĩ nda ngu quereco eã mbei huee cote no.
³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra riqui huee mose cote. Embuquerái quiatu ra cote. ³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “Se rei Dios. Abraham nderecua chõ aico nguiã co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ũquĩ ndese ra. ³⁸ Ūquĩ mano ndaque nyii. Ūquĩ ndeco siqui bei chõ nguiã ũquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguiã Dios je ã, i que Jesús ee ra. ³⁹ —Ndecheẽ turãte, i que embesasa mo ñee Jesús je ra. ⁴⁰ Ae “Jesús nandembĩcuã” i rei quia, ũquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jẽje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbasa Salmos no:

Dios que ñee Cristo sererecua je ra.

“Ecoi seji.

Nde abe ra ererecua serese.

⁴³ Ae ndeucuãyãte quia nae, ũquĩ je ra ndequirãcuã atecuquia tuchi.

Ndequirãcuã tuchi chee ra ũquĩ si”, i que Dios sererecua je ra,

i que David embesa ra. ⁴⁴ David si chõ “sererecua” i nguiã Cristo je. ¿Mañi nda David rucucha Cristo re? Jeñee ño seje, i que Jesús ũquĩ je ra.

Jesús ñee asi embesasa je

⁴⁵ Mbia ja résa que Jesús ñee uchĩmbaaquiato je cote ra. ⁴⁶ —¡Embesasa rã ño nda jẽingochĩ je! Ūquĩ ucuasu saã saã mbeite quia ã. Huĩrao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe bei equia ã no. ⁴⁷ Ari eru cheecha mbae abe embutiã tiã nguiã ã no. Ucheẽ oco abe esaã saã mbeite quia Dios je ã no. “ĩ nda mbia mae nanderese”, i chõ nguiã. Ūquĩ nda Dios mbasi tuchi cote, i que Jesús uchĩmbaaquiato je ra.

Eru cheecha mbaecha reã mo mbae mo mee Dios je

21 Jesús que nyoi nyoi quia Dios chuchúa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que siqui ra. Ae que centavos nyeremoño mondo ofrendarã nda. Mbaecha reãte quiatu ngue ae re. ³ Jesús que ñee nda. —Tacheẽ tuchi jẽje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha

quiato que umbae rire ñetẽ mondo mondo ra. Eru cheecha quiatu nbbbbknnnknnnnnnn gue umbae mii mondo ja nguiã, i que Jesús ra.

Mbia ra Dios chuchua mbucoi ja, i Jesús

⁵ Mbia que ñee ñee Dios chuchua turã nii nda. Tuchua mbarõ ji sita turã nii. Mbae aba queteamba riĩ abe no, Dios chuchua jenda. Jesús que ñee mbia je cote ra. ⁶ —Ae rese jẽingo mae nae, ũquĩ nda mbiamo mbutiã ja cote. Sita mo nda chi eã nyuchuarõ cote. Mbia ra tuchia mbucoi ja tuchi. Dios chuchua ra chĩ eã juã cote, i que Jesús ra.

Mbae ua ja nonde

⁷ —¿Manose ra ũquĩ nde? ¿Mañi ure ra equia irandu mbae ua nonde re? i que Jesús chĩmbaaquiato ee ra.

⁸ Jesús que ñee ee ra. —Jẽtesa jiri quia jẽ. Mbia ra jembiĩri iĩchĩ jẽ. “Cristo chõ se re”, i ra mbia ñee ata atate jẽje. “Co rei é co cote”, i ra mbia ñee ata atate jẽje no. Ūquĩ nda jeñanduchĩ. Ñeeñoño je chõ ũquĩ nde.

⁹ Mbia ra ñee ñee tuchi nyiiquia iquia je riĩ. Guerra riĩ abe no. Ūquĩ mose ra jẽsiquichechĩ jẽ. Ūquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiato ra.

¹⁰ —Mbia ra guerra saã tuchi chee. Nyiiquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei rĩ cote.

¹² Ūquĩ nonde ra mbia icuã icuã tuchi jẽ je serĩ. Nguerecua je ra mbia jenderao rao tuchi. Ererecua abe icuã icuã tuchi ra jẽje. Jẽtarõ tarõ tuchi ra serĩ. ¹³ Ūquĩ mose nda secheẽ jẽsenei senei tuchi mbia je chã.

¹⁴ ¿Manyae ra ũquĩ ñee ndibishorõ nde? jenyechĩ nda ñee ũquĩ nonde jẽ. ¹⁵ Se chõ nda jaembucheẽ turã nguiã aque mose. Nyebe ra jẽucuayãsa jeñee ndibishorõ aroneate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jẽquiato abe no. Ūquĩ nda jemo iquia chee no. ¹⁷ Mbia ra jẽucuayã tuchi serĩ. ¹⁸ Jẽsiquichechĩ nda esi. Jaendeaquiato tuchi ra aque mose. ¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riĩchã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ũquĩ nyebibe eã Jerusalén ndiĩchã aque mose. ²² Aque mose ra mbia mbae icuã ja irara tuchi huĩcuã nii. Embesa ji cheẽ nda ique ja aque mose. ²³ Aba mbia eã tuchi ra emo ãquẽ ndiru rerequia mose aque mose. Nguiĩri mbuquiambu je abe no. Mbia ra mbae rasi saã tuchi

aque mose. Mbae icuã nda irara tuchi huïcuã ñi.
²⁴ Aque mose ra mbia guerra raã tuchi. Mbia ra nyïquia iquia aque mose. Jerusalén jenda ra sasẽ tuchi aque mose. Mbia ra ecuruchoi choi tuchi tarõ isho. Judíos eã nda chi tuchi Jerusalén aque mose. Dios ra emondochoi chee hue si cote.

Dios riirĩ nda tube ibate si

²⁵ Mbia mae sayã ndese ra mbia mae tuchi ibei rĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae.

²⁶ Mbia chiã nda cuaãcuã i tuchi aque mose. “Mbae rasi ra nandesaã tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube íbii cote. Ibeishĩ ndese ra achu. Senininya tuchi ra achu. Sequirãcuã tuchi ra achu.

²⁸ Ûquĩ ndese jemae mose, jẽo jẽo tuchi aque mose jẽ. Dios ra jendirõ jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usẽ ja mose, “iraro itõ ndacu ra cote”, i chõ mbia nguiã aque mose cote.

³¹ Eĩ si chõ nda mbia mae mbae ja rese cote. Ûquĩ ndese mae mose, “achite Jesús ñi tu a cote”, jenyè rae. “Mbia rerecua tuchi ra Dios cote”, jenyè ra aque mose. ³² Ae siqui quia mbia aque mose nae, ùquĩ nda manoã mbae ua ja mose chee. ³³ Ibei ra ua. Ibi abe ra ua. Secheẽ nguia ra uayã mbei.

³⁴ Mbia ndua eã mose serese ra achu cote. Ibi jenda ja ra ambua tuchi u. Jẽ nguia seraarõ arõ mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ûquĩ icuã ndese jẽingo mose, jaembuate ra u. ³⁶ Jẽtesa bei quiatu quia serese. Jeñee mbei quiatu quia Dios je. ã mbae icuã jeĩ eã sacua jẽje. Jẽingo turã sacua serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiato quiatu Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbia riqui ngaẽ ngaẽ ja bei echeẽ andu ra. Dios chuchúaa.

Jesús nandeisi tarõ, i ja mbia rerecua ñee nyue

22 Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia eiquia nonde re? i que equia ñee ñee nyue ra. Eireĩte que eriqui mbia tubiriã si ra. ³ Judas Iscariote, i que Jesús chimbbaaquiato mo je ra. Satanás que ique aque chiangui re cote ra. ⁴ Nyebe aque si nguiã ñee sacerdotes rerecua je. Dios chuchua raarõsa je abe no. —Jesús tamondo jẽje. ¿Mañi nande ra equia ee re? i que Judas ñee ee ra. ⁵ Ûquĩ iate que Judas ñee

mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbia ñee mose ee ra. —Jesús tamondo rã jẽje mbia tiãsaa, i que ñee nda.

Jesús quiaru uchimbbaaquiato rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra. Juan abe je. —Jẽso oveja mbuchi nande je, i que Jesús ee ra. ⁹ Ûquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jemae. I ra equerao quia irasa mo ye. Aque rui jẽso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbbaaquiato rese’, i que Jesús ñee ndeje ra”, jenyè tuchuacha je. ¹² Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiato sacua, i que Jesús ñee ee ra. ¹³ Pedro que nyoĩ cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbbaaquiato rese quiaru sacua cote ra. ¹⁵ Jesús que ñee ee ra. —Co oveja que ause tuchi quia jendese semana nonde ra. Co mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Ñee ngue uchimbbaaquiato je cote ra. —Co jẽisi. Jembe jaaja jẽ. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que Dios je ra. Siquio que mbuchao chao ee cote ra. Ñee ngue ee cote ra. —ã ndei serete rã ã. Serete ra mano jẽje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —ã ndei seruqui rã ã. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. ²¹ Ae ra semee mbia icuã je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icuã je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbbaaquiato que mae jaaja nyiese ra. —Aba tuchi ra emee mbia icuã je reae, i ja jate que nyue ra.

Jesús chimbbaaquiato mbia rerecua saã saã tuchi nyue

²⁴ Aquere que Jesús chimbbaaquiato ñee icuã icuã tuchi nyue ra. —Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ùquĩ.

²⁶ Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae eaquiato jiri jemo nae, sã ũquĩ ndiqui uñetẽ naa naa ño. Sã ũquĩ ndiqui tochei chõ nguia. Ae ererecu jemo nae, sã ũquĩ ndiqui ererecu rimba rã tuchi chõ. ²⁷ Ererecu ngoi chõ nguia. Erimba mbae mee mee ño nguia ee. Eĩ eã ño se re. Se quia mbae amee mee nguia jẽje co.

²⁸ Jẽ nguia ngue jẽingo beite nguia serese. Se mbae icuã irara tuchi mose. ²⁹ Nyebe ra jaemii tuchi mbia rerecuarã. Sã seru semii tuchi mbia rerecuarã no. ³⁰ Jẽingo tuchi ra serese, se ererecu tuchi mose. Jẽquiaru ra serese. Mbae mo abe ra jembei serese no. Israel ndiirĩ nderecu ja ra jẽ. Judíos rerecu ja ra jẽ, i que Jesús ee ra.

Jesús aicuayãte resẽ, i ra Pedro serĩ, i Jesús

³¹ Jesús que ñee Pedro je cote ra. —Simón, Satanás que ñee jenii nda. “Ndechimbaaquiato emee na seje. Tã tae rã ee. Ma siqui beite Dios rese”, i rei ngue Satanás jenii nde. ³² Acheẽ tuchite que Dios je nderĩ nda. Nde Dios icua tuchi sacua. Nde ubabe mose serese, nderesenda abe je echeẽ emingo sacua serese, i que Jesús Pedro je ra. ³³ Pedro que ñee ee ra. —Sererecu chõ nde re. Aico bei ra se quia nderese. Mbia nda sematã ndei nguia. Mbia nda sei quia rei nguia nderese, i que Pedro ra. ³⁴ Jesús que ñee ee ra. —Tacheẽ nyecua ndeje, Pedro. Ngaira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús Pedro je ra.

Embasa ji chee nda ique ja serĩ cote, i Jesús

³⁵ Jesús que ñee uchimbaaquiato je ra. —Jaemondo que mbia mbaaquiato quiato sacua nyii, jëochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jëiyao eã abe no. ¿Aque mose mbae eãte jẽje re? i que Jesús ee ra. —Tei. Urembae tubiriãte que ra, i que echimbaaquiato ñee Jesús je ra. ³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huĩrao ribishorõ ae. ³⁷ Sã embasa ji riqui ñee serĩ no. “Mbia icuã ndese ra Dios ririĩ mingo chee”, i. ũquĩ nda ique cote. Embasa ji cheẽ nda ique ja tuchi serĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbaaquiato echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiato que nyoĩ erese ra. ⁴⁰ Ngasẽ mose que ñee uchimbaaquiato je ra. —Jeñee tuchi Dios je. Satanás tã i eã sacua jẽje, i que Jesús ñee ee

ra. ⁴¹ Jesús que oso pe quiti jiri esi ra. Ngoi que ngũĩã ndese ñee Dios je ra. ⁴² —Paba, ndebi mose sereaquiato se, mbae rasi raã eã sacua. Ae sebite nae, ũquĩ esaã eã seje. Ae ndebite nae, ũquĩ nguia esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcuã sacua. ⁴⁴ Jesús ia eã tuchite que ra. —Mbae rasi ra asaã tuchi chõ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia íbii ra. ⁴⁵ Jesús ñee jare Dios je que juã cote ra. Uchimbaaquiato rea que esi ra. I que u uque ee ra. Eya eãte quiato ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacua jẽje, i que Jesús ee ra.

Mbia Jesús nyucua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbaaquiato raque que ae ra. Ae que Jesús siichã u eritii riite sacua nda. ⁴⁸ Jesús que ñee Judas je ra. —¿Ereico seritii riite mbia icuã je sereacuquia sacua a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecu, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru sacerdote rerecu rimba rese ra. Eisa sia. Eisa equiatocuti quitinda. ⁵¹ —Jëhui esi ae. Coche ñene, i que Jesús ee ra. Oco que eisa rese embucherõ nda. ⁵² Jesús rerao sacua ño mbia ngaẽ nguia reaẽ. Sacerdotes rerecu. Policía abe no. Judíos rerecu abe no. Nyebe Jesús ñee nguia ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co. ⁵³ Tenda que amumba mumba beite rei quia jendese resẽ. Mbia mbaaquiato quiato Dios chuchúaa resẽ. ¿Mbaerã jẽingo seisiã secua aque mose re? Isa chõ jenyuchĩ serea co, mbia mae eã sacua jendese. Itondaru rĩnda chõ jẽ nde, i que Jesús ee ra.

Jesús aicuayãte resẽ, ichõĩño Pedro

⁵⁴ Mbia que Jesús isi nyucua cote ra. Sacerdotes rerecu chuchua que eruruchoi cote ra. Pedro que oso quia ishote erui ra. ⁵⁵ Itaicuee que mbia tata mbucha ra. Huee que echi ngoi tata jii ra. Pedro abe que ngoi embirõ nda. ⁵⁶ Nyucuaaque mo ngue chĩ mae nguia tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷ Pedro que ñee ee ra. —Tei. Jesús aicuayãte resẽ, ichõĩño ngue Pedro nyucuaaque je ra. ⁵⁸ Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõĩño ngue Pedro ee ra. ⁵⁹ Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra. ⁶⁰ Pedro que ñee ee ra. —Tei. Ndecheẽ aicuayãte resẽ,

ichõĩño ngue Pedro ee ra. Pedro cheẽ mose tuchi que nguira ñee cote ra. ⁶¹ Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñooño tres veces serĩĩ, sã Jesús i Pedro je nyii no. ⁶² Pedro ndua mose ũquĩ ndese que esi nyeseo pe jiri ra.

Mbia iquia chooño Jesús je

⁶³ Ae Jesús isi miĩ nae, ũquĩ ngue iquia iquia tuchi u Jesús je ra. Ucuu ucua tuchi que u erese ra. ⁶⁴ Jesús resa abe que echati ra. Eruba rese que ucua ucua tuchi ra. —¿Aba ucua ucua quia nderuba rese a re? i abe que equia Jesús resa ati ji je ra. ⁶⁵ ũquĩ miĩ eã ngue eriqui ñee ee ra. Mbae ja rĩĩ ngue embuqueta ra.

Mbia Jesús ruruchoi ererecua chumunua mose

⁶⁶ I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. ũquĩ ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷ —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jẽje, “nyia”, jenyẽ ãte ra secheẽ mose. ⁶⁸ Se abe preguntar i mose jẽje mbae mo niĩ, jeñee ãte chõ nda secheẽ ndibishorõ. Jẽhui eã abe ra sesi no. ⁶⁹ Namu jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰ Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra. ⁷¹ Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

Mbia Jesús ruruchoi Pilato je

23 Judíos rerecua que juã ja cote ra. Jesús que ecuruchoi Pilato je cote ra. ² ũquĩ ngue ñee icuãte Pilato je Jesús rĩĩ nda. —Jesús que mbia mbaaquiату icuã icuãte quia ra jẽ. “Impuestos ra jemee meechĩ mbia rerecua je”, i chõ ngue equia mbia je ra jẽ. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩĩ nda. ³ —¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴ Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate erĩĩ, i que Pilato ra. ⁵ Judíos que ñee asite ee ra. —Jesús riqui mbia mbaaquiату icuã icuã tuchi co. Mbia mbesa chooño. Judíos mbaaquiату icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguia Herodes je. Galilea jenda rerecua quiatu ngue Herodes re. Herodes que siqui Jerusalén aque mose ra. ⁸ Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguia mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. ũquĩ ngue ñee icuã icuãte quia Jesús rĩĩ nda. ¹¹ Herodes que iquia iquia chõ nguia Jesús rĩĩ nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mondo Pilato je cote ra. ¹² Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jẽiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jẽ ngue Jesús jendu rei seje ra. “Mbia mbiĩĩ irĩsa chõ Jesús re”, jenyẽ rei que seje ra. Acheẽ ocote rei que ee jẽsaa ra. Ae jeñee ndei seje nae, ũquĩ icuã mo eãte seje Jesús rĩĩ. ¹⁵ Herodes je abe mbae icuã mo eãte Jesús rĩĩ. Herodes que Jesús mbube chõ nande je ra. ¿Mbaerã nda nandeiquia re? Mbae icuã mo ngue esaã eãte resẽ. ¹⁶ Tairuã nua ño. Aquere tambui mondo, i rei que Pilato ñee mbia je ra. ¹⁷ Pascua mose bei que Pilato riqui mbia matã ji miĩ mbui bei ra.

¹⁸ Mbia que tasẽ tasẽte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra. ¹⁹ Barrabás tarõ ji que chĩ nda. Mbia iquiasa tuchi que ae ra. Romanos nderecua je abe que eicuã icuã tuchi riqui ra. ²⁰ —Jesús quia tambui, i rei que Pilato ñeembe mbia je ra. ²¹ —Jesús embucha ira rese, i tuchi que mbia quia tasẽ i i ra. ²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacua. Tairuã nua ño. Aquere tambui mondo, i rei que Pilato ra. ²³ Mbia que ñee mombo mombo tuchite ee ra. —¡Eiquia jẽ! ¡Ira rese embucha jẽ! i tuchi que mbia quia tasẽ tasẽ ee ra. Sacerdotes rerecua abe que tasẽ i ite ra. Eno i chee que Pilato cote ra. ²⁴ Pilato que mbia cheẽ mumbayã nyee ra. ²⁵ Pilato que Barrabás mbui mondo cote ra. Mbia iquia iquiasate

raque ae. Ñee icuã icuãstate raque ererecua je. Pilato que Jesús mee mbia je cote ra. Eiquia sacuã.

Mbia Jesús mbucheseco ira rese

²⁶ Soldados que Jesús curuchoi eiquia sacuã cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchicuasanda ji rerao sacuã Jesús rui. Cruz, i equia ee. ²⁷ Mbia tubiriã ngue nyoï quia eruï ra. Cuña abe tubiriã. Ūquï ngue nyoï quia tasë tasë tuchi nyeseo erese ra. ²⁸ Jesús que uba mae ñee ee ra. —Cuña, jenyeseochï nguiã serese. Jenyiese quia jenyeseo. Jendiirï abe rese quia jenyeseo, Jerusalén jenda.

²⁹ Mbae icuã nda tuutu tuchi jëje cote. Ae eririñ nderecua nae, ūquï nda mbae rasi saã tuchi aque mose cote. Aque mose quiatu bichï mbia ririñ eã ja mbite re. Mbae icuã tuchite quia nda aque mose cote re.

³⁰ “Amano ño mbichï se”, i tuchi ra mbia aque mose cote. “Sita ibate tu chõ mbichï seati”, i tuchi ra mbia aque mose cote. ³¹ Se chee mbia riquichï sembasi mbasi a. Seicuã eã ndaque se. Mbia quiatu ra mbae rasi saã tuchi huïcuã ni cote, i que Jesús ñee nda.

³² Soldados que mbia icuã nyeremo curuchoi Jesús rese eiquia sacuã nda. ³³ Ngasë ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Ūquï mbia icuã abe que embucha ira rese ra. Enongue que emi Jesús quiatocuti ra. Equiatocutiã ngue enongue mi no nda. ³⁴ Mbia Jesús mbucha mose ira rese que Jesús ñee Dios je ra. —Paba, ã icuã embutiã esi. Ñimbaaquiatuãte equia sei quia ã, i que Jesús Dios je ra. Soldados que sita ñetë mbaaba aba o je ra. —Aba ra ja. Aba mbaerã nda Jesús irao reae, i que nyue ra. ³⁵ Mbia que chi ja tuchi mae erese ra. Ererecua abe chee que chi iquia iquia Jesús je ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eï ãte ndechue nde abe re? Dios ririñ nde reaë, i que ererecua u iquia iquia Jesús je ra. ³⁶ Soldados abe que iquia iquia chõ nguia ee ra. Vinagre chiquino ngue emee ndei ee echimbei sacuã nda. ³⁷ —¿Mbaerã ereico nguichi ãte ira si nde ae re? Judíos rerecua rei nde reaë, i que soldados iquia iquia Jesús je ra. ³⁸ Mbia que embesa ji mi Jesús ãquï quiti ibate ra. *JUDIOS RERECUA CHÕ CO RE*, i que embesa ji huï nda. Griego cheë. Latín ñee abe no. Hebreo cheë abe no.

³⁹ Ae mbia icuã mbucheseco ji chi Jesús rese nae, ūquï mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios ririñ nde reaë, i que ūquï mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ūquï Jesús je re? ¿Ndesiquiche ãte eriqui Dios si re? Ereico mano Jesús rã si a resë.

⁴¹ Nandeico mano nandeicuã ni a resë. Jesús quiatu

que mbae icuã saã eãte rei resë, i que enongue ñee ee ra. ⁴² Aque sí que ñee Jesús je cote ra. —Jesús, endua serese nde ererecuarã mose, i que ñee Jesús je ra.

⁴³ Jesús que ñee ee ra. —Tacheë nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chï mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyeseo chee. Tres horas que ra. ⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecua que mae tuchi huï erese ra. Ae que ñee turã Dios riñ cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chi quia mae ja erese nae, ūquï ia eã tuchi que nyoï quia uchiã isi cote ra. ⁴⁹ Mbia Jesús chiicua ja que chi isho mae erese ra. Ae cuña nyoï beite quia erese Galilea si nae, ūquï abe que chi isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae ra. ⁵¹ José ia eãte que ererecua ataque rese Jesús iquia mose ra. Ae que Dios quiatote ra. —Dios ra ererecua, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que ema nda. Sita ribicoi ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiato ja quia sábado nonde ra. ⁵⁵ Ae cuña nyoï beite quia Jesús rese Galilea si nae, ūquï ngue nyoï sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoi uchuchua ra. Aba mbushimbusa que esaã nyoï ra. Sábado mose que ūquï uquenea ucuã cote ra. Dios cheë si.

Jesús raaque quera si

24 Isamamimbe tuchi que cuña nyoï domingo mose sita imi ndese mae nda. Aba mbushimbusa que ecuruchoi rei eichusë chusë sacuã Jesús raaque rese ra. Cuña mo abe que nyoï quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoï sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chi juã ee ra. Eirao nininya tuchi que chi ee ra. ⁵ Cuña ngue titi titi i tuchi u ra. Nyebe echï nguiã nyibi beite. Angeles que ñee ee ra. —¿Mbaerã jëingo Jesús raaque requia requia a re? Quera si que resë. ⁶ Emoate a resë. Quera si que resë.

Sã ñee jêje siqui mose Galilea no. ⁷ “Mbia icuã nda seisi iquia. Sembucha ra ira rese. Tres días mose ra aquera si”, i que jêje nyii resê, i que ángeles ñee cuña je ra. ⁸ Ūquĩ ndese que cuña ndua cote ra. ⁹ Cuña ngue nyebi cuaẽ mbia mbiirandu ja cote ra. Jesús chimbaaquiato once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochĩ Jesús chimbaaquiato cuña ñee mose ee. Cuña ñee ñooño nei nguiã ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chi ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiato nyeremo nyoĩ quia aque mose ra. Emaús quiti que echoi quia ra. Dos leguas que Jerusalén si ra. ¹⁴ Ūquĩ ngue nyoĩ quia ñee ñee nyue ra. Jesús mano ñi. Jesús raaque oreã ñi abe no. ¹⁵ Ūquĩ ñee ñee ndiichã ngue Jesús si ra. Erese que Jesús si quia ngata cote ra. ¹⁶ Ūquĩ ngue mae ndei Jesús rese ra. Icuã eãte chõ ngue ra. Mbiamo nda eriqui reĩ ee raẽ. ¹⁷ Jesús que ñee nyee ee ra. —¿Mbae riĩ jẽingo ñee nyue ã nde? ¿Mbaerã jẽya eãte riqui re? i que Jesús ñee ee ra. ¹⁸ Ūquĩ mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde mĩ ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ūquĩ ngue ñeembe ee ra. —Jesús rese. Nazaret jenda rese. Dios cheẽ nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados eiquia nguiã mbucha ira rese cote. ²¹ Israel jenda rerecua reĩ nda ure je. Tres días chee namo cote emano mosenda bei. ²² Uresenda cuña mo ngue ñee uremundi tuchi ra. Ūquĩ ngue nyoĩ rei eatísaa nyaashĩ namo mose ra. ²³ Jesús raaque oreãte nda ee ra. Nyebe euaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que ureresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiato que mae eã nda, i que Cleofas ñee Jesús sí je ra. Jesús eã nda eriqui reĩ ee raẽ. ²⁵ Jesús que ñee ee cote ra. —¿Mbaerã jẽaquiataite riqui re? ¿Mbaerã jẽingo Dios cheẽ icuayãte re? ¿Mbaerã jẽingo Dios cheẽ nenei neneisa chimbesa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheẽ mbuchecua ja ee cote ra. Ngasi riĩ. Umano ñi abe no. Uquera riĩ abe no. Moisés chimbesa que embuchecua

ee ra. Aquere que Dios cheẽ nenei neneisa chimbesa abe mbuchecua ja ee ra.

²⁸ Ngasẽ ngue ūquĩ nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ūquĩ eriquisã nda. —Eitõ ureresee aa ae. Tenda osote resê. Itondarute ra ndeje resê, i que ñee ee ra. Nyebe Jesús ique nguiã echuchúaa erese. ³⁰ Ngoi ja que quiaru nonde cote ra. Jesús abe que ngoi erese ra. Mbichae que esirõ o je cote ra. Gracias i que Dios ibatenda je mbichae riĩ nda. Mbichae que esiquio mondo ee cote ra. ³¹ Ūquĩ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ūquĩ ngue ñee ñee nyue cote ra. —Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equia ñee ñee nyue ra. ³³ Nyebe echoi jei nguiã nyebi si Jerusalén. Huee que Jesús chimbaaquiato chi ñumunua ee ra. Eresenda mo abe rese. ³⁴ Ūquĩ ñumunua je que ñee ee ra. —Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ūquĩ nyeremo ñee mbia chumunua je cote ra. —Jesús rese que uremae ñeenda cúa ra. Urembaaquiato quiato que umano ñi nda. Uquera riĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbaaquiato je

³⁶ Ūquĩ ñee ua eã mose que Jesús nyecua ee ra. Mbia ite re. —Jẽya chõ serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raẽ. ³⁸ Jesús que ñee ee ra. —¿Mbaerã jẽsiquichete riqui re? ¿Mbaerã “Jesús chõ eriqui re” jenyee eã seje re? ³⁹ ¡Sã jẽ! Jemae seo rese. Jemae sei abe rese ae. Jẽoco serese ae. ¡Sã se si chõ jẽ! Aba checuayã nguia eroo eã nde. Equiangue eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. —¿Mbae mo ndei eu sacua aa re? i que ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ūquĩ ndésaa cote ra.

⁴⁴ Jesús que ñee ee cote ra. —Sã acheẽ jêje seico mose jendese nyii no. “Ae Moisés mbesa serĩ nae, ūquĩ nda ique ja serĩ cote. Dios cheẽ nenei neneisa chimbesa abe ra ique ja cote. Salmos ndesenda cheẽ abe ra ique ja serĩ cote”, ae que se quia jêje nyii. Ūquĩ ngue ique ja semano mose cote ra. Sequera mose abe no, i que Jesús ñee ee ra. ⁴⁵ Dios cheẽ ngue embuchecua checua ee cote ra. ⁴⁶ Jesús que ñeembe ee ra. —Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si.

⁴⁷ Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. 'Jẽicuã si jẽhuĩ rã. Cristo jẽicuã mbutiã sacuã', i tuchi ra mbia ja je Cristo rĩĩ cote", i que embesa ji quia nae. ⁴⁸ Ũquĩ ique quia ã cote. Jemaẽ nguia erese ã cote. ⁴⁹ Ae je Paba ñee jẽje nae, "Espíritu Turã tamondo jẽje", i equia jẽje nae, aque tamee jẽje cote. A jenguchõ na Jerusalén. Paba ibatenda uquirãcuã mee nyee jẽje, i que Jesús ñee uchimbãaquiatu je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbãaquiatu je cote ra. —Sã Dios jendeaquiatu turã, i ee. ⁵¹ Aque mose tuchi que Jesús si nyui ibate erecha cote ra. ⁵² Ũquĩ ngue ñee turãte Jesús rĩĩ nda. Eya tuchi que nyebi nyoĩ Jerusalén nda. ⁵³ Dios chuchua que eriqui bei nyoĩ ñee turã Dios rĩĩ nda. Amén.

SAN JUAN

Jesucristo rane ngue siqui nyii ra

1 Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemingosa chõ nanderesae nguiã ã. ⁵ Nandemingosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. Ì nda mbia aba resaesa icua ja, Juan ñee nguire. ⁸ Aba resaesa eã ño Juan nde. Emo nii ño Juan ndiqui nguiã ñee. —Ae chõ nanderesae nguiã co, i que Juan nda. ⁹ Aba resaesae que tu ibi cote ra. Aba resaesa chooñoã tuchi que ra. Ae chõ aba resae ja nguiã ã. ¹⁰ Aba resaesa que siqui íbii cote ra. Mbia que eicua eãte chõ nda. Mbae aosa ja raque ae. ¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã. ¹² Mbia mii mii ño ngue eisi turã turã nguiã. Mbia mii mii ño ngue eicua icua nguiã. Ûquĩ je quia Dios riqui nguiã “seriirĩ” i. ¹³ Mbia riirĩ na eã ño Dios riirĩ ndiqui nguiã nyaacuquia cuquia ã. Ìquẽ nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngũinisi rese embiirĩ nae, Ûquĩ na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁴ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eaturã tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁵ Juan ngue Jesús senei senei nguia mbia je ra. —Co riĩ ngue acheẽ jẽje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jẽje resẽ. Ae siqui co cote, i que Juan mbia je ra. ¹⁶ Jesús turã tuchi que ra. Nyebe eriqui nguiã mbae turã mee mee mbei nande je. ¹⁷ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁸ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús riĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo erea. Levitas mo ndese. —¿Aba nde re? i sacua Juan je. ²⁰ Juan ngue ñee nyecua tuchi ee ra. —Christo eã ño se re, i que ee ra. ²¹ —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecuasa ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²² Judíos chimondo que ñeembe Juan je ra. —Ndecheẽ embuchecua ure je. ¿Abate nde re? Ì nda ndecheẽ uresenei Ûquĩ je, ae urembu. ¿Mañi ure ra nderĩ nde? i que Juan je ra. ²³ Juan ngue ñee ee ra. —Tacheẽ jẽje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbese rui si chõ Juan ñee nguiã.) ²⁴ Ae ñee ñee nguia Juan je nae, Ûquĩ ndei fariseos chimondo Ûquĩ. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecuasa eã ño nde resẽ, i que Juan je ra. ²⁶ Juan ngue ñee ee ra. —I je chõ aico nguiã bautizar i. Emo nguia siqui raque quia jẽite re. Aque quia jẽicuayãte nguiã co. ²⁷ Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee. ²⁹ Isamamĩ nongue que Juan mae Jesús rese ra. Jesús que tu quia Juan ndichã nda. —Co mbia icua ndiquicharõ sacua ndu quia co. Oveja riirĩ na eriqui Dios je. Ae ra nandeicua mbutiã nandesĩ. ³⁰ Erĩ ngue aico ñee jẽje. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae que se quia jẽje. Co chi eru quia co cote. ³¹ Se sí que aicuayãte nyii ra. I je que bautizar ae quia mbia je cote ra. Ì nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusi rã ngue eru nguichi earõ nda. Ibate si.

³³ “¿Aba ra Cristo re?” ae beite que se quia ra. Dios que ñee seje ra. “¡I je eico bautizar i mbia je jê! Ae arõ nda Espiritu Turã ndu nguichi bei nae, ae quiatu bautizar i sacua mbia je Espiritu Turã je”, i que Dios seje ra.
³⁴ Atea que se cote ra. Ae rei Dios riiĩ. Aicuate se cote, i que Juan nda.

Jesús mbia irabo uchĩmbaaquiaturã

³⁵ Isamami nongue que Juan ndiqui hue sĩ no nda. Nguesenda nyeremo ndese que eriqui ra. ³⁶ I que Jesús ucua quia ra. —Qui mbia icua ndiquicharõ sacua coi quia qui. Oveja riiĩ na eriqui Dios je, i que Juan Jesús rĩĩ nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique qiti ra. —¿Mbae jẽsequia quia re? i que mae erese ra. Ūquĩ ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyeseccote mose que echoĩ erese ra. Tenda oso cheete que echĩ erese cote ra. ⁴⁰ Ūquĩ nyeremo ngue Juan ñee ñandu ra. Siqui que Jesús rui cote ra. Andrés, i que ūquĩ mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chĩmondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiĩĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda sĩ chõ Andrés re. Pedro rese. ⁴⁵ Felipe que oso Natanael ndequia cote ra. —Ae rĩĩ Moisés riqui embesa mbesa cose, aque que uretea ra. Ae rĩĩ Dios cheẽ mbuchecua riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José riiĩ ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael que tu Jesús rĩĩchã nda. Jesús que mae erese ra. —Co israelita turã tuchi mo ndu quia co. Aba mbĩĩĩ rĩĩsa reã tuchi mo ndu quia co, i que Jesús Natanael ñĩ nda. ⁴⁸ —¿Mañĩ ere quia seicuate re? i que Natanael Jesús je ra. —Amae ngue nderese ra. Felipe ‘quiatuchu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiĩĩ ño nde riqui re. Israel jenda rerecua tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae

nderese ra”, ae que ndeje, ¿aque bei bei seicua quia core? Mbae turã tuchi rese ra eremae cote, aque sĩ, i que Jesús Natanael je ra. ⁵¹ Jesús que ñee sĩ ee ra. —Tacheẽ nyecua jẽje. Ibei ra obo jẽje. Angeles nda nguichi quichi quia seje. Nyoĩ nyoĩ sĩ ra equia ibate. Angeles ibatenda. Dios rimba. Jemae nda erese, i que Jesús ee ra.

Emo ngũinisirã nguereco

2 Tres días mose que emo ngũinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngũinisirã isi mose ra. Jesús si abe que siqui huee ra. ² Jesús abe que siqui huee no nda. Uchĩmbaaquiaturã rese. ³ Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ūquĩ nde, Tai? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¡Jesús cheẽ ndui sĩ chõ jẽingo jê! i que ee ra. ⁶ Cántaro atate que chĩ ra. Seis que cántaro ra. Sita ao ji. Ūquĩ jie que judíos riqui nyoĩ nyoĩ querabe ra. Ūquĩ cántaro jie que cien litros jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã sĩ chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngũinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Etura mbei ja mose, ereã jiri mbei ruquia ruquia mbia je cote. Nde quia eturã tuchi ererecquiaturã nguiã. Hui bei sacua cote, i que ra. Jesús chisaã ñĩ ño eriqui nguiã ñee. ¹¹ Ūquĩ nane ngue Jesús saã mbia mae sayã nyii ra. Uva rique rã sĩ tuchi que i raã nda. Ūquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echĩmbaaquiaturã que Jesús icua tuchi cote ra. ¹² Huesi que Jesús choĩ Capernaum nda. Usi rese. Ngõngue rese. Uchĩmbaaquiaturã abe rese. Hue que echĩ itõ mocoĩte ra.

Jesús oso Dios chuchúaa

¹³ Fiesta rurubite mose que Jesús sĩ Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chĩ ticuasú mee mee nyue mbae isiquia ribishorõ nda. Ovejas abe no. Nyurusĩ cuasu abe no. Emo ngue chĩ ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoĩ Dios chuchua sĩ ra. Ticuasú

abe. Ovejas abe. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mbae isiquia mombo mombo íbii. ¹⁶ Ae nyurusì cuasu mee mee nguia mbia je nae, ùquĩ je que Jesús ñee asite ra. —Ñ nyurusì cuasu jendao Dios chuchua sí. Mbae isi isisa jësaã saã ñochĩ u Paba chuchúaa a, i que Jesús ñee ee ra. ¹⁷ Jesús chimbbaaquiato que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ùquĩ ndese que echimbbaaquiato ndua ndua ra. Jesús mbia icuã mbusẽ mondochoi mose Dios chuchua sí. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —¿Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe Jesús je ra. —Tenda atate que nanderu riqui itõte Dios chuchua ao ao resẽ. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete rĩ ngue Jesús riqui ñee nda. Mbia chumunuasa rĩ eã ño ngue ñee nguia. ²² Jesús quera sí mose ramo ngue echimbbaaquiato ndua aque echeẽ ndese cote ra. Embesa ji rese ndua. —¿Ñ nguia equia re, i que echimbbaaquiato ndua ndua cote ra. Jesús quera sí mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguia mbia je. ²⁵ —¿Ei ño mbia nguia ã, i aronea mbia mo Jesús mbiirandu. Jesús quiato que mbia chiã icuate quia ra.

Nicodemo oso ñee Jesús je

3 Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquíã mose erese, i que Nicodemo Jesús je ra. ³ Jesús que ñee ee ra. —Tacheẽ nyecua ndeje. Ae nyaacuquia sí eã, ùquĩ nda siquíã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia sí re? ¿Usi riequi rĩ nda esi sí re? ¿Nyaacuquia sí nonde re? i que Nicodemo Jesús je ra. ⁵ Jesús que ñee ee ra. —Tacheẽ nyecua ndeje. Ae nyaacuquia i achõ je nae, ùquĩ nda siquíã Dios rese. Ae nyaacuquia Espíritu Turã abe je nae, ùquĩ nguia ra siqui Dios rese cote. ⁶ Mbia nyaacuquia mose, mbia sí chõ eriirĩ nde. Emo nyaacuquia mose Dios riirina, Dios rã sí chõ eno nde.

⁷ “Nducuã”, erechĩ nda secheẽ mose jẽ. “¿Jenyaacuquia sí ja chõ jẽ!” se i mose. ⁸ ¿Mbaranguiti sí quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ sí chõ Dios riirĩ nde. Ae nyaacuquia Dios je nae, i que Jesús ee ra. ⁹ —¿Mañi ùquĩ nde? i que Nicodemo Jesús je ra. ¹⁰ Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheẽ nyecua ndeje. Ae ureicua, ùquĩ ño uresenei senei ndei nguia jẽje. Ae rese uremae, ùquĩ ño uresenei senei ndei nguia jẽje. “Ichõiño nguia”, jenze chõchĩ nguia urecheẽ mose. ¹² “Ichõiño nguia”, jenze chõchĩ nguia secheẽ mose. Ibi jenda renei nenei mose jẽje. Secheẽ nda jemumba tuchi cote, ibatenda nenei nenei mose jẽje. ¹³ Emo nguichiãte ibei sí. Se mii ño ngue achu nguia nguichi ibei sí. Mbiarã ño ngue achu nguia. Asobe ra ibei. Ibei jenda chõ se re. ¹⁴ Sã Moisés mbei raanguia mbuchecua mbia je turuquia re cose no. Eĩ sí ra mbia sembucha ira rese. ¹⁵ Ñ nda seicuaa quiachã eã mbei sesi. Ñ nda seicuaa siqui bei ibate serese.

Dios nyecua ja mbia rese

¹⁶ Dios que nyecua tuchite mbia ja rese ra. Nyebe nguiriĩ mii mbu nguia mbia je. Eriirĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiriĩ mbu íbii ra. Mbia rirõ sacua mbae icuã sí quia ñi ngue Dios nguiriĩ mbu nguia. ¹⁸ “Eso tata cuasu”, i eã nda Dios nguiriĩ icuasa je. “Eso tata cuasu”, i Dios quia nguiriĩ icuasa reã je ã. Jesús icua eãte quia ñene. ¹⁹ “Eso tata cuasu”, i Dios quia nguiriĩ icuasa reã je. Ebite quia ñi itondaru nyaashĩ sí re. Nyaashĩ tu mose íbii, isiteã ngue ra. Mbae icuã ndese quia eriqui beite nguia. ²⁰ Ae siqui beite quia mbae icuã ndese, ùquĩ nguia siquichete nguia nyaashĩ sí. Nyaashĩ ndiichã sereãte quia ñene. “Ñ nda mbia mae eã nandechisaã ndese mbae icuã ndese”, i ñene. ²¹ Ae mbae turã saã mbeite quia nae, ùquĩ nguia nyaashĩ sí chã sete nguia. Ñ nda echisaã saã nyecua mbia je. Ñ nda mbia ñee, “Dios quiricuã nguia siquite nguia erese”, i ra mbia ñee, i que Jesús ra.

Juan el Bautista ñee turã Jesús rĩ

²² Jesús que nyoĩ Judéaa cote ra. Uchimbbaaquiato rese. Huee que eriqui mocoite ùquĩ ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiato ngue i tubiriãte re. Mbia que ngaẽ ngaẽ nguia era ra. Juan ngue bautizar i quia ee ra. ²⁴ Mbia Juan tarõ nonde mii ngue eriqui bautizar i huee nyii ra.

²⁵ Judío mo ngue ñee icuã icuã Juan ñimbbaaquiato je ra. Bautizar i rĩ. —¿Aba quia ra bautizar i mbia mbitirõ

sacuã nde? i que ñee icuã icuã nyue ra. ²⁶ Nyebe Juan ñimbaaquiatu nyoï nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñimbaaquiatu ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacuaã Cristo tu nonde. “Cristo eã ño se resẽ”, ae checua rei que jẽje resẽ. ²⁹ Jesús rui ra mbia siqui ja. Sã emo ngüinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹ Jesús rei ibatenda. Nyebe equiatu riqui nguiã mbia si co. Ibi jenda chõ nande re. Ibi jenda rese achõ ño nandeaquiatu nande re. Ae quiarei ibatenda. ³² Ibatenda umaesa senei senei nguia mbia je co. Ae echan-du ibate nae, ùquĩ abe esenei senei nguia mbia je co. Mbia miñ jiri riqui echeẽ andu andu ã. ³³ Ùquĩ miñ miñ ño Jesús cheẽ isi turã nguiã ã. Ùquĩ miñ “Dios ichõñosa reã”, i tuchi nguiã ã. ³⁴ Dios quiatu que Jesús mbu ra. Nyebe Jesús riqui Dios cheẽ nenei nenei co. Dios que Espíritu Turã mondo tuchite Jesús je ra. ³⁵ Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. Ì nda Jesús riqui mbae rerecuarã ja. ³⁶ Ae Dios rucucha icua nae, ùquĩ nda siqui bei Dios rese. Ae Dios rucucha icuayã nae, ùquĩ nda siquiã tuchi erese. Nyoï eã mbei ra ibate. Dios ra ùquĩ mondo tata cuásuu.

Jesús ñee acuanì mo je

4 Mbia que siqui tuchite Jesús rui cote ra. Bautizar i sacuaã mbia je. Jesús sɿ que bautizar i eã nda. Echimbaaquiatu quia ngue bautizar i nguiã ee. —Fariseos riqui ndeucuayãte ã. Mbia siqui tuchi mose nderui, i que mbia mo Jesús mbiirandu ra. ³ Jesús jirandu mose que esi Judea recha cote ra. —Tasobe Galilea, i que ra. ⁴ Samaria ni ngue esi ra. ⁵ Ngasẽ ngue Samaria ra. Sucha tubiriã mo ngue ngasẽ nda. Sicar, i que hue je ra. Jacob chimee ibi ndurubite que huee ra. Ae emee nguiirí José je. ⁶ Jacob chibicoi ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandete re mose. Ñeenda ishote que ee ra.

⁷ Jesús ae que tiba huee ra. Echimbaaquiatu que nyoï sucha tubiriã nda. Mbae mo isi uchiurã. Acuanì mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. ⁹ Judíos que

ñee eã mbei quia mbia Samaria jenda je querabe ra. Isho bei que eriqui nyesi ra. Nyebe acuanì ñee nguiã Jesús je. —Judiate nde resẽ. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resẽ, i que acuanì Jesús cheẽ ndibishorõ nda. ¹⁰ Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuanì je ra. ¹¹ Acuanì ngue ñee si Jesús je ra. —Noria cuate nyeresẽ. I arasa ereru eãte quia a resẽ. Ma je quia ra i raanguia erechara seje. ¹² Nanderu ñiinda abe nda íu íu quia a yenda ye resẽ. Jacob. Nguiirí ndese. Erimba abe nda íu íu quia a yenda ye resẽ. ¿Ndeaquiatute ae si nde re? i que acuanì Jesús je ra. ¹³ Jesús que ñee acuanì je ra. —Mbia íu mose a yenda jie, eisei jei chõ nda eno. ¹⁴ Ae i raanguia mbei quia nae, ùquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacuaã, i que Jesús acuanì je ra. ¹⁵ Acuanì ngue ñeembe Jesús je ra. —I raanguia embu nembae seje no. Eĩ nda seisei chiã mbei. Eĩ nda achu achu eã a jenda ara, i que acuanì ee ra.

¹⁶ —Eso nderu rea. Eru seje a, i que Jesús ee ra.

¹⁷ —Seru eãte nyeresẽ, i que acuanì nda. Jesús que ñee ee ra. —Ae beite. Nderu eãte que ereico namo co ra.

¹⁸ Nderurã ngue eretea mocoite rei resẽ. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuanì je ra.

¹⁹ Jesús cheẽ mose que acuanì ñeembe ee no nda. —Mbae mbuchecua nde reae. Dios resenda nde reae. ²⁰ Uramei nda ngaẽ ngaẽ nguia a ibi ato ra. Ñee ñee sacuaã Dios je. “Jerusalén quiatu mbia cheesa Dios je re” jenyẽ chõchĩ nguiã judíos, i que acuanì Jesús je ra. ²¹ Jesús que ñee acuanì je ra. —Tacheẽ nyecua ndeje. Mangue chooño ãte ra mbia ñee Dios je cote. Namu jiri. Jerusalén miñ eã. A ibi ato miñ eã no.

²² Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icuã si. ²³ Namu jiri ra Dios quiatote ñee turã turã Dios rĩrĩ uchiangui re.

Mangue chooñoa cote. Dios quiatote ra ñee turã bei quia Dios rĩrĩ cote. Echeẽ nguire. ²⁴ Dios rei espíritu. Mae aronea erese. Nandechiangui re chõ nandeco Dios andu ã. Nandechiangui re nandechẽ turã turã Dios rĩrĩ. Dios cheẽ nguire, i que Jesús ra. ²⁵ Acuanì ngue ñee Jesús je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ùquĩ aicuate quia co, i que acuanì nda. ²⁶ —Cristo chõ se re. Ae je ereico ñee, i que Jesús acuanì je ra.

²⁷ Aque mose que Jesús chimbaaquiatu ngaẽ ngasẽ cote ra. —Jesús riquichĩ ñee acuanì je a re, i que eu nyuruirate mae erese ra. —¿Mbae jenyẽ quia ñee nde?

ĩ eã ngue emo nda. Ireĩ ireĩte quiatu ngue ñee Jesús je re. ²⁸ —Se rei Cristo, ĩ mose que acuanĩ ía tuchi ra. Nĩo ngue esecha oso ra. Mbia mbiirandu randu sucha tubiriã jenda. ²⁹ —A emo ndiqui a. Semumbusẽ ja que ra. Cristo chõ ae reae. Nyao rã mae erese, ĩ que acuanĩ mbia je ra. ³⁰ Nyebe mbia nyoĩ ja nguiã ícuaa. Jirandu mae Jesús rese. Acuanĩ ñee nguire.

³¹ —Mbae mo eu, ĩ chiĩbe ibe que echimbaaquiatu Jesús je ra. Acuanĩ oso mose sucha tubiriã. ³² —Tei. Sechiu jẽicuayãte jẽ, ĩ que Jesús ee ra. ³³ —Emo mbae mo queru echiurã ndeae, ĩ que echimbaaquiatu ñee ñee nyue ra. ³⁴ Jesús que ñee ee ra. —Ae riĩ Paba ñee seje nae, ũquĩ tasaã mbei quia ee. Paba cheẽ mum-bayã mose, ũquĩ ño sechiu riqui nguiã. ³⁵ “Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui sacua. ³⁶ Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ũquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingo bei sacua. Emo nane serenei nenei nguiã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ũquĩ ndese jẽya jate, ĩ que Jesús ra.

³⁹ —Jesús que semumbusẽ ja ra, ĩ que acuanĩ ñee sucha tubiriã jenda je ra. Nyebe mbia tubiriã siqui nguiã Jesús rui hue jenda cote. ⁴⁰ Samaria jenda que nyoĩ Jesús rea cote ra. —Eico are jiri ure rese, ĩ que mbia Jesús je ra. Nyebe Jesús itõ nguiã nyeremo huee. ⁴¹ Jesús sí que mbia mbaaquiatu quiatu cote ra. Nyebe mbia tubiriã siqui tuchi nguiã erui cote. ⁴² Mbia que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Erecheẽ ñooñoa ngue ra. Cristo tuchi chõ ae re. Mbia rirõsa mbae icua si chõ ae re, ĩ que mbia ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itõ nyeremo nda. Samáriaa. Hue si que esi si nyuruã Galilea quti ra. ⁴⁴ —Mbia ra Dios cheẽ nenei neneisa quereco turã eã hue jenda sí mose, ĩ que Jesús nyii ra. Nyebe esi nguiã Galiléaa. ⁴⁵ Jesús que ngasẽ Galiléaa cote ra. Mbia hue jenda que embucasẽ turã nda. Mae nguiatu equia erese Jerusalén neaẽ. Pascua mose. Mbia mae sayã nguiatu

ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui ĩ mbuchiicabo uva rique rã mbia je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, ĩ que hue je ra. ⁴⁷ —Jesús ru Judea si a cote, ĩ que mbia ererecua mbiirandu ra. Nyebe ererecua si nguiã Jesús rea cote. —Seriirĩ chĩ mano serĩte qui. Nyao terembucherõ seje, ĩ que ererecua ñee ee ra. ⁴⁸ —Mbia mae sayã naa eã mose ra jẽ seicuayã ñochĩ nde, ĩ que Jesús ee ra. ⁴⁹ —Nyao jei rã. Seriirĩ nda mano nyee re, ĩ que ererecua Jesús je ra. ⁵⁰ —Esobe nyebi ndechuchúaa. Nderiirĩ ngue nyerõ nda, ĩ que Jesús ee ra. —Jesús ñee ñooño aroneate, ĩ que ererecua oso nyebi ra. ⁵¹ Echuchua rurubi que erimba ngaẽ erobeishĩ ñee nda. —Nderiirĩ ngue nyerõte ra, ĩ que ñee embiirandu ra. ⁵² —¿Ma tenda seriirĩ ngasi ucua re? ĩ que ererecua ra. —Tenda nyiichere ramo mose que nderiirĩ ngacu ucua curi ra, ĩ que mbia ñee ee ra. ⁵³ —Hue tenda tuchi que Jesús ñee seje curi ra. “Nderiirĩ ngue nyerõ nda”, ĩ seje curi, ĩ que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴ Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riirĩ ngue embucherõ namo no nda.

Jesús Amei mbucherõ

5 Aquere que judíos mbae fiesta ra. Jesús que oso Jerusalén fiesta mose ra. ² Oveja iquesa que chĩ huee ra. Mbia icua abe que chĩ huee ra. Cinco tei que chĩ hue eicua mama nda. Betesda, ĩ que judíos hue mbia icua je ra. ³ Mbia rasi que chĩ jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chĩ huee ra. I rebera raarõ arõ. ⁴ Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, ĩ que mbia ra. ⁵ Amei ndasi ima mo ngue chĩ bei aque rĩ nda. Treinta y ocho años que amei ndasi ra. ⁶ Aque que chĩ nyaara Jesús je ra. —Aa chõ erasi riqui bei a cose re, ĩ que Jesús uchiangui re ra. —¿Erecherõ sete ere? ĩ que ee ra. ⁷ Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, ĩ que erasi Jesús je ra. ⁸ Jesús que ñee ee ra. —Èhuã. Ndequisa erao. Eso, ĩ que Jesús ee ra. ⁹ Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰ Nyebe judíos paama ĩ nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? ĩ que judíos Jesús chimbucherõ je ra. ¹¹ —Ae sembucherõ, aque que ñee seje ra: “Ndequisa erao. Eso”, ĩ que sembucherõsa seje ra, ĩ que judíos

cheë mose ra. ¹² Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra. ¹³ —Aicua eâte se. Aba chõ sembucherõ. Mbia tubiriâte quiatu ngue re, i que erasi judíos je ra. Jesús oso rei. ¹⁴ Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¡Sã jê! Arembucherõ ngue se resë. ¡Mbae icuã nda eresaã sichĩ jê! Mbae mo nda jê tuchi ndeje cote, i que Jesús ee ra. ¹⁵ Amei ngue oso judíos mbiirandu cote ra. —Jesús chõ sembucherõ nguia reaë, i que judíos je ra. ¹⁶ Nyebe judíos paama i nguia Jesús je. Nandeiquia, i. Sábado mose quia Jesús riqui nguia mbia mbucherõ cherõ judíos je. Judíos uquenea ucua mose. Nyebe judíos paama i nguia ee. ¹⁷ Jesús que ñee judíos je cote ra. —Paba recoteã mbeite riqui co. Namu abe. Se abe Paba rã si serecoteã teã mbeite riqui co, i que Jesús ee ra. ¹⁸ Nyebe judíos riqui nguia paama i tuchi Jesús je. Iquia serĩ serĩte que cote ra. Jesús que judíos cheë mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguia ee.

Jesús rei Dios rucucha

¹⁹ Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguia mbae raã naa se abe co. Ae Paba saã saã nguia, ùquĩ asaã saã ja quia se abe co. ²⁰ Dios rucucha rei se. Paba riqui nyesequa tuchi serese co. Paba riqui uchiao reacuquia tuchi seje co. Uchiao ra eteacuquia tuchi seje cote. Mbia mae sayã tuchi. Jenyuruira tuchi ra mae erese cote. ²¹ Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùquĩ abe ra amingo bei. ²² Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. ²³ Ì nda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ùquĩ ñee turã eãte Paba abe rĩ no. Dios rucucha rei se. Dios chimée ndei se. ²⁴ Tacheë nyecua jêje. Secheë andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

²⁵ Tacheë nyecua jêje. Namu jiri ra mbia raaque secheë andu. Secheë mumbasa reã nda siqui bei.

²⁶ Paba quiarei mbia mingo beisa. Se abe rei mbia mingo beisa Paba rui si. ²⁷ Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ erucucha. ²⁸ ¡Jenyuruira techĩ nda secheë mose jê! Mbia raaque ra secheë ñandu ja chee. ²⁹ Júã ja ra ngua si. Ae siqui turã, ùquĩ nda Dios mingo bei cote. Ae siqui icuã icuã nguia, ùquĩ nda nyoĩ tata cuásuu.

Serĩ ño embesa ji ñee, i Jesús

³⁰ Se ae ra mbae asaã eã. Paba cheë ndui si chõ aico nguia mbia mondo tata cuásuu. Paba cheë ndui si chõ aico nguia mbia mingo bei no. Paba cheë nda achabiã. Paba cheë nguire chõ aico nguia mbae raã naa co. Se ae eã ño ñene. ³¹ Se ae eã ño acheenei enei nguia mbia je co. Ì nda “ichõĩño” jenyere seje. ³² Aque emo ndiqui serenei nenei mbia je aque. Aque eriqui ñee ñooño eã serĩ aque. ³³ Jemo ngue jemondo Juan je. Jêirandu sacua serese. Juan ngue ñee ñooño eãte jêje ra. ³⁴ Ae mbia ñee ñee serĩ, ùquĩ ñee ndeseã aico nguia se. “Dios riri eã ño co re”, i mose mbia serĩ, Dios riri mbei chõ se re. Jêicuã mbutiã sacua ño aico rei nguia ñee jêje. ³⁵ Tata rendi rã ndei Juan. Mbae resae ja raque. Huee que jengu mbirĩ ndei erese ra. Jêhui jei chõchĩ esi. ³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheë nguire ae aico nguia mbae ao ao co. Sechisaã ndese mae jee mbia jirandu nguia serese cote. “Dios chimondo quiarei Jesús”, i mbia cote. ³⁷ Paba abe riqui serenei nenei mbia je co. Paba cheë jeñanuate raque. Jemaie sayãte raque Paba no. ³⁸ Jê nguia seicuayãte nguia co. Paba chimondo chõ se re. Nyebe Paba cheë chĩ eãte jendese. ³⁹ Embesa ji rese jêingo mae tuchite raque. “Embesa ji ra nandemingo beite”, jenyechĩ nguia. Serese jembiiirandu sacua ño embesa ji re. Se quiatu mbia mingo tuchi re. ⁴⁰ Jê nguia jêingo sereãte nguia serese. Ì nda se jaemingo beite rei. ⁴¹ Jêingo eã mose Dios rese, sebiãte jeñee turã turã mose serĩ. ⁴² Co aico jêicuate co resë. Jenyesequa eãte quia Dios rese co resë. ⁴³ Paba que sembu resë. Jêo eã ñochĩ serese. Paba chimondo eã tu mose, aque rese quia ra jêo tuchite cote. ⁴⁴ Mbia resa rae jêingochĩ nguia jêeturã naa naa. Dios je quiarei jêeturã eãte. ¿Mañi jenyere quiatu ra equia seicua re? ⁴⁵ Se quia ra jêicuã ambuchecua eã Paba je. Moisés chimbesa quia jêicuã mbuchecua nguia. “Moisés chimbesa rei mbia mingo beisa”, jenyechĩ nguia. ⁴⁶ Moisés chimbesa jêicua eãte quia ã. Nyebe jêingo nguia seicua eãte ã. Serĩ ngue Moisés embesa ra. ⁴⁷ “Nyia” jenyere eã mose Moisés chimbesa je, “nyia” jenyere eã nda secheë mose abe no, i que Jesús judíos je ra.

Jesús mbichae mbeta tuchi

6 Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ² Mbia que nyoĩ tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherõ cherõ mose. ³ Sita ibate rĩ ngue Jesús choi ra. Huee que echĩ ngoi uchimbacquiату rese ra. ⁴ Fies-ta de pascua rurubi que ra. ⁵ Mbia tubiriã ngue ngaë

nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echiaurã nandeisi mangue re? i que Jesús ee ra. ⁶ Jesús eicuate raque. —Mañi nda Felipe quia secheẽ mose reae, i que Jesús ra. ⁷ Felipe que ñee ee ra. —Doscientos plata mbia chayãte mbia chiurã isi sacua. Echayã tuchite, i que Felipe ra. ⁸ Andrés abe que chi ra. Jesús chim-baaquiatu. Simón Pedro nongue. Ae que ñee nda. ⁹ —A ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiatu nda re. Mbia tubiriãte quia ñene, i que Andrés Jesús je ra. ¹⁰ —“Jen-goi ja”, jeye mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabẽ. Cinco mil que mbia ra. ¹¹ Jesús que mbichae isi cote ra. Ñaanye, i que ngu je cote ra. Mbichae rĩ. Mbichae que embuchao chao cote ra. Uchim-baaquiatu je que emondo mondo ra. Echimb-aaquiatu que emondo mondo mbia je cote ra. Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra. ¹² Mbia rio ja mose que Jesús ñee uchimb-aaquiatu je cote ra. —;Mbia chiu sique jemunua nua jẽ! ¡Jendecoquiatu ja jẽ! i que ra. ¹³ Echiu sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ. ¹⁴ Mbia que mae tuchi Jesús rese ra. Mbichae mbe-ta rese ra. Ûquĩ ndese que mbia riqui mae eã tuchi nyii ra. —Dios cheẽ nenei neneisa chõ co riqui re. Ae ure-saarõ arõ nguia, ae chõ eriqui re, i que mbia Jesús rĩ nda.

¹⁵ Jesús que mbia icua ra. —Mbia ra seisichĩ suruchoi ererecuarã nde, i que ra. Nyebe esi si nguiã mbia recha. Sita ibate rĩ ngue esi erecha ra.

Jesús ngata i arõ

¹⁶ Itondaru ndaru que Jesús chim-baaquiatu choi ama ndísa ra. ¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoi chee que erecha ra. ¹⁸ Quiririã ngue tu icuã icuã ee ra. Ama ndi-ite re mbia reco mose. I rebera que tu asi asi tuchi ra. ¹⁹ Mbia que nyoi choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echiã ngue cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra. ²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ íbii cote ra.

Mbia cuabẽ Jesús requia

²² Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguiã nyue. —Canoa mii ño ngue chi resẽ. Canoa ye eã ño Jesús si iasa resẽ. Echimb-aaquiatu achõ ño ngue nyoi iasa canoa ye resẽ.

¿Mangue Jesús riqui mangue re? i que mbia cuabẽ u ñee Jesús requia ra. ²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbia mbichae usa rurubi que ecuaẽ tiba ra. ²⁴ Jesús tiã mbei que mbia je huee ra. Mbichae úsa ra. Echim-baaquiatu abe tiã ngue mbia je ra. Nyebe mbia choi nguiã erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵ Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶ Jesús que ñee ee ra. —Tacheẽ nyecua jẽje. Se jembuquiarure chõ jẽingo nguiã serese. Se jembiore chõ jẽingo nguiã serese. Sechisaã icuare rocoĩ. Jemae sayã ngue asaã saã ndei quia resẽ. ²⁷ Jenyurã ndese jẽingochĩ nguiã ndua tuchite. Ûquĩ nda ua jeite. Ae ua eã mbeite quia, Ûquĩ ndese quiatu jendua. Mbia mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra. ²⁸ Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰ —¿Mbae mo nda eresaã na ure je re, uremae sayã nde? Ñ nda uremae nderese. Eẽ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³² Jesús que ñee ee ra. —Tacheẽ nyecua jẽje. Moisés eã ño ngue mbichae mondo nguiã mbia je ibei si. Paba chõ ngue emondo nguiã ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³ Dios riqui mbichae mbuae mondo mondo mbia je co. Ae Dios mondo mondo nguiã mbia je co nae, aque que tu ibei si ra. Aque rei mbia mingo beisa, i que Jesús ra. ³⁴ Mbia que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

³⁵ Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jẽya bei rae. ³⁶ Jemae ndei que equia serese resẽ. Seicuayã mbei chõchĩ nguiã ã. Acheẽ ndei que jẽje nyii resẽ. ³⁷ Ae Paba mee seje mbia nae, Ûquĩ nda siqui bei serese. Ûquĩ nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co. ³⁹ “Ae amondo ndeje nae, Ûquĩ mo nda quiachãchĩ”, i que Paba seje ra. Ambuquera ja ra se, se tube mose íbii. ⁴⁰ Se rei Dios rucucha. Paba que sembu ra. Ae

seicuate nae, ũquĩ nda siqui bei. “Ũquĩ nda amingo bei”, i que Paba ra. Ũquĩ nda ambuquera ja, se tube mose íbii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José ririĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jëingo ñee icuã icuã serĩĩ nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. Ũquĩ nda ambuquera si mingo sechube mose íbii. ⁴⁵ “Dios ra mbia mbaaquiata ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se miĩ ño ngue amae erese ra. Esi chõ ngue achu resẽ. ⁴⁷ Tacheẽ nyecua jëje. Ae seicuate quia nae, ũquĩ nda siqui bei. ⁴⁸ Se rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰ Mbichae mbuae chõ asenei senei nguiã jëje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ũquĩ nda siqui bei. Ũquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ũquĩ nda siqui bei. Mbichae ra amee mbia mingo bei sacua. Aque mbichae rei serete sí. Seroo sí, i que Jesús judíos je ra. ⁵² Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³ Jesús que ñee ee cote ra. —Tacheẽ nyecua jëje. Mbiarã ngue achu ra. Serete jëu eã mose, jëingo bei eã ndae. Seruqui jembei eã mose, jëingo bei eã ndae. ⁵⁴ Ae serete u quia nae, ũquĩ nda siqui bei. Ae seruqui mbei quia nae, ũquĩ nda siqui bei. Ũquĩ nda ambuquera si mingo, sechube mose íbii. ⁵⁵ Serete rei mbia chiũ rã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ũquĩ nda siqui bei sechiangui re. Se abe ra aico bei echiangui re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jëje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimee u quia nae, ũquĩ nguia ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiata quiata ra. Capernaum. Judíos chumunuásaa.

Mbia tubiriã hui Jesús si

⁶⁰ Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re.

Echeẽ nandemumba eã aroneate quiata quia re, i que nyue ra. ⁶¹ —Mbia riqui ñee icuã icuã tuchichĩ secheẽ ñi, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuãte secheẽ jëje re? ⁶² ¿Mañi jenye ra mae mose serese re? Seso si mose ibate re. ⁶³ Nande rete nandemingo eã nguiã. Nande aĩ ño nandemingo nguiã. Secheẽ nguia ra mbia mingo bei ibátee. ⁶⁴ Seicua ja eãte quiata nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. ã nda seicua eã. Co ra semondo mbia icuã je, i que Jesús mbia icua uchiangui re nyii ra.

⁶⁵ —Acheẽ ngue jëje nyii, ũquĩ sí aico ñee jëje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús si cote ra. Ae siqui erese nyii nae, ũquĩ mo ngue hui ja esi cote ra. Ngatayã ngue equia erui cote ra. ⁶⁷ Jesús que ñee uchimbaaquiata je cote ra. Doce je. —¿Jë abe ra jëhui sesi re? i que uchimbaaquiata je ra. ⁶⁸ Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ.

⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰ Jesús que ñee ee cote ra. —Jë doce que jaëirabo rei ra. Sechimbaaquiata sacua. Jemo ngue diablo rã nda, i que ra. ⁷¹ Judas Iscariote rĩĩ ngue eriqui ñee nda. Diablo, i. Simón ndiiriĩ ndei Judas. Ae quia Jesús mee nguiã mbia icuã je. Jesús chimbaaquiata mo ndaque.

Jesús nongue siquiã Jesús rese

7 —Jesús nandeiquia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. ² Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. ³ Jesús nongue que ñee ja ee ra. —Eso rã Judea. Ñ nda ndechimbaaquiata mae ja ndechisaã ndese Judea jenda. ⁴ Mbae esaã nyecua chõ mbia resa rae jë! Ñ nda mbia ndeicua ja. Co ereico mbia mae sayã naa naa co. Mbia resa rae quiata esaã saã, i que enongue ee ra. ⁵ Jesús nongue abe que Jesús icuayãte ra. Nyia, i eã Jesús cheẽ je. ⁶ Jesús que ñee ee cote ra. —Emo mose quia ra aso nyecua mbia je cote. Jë jëso jë ae ae, jësose mose. ⁷ Dios cheẽ mumbasa riqui jëucuyã eãte raque jë. Se quia eriqui nguiã seucuyãte ã. “Jenyisaã saã nguia eicuãte riqui nguiã”, ae quiata nguiã ee co. Nyebe eriqui nguiã seucuyãte ã. ⁸ Jë ño jëso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹ Jesús que siqui are jiri Galilea cote ra.

Jesús mbia mbaaquiato quiatu fiesta mose

¹⁰ Jesús nongue que nyoí fiesta rea cote ra. Aquere que Jesús abe si mingue cote ra. Ngasẽ nyecuayã ño ngue oso ra. —Mbia ra jiranduchĩ serese re, i que uchiangui re ra. ¹¹ Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹² Mbia que ñee ata atate Jesús rĩĩ nda. —Jesús turãte que, i que emo emo nda. —Jesús turã eã ngue ra. Mbia mbiĩĩrĩ irĩte que equia no nda, i que emo emo no nda. ¹³ Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩĩ.

¹⁴ Fiesta ite mose que Jesús si Dios chuchua mbia mbaaquiato quiatu cote ra. ¹⁵ Judíos que nyuruĩra tuchi Jesús cheẽ andu ra. —Eaquiature quia eriqui re. ¿Mangue eriqui ñimbaaquiato mangue nyii re? i que mbia ra. ¹⁶ Jesús que ñee ee ra. —Secheẽ ae eã asenei senei nguiã jẽje co. Paba cheẽ ño asenei senei nguiã jẽje. Ae sembu. ¹⁷ Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩĩ. ¹⁸ “¿Sã mbia ñee turã mbe i serĩĩ jẽ!” i ra emo ucheẽ achõ nenei nenei. “¿Sã mbia ñee turã mbei Dios rĩĩ nguiatu jẽ!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambiĩĩrĩ irĩ eã ño nguiã co. ¹⁹ Moisés que Dios cheẽ mbesa rei nande je ra. Nande emumbayã sacua. Jẽ nguia rei Dios cheẽ mumba. ¿Mbaerã jẽingo sequia serĩte re? i que Jesús ee ra. ²⁰ Mbia que ñee ee cote ra. —Emo ndiqui ndeiquia serĩ eãte co. Aba checuayã icua ae nembĩcuã ndeae, i que mbia Jesús je ra. ²¹ Jesús que ñee ee cote ra. —Mbia rasi mo ngue ambucherõ sábadu mose. Aque mĩ ño ngue asaã ndei nguiã. Aque mĩ je chõ jẽingochĩ nguiã nyuruĩrate mae serese. ²² Moisés que circuncisión teacuquia jẽje ra. Nanderamei nane ngue circuncisión saã nguiĩrĩ je ra. Nyebe jẽingo nguiã sábadu mose abe circuncisión naa naa jendiĩrĩ je. ²³ Moisés cheẽ nguire chõ jẽingo nguiã circuncisión naa naa jendiĩrĩ je ã. Sábadu mose abe. ¿Mbaerã jẽingo paama i seje mbia mbucherõ mose sábadu mose re? ²⁴ “Aque eicuãte”, jenyje jẽ chõchĩ nguiã. Jẽirandu turã na erese nyii, i que Jesús ee ra.

Ibatenda chõ se re, i Jesús

²⁵ Jerusalén jenda que ñee ñee Jesús rĩĩ cote ra. —A Jesús riqui ñee mbia je a. ¿Nandererecua ra Jesús icua eã si chõ nde? ²⁶ A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui reĩ nandererecua je re? ²⁷ Cristo eã ño Jesús re. Galilea jenda chõ ae re. Cristo tu mose quiatu ra nanderanuate. Ma si chõ nda eru, i que Jerusalén

jenda ñee nda. ²⁸ Jesús que echeẽ ñandu ja ra. Dios chuchúaa eriqui mose mbia mbaaquiato quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõñosa reã ae ngue sembu nguiã. Ae rese jemaie ãte nae, ae chõ sembu nguiã. ²⁹ Se ae que amae erese ra. Esi que achu ra. Ae chõ sembu nguiã co, i que Jesús ee ra. ³⁰ Mbia que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee. ³¹ Mbia tubiriã ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiato mo nda tuãte rei. Co mĩ tuchi chõ ndei Dios chimbu co, i que mbia tubiriã nguia ñee ñee Jesús rĩĩ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbia ñee turã turã mose Jesús rĩĩ. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. ³³ Jesús que ñee nda. —Aico mbiĩĩ ño nguiã jendese a cote. Aquere ra aso si Paba rea. Ae sembu. ³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ñquĩ ndea ra esi reae. Griegos mbaaquiato sacua ndeae. ³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ñquĩ nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñmunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. ³⁸ Ae ra seicua nae, i riõ na nda ñquĩ. Iãcuã turã na nda ñquĩ”, sã embesa ji riqui i no, i que Jesús ucheẽ mbiĩĩrĩte mbia je ra. ³⁹ —Ae ra seicua nae, ñquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbia ñee atate Jesús rĩĩ

⁴⁰ Mbia tubiriã ngue chi Jesús cheẽ andu ra. ñquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús rĩĩ nda. ⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. ⁴² “David rĩĩrĩ nda Cristo. Belén jenda

ra Cristo, David rã si", sã embesa ji riqui i no, i que mbia ñee ñee nyue ra. ⁴³ Hue rĩ ja mbia ñee eãchĩ Jesús rĩ. Mbia que ñee ata ata Jesús rĩ nda. ⁴⁴ —Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuayã

⁴⁵ Policía jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra.

⁴⁶ Policía jenda que ñee ee ra. —Aque Jesús riqui mbia mbaaquiato turã tuchi aque. Ae rã si emo mbia mbaaquiato turã aronea, i que policía jenda ñee mbia rerecua je ra. ⁴⁷ Fariseos que ñee policía jenda je cote ra. —¿Jẽ abe chee chõ Jesús jembĩrĩ irĩ nguia re?

⁴⁸ Nandererecua mo ngue "coche rei" iã tuchi Jesús je resẽ. Fariseos mo abe que "coche rei" iã tuchi Jesús je resẽ. ⁴⁹ ã mbia ataque riqui Dios cheẽ icua eãte ã.

Quiachã ja ra Dios si, siqui mose Jesús rese, i rei que fariseos ra. ⁵⁰ Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra.

⁵¹ —Emo nandembasi mbasi chooño aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa mĩ nande je ra, i que Nicodemo uataque je ra.

⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyoĩ ja uchuchua cote ra.

Cuña mo siqui emo ndu rese

8 Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitõ ndabe. Mbia que esiichã tuchi ra. Jesús que ngoi ra. Mbia mbaaquiato quiatu. ³ Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña mĩ nda. ⁴ Ae cuña curucuaẽ nae, ùquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. "ã jẽiquia sita je", i que Moisés quia ã mbia rĩ nda. ¿Mañi ere ra ã nĩ ñee nde re? i que cuña ndurucuaẽsa ñee Jesús je ra.

⁶ —Jesús nandembĩrĩ. Ì nda ñee icuã. Ì nda mbia nandembĩcuã Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷ —¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheẽ andu mose que mbia rerecua ireĩ ireĩ ja chõ nda. —Nandeicuã jate

que, i ja chõ ngue ñee uchiangui re ra. Nyebe echoi nguia usẽ ja. Amei nane ja que ra. Eataque quia usẽ nguia eruĩ cote. Ererecua que usẽ ja ra. Jesús ae que siquichõ nda. Cuña ndesechõ. ¹⁰ Jesús que juã mbia rerecua ruiibe cote ra. Cuña je que ñee cote ra. —¿Ma nderurucuaẽsa ma nde? "Nandechei rã sita je", ¿iãte emo nguia nderĩ co re? i que Jesús ñee cuña je ra.

¹¹ —Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. ¡Mbae icuã nda eresaã sichĩ jẽ! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguia mbia je co. Ae siqui serui nae, ùquĩ nda siquiã itondáruu. Ùquĩ amingo bei quia querabe co, i que Jesús mbia mbaaquiato ra. ¹³ Fariseos que ñee Jesús je cote ra. —Ndechue chõ ereico nguia ñee mbia je. Nyebe mbia "coche rei" i aronea ndecheẽ je, i que fariseos ñee Jesús je ra. ¹⁴ Jesús que ñee echeẽ ndibishorõ nda. —Sechue acheẽ ndaque mbia je. "¡Ae bei jẽ!" i chõ mbite raque aba secheẽ mose. Ae si achu nae, huee jẽicuayãte. Ae ra aso nae, huee abe ra jẽicuayãte no. Se ae aicua nguia co. ¹⁵ Jeñee icuã jei chõchĩ nguia aba rĩ. Mbae mumbusẽ ja mose rocoĩ. Eĩ ae eã ño nguia se.

¹⁶ "Co eicuãte", ae eã nguia se ae co. Paba rese chõ aico nguia mbia mumbusẽ ja co. Nyebe aico nguia ñee Paba cheẽ ndui si co. ¹⁷ "Mbia nyeremo ñee mose hue rĩ si, 'ae beite' jenyẽ chõ", i que Moisés jẽje ra. ¹⁸ Sã ure nyeremo ure no. Paba rese. Ae sembu. Sã ureico ñee serĩ Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que fariseos Jesús je ra. Jesús que ñee ee ra. —Paba jẽicuayãte quia ã. Se abe seicuayãte quia ã. Jẽ seicua mose, Paba abe ra jẽicua, i que Jesús ra. ²⁰ Eĩ ngue Jesús quia mbia mbaaquiato quiatu Dios chuchúaa ra. Ofrenda no nosa jii que eriqui mbia mbaaquiato quiatu ra. Emo ngue Jesús isi ãte etarõ sacua nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jẽicuã mbei ra jemanano nyee. Ae ra aso nae, huee jengasẽ aroneate, i que Jesús ee ra. ²² Judíos que ñee ñee nyue ra. —¿Mbaerã nda nandecuasẽ aroneate ee re? Nyĩiquia ra reae, i rei que ñee nyue ra. ²³ Jesús que ñee ee ra. —Ibi jenda chõ jẽ nde. Ibatenda chõ se re. Ibi jenda eã ño se re. ²⁴ Nyebe aico nguia ñee jẽje nyii. "Jẽicuã mbei ra jemanano nyee", ae que jẽje nyii. Seicuayã mbei mose ra jemanano nyee jẽicuã mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que

ñee ee ra. —Cose ndare bei chõ aico nguiã serenei nenei jêje co. ²⁶ Mbae ra asenei tuchi jêje reae. Secheẽ nda jêicuã mbuchecua tuchi jêje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷ Mbia rerecua que Jesús cheẽ icuayã mbei ra. —Dios rĩ ño eriqui nguiã ñee, iã mbei que mbia ra. ²⁸ Jesús que ñeembe ee ra. —Mbiarã ngue achu ra. Jẽ nda sembucha ira rese cote. Aque mose ra mbae jêicua jiri serĩ cote. “Dios cheẽ nguire chõ eriqui mbia mbaaquiату quiatu re”, jenyе ra serĩ cote. “Dios rucucha chõ eriqui re”, jenyе ra serĩ cote. ²⁹ Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰ Jesús cheẽ mose que mbia Jesús icua icua cote ra.

Jẽingo bei mose serui, sechimbaaquiату tuchi chõ jẽ nde

³¹ Ae Jesús icua quia judíos nae, ùquĩ je que Jesús ñee nda. —Secheẽ si jêhui eã mose, sechim-baaquiaturã tuchi ra jẽ. ³² Jẽ nda ichõiñosa reã jêicua tuchi cote. Mbia icuã nderecua rimba eã nda jẽ cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingо cote”, i ure je re, i que mbia Jesús je ra. ³⁴ Jesús que ñee ee cote ra. —Ae mbae icuã saã saã nguia nae, ùquĩ ndiqui bei eicuã nimbarã ã. ³⁵ Erimba ra siqui bei eã nguerecua rese. Nguiirĩ tuchi quiatu ra equereco bei nyiese. ³⁶ Se jembui mose mbae icuã si, eicuã nimbarã eã nda jẽingo cote. ³⁷ Abraham nducucha raque jẽ. Ùquĩ aicuate raque. ã jẽingo secheẽ isi turã eãte ã. Secheẽ jêucuayã nguia ã. Nyebe jẽingo nguiã seiquia serĩte ã. ³⁸ Ae Paba teacuquia seje nae, ùqui ño asenei senei nguiã jêje co. Ae jendu teacuquia jêje nae, ùquĩ ndese chõ jẽingo nguiã jẽ ã no, i que Jesús ee ra.

³⁹ —Abraham ño ureru resẽ. Urei resẽ, i que mbia Jesús je ra. Jesús que ñee ee cote ra. —Abraham nducucha turã mose jẽ, eĩ nguia nda jẽingo turã nguiã ña. Abraham ndui si. ⁴⁰ Dios que sembaaquiату ra. Dios quiarei ñee ñooño eã. Echeẽ ño asenei senei nguiã jêje co. Ùquĩ je chõ jẽingo nguiã seiquia serĩte ã. I ãte que Abraham quia seje ra. ⁴¹ Jendu rã si chõ jẽingo nguiã ã, i que Jesús ee ra. Mbia que ñee Jesús je cote ra. —Ureru ata ata eãte nyeresẽ. Dios mi ño ureru re, i que ñee Jesús je ra. ⁴² Jesús que ñeembe ee ra. —Dios jendu tuchi mose, eĩ nguia nda jẽingo nguiã nyesecua serese chã. Ae quiarei sembu. Se ae eã achu nguiã. ⁴³ ã jẽingo secheẽ andu sereãte ã. Nyebe jẽingo nguiã secheẽ icua aroneate ã. ⁴⁴ Aba checuayã nderecua rei jendu. Erese bei chõ jẽingo nguiã ã. Echeẽ jemumbayã mbei

chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheẽ achõ ño esenei senei nguiã mbia mbiirĩ irĩ querabe co. Ñee ñooñosa rerecua chõ aque re. ⁴⁵ Se quia acheẽ ñooño ãte rei nguiã jêje. Secheẽ jêucuayãte chõchĩ nguiã. ⁴⁶ Mbae icuã ngue asaã eãte ra. Ùquĩ jêicuate raque. Acheẽ ñooño ãte sequia co resẽ. ¿Mbaerã jẽingo secheẽ andu sereã neate ã nde? ⁴⁷ Dios quiato quia Dios cheẽ ñandu turã nguiã. Dios quiato eã ño jẽ nde. Nyebe jẽingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resẽ. Co aico ñee turã tuchi Paba rĩ co resẽ. Jẽ nguia jeñee icuã mbeite nguiã serĩ. ⁵⁰ “iSã mbia ñee turã serĩ jẽ!” ae eã ño nguiã se co. Paba quia siqui nguiã ñee turã turãte serĩ co. Ae quia ra mbia icuã mbasi. ⁵¹ Tacheẽ nyecua jêje. Ae secheẽ mumbayã nguia nae, ùquĩ nda amingo bei. Ùquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resẽ. ⁵³ ¿Nde ndeaquiату tuchi Abraham si re? Ae chee que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheẽ turã mose serĩ, mbia ra seanduchõ. Paba quia ñee turã mbei nguiã serĩ co. Ae je jẽingo ñee. “Dios urererecua” i raque erĩ. ⁵⁵ ã jẽingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheẽ ñooñote rei jẽ na si. Dios aicua tuchite. Echeẽ ndui chõ aico bei nguiã co. ⁵⁶ Abraham ngue seraarõ arõ mbei quia ra. “Tu rae”, i bei que equia ñimbia serĩ nda. Secuasẽ mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. —Cosete que Abraham mano ndesẽ. ¿Mañi ere mae erese re? Cincuenta años eãte nde resẽ, i que ra. ⁵⁸ Jesús que ñee ee ra. —Tacheẽ nyecua jêje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —iSita je Jesús nandechei jẽ! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

Jesús emo ndesayã mbucherõ

9 Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei

ra. ² Jesús chĩmbaaquiatu que ñee ee ra. —Urem-baaquiatu, çabate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. çAbate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã. ⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. ⁵ Seico mose íbii, aico mbia re-saete co, i que Jesús ra. ⁶ Jesús que ñinĩmbu íbii cote ra. Tuchu que esaã ngũendi je ra. Nguiti que eresayã ndesa rese cote ra. ⁷ —Eso nderuba irei cote. Ama Siloé eso eirei, i que Jesús eresayã je ra. (“Echĩmondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸ Hue jenda que nyuruira jate mae erese ra. Ae mae nguia erese nyii nae, ùquĩ ngue nyuruira tuchi mae erese cote ra. Eresa cherõ mose. —çCo resayã ño ache ache i quia nyii re? çAe chõ ere? i que mbia ñee ñee nyue ra. ⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra. ¹⁰ —çMañi nderesayã mae nde? i que mbia ee ra. ¹¹ Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹² —çMa nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra. ¹⁴ Ae mose Jesús eresayã mbucherõ nae, sábadu mose que ra. Tuchu que esaã, aque mose que ra. ¹⁵ —çMañi nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶ Fariseos mo ngue ñee nyue ra. —Ae eresa mbucherõ sábadu mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷ Fariseos que ñee si eresayã je ra. —Ae nembucherõ nae, çmañi ee re? çMañi ere quia nde erĩ co re? i que ra. Eresayã ngue ñee nda. —Dios chĩmondo que ae ra, i que eresayã nda.

¹⁸ Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rã erese, i que ra. ¹⁹ —çCo nderiirĩ co re? çEresayã nyobei nyii re? çEresayã nyaacuquia nyii re? çMbae emumae nguia co

cote re? i que ñee eru je ra. Esi je abe. ²⁰ Eru que ñee ee ra. —Co rei seriiĩ co. Eresayã ngue nyaacuquia rei ra. ²¹ Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe.

²² Judíos rerecua quia ñee nguia nyue nyii reaẽ. —Emo ñee turã mose Jesús rĩ, ùquĩ nandemombo bei mbia chumunuasa si. “Dios chĩmbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguiã ñee turã Jesús rĩ. Esi abe no. ²³ Nyebe eru riqui nguiã ñee ererecua je. —Jeñee nguia seriiĩ je. Etiarõte nyeresẽ, i ee. Esiquichete quia ñene.

²⁴ —Quiatuchu, i si que judíos rerecua eresayã je no nda. —Echeẽ turã Dios miĩ je. çJesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. ²⁵ Eresayã ngue ñee ee ra. —Aicuayãte se. Eicuãte ereae. Eaturãte ere no ae. Aicuayãte se. Seresayã ngue nyii ra. Co aico mae co cote. ùquĩ miĩ ño aicua nguiã co, i que eresayã judíos rerecua je ra.

²⁶ —çMañi equia ndeje re? çMañi nderesayã ira re? i si que eresayã je no nda. ²⁷ Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. çMbaerã jẽingo “echeembe” i seje ã nde? çJẽ abe jẽingose rete sembucherõsa rui re? i que eresayã judíos rerecua je ra. ²⁸ Ererecua que ñee icuãte ee cote ra. —Ae rui chõ ereicochĩ nguiã nde co. Moisés rui chõ ureico nguiã ure ã. ²⁹ Moisés je quiatu que Dios ñee nyii resẽ. ùquĩ ño ureicua nguiã ã. Ae nembucherõ nae, ma si quiatu ñi ae ru. Ae quia ureicuayãte nguiã, i que judíos rerecua ra. ³⁰ Eresayã ngue ñee ee ra. —Seresa que embucherõ ndesẽ. “Dios chĩmbu”, jenyẽ eã ñochĩ equia ã. Seresa mbucherõsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ùquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherõ nda. Emo abe ra ùquĩ saã eã. ³³ Dios chĩmbu eã mose, eĩ nguia nda mbae raã eãte nguiã ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia mosenda bei chõ ndeicuã ndiqui nguiã co. çMbaerã ereico urembaaquiatu sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguiã ñee eresayã je. —çDios rucucha ereicuate quia co re? i que ee ra. ³⁶ —çAba chõ Dios rucucha re? Aicua sete quia co, i que eresayã nda. ³⁷ —Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra. ³⁸ Eresayã ngue ngoi ngũiã ndese Jesús ji cote ra. —Aricua tuchi se cote, i que

Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ùquĩ mumae eã sacuã abe que achu ra, i que ra. ⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Uresayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jëicuã ambuchecuayã ndei. “Seaquiatute”, jenyechĩ equia ã. Nyebe aico nguiã jëicuã mbuchecua jëje co, i que Jesús judíos rerecua je ra.

Ovejas ucha cheẽ icuate

10 Jesús que ñee nda. —Tacheẽ nyecua jëje. Ae iqueã nguia oveja chiquesa rĩ nae, mbae mbuquiachãsa chõ ùquĩ nde. Echiquesa eã ñi ique ique mose. ² Ae ique ique quia oveja chiquesa rĩ nae, aque quia oveja raarõsa aque re. ³ Ae echiquesa saarõ nguia nae, aque ra echiquesa equia oveja raarõsa je cote. Eique sacuã. Oveja raarõsa cheẽ nda oveja icua ja. Ñee mii mii nda umbae oveja je. Oveja icua ja. Ae ra oveja nyoĩ usẽ erui. ⁴ Eraarõsa embusẽ ja mose etaron da si, ae rane nda ngata oso quia erẽta. Oveja ra nyoĩ ja quia erui. Echeẽ nguia eicuate nguiã. ⁵ Emo ndui ra echoĩ eã. Uchã ño nda emo si. Echeẽ nguia eicuayãte nguiã, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jëje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chõ ùquĩ nde. Nyebe ovejas eche siichã eã nguiã. ⁹ Oveja chiquesa chõ se re. Ae seicua quia nae, ùquĩ nda atequiatu bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra seicua quia siqui bei serese. ¹⁰ Mbae mbuquiachãsa quia ra tu mbae rirõ sacuã. Mbae mbutiã sacuã. Mbae iquia sacuã. Se quia ni achu nguiã mbia mingo bei sacuã. Mbia mbia tuchi nonde que achu ra. ¹¹ Oveja raarõsa rei se. Ovejas atequiatu bei quia co. Amano nda emingo bei sacuã. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacuã nda amano. ¹⁶ Ovejas mo abe que sembae no nda. A jenda eã ño ùquĩ nde. ùquĩ abe ra aru a. ùquĩ nda secheẽ mumbayã no. Sembae oveja ra chi ja serese cote. Se mii ño

nda asarõ ja cote. ¹⁷ Sesiquiche eã semana ndese. Sembae ovejas mingo sacuã. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰ —Aba checuayã siquite Jesús rese co resẽ. ¿Mbaerã jëingo echeẽ andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ùquĩ nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús osei chiã

²² Mbia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseĩte que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde rĩĩ. Echimbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra. ²⁵ Jesús que ñee ee ra. —Acheẽ ndei que jëje resẽ. Secheẽ jëñanuã ño nguiã ã. Paba quirãcuã je chõ aico nguiã mbia mae sayã naa naa co. ã ndese mae nda seicua nguiã ña. ²⁶ Acheẽ ndei que jëje nyii resẽ. Serimba eã ño jë nde. Nyebe jëingo nguiã secheẽ anuã. ²⁷ Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰ Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹ Nyebe judíos paama i nguiã ee. Sita que esirõ sirõ nda. —Jesús nandechei, i rei que ra. ³² Jesús que ñee ee ra. —Paba que sembuquirãcuã tuchi ra. Nyebe jemaie sayã asaã saã tuchi nguiã jëje. ¿Ùquĩ mo nii jëingo “nandechei” i seje re? i que Jesús judíos je ra.

³³ Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios rĩĩ ndesẽ. Dios eresaã saãte quia ure je co resẽ. Mbia si chõ ndaque nde, i que judíos Jesús je ra.

³⁴ Jesús que ñee ee ra. —Sã embesa ji riqui i no: “Jë ndei dioses, i que Dios ra”, sã embesa ji riqui i no.

³⁵ Embesa ji ñeeñoño aronea. “Dioses rei jë”, i que Dios ucheẽ nenei neneisa je ra. ³⁶ Dios que seirabo ra. Sembu que íbii cote ra. ¿Mbaerã jëingo paama i secheẽ mose re? “Dios riiĩ ño se re”, i mose re.

“Ndeicuãte chõchĩ Dios je”, jenye chõchĩ nguiã seje.

³⁷ Se mbae raã naa eã mose Paba rã si, ùquĩ mose quia

secheẽ jeñanua. ³⁸ Paba rã si mose, “coche ñene” jẽnye chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ûquĩ nda jẽicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarõ sacua, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchichĩ Jesús rĩ. Ichõiño eã ño equia ñee nande je reaẽ, i que mbia ñee nyue ra. ⁴² Mbia tubiriã ngue Jesús icuua huee ra.

Lázaro mano

11 Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ùquĩ nda. Betania jenda ja que ùquĩ nda. ² María rei aba mbushimbusa ichusẽsa Jesús i rese. Ua je que esi esi ra. Enongue quia erasi re. Lázaro, i que ee ra. ³ Nyebe echari mbia mo mondo nguiã Jesús mbiirandu sacua. —Ndequiato rasi que chi aque rĩ nda, i que echoi Jesús mbiirandu ra. ⁴ Jirandu mose que Jesús ñee cote ra. —Mano sacua eã ño erasi chi nguiã aque. Dios quirãcuã ndese mbia mae sacua ño erasi chi nguiã aque. Se abe sequirãcuã ndese mae sacua ño erasi chi nguiã aque, i que Jesús ra. ⁵ Jesús que nyesequa tuchi Marta rese ra. María rese. Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbaaquiato je cote ra. ⁸ Echimbaaquiato que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra. ⁹ Jesús que ñee ee ra. —Dios quiatu que sembu ra. Mbae raã naa sacua ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbaaquiato je ra. ¹¹ Aquere que ñee si uchimbaaquiato je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra ñumumba rei, i que echimbaaquiato ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiato je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbaaquiato je ra. ¹⁶ Tomás que ñee echimbaaquiato ataque je ra. —Nyao erese nande abe no. Sã mbia nandequia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoĩte co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilómetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacua. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiatu que siquichõ tuchúaa ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³ —Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ùquĩ nda mano ndaque, quera si rae. ²⁶ Ae seicua quia nae, ùquĩ nda uayã mbei. ¿Ùquĩ ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoĩ mbia chuchua ite re. Marta erobeishĩsa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³² María que ngasẽ Jesús je ra. Ngoi que nguíã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴ —¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jẽ! Nyesequa tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹ —¡Sita eatiquia jẽ-jea jẽ! i que Jesús mbia je ra. Marta que ñee Jesús cheẽ

mose ra. —¡Enete ra nande je jê! Curite que mano ndesê. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quti ra. Ñee Dios je. —Paba, secheẽ ngue erechandu. “Ïaanye”, ae bei quia ndeje co. ⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra. ⁴³ Jesús que ñeemombo Lázaro raaque je cote ra. —Lázaro, jechu usê! i que ra. ⁴⁴ Er-aaque que usê u juã cote ra. Eo cuasa resebe que usê nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵ Judíos que nyoï María rese, ùquĩ ngue mae ja Jesús rese ra. Lázaro mbuquera mose. Ûquĩ tubiriã ngue Jesús icua cote ra. ⁴⁶ —Jesús que Lázaro raaque mbuchurua nda, i que emo nyoï fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús rĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸ Nande ereachõ mose ra mbia siqui ja techĩ eruĩ re. ¡Roma jenda ra nandembae isichĩ ibi jê! ¡Dios chuchua ra embucoichĩ ngaẽ jê! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jêicuayã tuchichĩ nguia ã. ⁵⁰ Jendua eã ñochĩ equia ã. Aque mii ño nda mano nguia nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguia ùquĩ. Sacerdote rerecua tuchite quiatu ngue ae re. Nyebe Dios embucheẽ nguia. —Jesús ra mano judíos mingoa ja sacua. ⁵² A jenda achõ je eã nda Jesús mano. Dios ririĩ mangue chooñoa jenda je abe chõ nda Jesús mano nguia. Dios ririĩ munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandeiquia rei jê! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbaaquiato rese cote ra. ⁵⁵ Fiesta de la pascua que ecurubite ra. Nyebe judíos nyoï choi ja nguia Jerusalén. Suchamo jenda emo emo ngue nyoï jate ra. Pascua nonde que echoi huicua mbitirõ sacua nda. ⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jêje re? i que mbia ñee ñee nyue Jesús rĩ nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ mii, i que sacerdote rerecua ñee nyii ra. Fariseos abe no.

María aba mbushimbusa ichusẽ Jesús i rese

12 —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio mii Jesús chiurã nda. Marta que echurã mondo mondo ee ra. Mbia je abe. Lázaro abe que chĩ quiaru erese ra. ³ María que aba mbushimbusa queru Jesús je cote ra. Medio litro. Nardo, i que ùquĩ je ra. Mbae isiquia mumba tuchi que ùquĩ nda. María que eichusẽ Jesús i rese ra. Ua je que esi esi ra. Tuchua mbushimbu ja que ra. ⁴ Judas Iscariote abe que siqui ra. Simón ndiriĩ ngue aque ra. Jesús chimbaaquiato mo ndei que aque ra. Ae quiatu que Jesús mee mbia icua je emo mose cote ra. Ae que ñee nda. ⁵ —¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacua, ùquĩ mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. —¡Erecheẽchĩ nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aico bei eã nguia jêje a, i que Jesús ra.

Lázaro nandeiquia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoï jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. —¡Lázaro abe nandeiquia rei jê! i que ererecua ñee nyue ra. ¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ûquĩ mbei bei que nyii ra. Jesús oso Jerusalén

¹² Mbia tubiriã ngue nyoï Jerusalén nda. Pascua raã naã sacua huee. Jesús abe que oso ra. Mbia que jirandu erese ra. Ecuasẽ nonde. ¹³ Mbia yate que Jesús cuasẽ mose ra. Sindo que ecuruchoi erobeishĩ nda. Mbia que tasẽ tasẽ tuchi ra. —Eturã tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro ririĩ mo je ra. Nyui que eato ra. Embesa ji rui si. ¹⁵ I que embesa ji quia nyii ra:

¡jêireĩ ireĩchĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiato que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiato eicua ramo cote ra. ¹⁷ Jesús que Lázaro mbuquera, ùquĩ ndese maesa que mbia

mbiirandu randu tuchi quia ra. ¹⁸ Nyebe mbia nyoĩ ja tuchi nguiã Jesús robeishĩ. Jirandure Lázaro raaque mbuquera rese. ¹⁹ Fariseos que ñee ñee si nyue no nda. —Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyoĩ Jerusalén nda. Pascua raã naa Dios je. ²¹ Ūquĩ ngue nyoĩ ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²² Felipe que oso Andrés mbiirandu ra. Ūquĩ ja que nyoĩ Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jėje. Ibasĩ eĩ tiquia eã mose ra ia eã mbei. Chĩ chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵ Ae nduate quia nyiese nae, ūquĩ nda nyoĩ eãte ibate. Ae ndua eãte quia nyiese nae, ūquĩ nguia ra nyoĩ ibate. Siqui bei sacuaã huee. ²⁶ Ae secheẽ mumba sereãte quia nae, sã ūquĩ ndiqui bei serui. Ae ra aico nae, huee ra ūquĩ abe riqui. Ae secheẽ mumba sereãte quia nae, ūquĩ nni nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. Ñ sacuaã ño ngue achu resẽ. Sembasi sacuaã ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ūquĩ mose que echeẽ mo ndu ee ibate si ra. —Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chĩ Jesús rese, ūquĩ. —Ama ndieu ereae, i que mbia ra. —Tei. Angel mo ño ngue ñee nguiã Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacuaã ño ngue ñee ndesẽ. ³¹ Paba ra seicuasa reã mbasi ja cote. Mbia icua nderecua ra Paba mombo ibi jenda cote. ³² Sembucha mose mñi ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³ —Mbia ra seiquia mñi sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiato quiatu. Jendesaebe mbirĩ. Tata rendi rãte aico co. Tata rendi siqui mose jendese, ijengata turã ño nguia jẽ! Seicuasa reã ño siqui nguiã itondaru. Ūquĩ quiachã ño nguiã ūquĩ. ³⁶ Tata rendi raãte aico co. Seico beebe mose jendese,

seicua tuchi rã. Eĩ nda jėjeingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸ Ae Isaías mbesa mñi nyii nae, ūquĩ na si chõ ngue mbia Jesús icuayã cote ra. Eĩ ngue Isaías embesa mñi nda:

Sererecua, ae uresenei senei nguia mbia je nae, ūquĩ mbia icua sereãte quia ã.

Ndequirãcuã mbia tea sereãte quia ã, i que Isaías embesa ra. ³⁹ Mbia que Jesús icua aroneate ra. Isaías chimbasa rã si chõ ngue ra. Eĩ ngue Isaías embesa mñi no nda:

⁴⁰ Dios que mbia chiã matã nda.

Nyebe eriqui mbae icuayãte ã.

Nyebe eriqui nguiã uba eãte serese.

Se embitorõ sacuaã,

i que Isaías chimbasa huĩ nda. ⁴¹ Isaías que Cristo quirãcuã tea nyii ra. Nyebe ã mbesa mñi nguiã Jesús rĩĩ a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiato ngue fariseos si re. —iFariseos ra nandemombochĩ mbia chumunuasa si jẽ! i que ra. ⁴³ —Dios cheẽ nandemumbayã jẽ, iã ñochĩ ngue re. —iMbia cheẽ nguiato nandemumbayã jẽ! i chõchĩ ngue re.

Secheẽ nguia ra seucuayãsa mbasi, i Jesús

⁴⁴ Jesús que ñee irãtã mbia je ra. —Ae seicua quia nae, se mñi icua eã. Paba abe icua. Ae sembu ibate si.

⁴⁵ Ae mae nguia serese co nae, Paba abe rese mae.

⁴⁶ Mbia resae sacuaã ño achu nguiã co. Eĩ nda seicuasa siquiã itondáruu. ⁴⁷ Jėjeingo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacuaã ño achu nguiã co. Mbia mbasi sacuaã eã ño achu nguiã. ⁴⁸ Secheẽ nguia ra seucuayãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu chooño nguiato ngue re. ⁴⁹ Se ae eã ño acheẽ nguiã mbia je. Paba quia ñee nguiã seje. “Eĩ ere mbia mbaaquiato quiato”, i que Paba sembu ra. ⁵⁰ Paba cheẽ ndei mbia mingo beisa. Echeẽ mumbayã mose. Nyebe aico nguiã Paba cheẽ nenei nenei co. Secheẽ ae eã ño ñene.

Jesús mbia i irei irei

13 —Namo jiri ra Paba sererao ibate ibi si cote, i que Jesús uchiangui re ra. Nyesequa tuchi que equia uchimbaaquiato rese ra. Mano nyee. ² Jesús que quiaru u uchimbaaquiato rese isa ra. Pascua nonde. —Jesús emondo mbia icua je, i que diablo Judas Iscariote je nyii ra. Simón ndiirĩ ndei aque. ³ Jesús que mbae

icua jate ra. —Dios si chõ achu nguiã co. Asobe ra erea. Paba que uquirãcuã mee tuchi seje ra, i que Jesús uchiangui re ra. ⁴ Quiaru jare que Jesús juã huïrao mbui ra. Ngũmbi que echucua toalla je ra. ⁵ I que eichusẽ mbae mo ye ra. Uchimbaaquiato i que eirei irei ra. Mbïru iru que toalla je ra. ⁶ Pedro i nda eirei nguiã cote chã. —Sererecua chõ nde resẽ. ¿Mañi ere ra sei irei re? i que Simón Pedro ñee Jesús je ra. ⁷ Jesús que ñee ee ra. —Ã ereicuayãte. Ae asaã saã nguia ã. Ereicua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. —Ae echasu quiite, equishĩte ũquĩ ndesẽ. Jẽi miñ ño tairei. Jẽquishĩ ja eãte raque. Aque miñte raque echiã nondei, i que Jesús uchimbaaquiato je ra. ¹¹ Jesús que jirandu Judas rese ra. Nyebe eriqui nguiã ñee. —Aque miñte raque echiã nondei, i.

¹² Ei irei jare que huïrao mingue cote ra. Ngoi si que ra. Ae ñee nguiã nguesenda je. —Jẽi que airei, ¿ũquĩ jẽicuate rei quia re? ¹³ Nyebe jẽingo nguiã ñee seje. “Sererecua, Sembaaquiatusa”, i seje. Coche jeñee nguiã seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que ateacuquia jẽje resẽ. Serui sichõ jẽingo emo i irei irei ae. ¹⁶ Tacheẽ nyecua jẽje. Se rei jenderecua. Se chõ aemondo mondo nguiã mbia mbaaquiato sacua. Jengasu ra jẽsaã saãchĩ sesi jẽ. ¹⁷ Jẽ secheẽ icua mose, secheẽ mumbayã mose, jẽya tuchi ra jẽingo. ¹⁸ Jẽ ja je eã aico nguiã ñee a. Jaẽirabo que se resẽ. Jaẽicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jẽ! Eicuã nonde seje. Eicuã mose seje, jẽ nda seicua cote. “Dios nducucha” jenyete tuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ũquĩ nda seisi se abe. Ae seisi quia nae, Paba abe isi rae, i que Jesús uchimbaaquiato je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã je cote, i que ñee nyecua uchimbaaquiato je ra. ²² Echimbaaquiato que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que chĩ ngoi ejii ra. ²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embiãcuã

tuchi cote ra. Jesús que ñee ee ra. —Ae ra eresaã nae, ¡ũquĩ esaã jeichõ jẽ! i que Jesús Judas je ra. ²⁸ —¿Mbae rĩĩ Jesús riqui ñee Judas je re? i que eataque ra. Mbia iranuã ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i reĩ Jesús quia Judas je uchimbaaquiato je. —Mbae mo emondo rã mbaecha reã je, i reĩ Jesús quia Judas je uchimbaaquiato mo je. Echeẽ ngue eicuayã ja ra. ³⁰ Mbichae ure que Judas si usẽ cote ra. Itondaruqui rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. ³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. ³³ Seresenda, aico mbĩrĩ ño nguiã jendese a cote. Serequia rei ra se cote. Acheẽ ngue judíos je, ũquĩ sí aico ñee jẽje a. Ae ra aso nae, huee jengasẽ aroneãte. ³⁴ Aico secheẽ yasu nenei jẽje a. Secheẽ mumbayã sacua. ¡Jenyesequia ja jenyiese jẽ! Sã ñi aico nyesequia tuchi jendese no. ¡Eĩ jenyete nyesequia tuchi jenyiese jẽ! ³⁵ Jenyesequia tuchi mose jenyiese, mbia ra ñee ja tuchi jenĩ. “Eĩ nguia Jesús chimbaaquiato quia re”, i ra mbia jẽje, i que Jesús uchimbaaquiato je ra.

Pedro ra ñee ñooño serĩ, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”, erechĩ nguiã seje. Co isa ra erecheẽ ñooño serĩ tres veces. “Jesús aicuayãte resẽ”, ere chooño nda serĩ nguira cheẽ nonde, i que Jesús Pedro je ra.

Jesús rei ñeenda Dios icha

14 Jesús que ñee uchimbaaquiato je ra. —Jẽya eã eriquichĩ nguiã. Dios jẽicua chõ ae. Se abe jẽicua chõ ae. ² Ae Paba riqui, huee tuchia tubiriãte. ũquĩ eande rae, eĩ nda acheẽ eãte rei jẽje. Aso ra tucharã naã jẽje. ³ Jenyucharã naa jare ra achube jendea cote, jenderao bei serese cote. Jẽ nda jẽingo bei serese pee cote, ae ra aico. ⁴ Ae ra aso, huee jẽicuate resẽ. Ñeenda abe jẽicuate resẽ, i que Jesús ee ra. ⁵ Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia mingo beisa rei se. Ae ra seicuayãte, ũquĩ nda ngaseã mbei Paba je. ⁷ Jẽ

seicua mose, Paba abe jëicuate quia ã. Jë Paba jëicuate quia cote resë. Jemaë ngue erese namo ndesë, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ûquĩ mii ño ureico nguiã ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayãte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resë. Paba abe riqui serese co. ¿Ûquĩ ereicuayãte re? Ae aico ñee jëje nae, secheë ae eã ño ùquĩ nde. Paba riqui serese co. Ae abe riqui mbae rã naa serese co. ¹¹ Secheë jëicua rã. Co aico Paba rese co. Paba abe riqui serese co. “Nyia”, jenye eã mose secheë je, sechisaã je chõ “nyia” jenye.

¹² Tacheë nyecua jëje. Ae seicua quia nae, ùquĩ nda sechisaã saã saã se rã si cote. Ûquĩ nda mbae saã saã tuchi sesi. Co quia aso nguiã Paba rea se co. ¹³ “Mbae emondo ure je” i mose seje, amondo ra jëje. Jë seicua mose. Eĩ ae ra Paba quirãcuã ndeacuquia mbia je. ¹⁴ “Mbae emondo ure je”, i mose seje, amondo ra jëje. Jë seicua mose.

Espíritu Turã tamondo jëje, i Jesús

¹⁵ Jenyesequa mose serese, secheë jemumbayã ae. ¹⁶ Tacheë Paba je. “Espíritu Turã emondo sechim-baaquiatu je”, ae ra Paba je. Espiritu Turã nda siqui bei jendese cote. Jëquiato tuchi ra ae cote. ¹⁷ Espiritu Turã nda ñee ñoñoã jëje, jembaaquiatu quiatu. Ae ra siqui eã tuchi Dios quiatoã ndese. Espiritu Turã icuayãte quia ñe ne. Jë nguia jëicuate nguiã. Co Espiritu turã ndiqui jendese co. Siqui bei ra jendese.

¹⁸ Aso raque quia co. Esi cheecha rã nda jëingoã. Achube ra jembirõ. ¹⁹ Aichite aĩ oso a cote. Dios icuasa reã nda mae eã serese cote. Jë nguia nda jemaë nguiã serese. Aquera si ra siqui bei nonde. Jë abe ra jëingo bei serĩ cote. ²⁰ Espiritu Turã tu mose ra jëicuate cote. “Jesús riqui ngu rese co. Æ ureico Jesús rese ã. Jesús riqui urerese co”, jenye ra serĩ cote. ²¹ Ae secheë icua quia nae, ae secheë mumbayãte quia nae, ùquĩ nguia nyesequate nguiã serese. Paba nyesequate ùquĩ ndese. Se abe achesequate ùquĩ ndese. Tachecua ñimbucha ùquĩ ndese, i que Jesús uchimbaaquiatu je ra. ²² Judas, i que echimbaaquiatu mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erechecua ure je re? Mbiam je nyecua rocoĩ, i que Judas ra. ²³ Jesús que ñee ee ra. —Ae nyesequate quia serese, ùquĩ secheë mumbayãte quia ã. Paba abe ra nyesequate ùquĩ ndese. Paba ra siqui ùquĩ ndese. Se abe ra aico ùquĩ ndese. ²⁴ Ae nyesequa eãte quia serese, ùquĩ secheë mumba mumbate quia ã. Secheë ae eã asenei senei nguiã jëje co.

Paba cheë ño asenei senei nguiã jëje. Ae chõ sembu nguiã.

²⁵ Seso nonde aico co renei nenei jëje a. Sereco mosebe jendese. ²⁶ Paba ra Espiritu Turã mondo jëje secheë ndui si. Jëquiato tuchi ra Espiritu Turã cote. Ae ra jembaaquiatu tuchi mbae ja rĩ cote. Ae ra jemundua tuchi secheë ndese cote. ²⁷ Co aso quia co. Jëyayã eã taemingoa. Seicuaa reã na si eã taemingoa. Ûquĩ nguia eya eãte riqui nguiã. Sã seyate se no. Eĩ tae jembia mingoa. ¡Jëya bei chõ jë! ¡Jësiquicheã ño jë! ²⁸ Aso ra Paba rea cote. Aquere ra achube jembirõ. Ûquĩ ndese que jëirandu resë. Jenyesequa mose serese, eĩ ndei ra jëyate secheë ndese. “Taso Paba rea”, i mose. Ae quiarei i tuchi sesi. ²⁹ Seso nonde aico ñee tuchi jëje a cote. “Ñee ñoñoã tuchi quia equia re”, jenye tuchi ra seso mose cote. Huee ra jë seicua tuchi cote. ³⁰ A nda aicobe ñee ñee jëje chã. Diablo quia tu nguiã co. Mbiam icuã nderecua ru quia co. Ae quiarei equirãcuã neã jiri sesi. ³¹ Paba cheë ndui si taico. Mbiam seiquia arondete raque. “Nyenesequa tuchi quia equia ngu rese re”, i ra mbiam seje cote. Paba cheë mumbayã mose. Jëhuã. Nyao, i que Jesús uchimbaaquiatu je ra.

Jesús rei ira i rã

15 Jesús que ñeembe uchimbaaquiatu je ra. —Se rei ira i rã. ² Paba rei ira raarõsa rã. Ira rãquiã ndibisho ia eã mose, nyisia rae. Erãquiã ia mose, saarõ turã ndae. Mbeerera rera rae. Embitirõ sacua. Ia tuchi sacua cote. ³ Jë ngue secheë jëisi turã ndesë. Nyebe Paba jembitirõ secheë je resë. ⁴ Jëingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ jenye ra jë. Mbae turã nda jësaã eã jë ae. Siquiã mose ñimbucha serese. ⁵ Se rei ira i rã. Erãquiã na ndei jë. Jëingo mose ñimbucha serese, seico mose ñimbucha jendese, jë-turã tuchi ra jëingo cote. Jë ae ra mbae turã jësaã eã, siquiã mose ñimbucha serese. ⁶ Ae siquiã ñimbucha serese nae, ùquĩ nda siqui ira rãquiã sia ji rã. Eiru mose ra mbiam emunua nua. Eréi sacua. ⁷ Jëingo bei mose serese, jeñee nda amumbayã. “Mbae embu ure je”, i mose, amondo ra jëje. Jëtesareia mose secheë si. ⁸ Jëingo turã mbei mose, mbiam ra ñee turã turã mbei Paba rĩ. Jëingo turã mbei mose, “Jesús chimbaaquiatu tuchi quia eriqui re”, i ra mbiam jeni. ⁹ Sã Paba riqui nyesequa serese nae, eĩ ae si equia nyesequa jendese co. Jëingo bei ñimbucha serese. Eĩ nda achesequa bei jendese. ¹⁰ Paba cheë amumbayãte quia co. Nyebe Paba riqui nguiã nyesequate serese co. Jë secheë mumbayã mose, achesequa bei tuchi ra jendese. ¹¹ Aico ñee jembaaquiatu co. Jembiam sacua. Sã seyate se no, se rã si ra jëya.

¹² Æ ndei secheë ã: ¡Jenyesequa tuchi quia jenyese jë! Sã aico nyesequa tuchi jendese no. ¹³ “Se tamano se-

quiato ribishorō”, i mose emo, aque quiarei nyesequa tuchite uquiato rese. ¹⁴ Sequiato rei jē, secheē mumbayā mose. ¹⁵ “Serimba” aeā nda jēje cote. Ererecua quiatu “sequiato” i āte nguiā ngūimba je. Nēe ja eāte ngūimba je. Sā eriqui nēe ja uquiato je no. Se quia nī Paba cheē asenei senei jate nguiā jēje. Nyebe “sequiato” tae jēje cote. “Serimba” i rocoī. ¹⁶ Jē ngue seirabo eā ndesē. Se quiatu ngue jaēirabo nguiā. iMbae turā nō jēsaā saā mbei quia seje jē! iJenyisaā nda uachī jē! Jē ngue seicuate. Nyebe jē “mbae mo embu ure je”, i mose Paba je, mondo ra jēje. ¹⁷ Ā ndei secheē jēje ā: iJenyesequa tuchi quia jenyiese jē!

Mbia ataque Jesús rimba ucuayā

¹⁸ Dios icuasa reā nda jēucuyāte cote. iJēicua quiatu jē! “Eī ngue equia Jesús ucuayā nyii resē”, jenyē ra cote. ¹⁹ Jaēirabo que se ra. Nyebe jēingo nguiā Dios icuasa reā na eā. Nyebe eriqui nguiā jēucuyāte ā. Jē ūquī na mose, eī nda eriqui turāte rei jendese. ²⁰ Acheē ngue jēje nyii, iūquī ndese jendua jē! iJengasu ra jēsaā saāchī sesi jē! Mbia icuā mose seje, jēje abe ra eicuā. Mbia secheē mumbayā mose, jē abe cheē mumbayā ndae. ²¹ Serīī nda Dios icuasa reā jeī jeī jēje. Dios icuayāte quiatu nguiā ā. Nyebe ra eicuā icuāte jēje. ²² Achu que mbia mbaaquiātu quiatu ra. Nyebe ra Dios eicuā tea chooñoā cote. Eī nda Dios eicuā tea chooño ndei. Se embaaquiātu eā mose. “Ureicuā ureicuyāte quia ā”, i aronea nō emo cote re. ²³ Ae seucuyāte quia, Paba abe ucuayāte equia ā. ²⁴ Mbia mae sayā ngue ateacuquia tuchi rei ee ra. Sechisaā nda mbia mo saā eā. Eī nda Dios mbia icuā tea chooño ndei. Sechisaā ndese mae eā mose. Sechisaā ndese mae ndaque, seucuyā nō nguiā ā. Paba abe ucuayā nō nguiā ā. ²⁵ Mbia riqui seucuyāte ā. Sā embesa ji riqui nēe no: “Mbia seucuyāte. Se mbae icuā asaā eāte raque”, sā embesa ji riqui i no. Ūquī iquechī cote. ²⁶ Seso mose Paba rea, Espiritu Turā tamondo jēje. Jēquiatorā. Ae ra tu Paba si jēje. Ae ra nēe nōoñoā jēje. Ae ra jembaaquiātu quiatu turā serīī. ²⁷ Nyii mosenda bei chō jēingo nguiā serese. Nyebe ra jē abe mbia jembaaquiātu quiatu turā serīī, i que Jesús ra.

16 Jesús que nēe i i uchimbaaquiātu je ra. —A aico nēe jēje a. Eī nda jēhui eā sesi, mbia icuā icuā mose jēje. ² Mbia ra jendiquisā quisā, jēso jēso mose mbia chumunuasa. “Ā ureico rei nguiā mbae turā naa naa Dios je ā”, i ra mbia jēiquia iquia mose. ³ Seicuyāte quia nēe ne. Paba abe icuayāte quiatu nguiā ā. Nyebe ra eriqui mbae raā icuā icuā jēje. ⁴ Eī ae chō nguiā nēe jēje co. Eī nda jendua secheē ndese, mbia icuā icuā mose jēje. “Jesús cheē iquechī cote”, jenyē ra cote.

Espiritu Turā nda jembaaquiātu quiatu, i Jesús

Acheē jei eā ngue jēje ūquī cose resē. Aicote quiatu ngue jendese re. ⁵ Co quia asote nguiā Paba rea co cote. Ae sembu. “iManguete ra ereso mangue re?” i eā nōchī jemo seje. ⁶ Se “taso” i mose jēje, jēya eāte chō jēingochī nguiā ā. ⁷ Tacheē nyecua jēje. Coche aso nguiā jendecha co. Espiritu Turā nda ambu jēje. Jēquiatorā. Ae ra siqui jendese. Eī nda Espiritu Turā tuāte rei. Seso eā mose jēsi. ⁸ Espiritu Turā tu mose ra nēe nēe mbia je. “Mbia icuā ja chō nēe ne. Jēingo turā Dios resa rae. Dios ra Jesús icuasa reā mbasi ja”, i ra Espiritu Turā nēe mbia mbaaquiātu quiatu. ⁹ “Jē nguia Jesús jēicuyāte nguiā ā. Nyebe jēicuā ndiqui nguiā”, i ra Espiritu Turā nēe mbia mbiirandu. ¹⁰ Aso ra Paba rea cote. Mbia ra mae eāte serese cote. Nyebe ra Espiritu Turā mbia mundua mbae turā ndese cote. ¹¹ “Dios ra diablo mondo tata cuasu. Nyebe ra mbia icuā abe mondo tata cuasu”, i ra Espiritu Turā nēe mbia mbiirandu.

¹² “Taembaaquiatube jiri”, ae rei se. Jēicuyā jeite chō ndae. ¹³ Espiritu Turā tu mose, ae ra jembaaquiātu quiatu turā mbae ja rese. Nēe nōoñoa tuchi rae. Ucheē ae ra esenei seneiā. Paba cheē nō esenei senei nguiā. Mbae tu nonde ra Espiritu Turā jembiiirandu erese. ¹⁴ Espiritu Turā nda jembaaquiātu quiatu secheē nī. Ūquī mose ra mbia nēe turā turā serīī cote. ¹⁵ Ae Paba senei senei nguia, ūquī asenei senei nguia se abe co. Nyebe ra Espiritu Turā jembaaquiātu quiatu secheē nī.

Jēya eande nyii ra jēya tuchi cote, i Jesús

¹⁶ Namō jiri ra jemaē eā serese cote. Aquere ra jemaembe serese cote. Aso ra Paba rea, i que Jesús uchimbaaquiātu je ra. ¹⁷ Echimbaaquiātu que nēe nēe nyue ra. —iMbae i Jesús quia re? “Namō jiri ra jemaē eā serese cote. Aquere ra jemaembe serese cote. Aso ra Paba rea”, i chōchī. iMbae ūquī nde? ¹⁸ iMbaerā eriqui “namō jiri” i re? iMbae rīī eriqui nēe nde? Nandeiranuā tuchichī, i que echimbaaquiātu nēe nyue ra. ¹⁹ Jesús que jirandu erese ra. —“Ndecheē embiasa jiri ure je” ijenye sete seje re? “Namō jiri ra jemaē eā serese cote. Aquere ra jemaembe serese cote”, ae que jēje, iaque jēicuyāte re? ²⁰ Tacheē nyecua jēje. Namō jiri ra jenyeseo. Jēya eāte rae. Sequiatoā nda eya tuchi. Aquere ra jēya tuchi cote no. Jēya eande nyii. ²¹ “Serasichī nda cote re”, i ra esi ndua ndua āquē nyaacuquia serīī mose. Eyayā tuchi ae. Āquē nyaacuquia mose cote, eya tuchi ra cote. Ndua eā tuchi ra ngasi rese cote. Eya tuchi chō nda nguiirī ndese cote. ²² Āquē ndasi rā nō jē nde. Jēya eāte namō. Setube mose jendea, jēya tuchi ra cote. Emo nda jembia eā eā cote. ²³ “Ndecheē embiasa jiri ure je”, jenyē eā nda seje cote. Tacheē nyecua jēje. Jē seicuate. Nyebe jē “mbae mo

embu ure je", i mose Paba je, mondo ra jêje. ²⁴ "Mbae mo embu ure je. Jesús icuasa je", jeny eã mbeite equia Paba je ã. Jeñee ee. Jeñee mose ee, mondo ra jêje. Jêya tuchi ra cote.

Jesús quirãcua tuchi ibi jenda si re

²⁵ Acheẽ tuchi rei que jêje ra. Secheẽ ngue ambiasa tuchiã jiri jêje ra. Emo mose jiri quia ra secheẽ ambiasa tuchi jêje cote. Paba riẽ. ²⁶ Aque mose ra jeñee Paba je. "Mbae embu rã ure je", jeny ra Paba je serĩ. Aque mose ra acheẽ eã ee jenii cote. Jê ae chõ nda jeñee ee cote. ²⁷ Paba sí nyesequa tuchite quia jendese co. Jenyesequate quiatu nguiã serese ã. "Dios que Jesús mondo nande je resẽ", jeny quiatu nguiã seje ã. Nyebe Paba riqui nguiã nyesequa tuchi jendese. ²⁸ Paba si que achu íbii resẽ. Asobe ra ibi recha cote. Paba rea ra asobe ibátee cote, i que Jesús ñee uchimbbaaquiato je ra.

²⁹ Echimbbaaquiato que ñee ee ra. —Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. ³⁰ Mbae ereicua ja tuchi quiatu quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. "Paba si chõ erechu nguiã co", ure equia ndeje ã, i que echimbbaaquiato ee ra. ³¹ Jesús que ñee ee cote ra. —Jê ngue seicuate rei nguiã. ³² Seandu rã se. Namojiri ra jeñimbuchao chao oso sesi. Jêso ja ra serecha namo. Se ae eã nda aico. Paba riqui nguiã serese co. ³³ Jê seicua mose, mbae ra jembia eã eã. Nyebe aico nguiã jembiirandu randu beite co. Mbia icuã icuã mbeite ra eriqui jêje a íbii. ¡Jeñimbirãcuã jiri quia jê! Se quia sequirãcuã tuchi ibi jenda si re, i que Jesús ñee uchimbbaaquiato je ra.

Sechimbbaaquiato eteaquiato, i Jesús Dios je

17 Jesús ñee jare uchimbbaaquiato je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã eteacuquia mbia je cote. Eẽ nda se abe ndeturã ateacuquia mbia je. ² Nde chõ ngue semii mbia rerecuarã, Paba. Mbia mingo bei sacuaã. Mbia que eremee seje, ùquĩ mingo bei sacuaã. Se rei nderucucha. ³ Paba, nde mii ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ùquĩ nda siqui bei. ⁴ Ndeturã ngue ateacuquia mbia je ra. "Ã esaã íbii", ere que seje, ùquĩ ngue asaã ja cote ra. ⁵ Paba, seturã eteacuquiabe mbia je. Cose ndare rã. Mbae eã mosenda rã. Asobe ra siqui nderese. M Sã ndeturã ereteacuquia mbia je nae, seturã abe eteacuquia mbia je.

⁶ Mbia que eremee seje, ùquĩ ngue ambiirandu tuchi nderese ra. Nembae rei que nyii ra. Eremee ngue seje cote ra. Ndecheẽ ngue emumbayã nda. ⁷ Nde chõ

ngue sembaaquiato quiatu nguiã, Paba. Ndecheẽ ae chõ ã nde. Secheẽ eã ño ñe ne. Ùquĩ ngue sechim-bbaaquiato icuate ra. ⁸ Eresenei senei ngue seje, ùquĩ ngue asenei senei ja ee ra. Nandecheẽ ngue eisi ja turãte ra. "Paba si que Jesús ru ra. Paba que embu ra", i equia nderĩ ã. ⁹ Sechimbbaaquiato eteaquiato, Paba. Seicuaa reã je eã ño aico nguiã "eteaquiato" i ndeje. Ae eremee seje nae, ùquĩ je chõ aico nguiã "eteaquiato" i ndeje. Nderimbate quia ñe ne. ¹⁰ Ae nderimba nae, serimba chõ se abe re. Ae serimba nae, nderimba chõ ùquĩ no nde. Serimba riqui ñee turã mbei serĩ ã. ¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiato, Paba. Ae eremee seje, ùquĩ eteaquiato ndequirãcuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae. ¹² Ae eremee seje, ùquĩ ngue ateaquiato quiatu quia ndequirãcuã je ra. Seico mose íbii. Emo ngue quiachã eãte sesi ra. Aque mii nda quiachã. Embesa ji cheẽ ndui si ra aque mii quiachã. Huicuaã je. Emo ngue quiachã yã cote ra. ¹³ Aso ra nderea cote. Seico beebese mose íbii, aico ñee ñee ndeje serimba riẽ a. Ì nda eya quiatu chi a. Sã seyate se no. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ "Serimba erao ibi si", ae eã ño nguiã ndeje co, Paba. "Eteaquiato diablo si", ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembaerã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, eẽ ae si chõ nguiã serimba mondo mondo mbia mbaaquiato quiatu co. ¹⁹ Aico ñimondo tuchi ndeje co, Paba. Mano sacuaã serimba je. Ì nda serimba abe ñimondo tuchi ndeje.

²⁰ Æ nii achõ eã aico ñee ndeje. "Eteaquiato" i ndeje. Æ nda secheẽ senei senei emo je abe cote. Ùquĩ abe ra seicua cote. Serimbarã. Ae ra seicua icua nae, ùquĩ abe eteaquiato. ²¹ Mbae mii ndese ja chõ ùquĩ emundua ndua mingo. Mbae mii naanguia tuchi emingo nanderese, Paba. Sã ereico serese no nae. Sã aico nderese no nae. Eẽ nyere si ùquĩ mingo mbae mii na. Eẽ nda mbia seicuaa reã ñee serĩ. "Dios chimbu quia eriqui re", i nda mbia ñee serĩ ña. Seicuaa siqui mose mbae mii ndese. ²² Ndeturã ngue eremee seje, eẽ ae que seturã mondo seicuaa je ra. Eẽ nda eriqui mbae mii na. Sã nandeico mbae mii na nande no, Paba. ²³ Nyebe aico nguiã seicuaa rese co. Nde ereico serese co no. Nyebe seicuaa riqui mbae mii na co. Eẽ nda seicuaa reã ñee nderĩ. "Dios quia Jesús mbu quia reaẽ. Dios quia nyesequa quia Jesús icuasa rese re. Jesús rese rã si nyesequa", i nda mbia ñee nderĩ ña. ²⁴ Paba, serimbarã ngue eremee seje. Ae ra aso, sã echoi serea siqui bei huee serese cote. Ndecheẽ turã andu sacuaã serĩ huee. Erecheẽ turã mbeite serĩ. Ibi eã mosenda bei

chõ ereico nguiã nyesequa serese co. ²⁵ Ndeturã tuchi, Paba. Seicuasa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderiã. ²⁶ Arerenei nenei tuchi que serimba je ra. Tarerenei nenei tuchi be ee. Eĩ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

Mbia icuã ngaẽ Jesús ruruchoi

18 Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiatu rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiatu rese. Nyebe Judas riqui nguiã hue icuate. —Jesús tateacuquia checuayã mbia je, i que Judas ra. ³ Nyebe Judas mbia ruruchoi nguiã huee Jesús isi sacuaã. Soldados que ecuruchoi ra. Policía jenda abe que ecuruchoi no nda. Sacerdotes rerecua chimondo rei policía. Fariseos chimondo abe no. Ûquĩ ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite qiti ra. Ngoi ngoi chee que echoi ra. ⁷ —¿Aba rea jenyu quia co re? i be que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequia mose, sererao se ae. Sã seresenda chichõ, i que Jesús ee ra. ⁹ —Ae Paba mee seje serimbarã, Ûquĩ mo quiachãyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰ Simón Pedro que uchuuru siqui tiquise ra. Sacerdote rerecua rimba rese que tiquise rerequie requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra. ¹² Soldados que Jesús isi cote ra. Soldados rerecua rese. Policía rese. Ûquĩ ja que Jesús isi ra. Nyucua que suruchoi ra. ¹³ Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerecua aque mose ra. ¹⁴ Caifás sí quia que ñee nyii ra. —Aque mĩ ño nda mano nguiã nande ja je chã, i que judíos je nyii ra.

Jesús aicuayãte, ichõiño Pedro

¹⁵ Mbia Jesús ruruchoi mose que Simón Pedro nyoĩ erui ra. Jesús chimbaaquiatu nongue rese. Co mĩ ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicuee. ¹⁶ Mbia que Pedro siquisã mĩ etaronda robei ra. Sacerdote chũcua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaque Pedro je ra. Echiquesa raarõsa. —Tei, ichõiño ngue Pedro ee ra. ¹⁸ Nyiiseĩte mose que ra. Nyebe policía jenda tata mbucha nguiã. Sacerdote rimba rese. Ûquĩ ja que chi nyee ra. Pedro que chĩ nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiatu re? ¿Mbae rĩẽ ereico mbia mbaaquiatu quiatu re? i que ererecua ra. ²⁰ Jesús que ñee ee ra. —Se que acheẽ ja mbia resa rae ra. Mbia chumunua nuásaa ja que aico mbia mbaaquiatu quiatu ra. Dios chuchúaa abe no. Acheẽ nyecuayã cuayã eã ngue se quia mbia ísaa ra. ²¹ ¿Mbaerã ereico ñee seje re? Secheẽ andusa je quia echeẽ. Sã Ûquĩ ñee. Mbae rĩẽ acheẽ ee re. Ûquĩ ngue secheẽ ñandu ja quia ra, i que Jesús ererecua je ra. ²² Jesús cheẽ mose que policía jenda mo ucua eritii rese ra. —¿Mbaerã ereico ñee sacerdote rerecua je Ûquĩ nde? i que policía mo ñee ucua Jesús rese ra. ²³ Jesús que ñee ee ra. —Secheẽ icuã mose quia echeẽ seje. Mbae icuã nĩ aico ñee nde. Secheẽ turã mose chõ erecuachĩ nguiã serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra. ²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraqi re Jesús rese reae, i que Pedro je ra. ²⁷ —Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policía jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchua je ra. I que nyaashĩ u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique

mose abae chuchua, i que ra. ²⁹ Nyebe Pilato si nguiã usẽ ñee ee. —¿Mbaerã jẽingo ñee Jesús je re? ¿Mbae icuã esaã nde? i que Pilato ra. ³⁰ Mbia que ñee ee ra. —Jesús que mbae icuã saã saãte ra. Eĩ nda uremondoãte rei ndeje. Mbae icuã naa naa eã mose, i que mbia Pilato je ra. ³¹ Pilato que ñee mbia je ra. —Jẽ ae Jesús jendao ae. Jẽ ae jẽingo erese ae. Jẽ ae Jesús jem-basi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ẽ. “Jẽiquia” ere chõ soldados je, i que mbia ñee Pilato je ra. ³² Jesús cheẽ iquechĩ cote. —Mbia ra seiiquia sem-bucha ira rese, i rei nyii. Echeẽ iquechĩ cote.

³³ Pilato que ique si oso uchuchúaa ra. Ae “quiatushu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae ercheẽ nguia seje a re? Emo ñee ndeje nyii reae, i que Jesús ee ra. ³⁵ Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbae icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷ —¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheẽ ñi nda. Ichõĩñosa reã ñee ñi. Ichõĩñosa reã ndesenda ra seandu ja, i que Jesús Pilato je ra. ³⁸ —¿Mbae ichõĩñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eã e reae. ³⁹ Pascua mose bei que aico etarõ ji mbusẽ mondo bei jẽje ra. ¿Aba ra ambusẽ mondo jẽje namo nde? ¿Judíos rerecua ra ambusẽ mondo jẽje re? i que Pilato ñee mbia je Jesús rĩĩ nda. ⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19 —Jesús jẽiruã nua, i que Pilato ra. Mbia que Jesús iruã nua cote ra. ² Nyu ritiméi uma ji que soldados mii Jesús ãquĩ ndese ra. Tiru ireĩ ngue emingue ee ra. ³ —Judíos rerecua tuchi chõ nde re, ichõĩño ngue soldados ucua ucua Jesús rese ra. ⁴ Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jẽje co, i que Pilato ra. ⁵ Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuquia mbia je ra. ⁶ Sacerdote rerecua que chi ja huee ra. Policía jenda mo abe que chi huee ra. Ñquĩ ja

que ñee mombo mombo Pilato je ra. —¿Embucha ira rese! ¿Embucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra. ⁷ Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios riiĩ saã saã nguia, aque jẽiquia”, i que embesa ji ra, i que judíos ñee Pilato je ra. ⁸ —Dios rucucha, i mose que Pilato siquiche tuchi cote ra. ⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra. ¹⁰ Pilato que ñee si ee ra. —¿Mbaerã ereico ñee ãte secheẽ mose re? Arembucha arõte ira rese. Arembui abe arõte se. Se chĩ mbia rerecua, i que Pilato ñee Jesús je ra. ¹¹ Jesús que ñee Pilato je ra. —Dios nemii eã mose mbia rerecuarã, eĩ nda ereoco ãte rei serese. Ae semondo ndeje, ae quiareie eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¿Erembuichĩ nda jẽ! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra. ¹³ Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra. ¹⁵ Mbia que tasẽ tasẽ ee ra. —¿Eiquia rei! ¿Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Ure-rerecua mo eãte nyeresẽ. César mii ño nyeresẽ, i que sacerdote rerecua Pilato je ra. ¹⁶ Aque mose que Pilato Jesús mondo mbia je cote ra. —Jẽiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra. ¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quti. Enongue eribisho quti no. Jesús que emii eite re ra. ¹⁹ Pilato que letrero mbesa ra. *JESUS DE NAZARET REI JUDIOS RERECUA*, i que embesa ra. Embesa ji que emii ibate Jesús ãquĩ nguiti ra. ²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chĩ mbia cheẽ mbuae jaaja ra. Judío cheẽ. Griego cheẽ. Latín ñee. ²¹ Sacerdotes rerecua que ñee ja Pilato je ra.

—“Judíos rerecua” erechĩ nguiã embesa. “Judíos rerecua raã ñooño” ere chõ embesa miĩ ae, i rei que judíos rerecua Pilato je ra. ²²—Ae ambesa, sã ũquĩ ñi ño, i que Pilato judíos rerecua je ra.

²³ Cuatro soldados que chi huee ra. Ũquĩ ngue Jesús mbucha ira rese ra. Ũquĩ ngue Jesús irao isirõ sirõ ja ra. Jesús irao miĩ ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ ere-sebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechĩ cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechĩ cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ũquĩ ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan ni eriqui ñee. Jesuubi tuchi quia ñi Juan nde. ²⁷—Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹ Vinagre mo ngue chĩ mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquĩ ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ũquĩ chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraaquete que ee ra. Nyebe etima ndiquio eã nguiã. ³⁴ Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda. ³⁵ Nyebe aico nguiã ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenyẽ Jesús rĩ. ³⁶ Embesa ji cheẽ ngue ique cote ra. Jesús tima

ndiquio eã mose. —Etima nda mbia siquio eã, i que embesa ji nyii ra. ³⁷—Ae embucha uquia ira rese nae, ũquĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shimbu turã mbucúĩ ji. Mbae a mbucúĩ ji abe no. ⁴⁰ Ũquĩ ja que Jesús rete querao cote ra. José. Nicodemo ndese. Aba mbushimbusa resebe que eraaque uma uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

Jesús quera si

20 Domingo mose que María Magdalena nyoĩ mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chimbbaaquiato nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangue eno mangue reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoĩ ja que uchã nda. Enongue rane ngue Pedro chucuã oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶ Aquere que Simón Pedro ngasẽ cote ra. Ae quiato que ique oso sita imi ni nda. Ae abe que mae Jesús umanda achõ ndese cote ra. ⁷ Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icúe ra. ⁸ Ae rane ngasẽ nguia nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguia re, i que eicua cote ra. ⁹ Ũquĩ ngue embesa ji icuayãte ra. “Jesús ra quera si”, i que eicuayãte ra. ¹⁰ Nyebe si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãquĩ ndúa qiti ra.

Enongue ecuii rúa quiti no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangue chõ eriqui ererequia mangue, i que María ra. ¹⁴ Ucheẽ nduibe que mae ndei uquite quiti ra. I que Jesús uã ee ra. Icuã eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reñ nguiã María je. Nyebe María ñee nguiã ee. —¿Nde Jesús raaque ererao re? ¿Mangue erechono mangue re? Taso erea ae. Tarao ae, i que María ra. ¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbbaaquiato je

¹⁸ María Magdalena que oso Jesús chimbbaaquiato mbiirandu ra. —Amaechĩ Jesús rese, i que ee ra. Jesús cheẽ ngue esenei ja ee ra. ¹⁹ Aque mose que domingo ra. Aque isa que Jesús chimbbaaquiato chi ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbbaaquiato mbuate ra. Eite re que esi ñee ee ra. —¡Jẽya eãte jirichĩ nda jẽ! i que Jesús ñee ee ra. ²⁰ Aquere que Jesús o iõsa reacuquia ee ra. Ucúa iõsa abe no. Echimbbaaquiato ía tuchi que mae Jesús rese ra. ²¹ Jesús que ñee si ee ra. —¡Jẽya eãte jirichĩ nda jẽ! Sã ñi Paba sembu no, eẽ tae si jemondo secheẽ nenei nenei sacua mbia je, i que Jesús uchimbbaaquiato je ra. ²² Jesús que uchimbbaaquiato ichu ñee nda. —Espíritu Turã ndu jẽje a cote, i que eichu ra. ²³ —“Dios chõ jẽicuã mbutiã nguiã jẽsi co”, jenyẽ mose emo je, Dios ra ãquĩ icuã mbutiã esi cote. “Dios chõ jẽicuã mbutiã eã nguiã jẽsi co”, jenyẽ mose emo je, Dios ra ãquĩ icuã mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchimbbaaquiato je ra. Jesús chimbbaaquiato raque Tomás. Eata, i que Tomás je ra. ²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecúa iõsa rese, “nyia” aeã nda se, i que Tomás ñee nda. ²⁶ Jesús chimbbaaquiato que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jẽya eãte jirichĩ nda jẽ! i

que ee ra. ²⁷ Ñee ngue Tomás je cote ra. —¡Sã seo jẽ! Seo iõsa rese eoco. Secúa iõsa rese abe eoco ae. “Jesús quera si eãte” jere sichĩ nda jẽ! “Jesús que quera si ra”, ere chõ cote, i que Jesús ñee Tomás je ra. ²⁸ —Sererecua. Nde rei sembae Dios, i que Tomás Jesús icua cote ra. ²⁹ Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. ãquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jẽje

³⁰ Jesús que mbia mae sayã saã saã tuchi uchimbbaaquiato je ra. ãquĩ ambesa ja eã nguia a. ³¹ ã nguia ambesa ja quia a. Jẽ Jesús icua sacua. —Jesús rei Cristo. Jesús rei Dios rucucha, jenyẽ nda chã. ãquĩ icua mose ra jẽingo bei.

Jesús nyecua siete uchimbbaaquiato je

21 Aquere que Jesús nyecua si uchimbbaaquiato je ra. Ama nimia ndese que eñi nda. Tiberias, i que

aque ama ndisa je ra. Eẽ ngue Jesús uã nyecua ee ra. ² Echimbbaaquiato que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riirĩ abe que chi ra. Echimbbaaquiato nongue abe que chi nyeremo no nda. ³ —Taso rã sira rea, i que Simón Pedro ra. —Ure abe ra ureso nderese, i que eataque ee ra. Nyoi ja rei que sira rea ra. Nyui ja que echoi canoa ye ra. Sira que embua mbua eãte aque isa ra.

⁴ Jesús que chĩ erimia ndese echimbbaaquiato je ra. Jesús eã eriqui reñ nguiã ee. ⁵ —¿Sira mo jembua re, ãquẽ? i que Jesús ñee mombo ee ra. —Tei, i que echimbbaaquiato ee ra. Jesús icua rocoĩ. ⁶ —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷ Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huĩrao mingue asi oso ii ra. Jesús rea. Sira mbua mbua nonde quia huĩrao mbui nguiã nyii. ⁸ Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndiichã nda. Sira mbua mbuasa que ecuruchoi quia mbutiriri sira resebe ra.

⁹ Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chi ra. ¹⁰ —Sira mo jendu rã. Ae jembua ramo, i que Jesús uchimbbaaquiato je ra. ¹¹ Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose ra. Sira cuasu achõte raque. Sira 153 raque. ¹² —Jenyu quiaru

cote, i que Jesús ee ra. —¿Aba nde re? i ãte que emo ñee ireĩ nguĩã ee ra. Mbia que Jesús icua jate ra.

¹³ Jesús que oso tátaa cote ra. Mbichae que esirõ nda. Mbuchao chao que uchimbaaquiatu je ra. Sira abe que embuchao chao ee ra. ¹⁴ Jesús que mano nyii ra. Quera si que ra. Nyecua nyecua que uchimbaaquiatu je cote ra. Co rei tercera vez co.

Jesús ñee Pedro je

¹⁵ Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesecua tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuaa embaaquiatu quiatu quia secheẽ je no, i que Jesús Pedro je ra. ¹⁶ —Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesecua tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuaa esaarõ turã nguia no, i que Jesús Pedro je ra. ¹⁷ —Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesecua tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuaa esaarõ turã nguia no. ¹⁸ Tacheẽ nyecua ndeje, Pedro. Ndeyasu mose que ereico ndeirao mingue oso ngata chooño ndesose quiti ra. Nde amei mose ra ndechiba ereira cote. Mbia ra ndecua cote.

Ndeso sere ãsa quiti ra mbia nderuruchoi cote, i que Jesús Pedro je cote ra. ¹⁹ —Eĩ nda mbia Pedro iquia, i chõ Jesús re. —Eĩ nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiatu rese Jesús nyesequa tuchi

²⁰ Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra nemee mbia icuã je re?” ae Jesús je resẽ. ²¹ Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³ —Juan nda manoã mbeichĩ nde, i que Jesús icuasa Juan nii cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra manoã, i chõ ndei ngue Jesús re. —Juan nda manoã, i ãte que Jesús ra.

Juan ñimbese hui bei

²⁴ Jesús chimbaaquiatu chõ se re. Se chõ ã ambesa ja nguĩã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵ Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.

HECHOS

Espíritu Turã nda tu, ¡ Jesús

1 Ambesa que ndeje nyii, Teófilo. Arembiirandu ja que Jesús chïao rese. Eresco mose íbii. Jesús que mbia mbaaquiato quiato eresco mose íbii ra. Dios que equerao bei jiri ibate cote ra. Ûquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiato quiato ra. Siqui que Espiritu Turã ndese mbia mbaaquiato quiato ra. Eaquiato que esecha oso ibate cote ra. ³ Manonde que eru si nyecua ùquĩ je ra. Oso nonde ibate. Ngueco que eteacuquia cuquia si ee ra. Cuarenta días que eriqui nyecua nyecua bei uchi mbaaquiato je ra. Dios rese que eriqui embiirandu randu ra. Dios rei ererecua tuchi. Ae riĩ eriqui embiirandu randu. ⁴ Jesús oso nonde ibate que eriqui ñee ñee uchimbbaaquiato je ra. —¡Jẽsochĩ nda sucha tubiriã si jẽ! ¡Jẽsochĩ nda Jerusalén si jẽ! ¡Paba cheẽ nguire jengu Espiritu Turã ndaarõ aa jẽ! “Espiritu Turã tamondo jẽje”, ¡ que Paba jẽje ra. Aque riĩ ngue acheẽ jẽje nyii resẽ, ¡ que Jesús ee ra. ⁵ —I je que Juan bautizar ¡ mbia je ra. Namu jiri ra Espiritu Turã ndu. Ae ra ique jeñiangui re. Eĩ nda Espiritu Turã bautizar ¡ jẽje. I je eã cote. Espiritu Turã nda ique chõ jeñiangui re cote, ¡ que Jesús uchimbbaaquiato je ra.

Jesús oso ibate

⁶ Emo mose que Jesús chimbaaquiato ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namu nda ure mo eremii urererecuarã nde? ¡ que mbia Jesús je ra. ⁷ Jesús que ñee ee ra. —Manose chõ ndae. Paba mii eicua. Mbia eicuayã. Jẽ nguia jẽicuayãte nguia no. Manosete chõ ndae. ⁸ ¡Co rese chõ jendua jẽ! Espiritu Turã nda tu jẽje cote. Ae ra jembuquirãcuã. Ae ra jembucheẽ ñee serĩ. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangue chooñoa jenda ja je abe no. Ûquĩ ja je jẽingo serenei nenei, ¡ que Jesús ra. ⁹ Ñeende que Jesús si ibate cote ra. Uchimbbaaquiato resa rae que esi erecha ra. Ibeishĩ ngue embuchecuayã cote ra. ¹⁰ Echimbbaaquiato que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echĩ ra. Eiraoshĩ tuchi que ngaẽ ejii ra. ¹¹ Ibatenda que

ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemae ngue u eso rese nae, eĩ si ra u íbii no, ¡ que ibatenda ee ra.

Dios que Matías irabo ra

¹² Jesús chimbaaquiato que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. ã ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo ririĩ. Jacobo, ¡ ee. Simón el Cananista. Judas. Jacobo ririĩ ndei Judas. ¹⁴ Ûquĩ ja que ñumunua mbei bei quia ñee ñee Dios je ra. Ari abe no. Acuanĩ abe no. María abe no. Jesús si rei María. Jesús nongue abe no. Ûquĩ ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶ —Se andu rã se, Seresenda. ¡Sã embesa ji ñee ñooño eã ño jẽ! Cose que Espiritu Turã ñee Judas riĩ nda. David que embesa Espiritu Turã ñee nguire ra. Judas riĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nandere sendacuã. Nyebe rei Judas nanderesenda nyii. ¹⁸ Judas que mbae isiquia isi icuã nda. Mbae isiquia je que ibi mo isi ra. Hue eresco mose que mano nda. Ibate si eru ngoĩ mano. Uãquĩ nguiti que eru ngoĩ ra. Erie que oo ra. Echique mburiri. ¹⁹ Jerusalén jenda que jirandu ja erese ra. Acéldama, ¡ que hue ibi je cote ra. Mbia ruqui rua, ¡ chõ nguia hue je. Ecoisa ibi je. ²⁰ Ī ñĩ embesa ji Salmos nde:

Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheẽ nenei nenei cote, ¡ que embesa ji Judas riĩ nda. ²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiato quiato bei mose. ²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ùquĩ mo nandeirabo nanderesendacuã. Jesús quera rese mbia mbiirandu randu sacua, Judas riquicharõ, ¡ que Pedro ñee ee ra. ²³ Mbia nyeremo ngue etea cote ra. José Justo, ¡ emo je. Barsabás, ¡ abe ee no. Matías, ¡ enongue je. ²⁴ Jesús chimbaaquiato que ñee Dios je cote ra.

—Urererecua, aba chiã ereicuate quia co. ã nyeremo ndiqui ã. ¿Aba ndechiirabo re? ¿Aba ereirabo urembirõ sacuaã nde? ²⁵ ¿Aba eretea ndechimbaaquiaturã nde? ¿Aba eretea Judas riquicharõ nde? Ae hui quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra. ²⁶ Sita que embaba mbaba o ye cote ra. —¿Aba Dios chiirabo re? i ñene. Eẽ ngue Matías irabo ra. Dios que Matías mingo Jesús chimbaaquiaturã rese cote ra. Mbia once mbirõ. Docerã. Doce que Jesús chimbaaquiaturã cote ra.

Espíritu Turã tu Jesús icuasa je

2 Fiesta de Pentecostés mose que Jesús icuasa chi ja ñumunua nda. Hue mii ngue echi ja ñumunua nda. ² Ibei rieu que embuate ra. Ama ndieu raanguia. Tuchua mbieu tuchi Jesús icuasa je. ³ Tata rendi raanguia que tu nguichi eãquĩ ndes e ra. Jesús icuasa aãquĩ ja rese. ⁴ Espíritu Turã ngue ique tuchi hue jenda chiangui re ra. Ique ja que Jesús icuasa chiangui re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espíritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangue choõnoa jenda ja chõ chi nguiã huee. Uquĩ ndei Dios cheẽ mumbasa reã judíos ataque rã si. ⁶ Ibei rieu andu mose que uquĩ ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguiã u. Espíritu Turã ño ngue embucheẽ nguiã. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguiã nyuruira eandu. ⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra. ⁸ —¿Mañi equia nande ja cheẽ naa naa ã nde? Nandechẽ Jesús icuasa saã jaaja chõchĩ nguiã ã. Partia jenda cheẽ esaã saã ñochĩ nguiã ã. Media jenda cheẽ abe no. Elam jenda cheẽ abe no. Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no. (Roma jenda mo ndei judíos. Roma jenda ataque rei judíos eã.) Creta jenda cheẽ abe no. Arabia jenda cheẽ abe no. Jesús icuasa uquĩ ñee saã saã ja chõchĩ nguiã ã. Nandechẽ esaã saã ja chõchĩ nguiã ã. Jesús icuasa riquichĩ nandechẽ naa naa tuchi Dios chiao turã nenei nenei ã, i ja que mbia ucheẽ andu jaaja mose. ¹² I jate que mbia u nyuruira eandu ra. Ndua ndua tuchi que u eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose. ¹³ Emo emo ngue ñee icuã

icuã Jesús icuasa je ra. —Quiacua chõ eriqui nguiã ã, i raque Jesús icuasa rĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echi uã ñee mbia je ra. Tasẽ jiri ñee ee. —iSeandu ja u jẽ! Tacheẽ jẽje, Jerusalén jenda. Judea jenda abe no. ¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyui ramote resẽ. Mbia quiacuasa eã ño huee tenda resẽ. ¹⁶ ã ñi ngue Joel embesa mbesa cose ra. Dios cheẽ mbuchecuasa que embesa ã ñi nda. Eẽ ngue embesa ra:

¹⁷ “Mbae ua jiri mos e ra Espíritu Turã amondo mbia ja je”, i que Dios ra.

“Jendiirĩ nda secheẽ mbuchecua mbia je.

Acuanindu ra serea rea tuchi cuu.

Amei abe ra serea rea cuu no.

¹⁸ Aque mose ra Espíritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbia rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,

i que Joel embesa ra. ²² Israel jenda, iSeandu rã!

Nazaret jenda rĩ aico ñee ñee jẽje a. Jesús rĩ. Dios que

Jesús mbuquirãcuã tuchi ra. Nyebe que Jesús mbia

mae sayã saã saã nda. Uquĩ ndese que jemaẽ nda.

²³ “Mbia icuã nda seriirĩ iquia”, i que Dios Jesús mano

nonde ra. Jẽ nguia Jesús jẽiquia tuchi nguiã cote. Jẽ

nguia jemee nguiã mbia icuã je. Eiquia nonde. Dios

rane ngue jirandu Jesús rese ra. “Mbia icuã nda Jesús

iquia”, i que Dios quia nyii ra. ²⁴ Dios que Jesús mbu-

quera si ra. Jesús mano mbei aroneãte. ²⁵ David que

Jesús cheẽ senei cose ra. ã ngue ñee nda:

Sererecua riqui sembei eã mbei co.

Eriqui bei serese co.

Mbae riqui sembusiquiche aroneãte co.

²⁶ Nyebe seya tuchite riqui co.

Nyebe aico ñee turãte Dios rĩ co.

Semano mose abe ra Dios hui eã mbei sesi.

²⁷ Seingue ra eresechayã semana mose, Sererecua.

Serete abe ra erembuquera si mingo.

Ndechesequate aico co.

²⁸ Semingosa tuchi rei nde.

Sereco mose nderese ra seya tuchi,

i que David Jesús cheẽ nenei cose ra.

²⁹ Tacheẽ nyecua jẽje, Seresenda. Nanderu David que mano cose resẽ. Mbia que echati resẽ. Eatisa nan-

deicua ja quia co resē. ³⁰ David rei Dios cheē mbuchecuasa. Dios que ñee ee ra. “Nderiirĩ mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios ñee ñooñoa tuchi chõ nguiã”, i que David ra. ³¹ David que Dios cheē icuate quia ra. Nyebe que ñee Jesús rĩ nda. “Seaingue ra eresechayã semana mose. Serete ra erembuquera si mingo”, nyebe David i nguiã Jesús rĩ. ³² Dios que Jesús mbuquera si ra. Ūquĩ ure-icua ja quia ã. Nyebe ureico nguiã jembirandu randu ũquĩ ndese ã. ³³ Dios que Jesús querao ibate nyiese ra. Dios jii eriqui pee cote. Dios que Espíritu Turã mee Jesús je cote ra. Ucheē nguire que emee ee ra. Jesús riqui Espíritu Turã mondo ure je co. ã Espíritu Turã nyisaã jeñandu ñandu quia ã. Espíritu Turã ndiqui ã mbucheē mbia mo ñee ã. ³⁴ David osoã ibate aque mose. Jesús rĩ ngue David embesa ra. ã ngue embesa ra:

Dios que ñee sererecua je ra. “Ecoi sejii. Nde abe ra ererecua serese.

Ae ndeucuayãte quia nae, ũquĩ je ra ndequirãcuã ateacuquia tuchi.

Ndequirãcuã tuchi ra ũquĩ si”, i que Dios sererecua je ra, i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tēirandu ja, Israel jenda, i que Pedro ñee ocote ra.

³⁷ Mbua ia eã tuchiite que Pedro cheē andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeē sibishorõ nda. —¿Jēicuã si jēhui rã jē! Sã bautizar ure jēje Jesucristo rĩ. Dios jēicuã mbutiã sacua. Aquere ra Dios Espíritu Turã mondo jēje. ³⁹ “Espíritu Turã nda amondo jēje. Jendiirĩ je abe ra amondo. Ishonda je abe ra amondo. Sechiirabo ja je ra Espíritu Turã amondo”, i que Dios ñee nande je ra, i que Pedro Dios cheē nenei nda. ⁴⁰ Eĩ ngue Pedro ñee ocote mbua je ra. Ñee turã ngue ee ra. —Mbua icua achõte eriqui ibi jenda ã. Quiachã ja equia Dios si ã. Ūquĩ si jēhui chõ. Jē abe jēquiachãyã sacua Dios si, i que Pedro mbua mbaaquiato ra. ⁴¹ —¿Ae beite jē! i que mbua tubiriã Pedro cheē andu ra. Ūquĩ j e que bautizar i ra. Aque mose que mbua tres mil Jesús isi ra. ⁴² Ūquĩ abe que ñumunua nua nguia Jesús quiato ataque rese ra. Jesús chimbaaquiato ñee ñee mose mbua je. Ñumunua nua ñee Dios je. Etura mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbua que siquiche ja Dios si ra. Jesús chimbaaquiato que Dios mbuquirãcuã nda. Nyebe mbua mae sayã naa naa tuchi nguiã. ⁴⁴ Jesús icuasa que ñu-

munua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios rĩ ngue eriqui ñee turã turã nyue ra. Eya tuchi que eriqui Dios rese ra. ⁴⁷ Dios rĩ ngue eriqui ñee turã turã nda. Mbua ataque que ñee turã turã nguia Jesús icuasa rĩ nda. Jesús icuasa que Dios mbeta mbeta bei quia ra.

Ecuatayã mbucherõ

3 Emo mose que Pedro nyoĩ quia Dios chuchúaa ra. Juan ndese. Tenda nyesecco mose. Hue tenda bei que mbua riqui ñee ñee Dios je ra. ² Huee que amei mo ngatayã ndiqui bei huee ra. Echaacuquia mosenda bei eiquieĩ icua. Mbua que ecuruchoĩ choi bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mĩ mĩ mbei eiquesa jii ra. Ache ache i sacua mbua ique mose Dios chuchúaa. ³ Dios chuchúaa nda Pedro ique nguiã Juan ndese chã. Ecuatayã ngue mae erese ache ache i ee ra. ⁴ Pedro que nguesa mbui reã mae erese ra. Juan abe. —¿Ure rese emae jē! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiato erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi ruibe. ⁸ Ecuatayã ngue juã asi cote ra. Ngata cuata que ra. Ique Dios chuchúaa ũquĩ ndese. Eya tuchi que ra. Oo oo tuchi que ra. Iaanye, i tuchi que equia Dios je ra. ⁹ Mbua que mae ja u ecuatayã ngata rese ra. Ñee turã mose Dios je que mbua nyiisaquia u echeē ndese ra. ¹⁰ Mbua que nyuruirã u mae erese ra. Mbua que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbua nyuruirã tuchi mae erese ra.

Pedro ñee oco judíos je

¹¹ Embucherõ ji que Pedro chiba isi isi quia ra. Juan chiba abe no. Mbua que ngaẽ ucha mae erese ra. Nyuruirã erea. Portal de Salomón, i eiquesa je. Huee que echĩ ra. ¹² Pedro que mae mbua chumunua ndese ra. Ñee ngue ee ra. —¿Mbaerã jēingo nyuruirate mae erese re, Israel jenda? ¿Mbaerã jēingo nyurui rate mae urerese re? Ure ae eã ño Ecuatayã urembucherõ nguiã. Urequirãcuã eã Ecuatayã mbucuata nguiã. Dios quiarei uquiracuã mee ee embucherõ. Urecuata turã embucherõ eã nguiã. ¹³ Dios rei nanderu rerecua bei. Abraham. Isaac. Jacob. Ūquĩ nderecua bei Dios. Dios ñee turã mbei nguiirĩ ni. Jesús rĩ. Ae que jemee icua

mbia je eiquia sacua nda. “Jesús tambui”, i mose Pilato, ũquĩ mose que jēisi quiatu quiatu chōchĩ nguiã. ¹⁴ “Em-bui”, jenyē eã ñochĩ ngue Jesús turã ñi nde. “Embui”, jenyē chōchĩ ngue mbia iquiasa rĩ nde. ¹⁵ Eĩ jenyē chōchĩ ngue mbia mingosa iquia nguiã. Dios que em-buquera si ra. Equera si rese que uremae nda. ã ureico mbia mbiirandu randu equera rese ã. ¹⁶ ã jengu mae Ecuatayã ndese ã. Jē Ecuatayã jēicuate resē. Jendesa rae que Dios embucherō nda. Ure Jesús ureicuate quia ã. Nyebe Ecuatayã mbuquirãcuã nguiã.

¹⁷ Jēaquiata ño Jesús jēiquia nguiã, Seresenda. Jenderecua aquiata ño Jesús iquia nguiã no. ¹⁸ Dios quia que ucheẽ mbuchecua mbucheẽ cose ra. Cristo rĩ mbucheẽ. “Mbia icuã icuã nda Cristo je. Cristo mbasi mbasi rae”, i que mbuchecua cose ra. ũquĩ ñee nguire quia Cristo mbasi mbasi nguiã cote. ¹⁹ jēicuã si jēhui chō jē! Jemba rã Dios icha cuti. Dios jēicuã mbutiã sacua. Eĩ jenyē mose ra Dios jembiate cote. ²⁰ Dios ra Jesucristo mbuquichi imbu cote. Ae que emi jenderecua rã cos e ra. ²¹ Namō ño nda Jesús riquichō ibate. Dios mbae mbitirō ja mose ra eru cote. Eĩ ngue Dios cheẽ mbuchecua ñiinda ñee nda. ²² Nyebe Moisés ñee nguiã nanderu cose ndare je. “Dios ra nanderesenda mo isi. Dios cheẽ mbuchecua sacua. ¡Ae cheẽ nda jemumba jirichĩ jē! ²³ Echeẽ mumbasa ra Dios mbuquiachã nyesĩ”, i que Moisés ñee nda. ²⁴ Dios cheẽ mbuchecua ja que mbia mbiirandu randu mbae rĩ nda. Ae riqui nyecua namō ã cote. Samuel nane ngue mbia mbiirandu randu ã ñi nda. Samuel nduinda ja abe que embiirandu randu ã ñi no nda. ²⁵ Jēje chō Dios cheẽ mbuchecua ñee ñee nguiã. “Seturãte ra jendiĩ ja je”, i que Dios ñee nanderu ñiinda je ra. Jēje abe Dios ñee. Ucheẽ nda embuchebi eã. Dios que ñee Abraham je cose ra. “Nderiĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. ²⁶ Dios que nguiĩ mondo íbii cote ra. Jē nane je que embu ra. Jembuturã sacua. Jēhui sacua jēicuã si, i que Pedro judíos je ra.

Ererecua paama i ja Pedro je, Juan abe je

4 Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarōsa abe que tu erese huee ra. Saduceos mo abe que ngaẽ erese huee ra. ² ũquĩ paama i ja Pedro je. Juan abe je. Mbia mbaaquiata quiatu mose chō ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ũquĩ ndiqui nguiã paama i ee. ³ Nyebe eisi suruchoi nguiã policiaa. Eresaitō ño emingue nguiã tarō. —Isamami nguia nda nandechandu nguiã, i que ererecua nyue ra. ⁴ Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵ Isamami ngue mbia tubiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. ũquĩ ja que ñumunua Jerusalén nda. ⁶ Anás abe que chĩ erese ra. Ae rei sacerdote rerecua. Caifás abe que chĩ erese ra. Juan abe no. Alejandro abe no. Sacerdotes nducucha ja que chi ñimbaacua ra. ⁷ Pedro que emi mbia ite re ra. Juan ndese. Mbia ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuata nonde re? i que ee ra. ⁸ Espíritu Turã ngue Pedro mbucheẽ cote ra. —Tacheẽ jēje, mbia rerecua. Tacheẽ jē abe je, Amei. ⁹ “Ecuatayã ndese urembiirandu rã”, jenyē chō nguiã ure je ã. “¿Aba jembirãcuã ecuatayã mbucherō nonde re?” jenyē chō nguiã ure je ã. ¹⁰ Tacheẽ nyecua jēje. Sã mbia ureandu ja. Sã Israel jenda ureandu ja. A ecuatayã embucherō ji riqui jendesa rae a. Jesucristo quirãcuã nguiarei embucherō. Aque sí quirãcuã ño ñene. Ae jēiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. ¹¹ ĩhuaẽ nandechirirō na ño Jesús re. Sañi nandeico mae mae ĩhuae nandechirirō ndese no. “Aque chō ndei que eturã nda”, sañi nandeico erirō i no. Eĩ nyee ra mbia Jesús ndichã i no. Mbia ra eisi tuchi nguerecuarã cote. Jesús momboi isi. Eisire rocoĩ nyii. ¹² Aba mo eã ndei nanderirōsa nandeicuã si. Jesús ae nanderirō nguiã nandeicuã si. Dios aba mo abe mbu eã nguiã mbia rirō sacua huicua si. Jesús ae ñene, i que Pedro ra.

¹³ Mbia rerecua nyuruiira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbia ataque rã ño ndaque, i que ererecua nyue ra. Pedro rĩ. Juan ñi. —Jesús resenda quia eriqui reaẽ. Nyebe eriqui siquicheãte ñee nde, i nyue cote. ¹⁴ Hue que embucherō ji riqui huee ra. Nyebe mbia rerecua ñee icuã aroneate erĩ. ¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra. ¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherō ndese mbia riqui jirandu randu jate ã. Jerusalén jenda riqui jirandu randu jate ã no. “Mbucheroã ngue ra”, nande aroneate. ¹⁷ Nandembusiquiche rã no. Ñee ñee siã nda equia Jesús rĩ ña. Mbia nda jiranua nguia mámbi chã. Jesús rese chã. “¡Jesús cheẽ nda jēsenei senei sichĩ jē!” nande rã ee, i que ererecua nyue ra. ¹⁸ —Jenyu, i Pedro je cote. Juan abe je. —¡Mbia ra jembaaquiatachĩ Jesús rĩ jē! ¡Jesús ra jēsenei seneichĩ mbia mo je jē! i rei que ee ra. ¹⁹ Pedro que echeẽ sibishorō nda. Juan ndese. —¿Aba cheẽ nguia ra aba mumbayã nguia re? ¿Jēnee nguiatu ra aba mumbayã nguia re? Dios cheẽ aba mumba aroneate. ¿Ī jēje re? ²⁰ ¿Mañi nda aba umaesa reneĩ nde? ¿Mañi nda aba uchiandu abe reneĩ ne no? i que Pedro ee ra. Juan abe. ²¹ Ererecua ñee icuã

Pedro je. Juan abe je. —Nandembusiquiche nandechesi, i raque. Hui chõ ngue esi cote ra. Embasiã mondo cote. Ererecua ireñte mbia tubiriã si. Nyebe eiruã nuã eã nguiã. Pedro ecuatayã mbucherõ mose mbia ñee turã turã ño nguia Dios riñ neaë. Nyebe ererecua ireñte riqui nguiã esi. ²² Ae Dios mbucherõ nae, aque amei. Cuarenta años que ae ra.

Urebusiquicheã, i equiato Dios je

²³ Mbia rerecua hui ja Pedro si. Juan abe si. Nyoï nguesenda mbiirandu ja mbia rerecua cheë ndese. Amei ñee ndese. Sacerdotes cheë ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no. ²⁵ Sã David erembucheë nderimba cose no. Sã eñ erembucheë no:

¿Mbaerã ño mbia pare pare i ja re?

¿Mbaerã mbia riqui ndua ndua chõoñote mbae mo ndese re?

²⁶ Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriri abe je no. Cristo je, sã David i cose no. ²⁷ Eñ si tuchi mbia rerecua quia ñumunua icuã Jesús je co. Nderiri turã je co. Herodes. Poncio Pilato. Judíos. Judíos eã abe no. Ûquĩ ja que siqui icuã icuã nguia Jesús je ra. Ndechiirabo raque Jesús. ²⁸ Eñ ere que ñee cose, eñ si eicuã nguia ã namo. ²⁹ Echiisaquia echeë icuã ndese, Urererecua. Nandembusiquiche, i tuchi equia ure riñ ã. Urebusiquicheã na, Urererecua. Urebusiquicheã ndecheë nenei nenei sacua. ³⁰ Ndequirãcuã embu ure je. Mbia rasi mbucherõ cherõ sacua. Mbia mae sayã naa naa sacua. Jesús riñ. Nderiri turã ñi, i que Pedro resenda ñee nyecha Dios je ra. ³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espíritu Turã ngue ique tuchi echiangui re ra. Esiquicheãte que mbia mbiirandu randu Dios cheë ndese cote ra.

Jesús quiato abeichiã eã

³² Hue riñ ja Jesús icuasa ndua ndua checha. Eicua tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue. ³³ Jesús chi mbaaquiato que mbia mbiirandu randu tuchi Jesús quera resera. Jesús que uquirãcuã mee mee nguia uchimbaaquiato je ra. Dios que siqui tuchi erese ra. ³⁴ Mbae tiã eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbaaquiato je cote ra. Jesús chimbaaquiato que emee mee mbaecha reã ja je cote ra. Nyebe mbae tiã eãte riqui nguiã emo je. Jesús quiato mo je. ³⁶ Sã José no. Bernabé, i Jesús

chimbaaquiato José je. Mbia mbiasa, i chõ nguiã Bernabé i. Ae rei Chipre jenda. Levita mo ngue ae ra. ³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiato je cote ra.

Ananías ñee ñoño

5 Ananías, i que emo je ra. Safira, i que eninisi je ra. Ûquĩ ngue vender i ibi mo je ra. ² —Mbae isiquia ataque nandembuchimi nandembaerã, i nyue.

Eataque que emee Jesús chimbaaquiato je cote ra. Eninisi abe que eicua ja ra. ³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheë ñoño Espíritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde? ⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoñ erecheë ñooñochi nde. Dios je chõ erecheë ñooño nguiã, i que Pedro ra. ⁵ Ananías eandu mose que esi ngoi mano nda. Eandusa que siquiche ja ra. ⁶ Acuanindu mo ngue ngaë eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra. ⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ûquĩ ja chõ nyeresë, ichõñ ngue eninisi Pedro je ra. ⁹ Pedro ñee ee cote. —¿Mbaerã ere? ¿Mbaerã jendua nduachĩ ùquĩ ndese re? Jeñee ñooñochi nguiã Espíritu Turã je. Ae nderu curuchoi nyati nae, ùquĩ nyi nderaarõ arõ a. Eiquesa ji a. A ecuaë ndererao sacua a, i que Pedro ee ra. ¹⁰ Pedro cheë mose tuchi que esi ngoi mano nda. Ngu rã si. Pedro resa rae mano. Acuanindu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ùquĩ je ra. Jesús icuasa que ñumunua nua ja quia eiquésaa ra. Portal de Salomón, i que eiquesa je ra. ¹³ Jesús icuasa riñ ngue mbia ñee turã ja quia ra. Mbia ataque que siquichete ra. Nyebe ñumunua eã nguiã erese. ¹⁴ Jesús icuasa tubiriã e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucua mose ra. ¹⁶ Jerusalén ndurubinda abe que ngaë ngaë nguia ra. Erasi rurucuaë cuaë Jerusalén. Aba checuayã nyireco abe que ecurucuaë cuaë nguia ra. Dios que embucherõ cherõ ja quia ra.

Jesús quiato tarō policíaa

¹⁷ Sacerdote rerecua que paama ì ra. Saduceos mo abe que chí erese ra. Ûquĩ abe que paama ì no nda. ¹⁸ Nyebe que Jesús chĩmbaaquiato isi icuã nda. Tarō ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chĩmbaaquiato que equerao itaicuee ra. Ñee nonde ee. ²⁰ —Dios chuchúaa jêso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, ì que ibatenda Pedro je ra. Juan abe je. ²¹ Jesús chĩmbaaquiato eandu mose que echoi Dios chuchúaa ra. Mbia mbaaquiato quiato que echoi ra. Isamamimbe cote. Isamamimbe echoi mbia mbaaquiato. Sacerdote rerecua que “jenyu” ì mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policíaa raarõsa je cote ra. —Jêso policíaa. Jesús chĩmbaaquiato jendu rã ure je, ì rei que ee ra. ²² Ecuasẽ mose policíaa que Jesús chĩmbaaquiato oreã ño ee ra. Ae nyebi chõ ecuaẽ nguĩã sacerdote rerecua mbiirandu. Ñee ee. ²³ —Puerta ãtã ngue chí ndei nguĩã ure je. Soldados ngue chí rei nguĩã itaicuee. Eraarõ ndaque. Ureequia rei ngue re. Eoreã ngue ra. Jesús chĩmbaaquiato oreãte que ure je ra, ì que ra. ²⁴ Sacerdote rerecua que nyuruirã eandu ra. Dios chuchua raarõsa abe nyuruirã eandu. —¿Mañi mañite equia re? ì que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiato quiato, ì que embiiirandu ra. ²⁶ Eandu mose que Dios chuchua raarõsa nyoĩ erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sĩa mombo mombochĩ nande je, ì ñene. Nyebe eicuã eã ee. ²⁷ Jesús chĩmbaaquiato que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“ì Mbia ra jembiiirandu randuchĩ Jesús rese jẽ!” ure rei que jẽje. Urecheẽ jemumba chõchĩ. Jerusalén jenda ja jembiiirandu randu chõchĩ nguĩã. “Jesús ìquiasa chõ ùquĩ nde”, ì jenyechĩ nda ure rĩ jẽ! ì que sacerdote rerecua Jesús chĩmbaaquiato je ra. ²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguĩã. Mbia cheẽ nguia nda aba mumba jiri nguĩã ña. ³⁰ Jẽ nguia Jesús jembucha nguĩã ira rese. Eiquia sacuaã. Dios que embuquera si ra. Nanderu rerecua que embuquera si ra. ³¹ Dios que nguiriĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacuaã eicuã si. Israel jenda mbui sacuaã huĩcuã si. Dios eicuã mbutiã sacuaã esi. ³² Ûquĩ ndese que uremae ja ra. Nyebe ureico nguĩã mbia mbiirandu randu ã. Espiritu Turã abe mae ja erese. Nyebe a e abe riqui nguĩã

mbia mbiirandu randu co. Dios quia Espiritu Turã mee mee nguĩã ucheẽ mumbasa reã je, ì que Pedro ra.

³³ Ererecua que paama ì ja Pedro cheẽ mose ra. Nyebe eriqui nguĩã eiquia ja serĩte. ³⁴ Fariseo mo abe que chí erese ra. Gamaliel, ì que ee ra. Ae abe que ererecua ra. Mbia chíicua jat e que ae ra. Mbia mbaaquiato quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chĩmbaaquiato jemondo mbiiriĩ conosẽ itaicuee, ì que ra. ³⁵ Ñee ngue ererecua uataque je cote ra. —Tacheẽ jẽje, Israel jenda. ì Jendua tuchi jẽ! ì Jẽocochĩ nda Jesús chĩmbaaquiato rese jẽ! ³⁶ ¿Teudas si jẽtesareĩ re? ¿Jendua eãte quia erese re? Teudas quiato ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas ìquia chee. Teudas mano nyee. Erimba que saseĩ saseĩ ja chee. Erimba que ua ja ra. ³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jẽteachõ. Jesús chĩmbaaquiato jẽteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ì Jesús rimba nandeteachõ ño jẽ! Dios quirãcuã nguia siqui rei erese. Dios je ra nandeicuã abareãte, ì que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguĩã cote. —Jenyu, ì nguĩã Jesús chĩmbaaquiato je cote. Iruã nua cote. —ì Mbia je ra Jesús cheẽ jẽsenei senei sichĩ core jẽ! ì rei que ee ra. Ererecua que hui esi cote ra. ⁴¹ Jesús chĩmbaaquiato que nyoĩ mbia rerecua recha cote ra. Eyate que nyoĩ ra. —Jesús rĩ ño ureiruã nua nguĩã, ì que ra. Eya tuchi chõ ngue ra. ⁴² Mbia que embaaquiato quiato bei ra. Jesucristo rĩ mbia mbiirandu randu bei. Mbia chuchua que embuchesea sea quia mbia mbiirandu randu Jesús rĩ nda. Dios chuchúaa abe mbia mbiirandu randu.

Mbia siete irabo mbia mbuquiaru sacuaã

6 Jesús quiato tubiriãte que cote ra. Ae griego cheẽ saã nguia, ùquĩ ngue paama ì ra. Ae judío cheẽ saã nguia, ùquĩ je que paama ì ra. Jesús quiato ja raque. —Uresenda eru cheecha ja ngue jembuquiaru icuã icuã ñochĩ nguĩã, ì que griegos judíos je ra. ² Nyebe Jesús quiato rerecua mbia munua nguĩã. Jesús quiato munua ja. Ñee sacuaã ee. —Ã ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoĩ. ³ Nyebe Jesús quiato siete chõ jẽirabo. Mbia mbuquiaru sacuaã. Mbia chíicua siete chõ jẽirabo. Hombres aracua chõ jẽirabo. Espiritu Turã ndesenda tuchi chõ jẽirabo. Sã ùquĩ ño mbia mbuquiaru quiaru quia. ⁴ Ure quiato ra urecheẽ

mbei quia Dios je. Ure quiatu ra Dios cheẽ uresenei senei mbei quia mbia je, i que Jesús quiato rerecua ra. ⁵—Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espíritu Turã ndesenda tuchi. Felipe. Prócoro. Nicanor. Timón. Parmenas. Nocolás. Ûquĩ ja que eirabo ra. Nicolás ndei Antioquía jenda. Judío eã ngue ae ra. ⁶ Curuchoi ja que Jesús quiato rerecua je ra. Jesús quiato rerecua que o chono ñono ja ùquĩ ãquĩ arõ nda. Ûquĩ siete ãquĩ arõ. Ñee ngue Dios je cote ra. ⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je. ⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ûquĩ jate que paama i Esteban je ra. ¹⁰ Ûquĩ ngue Esteban ñee sobeishĩ aroneate quia ra. Espíritu Turã nguia Esteban mbaaracuate nguiã. Espíritu Turã nguia Esteban mbuch eẽ aquiatute nguiã. Nyebe ùquĩ ndiqui Esteban ñee ndibishorõ aroneate. ¹¹ Paama isa que mbae isiquia mee mbia mo je ra. Ñee ñooño nonde Esteban ñii. —Esteban ngue ñee icuãte Moisés riĩ nda. Esteban ngue ñee icuãte Dios riĩ no nda, ichõiño nonde Esteban ñii. ¹² Ñee ñooño je que mbia mbiãcuãte Esteban je ra. Amei abe mbiãcuãte Esteban je no. Embesasa abe mbiãcuãte Esteban je no. Nyebe mbia Esteban isi suruchoi nguiã ererecua je. ¹³ Ñee ñooño je que ñee icuã si Esteban ñii huee no nda. —¡Esteban ngue ñee icuã icuãte quia Dios chuchua riĩ nda jê! ¡Dios cheẽ ñii abe que Esteban ndiqui ñee icuã icuãte ra jê! ichõiño Esteban ñii. ¹⁴ —¡Esteban ñee ngue urechandu ra jê! “Jesús ra Dios chuchua mbucoi. Moisés cheẽ nda Jesús mbutiã”, i que Esteban nda jê! ¡que ñee ñooño ererecua je ra. ¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ùquĩ mose.

Esteban ñee mbia je

7 Sacerdote rerecua que ñee Esteban je cote ra. —¿Mbia ñee ñooño nguia nderiĩ nde? i Esteban je. ² Esteban ngue ñee oco ee cote ra. —Tacheẽ jêje, Sere-senda. Tacheẽ jêje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán. ³ Dios que ñee Abraham je ra. “Ibi mo nguia eso. Nderecua esecha. Ndere-

senda abe esecha ja. Ibi mo tateacuquia ndeje. Huee eso rã. Huee quia tereico”, i que Dios ee ra. ⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda. ⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose qu e Dios ñee ee ra. ⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra. ⁷ “Nderiirĩ mbuquiei quieisa ra ambasi mbasi. Ûquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, i que Dios ra. ⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguiã circuncisión, i ùquĩ je. Dios cheẽ si embutesareiã sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eririĩ je ra. Isaac cuasu mose que ae abenguiirĩ tea ra. Jacob, i que eririĩ je ra. Isaac abe que circuncisión saã nguiirĩ je no nda. Embutesareiã sacua Dios cheẽ si. Jacob abe que nguiirĩ tea ecuas mose ra. Ae abe que circuncisión saã nguiirĩ je no nda. Doce eririĩ. Ûquĩ ndei nandei cose.

⁹ José, i que Jacob riirĩ mo je ra. José nongue que paama i ja José je ra. Nyebe José mee nguiã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã. ¹¹ Emo mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egíptoo ra. Jacob jirandu mose que nguiirĩ mondochoi era ra. “Nandechiurã mo jêisi rã oso”, i que emondochoi Egíptoo ra. Aque ramo tuchi que eririĩ nyoi Egíptoo ra. Jacob ndiirĩ ndei nandei ja. ¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyebe e Faraón José nongue icua nguiã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaẽ ja que ra. Setenta y cinco que mbia ra. ¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que

mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ “Cuatro cientos años nda nderiirĩ nyi bei Egíptoo. Aquere Ibi Canaán tamee ee”, i quia Dios Abraham je nyii reaë. Cuatro cientos años ua jiri mose que nandei tubiriãte cote ra. ¹⁸ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiirĩ irĩ. Eicuã tuchi que eriqui nandei je ra. “Jendiirĩ itãquieĩ jësecha chõ. Sã ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ mose. ²¹ Nguereco checuayã aroneate chee que ra. Nyebe ererecua ririĩ ngasë nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua ririĩ nda. Ae que Moisés itãquieĩ mbutiarõ cote ra. ²² Nyebe Moisés mbaaquiato tuchi nguiã Egipto jenda rã si. Earacua tuchi que ecuasu mose cote ra. I tuchi que ra.

²³ Moisés que ndua tuchi uataque rese cote ra. “Taso rã israelitas rea”, i que cuarenta años mose cote ra.

²⁴ Oso que cote ra. Egipto jenda mo icuã icuã mose israelita mo je que Moisés si ngasë nda. Moisés que esiquisã nda. Iquia que ra. Egipto jenda iquia que ra.

²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacua a si’, i ra seresenda serĩ”, i rei ngue Moisés uchiangui re re. Eresenda que eisiã ñochĩ nguiã.

²⁶ Isamami nongue que israelitas mo icuã icuã nyue ra. “Tacheë turã ee. I nda eturã si nyue”, i rei que Moisés ra. “¿Mbaerã jëicuã icuã ndiqui jenyue re? Nande ja chõ nyeresë”, i que Moisés ee cote ra. ²⁷ Ae rane eicuã icuã ndiqui nyue nae, aque que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra. ²⁸ “Ae ereiquia curi, ¿aque rã si ra sei quia re?” i que ñee icuã Moisés je ra. ²⁹ Ñ andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiriĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra. ³¹ Moisés que nyuruirã tuchi erea ra. Eru-rubi que mae tuchi erese cote ra. Dios que ñee ee cote ra. ³² “Dios chõ se re. Ndei rerecua chõ se re. Abraham nderecua. Isaac abe rerecua no. Jacob abe rerecua no. Ûquĩ nderecua ja chõ se re”, i que Dios ra. Moisés que titi titi i ra. Siquichete que mae ndocoĩ erese ra. ³³ Dios

que ñeembe ee ra. “Ndeiyao esirõ na. Seturã ño se re. Sésaa ndeiyao esirõ. ³⁴ Serimba rese aico mae mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacua a. Tasirõ eicuã si cote. Eso Egíptoo. Taremondo Egipto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacua Egipto si. Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisés je nyii ra. Ûquĩ sí je que Dios Moisés mondo si ra. Ererecuarã. Dios que tata rendi ite renda mbucheë Moisés je ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egipto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheë mbuchecua sacua jëje. Ser-aanguia si ra eirabo. ¡Aque cheë nda jemumbachĩ jë!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesë. Ae je chõ ngue ángel ñee ndesë. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheë mbuchecua ee. Mbia mingosa cheë nenei nenei mbia je. Nandei je. ³⁹ Nandei que Moisés cheë ñandu sereãte quia ra. Echeë mumba mumba. “Nyaso rei nyebi Egipto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egipto si. Maranguiti chõ esi ure-recha”, i que mbia Aarón je ra. ⁴¹ Nyebe que Aarón ticuasusu raanguia raã ee ra. Imagen. Nandei que mbae iquia iquia ticuasusu raanguia je ra. Eroo que emi ticuasusu raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ûquĩ icuã tuchi que Dios je ra. Nyebe Dios hui nguiã nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ûquĩ je chõ mbia riquichĩ ñee ñee. Ûquĩ mose que Dios ucheë mbu cote ra. Dios cheë mbuchecua que Dios cheë senei senei mbia je ra. Co rei embesa ji co:

Israelitas, ¿aba je jëingo mbae roo mendi mendi cose re?

Jëingo mose turuquia cuarenta años mose.

¿Seje chõ jëingo mbae roo mendi mendi cose re?

⁴³ Tei. Seje eã ñene.

Jenyiao je chõ jëingo mbae roo mendi resë.

Tuchua ñetë jendaso bei chõchĩ.

Mbae aingue raanguia resebe. Moloc, i ee.

Aque je chõ jëingochĩ nguiã ñee ñee.
 Seje ñee ñee ndocoĩ.
 Nyasi tata je abe jëingochĩ nguiã ñee ñee.
 Nyasi tata rei Refán mbae.
 Mbae raanguia jenyiao je abete que jëingo ñee ñee nda.
 Nyebe ra jaemondo jembae ibi si.
 Babilonia ndobei ra jaemondo.
 Mbia rimbarã nda jaemondo,
 i que Dios nandei je cose ra. ⁴⁴ Nandei que chi arete turúquiaa ra. Aque mos e que nandei riqui tuchua ruruata bei cose ra. Mbae ire que tucharã cose ra. Aque tuchuaqui re que mbia riqui ndua ndua Dios rese ra. Dios que tuchua nyao uquia Moisés je ra. “¡Eĩ ere chõ eao jẽ!” i que Dios Moisés je ra. Dios cheẽ ndui si tuchi que Moisés eao ra. ⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chimee, hue ibi je que ngasẽ cote ra. Nandei que guerra saã saã hue jenda je ra. Dios que mbia mombo ja hue jenda ra. Aque mose que nandei riqui tuchua ruruchoi bei ra. Tuchia, i chõ nguiã mbae ire ao ji je. Aque tuchia que equereco bei quia ra. David abe mbia rerecua mose. ⁴⁶ Dios que siqui tuchi David rese ra. David que ñee ee ra. “Tuchia cuasu tasaã ndeje”, i rei ngue David Dios je re. Jacob nderecua rei Dios. ⁴⁷ David ndiirĩ nguiatu que tuchia saã Dios je ra. Salomón, i que eririĩ je ra. ⁴⁸ Mbia rã eã ndei Dios. Dios siquiã tuchi chõ nguiã tuchuaqui re. Mbia chiaoqui re. Dios cheẽ mbuchecua que Dios cheẽ saã nda:
⁴⁹ Se quia ererecua tuchi re.
 Ibatenda rerecua abe rei se.
 Ibi jenda rerecua abe rei se no.
 ¿Mañi nda mbia sechucharã ao re?
 Equi re ra aicoã ndesẽ.
⁵⁰ Se quiatu que mbae achao ja resẽ,
 i que Dios nandei je ra. ⁵¹ Jeñia icuã ñochĩ. Jëisayã ñochĩ. Espíritu Turã jëisiteã teã ñochĩ. Jendu rã si chõ Espíritu Turã jëisiteã teã ñochĩ. ⁵² Jendu icuã bei que eriqui Dios cheẽ mbuchecua ja je ra. Jendu que Dios cheẽ mbuchecua iquia iquia bei quia ra. Ibatenda Turã nda tu, ae i quia cose nae, ùquĩ abe que jendu iquia iquia quia cose resẽ. Ibatenda Turã tu mose que jemee ñochĩ nguiã mbia icuã je ra. Eiquia nonde que jemee ñochĩ nguiã mbia icuã je. ⁵³ Dios que ángeles mbu rei jẽje ra. Ucheẽ nderu raque jẽje. Jẽ echeẽ mumbayã sacua. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ. ⁵⁵ Espíritu Turã ngue siqui tuchi Esteban ndese ra. Esteban ngue mae tuchi ibei rese mbia paa-

ma i mose ee ra. Dios Turã ndese que mae ibate ra. Jesús rese abe que mae nda. Jesús que chĩ juã Dios ji ee ra. ⁵⁶ Esteban ngue ñee nda. —Jemae jẽ. Ibei nyiequia rese aĩ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huiãro mbui mbui acuanindu mo je ra. —Esaarõ, i que ee ra. Saulo, i que eieirao raarõsa je ra. ⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra. ⁶⁰ Ngoi que nguiã ndese cote ra. Tasẽ tasẽte que ñee mombo mombo ra. —Sererecua, ã icuã ndaque seje. ¡Erembasi mbasichĩ nda huiãcuã ñi jẽ! i que Esteban Jesús je ra. Esteban ngue mano cote ra.

Saulo icuã Jesús quiato je

8 —Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoĩ ja ñimbuchao Judea rĩ nda. Samaria rĩ abe que echoi ñimbuchao ra. Jesús chimbaaquiato achõ ngue chichõ Jerusalén nda. ² Mbia turã mo ngue Esteban nyati ra. Nyeseo tuchi que eati mose ra. ³ Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguiã mbia chuchua mbuchesea seate. Jesús quiato rea rea ererao sacua tarõ policiaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴ Ae uchã nyoĩ quia Jerusalén si nae, ùquĩ ngue nyoĩ mbia mbiirandu randu tuchi quia Jesús rĩ nda. Mbia recua ja que eriqui nyoĩ nyoĩ mbia mbiirandu randu Jesús rĩ nda. ⁵ Felipe que oso Samariaa ra. Sucha tubiriã mo. Huee que eriqui mbia mbiirandu randu Jesús rĩ no nda. ⁶ Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra. ⁷ Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia hui mose mbia si ra. Felipe que mbia cuatayã mbucua ja quia ra. Mbia umi sayã abe que embucherõ cherõ nguia ra. ⁸ Nyebe hue jenda ia tuchi sucha tubiriã jenda.

⁹ Huee sucha tubiriã ngue Simón ndiqui ra. Brujo que ae nyii ra. Ae que mbia mbiirã irĩ tuchi quia nyii ra. Mbia Samaria jenda chucua tuchi que ae ra. ¹⁰ Mbia que nyiisaquia tuchi quia Simón ñee ndese cose ra.

Mbia riirĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbia Simón nĩ nda. ¹¹ Simón ngue mbia mbiĩĩ rĩ tuchi quia brujería je ra. Nyebe que mbia riqui nyiisaquia tuchi eres e nyii ra. ¹² Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. Ūquĩ mose que mbia Jesús icua icua tuchi ra. Bautizar i que mbia atate je ra. ¹³ Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã saã saã nguia ra. Simón ngue nyuruira tuchi quia mae erese ra.

¹⁴ —Samaría jenda riqui Dios cheẽ isi isi tuchi ã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo. ¹⁵ Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶ Espíritu Turã iqueã mose hue jenda chiangui re que Pedro choi erea ra. Jesús rimbarã ño ngue mbia bautizar i nguia ee nyii. Espíritu Turã iqueã ño nguia echiangui re nyii reaẽ. ¹⁷ Pedro que o chono Jesús quiato ãquĩ arõ nda. Juan ab e o chono earõ. Espíritu Turã ngue tu Jesús quiato je cote ra. ¹⁸ Simón ngue mae erese ra. O chono mose earõ. Espíritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹ Ñee ngue ee ra. —Sembaaquiatu se abe. Ndequirãcuã embu seje. Sã se abe seo tachono ñono mbia arõ. Sã se abe Espíritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda. ²⁰ Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. i Dios ra uquirãcuã mee eã mbae isiquia ribishorõ jẽ! ²¹ Ndeturã eã ñochĩ ndechiangui re. Nyebe ra Dios uquirãcuã mee eã ndeje. ²² i Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi. ²³ i Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra. ²⁴ Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. ĩ nda aquiachãyã esi, i que Simón nda.

²⁵ Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷ Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecuia resenda. Candace, i que

ererecuia je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaẽ. Oso quia equia Jerusalén ñee ñee sacua Dios je nyii reaẽ. ²⁸ Uba que u quia uchuchua quiti cote ra. Carro ye que eru quia cote ra. Isaías chimbesea rese que eru quia mae mae carro ye ra. Dios cheẽ. ²⁹ Espíritu Turã ngue ñee Felipe je ra. —Eso rã carro jii, i que ee ra. ³⁰ Felipe que oso ra. Oso que Etiopía jenda andu ra. Isaías chimbesea rese que esi quia maemae nda. Nyebe Felipe ñee ee. —i Isaías chimbesea checuate eriqui ndeje re? i que Felipe ee ra. ³¹ —Tei. i Mañi ae ra eicua re? Aba mo eicuayãte seje resẽ. Echui rã. Ecoi sejii. Sembaaquiatu rã se, i que carro yenda ee ra. ³² ã Isaías chimbesea rese que eriqui mae mae nda. ã ndei e ã:

Nanderiquicharõsa rei oveja rã.

Mbia que oveja querao eiquiásaa ra.

Mbia que ovejara nyisia sia ra.

Oveja ñee ñeeã ee.

Eĩ ngue nanderiquicharõsa ñee ñeeã huĩquia mose ra.

³³ Nanderiquicharõsa turãte raque.

Mbia icuã tuchi ee. Mbia eiquiachõ.

Emosenda icuã tuchite ee.

Emosenda eiquia chee.

Nanderiquicharõsa siquã ibi rĩ cote,

i qu e Isaías embesa ra. Embesa ji rese que Etiopía jenda riqui mae mae nda. ³⁴ Etiopía jenda que ñee Felipe je ra. —Embesa ji embuchecua seje. i Aba rĩĩ Isaías riqui embesa mbesa re? i Mbiamo nĩ eriqui embesa re? i Ngũĩ eriqui embesa re no? i que Felipe je ra. ³⁵ Felipe que embuchecua ee ra. Mbaaquiatu tuchi que Jesús rĩĩ cote ra. ³⁶ Carro que ngasẽ ama moo cote ra. —i Co ama ñi co! i Aa ra bautizar ere seje re? i que Etiopía jenda Felipe je ra. ³⁷ —i Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. —Jesús aicuate quia co cote. Jesucristo rei Dios ndiirĩ. Aicua sequia co cote, i que ra. ³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra. ³⁹ Usẽ ngue ama si cote ra. Espíritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheẽ ndese. Ngasẽ nyee que Cesarea ra.

Saulo uba ramo Dios icha rui

9 Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecuia je ra. ² —Papel embesa rã sechira-orã. Tarao Damáscoo. Judíos chumunua mose

ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarõ sacua policíaa. Mujeres abe taru. Hombres abe taru taru no, i rei que Saulo ñee icua Jesús quiato ríi nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso íbii ra. Echeẽ mo ngue ehandu ra. —¿Mbaerã ndeicuãte riqui seje re? i que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde sí chõ ereico ñimbasi co. Sã ticuas riqui nambacua mbuti no. Sã eriqui hui mbaba ira racua echĩ no. Ūquĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra. ⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra. ¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue. ¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ūquĩ sí esaã oso ee, i nda Dios Ananías je ra. ¹³ Ananías que teã ndei ra. —Mbia Saulo icua icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi ererao sacua a. Ūquĩ je chõ sacerdote rerecua embu nguiã a. Uretarõ ja sacua, i que Ananías Dios je ra. Esiquichete que Saulo si ra. ¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue choñoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no. ¹⁶ Saulo secheẽ nenei nenei mose ra mbia embasi mbasi tuchi. Mbia icua icua tuchi ra ee seríĩ mambi. Ūquĩ ndese Saulo tambiiirandu, i que Dios ra. ¹⁷ Ananías que oso cote ra. Dios cheẽ nguire. Íque que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacua ndechianguire. Nemaes sacua abe sembu co no, i que Ananías Saulo je ra. ¹⁸ Aque mose tuchi que sira quishĩ naan-

guia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcua cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios ririĩ, i tuchi que equia mbia je ra. ²¹ Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacua nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbia nyuruira Saulo rea ra. ²² Saulo quirãcua tuchi que eriqui cote ra. Ererecua rã ño eriqui nguiã mbia mbaaquiato quiato Jesús ríi. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¿Saulo nandei quia jẽ! i rei que ñee nyue ra. ²⁴ Mbia mo ngue Saulo mbiirandu ra. —Nandei quia, i nda mbia nderíĩ nda. Hue echĩ nyiquitirõ nderese eiquésaa hue. Isa abe echĩ nyiquitirõ nderese hue, i que embiirandu ra. ²⁵ Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi. ²⁷ Bernabé miĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ūquĩ je abe que erenei nenei nda. Ñee asi así que Saulo je Jesús ríi nda. Saulo abe que ñee tuchi ee Jesús ríi nda. Nyebe mbia riqui nguiã “nandei quia” i Saulo ríi. ³⁰ Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbia

icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacuã ja ra. Siqui ì ì tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, ì que umi sayã je ra. ³⁴ Pedro que ñee ee ra. —¡Jesús riqui nembucherõ a jê! Ehuã na. Nderua abe enua, ìque Pedro umi sayã je ra. Ûquĩ mose que nyerõ nda. ³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, ì que ari mo je ra. Jope jenda que ra. Dorcas, ì que griego cheẽ quiicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, ì que sucha tubiriã je ra. Nyebe que Jesús quiato mbia nyeremo mondochoi Pedro reru sacuã nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubirĩ a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra. ⁴⁰ Pedro que mbia mbusẽ ja mondo taicuee ra. Ngũiã ndese que ñee Dios je cote ra. Aquere que ñee eraaque je cote ra. —Ehuã na, Dorcas, ì que ee je ra. Eraaque que nguesa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, ì que Jesús quiato je cote ra. Eru chiecha ja je abe no. Ngaẽ ngue mae equera rese cote ra. ⁴² Mbia Jope jenda que jirandu tuchi erese ra. Nyebe que mbia tubiriã Jesús icua cote ra. ⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

Pedro oso Cornelio rea

10 Soldados rerecua mo ngue siqui sucha tubiriã Cesaréaa ra. Italia jenda rei ùquĩ soldados. Cien ngue soldados ra. Cornelio, ì que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã

ndiqui Dios je ra. ³ Tenda nyeseo ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ìque que echuchúaa ee cuu ra. —Cornelio, ì que ñee ee cuu ra. ⁴ Cornelio que mae quiatu tuchi erese ra. —¿Mbae ere, Sererecua? ì que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguiã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Eru sacuã ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacuã ndeje, ì que ibatenda Cornelio je cuu ra. ⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, ì que ngũimba nyeremo je ra. Aque mii soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ûquĩ je que Cornelio uquereicuã nenei nenei ja ra. —Jẽso Pedro reru Jope si, ì que ee cote ra.

⁹ Isamami ngue Cornelio rimba ngasẽ Jope rurubi cote ra. Aque mose que Pedro chi tuchua arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echurã ngue uchi ãte ra. Nyebe que uque u ra. Uchurã naa mose. Equereicuã ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja. ¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riãnda ja. Mbei abe no. Nguireĩ abe no. Mbae ibi riãnda ja tuchi que chi tiru ye cuu ra. ¹³ Pedro que echeẽ mo ñandu cote ra. —Ehuã na, Pedro. Emo eiquia ndechiurã, ì que ra. ¹⁴ —Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je, ì que Pedro ee ra. ¹⁵ Dios que ñeembe ee ra. —¡Sechimee ndechiurã nda ereisiteächĩ jê! ì que ra. ¹⁶ Eĩ si que tiru icoi ru tres veces ra. Mbae chumumbara ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? ì que ngasẽ nda. ¹⁸ —¿Simón Pedro riqui a re? ì que ra. ¹⁹ Pedro qu e ndua ndua beite quia uquereicuã ndese ra. Nyebe Espíritu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¡Esiquicheã oso erese jê! Se chõ ngue ambu nderea resẽ, ì que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? ì que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chiicua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacuã. Pedro cheẽ echandu rã”,

í que ángel Cornelio je ra, í que Cornelio rimba Pedro je ra. ²³—Jenyu rá íque. Jengue a, í que Pedro ee ra. Isamami ngue Pedro oso erese cote ra. Jesús quiato Jope jenda abe que nyoí erese ra. ²⁴ Isamami ngue ngasê Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiirí abe rese que eriqui eraarõ arõ nda. —Jenyu Pedro raarõ serese. Echeẽ andu sacuaã, í nda nguesenda je nyii ra. ²⁵ Pedro que ngasê oso Cornelio chuchúaa ra. Cornelio que oo erese ra. Aquere que ngoi ngúfã ndese ñee ñee ee ra. Ibatenda Pedro riqui reí nguiã Cornelio je. ²⁶ Pedro que ñee ee ra. —Ehuã na. Dios eã ño se re. Nderã sí chõ se re. Mbia chõ se re, í que Pedro ra. ²⁷ Ñee ñee ngue equia nyue cote ra. Nyoí que íque mbia tubiriãsa cote ra. ²⁸ Pedro que ñee ùquĩ je ra. —Se rei judío. Judío siqui aronea ndaque mbiamo ndese. Judío íque aronea mbiamo nyuchúaa. Ùquĩ jêicua raque quia ã. Dios que ñee seje cuu ra. Dios que sembaaquiato cuu ra. “Mbiamo abe que eturãte riqui ra. Mbiamo ndese abe eico jiri”, í que Dios seje ra. ²⁹ Nyebe achu jei nguiã ndecheẽ mose co. ¿Mbaerã “echu” ere seje re? í que Pedro Cornelio je ra.

³⁰ Cornelio que ñee ee cote ra. —Hue tenda bei aico ñee ñee Dios je co. Tenda nyesece mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. ³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. ³² Mbia mo emondo rá Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimíã ndese eriqui hue. Sã nderimba mo erurucuaã aa”, í que ángel seje ra. ³³ Nyebe serimba amondo jei nderea. Coche erechu nguiã seje aa. Ndecheẽ andu sacuaã ño urecu nguiã aa. Dios cheẽ esenei na ure je cote. Ae Dios mondo ndeje, erenei sacuaã ure je, í que Cornelio Pedro je ra.

³⁴ Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. ³⁵ Mbiamo abe ireĩ ireĩ chĩ nguiã Dios sí re. Ibimo jenda re. Ùquĩ siqui turã ño nguiã Dios je reaẽ. Nyebe Dios abe eturã ndiqui ùquĩ je reaẽ. Judíos achõ eã ndaque. ³⁶ Dios que ucheẽ turã mondo judíos je ra. Dios cheẽ turã ngue tu Jesucristo rĩĩ nda. Ae rei aba mbiasa. Jesucristo rei mbia rerecua tuchi. ³⁷ Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasê judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasê judíos ja je cote ra. Ùquĩ jêicua tuchi quia ã ndesẽ. ³⁸ Jesús siqui turã jêicua quia resẽ. Jesús Nazaret jenda siqui turã mbei. Dios que Jesús mbuquirãcuã Espíritu Turã je ra. Dios que siqui tuchi erese ra. Nyebe eriqui nguiã mbae turã naa

naa. Nyebe eriqui nguiã aba checuayã icuã jea jea mbia sí. Ùquĩ jêicua quia ã ndesẽ. ³⁹ Jesús chimbbaaquiato chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacuaã. ⁴⁰ Dios que Jesús mbuquera sí cote ra. Tres días mose. Dios que Jesús mbuchecua ure je cote ra. Mbia ja je embuchecuayã. Ure je achõ ngue embuchecua ra. Uchiirabo achõ je. Jesús renei nenei sacuaã ngue Dios ureirabo ra. Ure quiaru que Jesús rese ra. Jesús quera ico. Mbae mo abe que urembei erese ra. ⁴² Jesús que uremondo mbia mbiirandu randu sacuaã ngũĩĩ nda. “Secheẽ turã jêsenei senei nguia mbia je. ‘Dios que Jesús miĩ nda. Mbia mano je icuã ndea sacuaã. Manoã je abe icuã ndea sacuaã. Jesús r a eicuã tea ja’, jenye quia mbia mbiirandu randu”, í que Jesús ure je ra. ⁴³ Dios cheẽ mbuchecua ja que embesa mbesa Jesús rĩĩ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, í que Dios cheẽ mbuchecua ra, í que Pedro Cornelio je ra.

Espíritu Turã íque judíos eã chianguí re

⁴⁴ Pedro cheẽ mose que Espíritu Turã ndu íque eandusa chianguí re ra. Eandusa chianguí re ja íque. ⁴⁵ Pedro resenda judíos que nyuruira tuchi ra. —Judíos eã je abe chõ Dios riqui Espíritu Turã mondo mondo re, í que judíos Jesús quiato u nyuruira ra. ⁴⁶ Judíos eã ngue mbiamo ñee saã saã nda. Espíritu Turã íque mose echianguí re. Ñee turã ja Dios rĩĩ. Nyebe judíos ñee. —Ã ñiangui re abe Espíritu Turã íquechĩ. Judíos eã ndaque, í que eandu ra. Pedro que ñee nguesenda je cote ra. ⁴⁷ —Espíritu Turã ngue íque echianguí re cote ra. Nyebe bautizar tae ee í je cote. Emo nda seriquisãyã, í que Pedro ra. ⁴⁸ Nyebe que Pedro bautizar í ee ra. Jesucristo rimbarã ngue bautizar í ee ra. Aquereque ñee ja Pedro je ra. —Eitõ mocoĩ jiri quia ure rese aa, í que ee ra.

Pedro Jerusalén jenda mbiirandu ja

11 Jesús chimbbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, í que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, í que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoĩ mo ngue tu ibate sí cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu

aque tiru ye cuu ra. Quiaa riinda ja. Mbei abe no. Nguireñ abe no. Mbae ibi riinda ja tuchi que chi tiru ye cuu ra. ⁷Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra. ⁸“Tei, Sererecua. Urechiu eã ño ã ndesẽ. Ñ mo ngue ureu eã mbei quia ra. Mbaeia tuchi ure je judíos ja je”, ae rei que ee ra. ⁹Dios que ñeembe seje ra. “¡Sechimee ndechiurã nda ereisi teãchĩ jẽ!” i que seje ra. ¹⁰Eĩ si que tiru icoi ru tres veces ra. Oso bei que ibate serecha cote ra. ¹¹Aque mosete que Cornelio rimba ngasẽ seje ra. Seruruchoi sacua ngue ecuaẽ Cesarea si ra. Tres que ngaẽ seruruchoi sacua nda. ¹²“Eso rã erese. ¡Esiquicheã oso erese jẽ!” i que Espiritu Turã seje ra. Ñ nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³Cornelio que uquereicua senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendirõ sacua jẽicua sĩ, i que ángel seje ra”, i que Cornelio seje ra. ¹⁵Se ñee namo mose ee que Espiritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re abe. ¹⁶Jesús cheẽ ndese que andua ndua cote ra. Ñ ndei echeẽ ã: “I je que Juan bautizar i rei mbia je ra. Espiritu Turã je bautizar tae jẽje cote”, i que Jesús cose ra. Aque rese que andua ndua cote ra. ¹⁷Nande judíos achõ je eã ño Dios riqui nguia Espiritu Turã mondo. Judí eã je abe chõ eriqui nguia Espiritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra. ¹⁸Mbia que Pedro cheẽ sobeshiãte ra. Ñee turã turã ngue Dios je cote ra. —Dios judío eã abe mbui mbui quiatu quia huicua si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹Mbia icua tuchi que eriqui Jesús quiato je cote ra. Esteban iquia mosebe bei que mbia icua ndiqui Jesús quiato je ra. Nyebe Jesús quiato choi nguia uchã Jerusalén si. Emo nyoĩ Feniciaa. Emo nyoĩ Chipre no. Emo nyoĩ Antioquía no. Huee ja que echi Jesús cheẽ turã nenei nenei nda. Judíos achõ je que echi erenei nenei nda. Judío eã je erenei nenei eã. ²⁰Chipre jenda rei emo. Cirene jenda rei emo no. Ñquĩ nguia que nyoĩ Antioquíaa ra. Ñquĩ nguia que Jesús cheẽ senei senei judío eã je ra. ²¹Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²²Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa. ²³Bernabé que ngasẽ ñee Jesús quiato je ra. —Dios turã tuchi riqui nguia jẽje co. Aque rese seyate riqui co. ¡jẽingo tuchi nandererecua rese

jẽ! ¡jẽhuichĩ nda esi jẽ! i tuchi que Bernabé quia mbia je ra. ²⁴Bernabé turãt e que eriqui ra. Espiritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguia Jesús isi isi. ²⁵Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra. ²⁶Huee que echi bei Jesús quiato mbaaquiato quiatu ra. Un año que echi huee ra. Mbia tubiriã mbaaquiato quiato bei. Hue jenda je rane ngue “Cristianos” i Cristo quiato je ra.

²⁷Aque mose que Dios cheẽ mbuchecuasa mo ngaẽ Antioquíaa ra. Ngaẽ ngue Jerusalén si ra. ²⁸Emo ngue juã ñee mbia je ra. Agabo, i que ee ra. Espiritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose. ²⁹Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Ñquĩ ngue ecuruchoi cote ra. Ae emee nguia Jesús quiato rerecua je. Judea jenda.

Mbia Jacobo iquia; mbia Pedro tarõ

12 Aque mose que ererecua icua tuchi riqui Jesús quiato je ra. Herodes, i que ererecua je ra. ²Ae que Jacobo ãquĩ ndoso ti quise je ra. Jacobo rei Juan nongue. ³Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguia. Fiesta de Pascua mose que Pedro isi nguia. ⁴Tarõ ngue mii mbia icua tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacua. Fiesta ua mose r a amee ee, i rei que ererecua uchiangui re ra. ⁵Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro riẽ ee ra.

Dios Pedro sirõ nyecuayã etaronda si

⁶Isamami nda ererecua Pedro mee nguia mbia je chã nde. Eiquia sacua. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecuã ji que uque u ra. Cadena nyeremo je que ecua ino nda. Soldados nyeremo ngue uqueã u eraarõ nda. ⁷Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jẽ! i que Pedro je ra. Ehuã mose que cadenas nyera eo si ra. ⁸—Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese

cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui reĩ nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacuañ nde. Serirõ ño equia Herodes si re. Judíos ra seiquiayã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jẽje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei eequia ee ra. Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobo jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiurã mondo monoa ee cote. Nyebe que ũquĩ nyoĩ ja Herodes chuchúaa ra. —iNandeturã mbei chõ ee jẽ! Ñ nda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure riĩ. Ñ nda eturambe ure je, i que mbia Blasto je ra. ²¹ Emo mose jiri que Herodes huĩrao turã mingue ra. Ngoi que ngũenda icoi tose ra. Jenyu seje, i que

Tiro jenda je cote ra. Sidón jenda je abe no. Herodes que ñee ocote ũquĩ je cote ra. ²² Mbia abe que ñeete ee cote ra. —Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasu i i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios riĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra. ²⁴ Jesús quiato que Jesús cheẽ senei senei tuchi quia ra. Mbia tubiriã ngue ehandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoĩ Jerusalén nda. Saulo rese. Mbae isiquia ruruchoi sacuañ. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoi nyiese ra.

Espíritu Turã Bernabé mondo Dios cheẽ nenei nenei sacuañ, Pablo rese

13 Jesús quiato que ñumunua nua nguia Antioquíaa jenda ra. Mbia mbaaquiato quiatusa abe que chi erese ra. Dios cheẽ mbuchecuasaa mo abe que chi erese ra. Bernabé, i que emo je ra. Simón nondei abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. ũquĩ ja que mbia mbaaquiato quiatusa ra. ² Emo mose que ũquĩ nyi ñumunua nda. Ñee ñee ngue u Dios je ra. Uchiu si que huĩ ra. Ndua ndua sacuañ Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. ũquĩ ngue airabo ra. Airabo que secheẽ nenei nenei sacuañ nda, i que Espiritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé ãquĩ ndese cote ra. Saulo ãquĩ ndese abe no. Mondo que Dios cheẽ nenei nenei sacuañ cote ra.

Pablo Dios cheẽ senei senei Chípree, Bernabé rese

⁴ Aquere que Espiritu Turã Bernabé curuchoi Selúci-aa ra. Saulo rese. —Ama ndui nyao Chipre, i que uacanoa cuasu ye ra. ⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoi Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuasaa rei se, ichõĩño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiato tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riqisã. —Ñ nda sererecua

Jesús icuayã, i tuchi brujo ùquĩ ñee ndiquisã. Elimas, i abe que brujo je ra. ⁹ Espíritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra. ¹⁰ Ñee ngue ee ra. —Mbia mbĩĩĩ irĩsa tuchi quiarei nde. Diablo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehui ùquĩ si re? i que Pablo ñee icuã ee ra. ¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¡Sembucua-ta turã na nguia jẽ! i tuchi eresayã nguia mbia je cote. ¹² Ererecua que echandu ja ra. Nyebe ngue Jesús icua nguia cote. Nyuruira tuchi que huĩ Jesús cheẽ andu ra.

Pablo que siqui Antioquíaa ra; Bernabé rese

¹³ Pablo que nyoĩ Pafos recha cote ra. Nguesenda rese que echoĩ ama ndui ra. Ngasẽ ngue Perge de Panfília ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoĩ Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echĩ ngoi ra. ¹⁵ Judíos que leer i Dios cheẽ je ra. Moisés chimbese je. Dios cheẽ mbuchecua chimbese je abe no. Aquere que judíos ñee Pablo je ra. Bernabé je abe no. —¿Mbia ra jembaaquiato quiatu jẽ nde? i que ee ra. ¹⁶ Pablo que juã cote ra. O je que mbia mbuquirĩ ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chĩ mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chĩ mose turuquia. ¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ùquĩ iquia ja nanderamei si ra. Ùquĩ mbae ibi que Dios mee nanderamei je cote ra. ²⁰ Dios que jueces mĩ mĩ nanderamei nderecuarã cote ra. Jueces que emĩ mĩ nguia cuatro cientos cincuenta años nda. Aquere que Dios Samuel mĩ nanderamei nderecuarã nda. ²¹ Aquere que nanderamei ñee Dios je ra. “Rey mo nguia emĩ urerecuarã”, i que Dios je ra. Nyebe que Dios Saúl mĩ ererecuarã nda. Rey. Ae rei Cis riirĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda. ²² Cuarenta años ua mose que Dios Saúl mombo cote ra. Dios que David mĩ nanderamei ndere cuarã cote ra. Saúl rendaque re. David rei Isaĩ riirĩ. Dios que ñee David je ra.

“David sebi tuchi. Ae quia ra secheẽ mumba mumbayã”, i que Dios cose ra. ²³ David sí que Jesús ramei nda. Dios que Jesús mbu Israel jenda rirõ sacuã huĩcuã si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jẽicuã si jẽhui. Jemba Dios icha rui. Ì nda bautizar ae jẽje”, i tuchi que Juan nguia mbia je ra. ²⁵ Umano nonde que Juan ñee mbia je ra. “Ae jẽsaarõ nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyao rese”, i que Juan ñee Jesús rĩĩ nda.

²⁶ Seresenda, Abraham ndiirĩ ndei jẽ. Jemo ndiqui Dios icua ã. Nande je quia Dios ucheẽ mondo nguia. Nanderirõ sacuã nandeicuã si. Dios que Jesús mondo nande je ra. ²⁷ Jerusalén jenda que Jesús icuayãte ra. Ererecua ja que chĩ Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábado mose, eicuayã mbei. Dios cheẽ mbuchecua cheẽ nguire que Jesús iquia ra. ²⁸ “Jesús eiquia rã”, i tuchi que mbia quia Pilato je ra. Jesús icuã eã ndaque. ²⁹ Nyebe que Jesús mano ndei ra. Embesa ji cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji je ra. ³⁰ Jesús que quera si manonde cote ra. Dios que embuquera si ra. ³¹ Galilea jenda que siqui bei quia Jesús rese Jerusalén nae, ùquĩ ngue mae mae equera si rese cote ra. Mae mae mbei equia Jesús quera si rese cote. Ùquĩ ñee mbei quia Jesús rĩĩ ã cote. ³² A ureico Dios cheẽ turã nenei nenei jẽje a. Dios ñee ñee nguia nanderamei je nyii nae, ùquĩ uresenei senei nguia jẽje a. ³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namu ngue arembuchecua mbia je ra”, i que Dios Jesús rĩĩ cose ra. Eĩ ngue Salmo dos nda. ³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jẽje. Seturã David je nyii nae, eĩ si ra seturãte jẽje”, i que Dios ra. “Jesús tambuquera si jẽje”, i ñene. ³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rĩĩ nda. Aquere que David roo soõ cote ra. ³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguia. ³⁸ Seresenda, Jesús mĩ ndiqui nandeicuã mbutiã sacuã co. A ureico ùquĩ nenei nenei jẽje a. Jẽirandu sacuã erese. ³⁹ Dios que ucheẽ senei senei nguia Moisés je nyii nae, aque cheẽ nguia r a aba icuã mbutiã eã. Jesús mĩ ndiqui nandeicuã mbutiã sacuã co. Nande Jesús icua mose. ⁴⁰ “Mbae icuã nda tuchĩ jẽje”, i que Dios cheẽ

mbuchecuasa ra. Jêtesa bei u jê. Sã Dios cheẽ mbuchecuasa io eã jêje. Eĩ ngue Dios cheẽ mbuchecuasa ra:

⁴¹ Co jê, mbae turã ucuayãsa.

Je nyuruira rae. Jemano ndae.

Mbia mae sayã nda asaã ndaque jêje.

Jêicua sereãte ra equia.

Mbia embuchecua raque jêje. Nyebe ra jemano, i que Dios cose ra, i que Pablo ra.

⁴² Pablo que usẽ nyoĩ echumunuasa si cote ra. —Jenyube rã sãbado nongue. Ũquĩ jêsenei seneimbe rã u ure je, i que mbia ee ra. ⁴³ Mbia que usẽ ja echumunuasa si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sãbado nongue mose que sucha tubiriã jenda ñumunua ja ra. Ñumunua nua ja Dios cheẽ andu.

⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchi nguiã. Nandechẽ andu rocoĩ, i que judíos ngueteã mbia rese Pablo si ra. Nyebe judíos ñee icuã icuã nguiã Pablo je. ⁴⁶ Pablo que siquicheã tuchi ñee judíos je ra. Bernabé rese. —Jê nane je ureico rei Dios cheẽ nenei nenei ã. Dios cheẽ nguire ureico rei nguiã erenei nenei jê nane je ã. Ibate jêingo bei sereã ñochĩ. Nyebe jêingo nguiã Dios cheẽ isiteã teã ã. Nyebe ureso nguiã erenei nenei judíos eã je co. ⁴⁷ ã ngue Dios ñee ure je cose ra: “Aremingo que secheẽ nenei nenei sacuã mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ ñii nda. Dios que mbia irabo ata ra. Emingo bei sacuã ibate. Ũquĩ ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chiicua mbuqueta tuchi que ra. Amei mbia chiicua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no. ⁵¹ Nyoĩ nonde que hui tubi mbutomo tomo mbia je ra. —Jêicuaã têicua, i ñe hue jenda je re. Aquere que echoi Iconio nda. ⁵² Jesús quia-to ia tuchi que chi ra. Espíritu Turã ngue siqui tuchi quia erese ra.

Pablo que siqui Iconio nda, Bernabé rese

14 Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. Ũquĩ ngue judíos eã mbiicuaã icuã Pablo je ra. Bernabé je abe no.

Ñee icuã icuã tuchi erĩ. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcuã nda. Nyebe que eriqui mbia mae sayã naa naa nda. —Ichõĩño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵ Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. —iPablo nandẽiquia jê! iBernabé abe nandẽiquia jê! iSita nande mombo mombo erese jê! i rei que mbia ra. ⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra. ⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei. ⁹ Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyebe e mae nguiatu erese. ¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra. ¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo rĩ ñee ñee. —Dios ngaẽ nguichi nande je mbia rã sí a, i rei que nyuruira ra. Tasẽ tasẽ. Licaonia, i hue jenda cheẽ je. ¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no. ¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandẽiquia iquia rã Pablo je. Nandesei sei ee, i ja que mbia ra. —Pablo rei Dios rã si. Bernabé rese. Nyebe ticuasú nandẽiquia iquia rã ee. Dios raanguia je, i rei que mbia ra. ¹⁴ Pablo que echandu ra. Bernabé rese. Nyebe huĩrao ndoro ndoro paama i ee. —Ureya eã jendese, i ñe ne. Ique que echoi mbia ite ite rĩ nda. Ñee asi asi mbia je. ¹⁵ —iMbaerã nda re, mbia? iMbaerã nda ticuasú jêiquia ure je re? Mbia chõ ure re. Jê na si chõ ure resẽ. Dios eã ño ure resẽ. Nyebe urechu nguiã Dios cheẽ turã nenei nenei jêje ã. ã mbae icuã jêsecha ja chõ. Dios quiarei ereco. iAe rui jêingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jêingo. ¹⁶ Dios que mbia teachõ cose ra. Mbia tesarei mose esi. ¹⁷ Dios que eturã saã saã mbei quia mbia je ra. Mbi a eicua sacuã. Dios chõ ama mbuchaaqui bei nguiã nande je. Ae quia mbae a mee

mbei nguiã nandechiurã. Dios chõ nandembia mbia bei nguiã co, i que Pablo mbia je ra. ¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaẽ huee ra. Antioquía sí. Iconio sí abe no. Ũquĩ ngue mbia mbiã icuã Pablo je ra. Nyebe que mbia sita mombo mombo tuchi Pablo rese ra. Pablo manote reĩ nguiã ee. Mbia que ecuruchoi mbutiriri pe jiri sucha tubiriã sí. ²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese. ²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístaa ra. Icónioo abe. Antioquíaa abe. Huee sucha tubiriã ngue echoi nyebi ra. ²² Pablo que Jesús icuasa mbaaquiato quiato hue jenda ra. Bernabé rese. —¡Jesús rese jẽingo tuchi jẽ! Mbia ra nandembasi mbasi tuchi. Aquere ra Dios nandererecuarã tuchi cote, i que Pablo mbia je ra. Bernabé rese. ²³ Amei mo ngue eirabo rabo mii ino huee ra. Jesús icuasa rerecuarã no hue. Ñumunua je rerecuarã jaaja. Aquere que hui uchiu sí ra. Quiaruã. Ñee ñee ngue equia Dios je ra. Ñee ñee ee ererecua namonda riĩ. —Ã jẽingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquíaa, Bernabé rese

²⁴ Nyoĩ que erecha cote ra. Pisidia, i equia ibi je, hue rĩ ngue echoi ra. Ngasẽ ngue Panfilia no nda. ²⁵ Jesús cheẽ turã ngue esenei senei sucha tubiriã Perge jenda je ra. Aquere que echoi Atalia no nda. ²⁶ Hue sí que echoi ama ndui ra. Nguique riita qiti que ecuaẽ tiba Antioquía cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. —Chã Dios turã jendeaquiato jẽso mose, i que ee nyii ra. Huee que tiba obei cote ra. ²⁷ Ngasẽ mose Antioquíaa, Jesús icuasa que emunua nua cote ra. Mbae ja que esenei tuchi ee ra. —Dios que ureaquiato tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguiã Jesús icua cote, ure echeẽ nenei nenei mose, i que Pablo ra. Bernabé rese. ²⁸ Chi arete que Antioquíaa ra. Jesús icuasa ja rese echi huee.

Jesús quiato rerecua ñumunua ja

15 Judea jenda mo ngue ngaẽ Antioquíaa ra. Ngaẽ ngue Jesús icuasa mbaaquiato quiato icuã nda. —Circuncisión jẽsaã saã ja. Moisés cheẽ nguire jẽsaã saã, i rei que Jesús icuasa je ra. Eracoĩ ire o ji je chõ eriqui nguiã circuncisión, i ũquĩ je. —Eĩ jenyee eã mose ra jẽsoã ibate, i rei que ra. ² —Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee

ñooño nguiã, i tuchi Judea jenda. Nyebe ñee tuchi nguiã nyue circuncisión ñi. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ũquĩ mondochoi ja. —Jẽso Jerusalén. Jeñee Jesús quia-to rerecua je. “¿Circuncisión nda uresaã saã nde?” jenyee oso ee. Sã Jesús quiato rerecua ñee jẽje. Jenyu ñee ure je cote, i que ñee uchimondo je ra. ³ Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia huicua sí cote ra, i que hue jenda mbiirandu randu ra. Jesús icuasa ia tuchi que eandu ra. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jẽsaã saã ee. Jeñee na ee. “Moisés cheẽ ndui jẽingo bei”, jenyee chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque riĩ. ⁷ Ñee ñee tuchi nyue circuncisión ñi. Aquere que Pedro juã ñee nda. —Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ũquĩ Jesús icua sacua ngue seirabo cose ra. Ũquĩ jẽicuate quia ã. ⁸ Dios quia aba chiã icua jate nguiã co. Judíos eã je abe Dios Espíritu Turã mondo mondo cote. Nande achõ je eã emondo. Ũquĩ abe je emondo mondo Jesús icua mose no. “Judíos eã abe sequiato”, i ñee Dios re. ⁹ Judíos eã Jesús icua mose, Dios ũquĩ ñia mbi-asu cote. Nande rã sí. Nyebe Dios riqui nguiã judíos eã je abe siqui turã. Nande rã sí. ¹⁰ ¿Mbaerã jẽingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jẽingochĩ embeta re. Embeta ji chĩ nda eãtã tuchi aba je cot e re. Ũquĩ nanderu cose ndare saã aroneate. ¹¹ Dios turã nguia nandemingo bei nguiã ã. Dios turã nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã sí no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. —Seandu rã se, Seresenda. ¹⁴ Pedro que ñee jẽje namo nda. Dios turãte que judíos eã je ra. Dios que ũquĩ mo irabo rabo nguesendarã nda. Pedro que jembiirandu erese namo nda. ¹⁵ Eĩ ngue

Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote. ¹⁶ ã ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote, i que Dios ra. ¹⁸ Eĩ ngue Dios ñee mbia mbiirandu cose ra, i que Jacobo ra. ¹⁹ —Judíos eã mo ngue Dios icua icua quia cote ra. ¡Nandechẽ nandembetayã jiri ee jẽ! ²⁰ ¡Nandechẽ mii ño nandembesa mondo ee jẽ! Nandechẽ mumbayã sacua. “Mbia soo mondo mondo mose dios raanguia je, ¡aque soo ra jẽuchĩ jẽ!” nande rã ee. “¡Jeninisi rese siqui rocoĩ nda jẽingochĩ emo ndese jẽ! ¡Jendu rese siqui rocoĩ nda jẽingochĩ emo ndes e jẽ!” nande chõ ee. “¡Eruqui resebe ra soo jẽuchĩ jẽ! ¡Mbae ruqui ra jẽuchĩ jẽ!” nande chõ ee. Ûquĩ mii nandembesa rã mondo ee. Nandechẽ mumbayã sacua. ²¹ Ûquĩ mii nande rã ee. Ûquĩ ño mbia ñandu ñandu mbei quia cose ndare bei. Mbia Moisés chimbesa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² —Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ûquĩ ndei Jesús quiato rerecua mo. Ûquĩ ngue emondo Antioquíaa ra. —Urecheẽ jẽsenei senei Jesús icuasa hue jenda je, i que Jerusalén jenda ra.

²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jẽje a, Jesús icuasa. Judíos eã je. Antioquíaa jenda je. Siria jenda je. Cilicia jenda je. Saludos. ²⁴ Ureresenda mo ngue nyoichĩ jembaaquiatu icua icua nda. Ûquĩ ñee jemingo asi asite rei. “Circuncisión jẽsaã saã”, i chõchĩ equia jẽje rea. “Moises cheẽ ndui jẽingo bei”, i chõchĩ equia jẽje re. Ûquĩ uremondo eã ñee jẽje. Ae ae chõ nyoĩ nguiã ñee ñooño jẽje. ²⁵ Nyebe ureico nguiã ñumunua a. Emo ngue ureirabo emondo sacua jendea ra. Nyeremo uremondo quia aque. Pablo rese. Bernabé abe rese. Ure quiato tuchi que Ûquĩ nda. ²⁶ Ûquĩ ireĩ ireĩ eã tuchi nyoĩ Jesucristo cheẽ nenei nenei. Mbia eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ûquĩ nda jembiirandu ja. Ûquĩ nda urecheẽ senei senei jẽje. ²⁸ Espíritu Turã ngue urembaaquiatu ra. Nyebe ra urecheẽ tuchiã jẽje. Echeẽ mumbayã sacua. ã mii ño uremondo quia jẽje aque.

²⁹ “Mbia soo mondo mondo mose dios raanguia je, ¡aque soo ra jẽuchĩ jẽ! ¡Eruqui resebe ra soo jẽuchĩ jẽ! ¡Mbae ruqui ra jẽuchĩ jẽ! ¡Jeninisi rese siqui rocoĩ nda jẽingochĩ emo ndese jẽ! ¡Jendu rese siqui rocoĩ nda

jẽingochĩ emo ndese jẽ!” Coche Ûquĩ jemumbayã nguiã. Aque mii ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbesa isi mose. ³² Dios cheẽ mbuchecuasa rei Judas. Silas rese. Nyebe que Ûquĩ Dios cheẽ nenei nenei tuchi Jesús icuasa je ra. Jesús icuasa mbaaquiatu quiatu tuchi. ³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda. ³⁴ Silas que siquichõ nda. ³⁵ Pablo abe que siquichõ Antioquíaa ra. Bernabé rese. Mbia que embaaquiatu quiatu quia ra. Dios cheẽ turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfíliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos riĩ. Nyebe que nyao nyesi ra. Bernabé que Marcos querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiatu bei jẽso mose, i ja que ee ra. Pablo que nyoĩ cote ra. Silas rese. ⁴¹ Siria rĩ ngue echoi ra. Cilicia rĩ abe no. Hue jenda Jesús icuasa mbaaquiatu quiatu que echoi ra.

Pablo resenda bei que Timoteo cote ra

16 Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra. ³ —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote. ⁴ Nyoĩ que sucha tubiriã mbuchesea sea cote ra. Jesús quiato rerecua cheẽ ngue esenei senei ja quia mbia je ra. Jerusalén jenda cheẽ. —¡Ûquĩ ñee nda jemumba mumbachĩ jẽ! i que Pablo nyoĩ quia ra. ⁵ Pablo que Jesús osei uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiatu quiatu, i que Macedonia jenda Pablo je cuu ra

⁶—Nyao Dios cheë nenei nenei Asia, i rei ngue re. Espíritu Turã ngue nya i ee ra. Nyebe echoi nguiã Frígiaa. Galáciaa abe. ⁷Ngasë ngue Mísiaa ra. Nyao Bitinia, i rei ngue re. Espíritu Turã ngue nya i ee ra. ⁸Misia que echucuaño nyoï ra. Ngasë nyee Troas. ⁹Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu ra. —¡Echu aa Macedóniaa jê! Echu urembaaquiatu quiatu, i nda Pablo je cuu ra. ¹⁰Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheë nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹Ama ndui que ureso Troas si ra. Eriimbe que ureso iasa ra. Urecuasë nyee que oso Samotracia ra. Isamami ngue ureso Neápolis cote ra. ¹²Hue si que ureso ibi rĩ nda. Urecuasë nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra. ¹³Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaë ngaë nguiã huee ra. Acuaní mo ndese. Urecoi que Dios cheë nenei nenei ee ra. ¹⁴Lidia, i que urecheë andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheë mbuchecua ee ra. Pablo cheë ngue eisi ra. ¹⁵Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jêje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷Nyucuaaque que tu Pablo rui ra. Tu ure ja rui. Ñee ngue urerĩ nda. —Ã ndei Dios rimba ã. Ibatenda rimba. A echí aba icuã mbutiãsa nenei nenei jêje a. A echí Jesús renei nenei jêje a, i bei que nyucuaaque quia urerĩ nda. ¹⁸I bei que nyucuaaque quia urerĩ nda. Pablo que echeë nyosei chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esë nyucuaaque si, i que Pablo aba checuayã icuã je ra. Echeë mosebe que usë esi ra.

¹⁹Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curu-

choi que plaza ra. ²⁰Mondo que mbia rerecua je ra. —Ã ndei judíos ã. Mbia mbiçuã icuãte equia ñee ñee ã. ²¹“Ure rã jëingo”, ichĩ nguiã nande je. Romanos ndaque nande. Ūquĩ nandesã aronea tuchi quiarei, i que mbia nguerecua je ra. ²²Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jëiruã nua, i que ererecua ra. ²³Mbia que eiruã nua tuchi ra. Tarõ ngue cote ra. —Jësaarõ tuchi, i que ererecua eraarõsa je ra. ²⁴Echeende que etarõ tuchi cote ra. Ei abe que emumbi ino ira je ra.

²⁵Pablo que ñee ñee nguiã Dios je itondiite mose ra. Silas rese. Irasei rasei abe no. Etarõi que echandu ja quia ra. ²⁶Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuaa que nyera ja cadenas nda. Etarõ ji si que nyera ja ra. ²⁷Eraarõsa que ñumumba ra. Eiquesa eequia ji rese que mae nda. Etarõ ji uchã nei nguiã ee. Nyebe ñee nguiã. —Tachĩquia, i que tiquise rirõ nda. ²⁸Pablo que tasë ee ra. —¿Mbaerã nda erechĩquia re? ¡A urecu chõte a resë! i que Pablo ee ra. ²⁹—Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que ngũã ndese Pablo je ra. Silas abe je. ³⁰Eraarõsa que ecuruchoi taicuee cote ra. Ñee ee. —Sã Dios serirõ seicuã si. ¿Mañi ae ra se re? Siqui bei sacua Dios rese re, i que eraarõsa ra. ³¹Pablo que ñee ee cote ra. Silas rese. —Jesucristo eicua. Ūquĩ mose ra Dios nderirõ ndeicuã si. Ūquĩ mose ra Dios ndechuchua jenda abe rirõ huicuã si, i que Pablo ee ra. ³²Jesús cheë ngue esenei senei ee ra. Echuchua jenda je abe que erenei nenei nda. ³³Pablo iruã nua ji que eraarõsa irei irei ra. Silas iruã nua ji abe. Itondii mose raque. Bautizar i que eraarõsa je cote ra. Echuchua jenda ja je abe que bautizar i ra. ³⁴Eraarõsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. —Nandeico Dios icua co cote, i ñene. Nyebe eya tuchi Dios rese.

³⁵Isamamimbe que ererecua ñee policía je ra. —Jëso Pablo mbusë cote. Silas abe jembusë, i que ee ra. ³⁶Eraarõsa que ñee Pablo je ra. —A policía cuaë a. Jembusë sacua. Hui que jësi ra. Jëso turã cote, i rei que eraarõsa Pablo je ra. ³⁷—Nya, i que Pablo ee ra. —¿Mbaerã ererecua ureiruã ñooño nde? Mbiãsa. Mbae icuã naa mose rocoĩ. Romanos ndaque ur e abe. Uretarõ ñooño ngue ra. “Nandembusë checuayã”, i raque ure je co cote. Tei. Sã ūquĩ ngaë urembusë nyecua, i que Pablo ee ra. ³⁸Pablo cheë ngue policía senei nguerecua je ra. “Romanos”, i mose que ererecua chiã cuaãcuã i ja ra. ³⁹Ererecua que nyoï Pablo rea cote ra. Silas abe rea. —Ureicuã ñochĩ jêje. Ureicuã eã nda cote. Jëso a si cote, i que ererecua embusë turã mondo cote ra. ⁴⁰Pablo que usë etarõsa si cote ra. Silas rese. Nyoï que Lidia chuchua ra. Hue que echí mbirĩ Jesús

icuaa mundua ndua ra. Nyoï que hue si cote ra. Sucha tubiriã si.

Pablo que siqui Tesalónicaa ra

17 Pablo que nyoï Antípolis rĩ nda. Apolonia nĩ abe echoï. Silas rese. Hue si que echoï ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je. ² Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiato quiato huee ra. ³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jẽje, ae rei Cristo. Ae jẽsaarõ arõ mbeite quia, aque rei Jesús, i que Pablo embaaquiato quiato ra. ⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ùquĩ. Griego ninisi tubiriã abe que siqui Pablo rui ra. Mbia chiã tuchi rei ùquĩ. ⁵ Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, ùquĩ ngue ngueteãte quia mbia rese ra. Nyebe ngata choõño je munua nguiã. Ùquĩ ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icuã je, i rei que judíos ra. ⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoï mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbiã icuã ja aa. Pe jenda mbiã icuã icuã jare. ⁷ Jasón eisi turã ñochĩ nguia uchuchúaa a. Ùquĩ icuã ja que eriqui nandererecua je. César cheẽ emumba mumba bei chõchĩ nguiã ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra. ⁸ Mbia ataque eandu mose que paama i ra. Ererecua abe que paama i ra. ⁹ Ererecua que mbae isiquia isi Jasón si ra. Jasón ndesenda si abe. —Uremeembe ra jẽje Pablo choï mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoï jei Berea ra. Silas rese. Aque isa mose bei. Ngasẽ ngue Berea ra. Nyoï que judíos chumunuasa cote ra. ¹¹ Judíos Berea jenda que earacua ra. Tesalónica jenda si. Berea jenda quiato que Dios cheẽ ñanduse rete ra. Berea jenda que embesa ji tea jei jei ra. —Ma Pablo ñee Dios cheẽ ndu si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chiã rei griego s ninisi. ¹³ Pablo que Dios cheẽ senei senei Berea jenda je ra. Judíos Tesalónica jenda que jirandu ra. Jirandure que echoï

Beréaa mbia mbiã icuã Pablo je ra. ¹⁴ Jesús icuasa que Pablo mondo ama ndisha quti ra. Silas que siquichõ Beréaa ra. Timoteo rese. ¹⁵ Ae Pablo curuchoï, ùquĩ ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra. Ùquĩ ndese quiato que mbia riqui oo tuchi ra. Pablo que mae icuã ùquĩ ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echeẽse rete eriqui reae, i que emo emo nda. —Dios mo nĩ eriqui ñee ñee nande je reae, i que emo emo nda. Pablo ñee ñee mose Jesús rĩ. Pablo Jesús quera renei nenei mose. ¹⁹ Mbia que Pablo curuchoï ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae rĩ ereico ñee ure je re? Embuchecua ure je. ²⁰ ã ngue urechuanate quia ra. Ndecheẽ embuchecua ure je. ¿Mbae ere quia re? i que mbia Pablo je ra. ²¹ Atenas jenda mingo uquia reã mbae mo ndese. Ae siqui Atenas jenda rese, ùquĩ abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheẽ jẽje, Atenas jenda. Dios ata rete rese jẽingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenyee que embesa mi nda. Ae je jẽingo ñee ñee ùquĩ. Jemae sayã ndaque. Ae rĩ aico ñe e jẽje co. ²⁴ Co Dios que ibi chao ra. Mbae ao ja. Ae rei mbae rerecua. Ibi rĩnda rerecua. Ibei jenda abe rerecua. Dios siquiã ño nguiã tuchuaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingosa rei ae. ²⁶ Mbia mii ngue Dios chao ra. Aque rei mbia i ja aque. Emo eã ño nandeico nguiã ã. Nande ja chõ nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra. ²⁷ Dios que mbia mingo ibi rĩ nda. Ñ nda mbia Dios requia. Ñ nda mbia Dios icua. I sho eãte Dios riqui a. Nande ja jii eriqui a. ²⁸ Dios rĩ ae nandeico nguiã. Erĩ ae nandeico

nguiã ngata. Jemo abe que ñee nda. “Dios riirĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icuã teachõ cose ra. Mbua aquiatuã mose. Namo ño Dios riqui nguiã ñee mbia je co. “Jẽhui chõ jẽicuã si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios miñ ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mondo tata cuasu no. ³² —Jesucristo que quera si manonde ra, i que Pablo ee ra. Mbua que iquia iquia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ùquĩ ngue siqui bei erui ra. Dionisio, i que ùquĩ mo je ra. Ae rei mbua rerecua mo. Dámaris, i que cuña mo je ra. Emo emo abe que siqui Pablo rui ra.

Pablo que siqui Coríntoo ra

18 Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. Ùquĩ ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra. ³ Pablo que tuchia saã saã nguia mbae ire je ra. Eĩ ngue Aquila no nda. Tuchia raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jẽsaarõ arõ mbeit e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huiirao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¿Dios cheẽ ngue asenei tuchi rei jẽje ra jẽ! Nyebe taendecha. Judíos eã je Dios cheẽ tasenei senei cote, i que Pablo huiirao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto

jenda tubiriã ngue Dios cheẽ ñandu ra. Mbua tubiriã ngue Jesús icua cote ra. Bautizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbua si jẽ. Secheẽ esenei senei mbei. Erehuichĩ nda esi jẽ. ¹⁰ Co aico nderea quiatu co. Mbae icuã nda i eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra. ¹¹ Pablo que siqui arete Corinto ra. Un año ndobeichõ jiri que eriqui huee ra. Mbua mbaaquiatu quiatu bei Dios riĩ.

¹² Galión ngue Acayo jenda rerecua ra. Aque mose que judíos ñimbiicuã tuchi Pablo je ra. Oo que erese ra. Curuchoi que nguerecua je ra. ¹³ Judíos que ñee ererecua je ra.

—Pablo que mbua mbaaquiatu icuã icuã nguia ra. Dios riĩ. Nandererecua cheẽ ndui eã, i que judíos ra. ¹⁴ Pablo nda ñee nguiã ña. Ererecua Galión nane nguia ñee nguiã esi. Ñee judíos je. —Mbae icuã ndese que Pablo riqui ãte. Eĩ nguia nda jeñee achandu nguiã ña. ¹⁵ Mbae icuã ngue esaã eãte. Pablo cheẽ je chõ jẽingo nguiã paama i. Judíos cheẽ niñ ño jẽingo nguiã paama i Pablo je. Nyebe ra jeñee achana. Jẽ ae jeñee turã jenyue ae, i que Galión judíos je ra. ¹⁶ Mombo ja que uchuchua si cote ra. ¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquíaa

¹⁸ Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Sucha a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, aque que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra. ²⁰ —Eico are jiri aa, i rei que judíos ee ra. Pablo que echeẽ mumba bei oso ra. ²¹ —Taso Jerusalén. Mbua chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²² Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³ Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴ Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi. ²⁵ Apolos que Dios icha icuate ra. Mbiam que embaaquiato quiato turã tuchi quia ra. Mbiam mbaaquiato turã Jesús rĩĩ. Juan Bautista cheẽ achõ ngue eicua quia ra. Juan bautizar i mose mbiam je. ²⁶ Apolos siquicheã tuchi que eriqui mbiam mbaaquiato quiato ra. Judíos chumunuásaa. Aquil a que ehandu ra. Priscila rese. Nyebe que õquĩ Apolos rerao mbaaquiato quiato tuchi ra. Dios icha que embuchecua tuchi ee ra. ²⁷ Apolos que osose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jẽisi turã, i ee. Apolos que ngasẽ cote ra. Ae Jesús icua quia, õquĩ mbaaquiato quiato tuchi. ²⁸ Apolos que judíos cheẽ siquisã tuchi ra. Judíos mbiam mbaaquiato chooño mose. Jesús rĩĩ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheẽ nenei ee ra.

Pablo que siqui Efésoo ra

19 Sita ibate bate ite rĩĩ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra. ² Pablo que ñee ee ra. —Jẽ Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbiam Pablo je ra. ³ Pablo que ñee ee ra. —¿Mbae rĩĩ bautizar i jẽje re? i que ra. —Juan ñee ñii ngue bautizar i ure je ra, i que Pablo je cote ra. ⁴ Pablo que ñee ee ra. —Juan ngue bautizar i mbiam je ra. Mbiam hui mose huĩcuã si. “Ae ra tu serui, aque jẽicua jẽ. Jesucristo chõ aque re”, i que Juan nda, i que Pablo ra. ⁵ Pablo cheẽ andu mose que bautizar i Jesús rĩĩ cote ra. ⁶ Pablo que o chono earõ nda. Espíritu Turã ngue ique echiangui re cote ra. Ucheemo ngue esaã saã nguia cote ra. Dios cheẽ ngue embuchecua checua quia mbiam je cote ra. ⁷ Doce que õquĩ nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheẽ nenei nenei nda. —Ererecua tuchi quiarei Dios. Jesús jẽicua rã, i que Pablo quia mbiam je ra. ⁹ Emo emo ngue Pablo cheẽ ñandu sereã nda. Echeẽ mumba mumba. Jesús rĩĩ ñee icuã icuã mbei mbiam ja je. Nyebe Pablo nyao nguiã esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiato cote ra. ¹⁰ Dos años ngue Pablo riqui huee ra. Nyebe mbiam Asia jenda jirandu ja nguiã Jesús rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbiam mae sayã ngue esaã saã nguia ra. ¹² Mbiam rasi mbucherõ sacua ngue mbiam riqui tiru mbucha mbucha Pablo rese ra. Õquĩ tiru que ecuruchoi choi quia mbiam rasi je cote ra. Õquĩ tiru ruruchoi mose, mbiam rasi que nyerõ nyerõ nguia cote ra. Aba checuayã icuã abe que usẽ usẽ nguia mbiam chiã si cote ra. ¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusẽ aquiatute que ure ra, i que equia ra. —Jesús rĩĩ aba checuayã icuã nandembusẽ, i rei que nyue ra. Nyebe que ñee aba checuayã icuã mo je ra. —Jesús quirãcuã ñii aico jembusẽ mbiam si co. Ae Pablo senei senei nguia, i rei que judíos aba checuayã icuã je ra. ¹⁴ Sacerdote rerecua ririĩ abe que eĩ si ra. Siete eriiriĩ. Esceva, i que sacerdote rerecua je ra. Judío que ae ra. Ae ririĩ ngue eĩ si rei no nda. ¹⁵ Õquĩ ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ jẽ nde? Jaẽicuayãte se, i que aba checuayã icuã nda. ¹⁶ Aba checuayã nyireco que oo erese cote ra. Ucuatuchi que õquĩ ja rese cote ra. Õquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que õquĩ mbasi ja ra. Nyebe õquĩ ndasi rasi uchã aba checuayã icuã si. Eirao eã ngu e nyoĩ uchã itaicuee rĩĩ nda. ¹⁷ Efeso, i que huee sucha tubiriã je ra. Huee jenda que jirandu ja erese ra. Judíos que jirandu ja erese ra. Judíos eã abe no. Nyebe huee jenda siquiche ja. Nyebe mbiam ñee turã turã jate Jesús rĩĩ. ¹⁸ Jesús quiato mo ngue ngaẽ ngaẽ nguia ra. Eya eãte que huĩcuã ndese ra. Nyebe huĩcuã nenei nenei. ¹⁹ Mbiam tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. Õquĩ ngue esei sei mbiam ja rësaa cote ra. Mba e isiquia ata tuchi raque que õquĩ libros isiquia ra. Cincuenta mil plata. ²⁰ Mbiam tubiriã ngue Dios cheẽ isi isi quia ra. Dios cheẽ irãtãte que mbiam tea quia cote ra. ²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbiam paama i tuchi Jesús rĩĩ nda. ²⁴ Demetrio quia rei mbiam mbeĩcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra. ²⁵ Nguesenda ja que emunua nda. Dios mbuae

chuchua raãsa que emunua ja ra. Ñee ngue ee ra. —Mbae nandei si turãte rei nguiã nandechiao ribishorõ ã. ²⁶ Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbua riqui echeẽ mumbayãte ã. A jendachõ eã ñene. Efeso miã eã ñene. Asia jenda abe eriqui echeẽ andu ã. ²⁷ Ûquĩ icuãte nande je. Nandechiao ra mbia isi isiã ñochĩ cote re. Mbua ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecua tuchi que Diana. Mbua chucua tuchi que ae. Asia jenda chucua tuchi que ae. iMbua ra hui chõchĩ esi jẽ! i que Demetrio ra.

²⁸ Demetrio resenda echeẽ andu mose que paama ite ra. —iDiana quirãcuãte jẽ! iEfeso jenda rerecua quirãcuãte jẽ! i tuchi que mbia tasẽ tasẽ nda. ²⁹ Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ûquĩ nyeremo ngue ecuruchoi mbia chumunúasa ra. ³⁰ —Taque se abe. Tacheẽ ñee mbia je, i rei que Pablo ra. Jesús quiato que Pablo siquisã nda. ³¹ Asia jenda rerecua mo abe que ucheẽ mondo Pablo je ra. —iEriquechĩ nda nde jẽ! i Pablo je. Pablo quiato que Ûquĩ nda. ³² Mbua que pare pare i tuchi ra. Tasẽ tasẽ ja que ra. Hue rĩ ja mbia ndua eãte. Mbae miã ndese ndua eã. Paama i chooño ja. Eaquiata ño ñumunua ñooño nguiã. ³³ Mbua mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeẽ mbia ja je, i que ee ra. Alejandro que o mee mbia je ra. —iJẽquiriri chõ jẽ! i rei ngue ee re. —Mbua je tacheẽ. Ñ nda paama iã judíos je, i rei ngue re. ³⁴ —Judío chõ Alejandro riqui re, i ja que mbia ra. Nyebe mbua riqui tasẽ tasẽ mbeite re. Dos horas. —iDiana quirãcuãte jẽ! iEfeso jenda rerecua quirãcuãte jẽ! i tuchi que mbia tasẽ tasẽ nda. ³⁵ Secretario rei ererecua mo. Aque que mbia cheẽ siquisã cote ra. Ñee ngue ee cote ra. —Tacheẽ jẽje, Efeso jenda. Efeso jenda chõ nande re. Diana ndei nandererecua. Nande rei Diana ndaarõsa. Diana naanguia ngue tu ibei si, aque raarõsa chõ nande re. Diana chuchua raarõsa abe chõ nande re. Mbua jirandu jate Ûquĩ ndese. ³⁶ Emo eicuayã eãte. Nyebe jẽquiriri chõ jẽ. iJẽaquiata jẽsaã saã eã ño jẽ! ³⁷ Ae jẽsi seru nae, Ûquĩ mbae mbuquiachã eãte dios mbuae rĩ. Dios mbuae jendererecua rĩ. ³⁸ Demetrio ñee icuãse mose emo niã, sã esi nandererecua chuchúaa. Demetrio resenda ñee icuãse mose emo niã, sã echoi nandererecua chuchúaa. Huee chõ ererecua riqui nguiã mbia cheẽ andu. Sã echoi ja ererecua je. Sã ñee ñee ja nyue ererecua résa. Mbae icuã niã. ³⁹ Mbae mo niã abe mose, jeñee mbia chumunua mose. ⁴⁰ Jesús quiato que nandei chooño chĩ nda. Nandechimbucua ñooño ño nguiã. Nandererecua ñee arõte nande je. Echeẽ nda

nandesibishorõ eã, i que secretario ra. ⁴¹ Aquere que hui mbia si ra. Mbua mbui que cote ra.

Pablo nyoĩ Macedoniaa, Gréciaa abe

20 Mbua quiriri mose que Pablo Jesús quiato munua nda. Embaaquiata quiata jiri. —Co acua quia co, i que ee cote ra. Macedoniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra. ³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandei si, i nda judíos quia Pablo rĩ nda. Nyebe Pablo ru nguiã nyebi si Macedonia. ⁴ Ñ ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei Ûquĩ. Gayo. Derbe jenda. Timoteo. Tíquico. Trófimo. Asia jenda rei Ûquĩ. ⁵ Ûquĩ ja rane nguia nyoĩ nguiã ure si. Troas que echĩ nguiã ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, Ûquĩ ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiata quiata quia ra. —Taso isamami, i que ra. Nyebe embaaquiata quiata itondiite mose chee. ⁸ Sucha ibátee que echĩ ñumunua nda. Eironguia ibate tuchi que ra. Ibate tuchi que echĩ ñumunua nda. Tata rendi tubiriã ngue etesae tuchi ra. ⁹ Mbua mo ngue chĩ ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —iJẽsiquichechĩ nda jẽ! Manoãte, i que Pablo mbia je ra. ¹¹ Pablo que osoi nyui ra. Mbichae que echisia sia ra. U que ra. Mbua que embaaquiata quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbua curuchoichĩ nguiã. Mbua ia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguiã ama ndisha rui. ¹⁴ Ae urecuasẽ nguiã Pablo je Asón cote. Pablo que oso urerese am a ndisha rui cote ra. Canoa naanguia ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucua cote ra. Quío, i que hue ejoõ acua

je ra. Isamami nongue que urecuasẽ Samos cote ra. Hue si que ureso Trogiloo ra. Huee que urequeneã urecuca ra. Isamami ngue urecuasẽ Milétoo cote ra. ¹⁶ Pablo que quicoi asi Asia si ra. Nyebe uresoã Efésoo. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. —Jenyu, i que amei je ra. Jesús quiato rerecua je. ¹⁸ Ūquĩ ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jẽicuate raque. ¹⁹ Dios cheẽ ngue asenei senei turã tuchi quia jẽje. Se-cuasú que asaã saã eãte quia jẽje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jẽje. Asiquicheã mbei que sequia erenei nenei jẽje. Jembitirõ sacua. Jeñumunua nua mose. Jenyuchúaa ja abe que aico Dios cheẽ nenei nenei jẽje. ²¹ Acheẽ tuchi que jẽje. Judíos je. Judíos eã je ab e no. “jẽicuã si jẽhui rá! Jesucristo jẽicua rá”, ae tuchi que sequia jẽje. ²² Co aso quia Jerusalén co. Co Espiritu Turã sererao quia Jerusalén co. Mañi ño nda seje pee. ²³ Co miñi ño aicua nguiã. Espiritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espiritu Turã ngue sembiirandu ra. ²⁴ Sesiquicheãte ūquĩ si. Sã sei quia quiatu. “Dios turã esenei senei mbei quia mbia je”, i que Jesús seje ra. Aque miñi ndese chõ aico nguiã ndu a co. Echeẽ miñi ndese. ĩ nda echeẽ amumba eã. ²⁵ Dios nandererecua que asenei senei tuchi jẽje. Jemae eã mbei ra serese cote. Aicuate se quia co. ²⁶ Jemo siqui sereã mose Jesús rese, se eã ño cote re. Jẽ ño cote re. Jẽ ja je chõ ngue asenei senei ndesẽ. ²⁷ Dios cheẽ ngue asenei senei jate jẽje. Asiquicheã mbei que sequia erenei nenei jẽje. Dios cheẽ mo ngue atibo tibo eãte jẽje. ²⁸ jẽingo turã ño nyiese jẽ! Jesús quiato abe jẽteaquiato quia jẽ! Espiritu Turã ngue ñee jẽje resẽ. “Jesús quiato rerecuarã jẽ”, i que Espiritu Turã jẽje resẽ. Jesús quiato jẽteaquiato quia jẽ. Ūquĩ ndibishorõ ngue Jesús nguqui mondo ra. Umano mose. ²⁹ Seso mose ra emo ngaẽ ñee ñooño jẽje. Tambiĩrĩ irĩ, i ra jẽje. Eicuã ño ūquĩ nde. Nyacua rá sí. ³⁰ Jendese ra emo ndiqui. Jesús quiato mbaaquiato icuã icuã. Jesús quiato mbiĩrĩ irĩ. “Ī nda Jesús quiato siqui nanderese”, i ra ūquĩ. ³¹ Jẽteaquiato jẽ. Jaembaaquiato quiatu tuchi que se. Tres años. Jẽ ja que jaembaaquiato quiatu. Acheseo tuchi que sequia jendese. ³² Aico jendecha Dios je a. Aico jendecha Dios turã je a. i Dios cheẽ turã jemumbayã mbei quia jẽ! Dios cheẽ nda jembuquirãcuã. Dios cheẽ nda jemingo tuchi Jesús quiato rese. ³³ Mbae isiquia que achosei chosei ãte quia mbia mbae aẽ. Mbia irao

abe que achosei chiãte quia aẽ. ³⁴ Seicuate rei que equia aẽ. Se sí chõ aquei quiei nguiã icua. Seresenda mbaerã abe que aquei quiei quia aẽ. ³⁵ Jaembaaquiato quiatu beite que se. “Jẽquiei quiei”, ae beite que sequia jẽje. “Mbaecha reã je mbae jemee mee”, ae que sequia jẽje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi nguiã ndese ra. Ñee ngue Dios je ra. Ūquĩ ndes e ja. ³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra. ³⁸ —Jemae iã nda serese cote, i que Pablo ee ra. Nyebe que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

Pablo nyoĩ Jerusalén

21 Urecuata que ūquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbiĩrĩ cote ra. Huee que canoa yenda jea jea ra. ⁴ Jesús quiato que urembirõ hue jenda ra. Si-ete días que ureico erese ra. Espiritu Turã ngue hue jenda mbucheẽ Pablo je ra. —jEresochĩ nda Jerusalén jẽ! i rei ngue Pablo je re. ⁵ Aquere que ureso cote ra. Jesús quiato que nyoĩ ja urerese ra. Ama nimia ndese. Eresebe echoi urerese. Nguiĩrĩ abe ruruchoi. Ama ndisha rimia ndes e que urecoi ja urenia ndese ra. Ñee ñee Dios je. ⁶ Urechiquiaama ama ja que cote ra. —Co urecua quia co, ure que ee ra. Canoa ye que ureso cote ra. Hue jenda que nyoĩ nyebi uchuchúaa cote ra. ⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ miñi ngue erese ra. ⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbuquiaru sa ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheẽ nenei neneisa ja que ūquĩ nda. ¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ nenei neneisa que ae abe ra. ¹¹ Ae que tu ure je ra. Pablo numbicuaasa que eisi ra. O que echucua eye ra. Hui abe que echucua ra. Pablo numbicuaasa je. Ñee ngue cote ra. —Espiritu Turã ndiqui ñee ndeje a. “Ī nda judíos ndecua pee Jerusalén. Nemeẽ nda judíos eã je cote”, i que Espiritu Turã nda, i que Agabo Pablo je ra. ¹² Ure eandu mose que urecheẽ Pablo je ra. Cesarea jenda abe que ñee ee ra. —jEresochĩ nda Jerusalén jẽ!

ure ja rei ngue ee re. ¹³ Pablo que ñee ure je ra. —¿Mbaerã jëingo nyeseo seo serese re? ¿Mbaerã jëingo sembia eãte re? ¿Mbaete ere? Sã secua Jerusalén ae. Sã seiquia Jesús rĩĩ ae, i que Pablo ra. ¹⁴ Pablo que uresiquisã aroneate ra. Nyebe urecheẽ eã nguiã e e cote. —Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra. ¹⁶ Jesús quiato mo abe que nyoĩ urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasẽ mose Jerusalén nda. Ureisi turã ngue ra. ¹⁸ Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua. ¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra. ²⁰ Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jê!” i tuchi que ùquĩ nguia ra. ²¹ Ùquĩ ndiqui ñee icuã icuã nderĩĩ ùquĩ. “Pablo que judíos ataque mbui Moisés cheẽ si ra”, i equia nderĩĩ ùquĩ. “Coche rei Moisés cheẽ jemumba. ¡Circuncisión jësaãchĩ jendiirĩ je jê! ¡Judíos ataque chisaã saã nda jësaãchĩ jê!, i que Pablo quia judíos je ra”, i rei equia nderĩĩ ùquĩ. ²² ¿Mañi nande ra re? Jesús quiato ra ñumunua ja judíos. Jirandu mose ndereco mose a. ²³ ¡Ë ere jê! Mbia cuatro que siqui urerese ra. Ùquĩ ngue ñee Dios je ra. “Ã nda uresaã ndeje”, i que ùquĩ Dios je ra. Ùquĩ nda esaã ee cote. ²⁴ Ùquĩ erao Dios chuchúaa. Ùquĩ na si esaã nde abe. Nembuturã sacua. Mbae isiquia emondo ee Dios chuchúaa. Queñi ua sia cote. Ë ere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩĩ cote. ²⁵ Judíos eã je que nandechẽ Jesús quiato je. Nandechẽ mii ño ngue nandemondo ee. Ë nande chõ ngue ee. “Mbia soo mondo mondo mose dios mo je, ¡aque soo ra jëuchĩ jê! ¡Eruqui resebe ra soo jëuchĩ jê! ¡Mbae ruqui ra jëuchĩ jê! ¡Jeninisi rese rocoĩ nda jëingochĩ emo ndese jê! ¡Jendu rese rocoĩ nda jëingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

²⁶ Pablo que ùquĩ cuatro querao cote ra. Dios chuchúaa que ererao ra. Isamami ngue Pablo ñimbitirõ nda. Ùquĩ cuatro rese. Oso que ñee Dios

chuchua rerecua je cote ra. —Aque mose ra mbae mo ureiquia Dios je cote, i que Pablo ee ra. ²⁷ Siete días que echi huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chĩ mose que judíos mae erese ra. Ùquĩ ngue mbia mbiicuã Pablo je ra. Oo que Pablo rese ra. Isi que ra. ²⁸ Tasẽ tasẽ ngue ñee mbia je ra. —¡Israel jenda! Jenyu rã urerese. Pablo nandeisi rã. Ae quia oso oso beite nguiã ñee icuã icuã judíos rĩĩ. Moisés cheẽ ni i abe quia eriqui nguiã ñee icuã icuã mbeite. Dios chuchua rĩĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbiicuãte nyeresẽ, i que mbia paama i Pablo je ra. ²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñimbitirõ tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serĩte quia pee, i que oso ee ra. ³² Soldados rerecua que soldados munua nda. Oficiales abe no. Nyoĩ así que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua caderas je, i que soldados je Pablo rĩĩ nda. Ererecua que ñee mbia je cote ra. —¿Aba co re? ¿Mbae icuã esaã jêje re? i que mbia je ra. ³⁴ Hue rĩ ja mbia ñee eã ee. Mbia que ñee ata ata ee ra. Tasẽ tasẽte que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jenya mbitirõ na cuartel, i que ererecua soldados je ra. ³⁵ Pablo ruruchoi que ra. Ngasẽ ngue eiquesa rurubi cote ra. Hue que mbia icuã icuã sí Pablo je no nda. Nyebe soldados ecuruchoi nguiã sui cote. ³⁶ Mbia que tasẽ tasẽ ngaẽ nguia erui ra. —¡Jëiquia rei ae! i que mbia cuaẽ nguia erui ra.

Pablo ñee mbia cuabẽ je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheẽ na, i que ererecua je ra. ³⁸ Ererecua que ñee Pablo je cote ra. —¿Griego cheẽ ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ùquĩ nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee ra. —Tei. Judío chõ se re. Tarso jenda chõ se re. Sucha tubiriã tuchi que Tarso de Cilíciaa ra. Tacheẽ na mbia je, aechĩ nguiã ndeje, i que Pablo ererecua je ra. ⁴⁰ —Eno. Echeẽ ee, i que ererecua ra. Eironguia ibate

rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheë ngue esaã mbia je ra.

22 —Seataque, seandu rä. “Eicuã”, jenyechĩ nguiã seje. Nyebe tacheë jêje, i que Pablo ra. ² Pablo judíos cheë naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chõ se re. Társoo que achaacuquia ra. Tarso de Cilicia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiatu quiatu ra. Eraã si. Dios cheë ngue amumba sereã tuchi ra. Sã jëingo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarõ nda. Mbia ninisi abe que atarõ tarõ nguia ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ùquĩ icuate raque. Jeñee ee ae.

Aico uba Dios rese co cote, i Pablo

⁶ Acuasë nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose que acoi oso íbii ra. Echeë mo ngue achandu ra. “Saulo, Saulo. ¿Mbaerã ndeicuãte riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuãte riqui”, i que seje ra. ⁹ Seresenda que siquiche tuchi ra. Mae ndei ngue tata rese re. Echeë nguia echanuate nguiã. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasë oso cote. Damáscoo. Mbae rĩi nda acheë ja ndeje huee cote”, i que Jesús seje ra. ¹¹ Tata rendi que seresa mungue ra. Sere-sayã. Nyebe seresenda sererao nguiã seo rese. Damáscoo.

¹² Huee que emo ndiqu i ra. Ananías, i que ee ra. Moisé s cheë ngue emumbayã tuchi quia ra. Judíos hue jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ùquĩ icua sacua ngue Dios ndeisi cose ra. Jesús turã ndese mae sacua ngue ndeisi cose ra. Jesús cheë andu sacua ngue ndeisi cose ra. ¹⁵ Dios cheë nda eresenei senei mbia ja je cote. Ae erechandu, ùquĩ nda eresenei senei mbia ja je cote. Ae rese eremae, ùquĩ nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato

bautizar i ndeje. Echeë na Jesucristo je. Sã Dios ndeicuã mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheë mumba mumbate, nde serenei nenei mose. Eso erecha” i que Jesús seje ra. ¹⁹ Acheë ngue Jesús je ra. “Sererecua, a jenda que seicuate nyii ra. Seicuãte que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbia Esteban iquia mose, seyate que ùquĩ mose ra. Huee que aico ra. Eiquiasa irao que asarõ nda”, ae que Jesús je cuu ra. ²¹ Jesús que ñee seje ra. “Eso. Taremondo isho. Secheë nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñi ñee mose que mbia nyiibute cote ra. Pablo cheë andu sereã cote. —¿Pablo nandeiquia rei jê! Ñi nda eriquiã cote, i que judíos tasë tasë nda. ²³ Mbia paama i ja Pablo je. Tasë tasë. Huiirao mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. —Pablo jendao matã. ¿Nandeiruã nua jê! Ñi nda ñee, i que ererecua ra. —¿Mbaerã mbia ñee icuã icuã ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resë. Mbae icuã asaã eãte resë, i que ra. ²⁶ Capitán ngue oso ererecua mbi-irandu cote ra. Pablo cheë nguire. —¿Ereiruã nuachĩ nda jê! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbia que hui esi cote ra. Mbia siquiche ja tuchi que cote ra. —Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheë andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. ùquĩ ererecua ñee sacua ee.

23 Pablo que mae huĩ ererecua ja rese ra. Ñee ngue ee ra. —Seresenda, mbae turã ndese aico bei co. Namu abe. Nyebe sesiquicheã mbei riqui Dios si co, i que Pablo ra. ² Ananías, i sacerdote rerecua je.

Aque que ñee Pablo ji jenda je ra. —Pablo churu rese jengua, i que ra. ³ Pablo que ñee ee cote ra. —Dios ra ucua nderese jê. Ndeturã eresaã ñooñochĩ nguiã. “¡Moisés cheẽ nda jemumbachĩ jê!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguiã serĩ. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra. ⁵ Pablo que ñee ee ra. —Sacerdote rerecua eã eriqui reĩ nguiã seje. Ñ nda acheẽ eãte erĩ. Aicuayãte quia ñi se re. “Jenderecua rĩ jëingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue rĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ũquĩ je chõ mbia riqui nguiã paama i seje. Ũquĩ je chõ ngue sereru nguiã jêje, i que Pablo ererecua je ra. ⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. ⁸ Saduceos que ñee nguia ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue. ⁹ Tasẽ tasẽ tuchi que nyue ra. Fariseos mo ngue juã ñee nda. Ũquĩ ndei embesasa. Ñee ngue Pablo rĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ũquĩ mose ra nandeico turã Dios je abe, i que fariseos ra. ¹⁰ Mbia que ñee icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jêso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

¹² Isamami ngue judíos ñee ja nyue ra. —¡Pablo nandeiquia jê! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra. ¹³ Ae Pablo iquia serĩte quia, ũquĩ cuabête que ra. Cuarenta que ra. ¹⁴ Ũquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose. ¹⁵ “¡Pablo embu ure je!” jenye soldados rerecua je. “Pablo rese uremae na”, jenye solda-

dos rerecua mbiĩrĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riirĩ ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jê! ¡Ndeiquiachĩ nda jê! i que Pablo je ra. ¹⁷ Nyebe Pablo ñee soldado mo je ra. —Senongue riirĩ erao ndererecua je. Ñee nda ndererecua je chã, i que Pablo ra. ¹⁸ Nyebe ererao nguiã nguerecua je. —Pablo que acuanĩndu mbu ra. Mbae i chõ nda ndeje, i nguerecua je. ¹⁹ Ererecua que acuanĩndu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra. ²⁰ Acuanĩndu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nemiĩrĩ irĩ. ²¹ Ñee ñooño nda ndeje. ¡Echeẽ nda eremumbayãchĩ jê! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanĩndu ererecua mbiirandu ra. ²² Soldados rerecua que ñee acuanĩndu je ra. —¡Equiriri chõ oso! ¡Erecheẽchĩ nda emo je jê! i que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icoquiato. Sã echoi Cesarea itondáruu. Sã doscientos choi ibi rĩ. Sã setenta choi ticuasú ato. Sã doscientos choi ira racuatirõ ji rerecua. Cesarea ra jêso itondaru, i que soldados rerecua ñee nda. ²⁴ —¡Ticuasú jêisi mua Pablo rendacuã jê! ¡Pablo jendao turã nguia jê! Jendao turã ererecua Félix je, i que soldados rerecua ra. ²⁵ Embesa ji que emondo Félix je ra. Ñ ngue carta mbesa ra: ²⁶ —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde. ²⁷ Co amondo quia ndeje co. Pablo, i equia ee. Judíos eisichĩ neaẽ. “Nandeiquia”, i rei ereaẽ. Se chõ ngue asiquisã nguiã. Romano ndei ae. Nyebe mbia asiquisã nguiã esi. ²⁸ Judíos rerecua chumunua mose que Pablo arao ee ra. “¿Mbaerã mbia icuãt e riqui Pablo je re?” ae rei ngue ñee ererecua je re. ²⁹ “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo siquiã ndaque mbae icuã ndese. Judíos cose ndare cheẽ nguire chõ ngue judíos paama i Pablo je ra. ³⁰ Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã Pablo mondo ndeje aque. Ae eicuã icuãte riqui Pablo je, ũquĩ je que acheẽ nda. “Jêso quia ñee Félix je”, ae chõ ngue ee ra. Hasta luego. Ñ ngue carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ ngue Antípatris ra. ³² Soldados que nyoĩ ibi rĩ, ũquĩ ngue ngaẽ nyebi isamami nda. Ae nyoĩ

ticuasú ato, ũquĩ ngue nyoĩ bei ngasẽ Pablo ruruchoĩ ra. ³³ Ngasẽ ngue Cesaréaa ra. Soldados rerecua chimbessa que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huĩ carta echimbessa rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra. ³⁵ —Ae ñee icuã icuã nguia ndeje, ũquĩ ngasẽ mose ra ndecheẽ achandu ja, i que ererecua Pablo je ra. —Pablo jêteaquiato tuchi Herodes chuchúaa, i que soldados je cote ra.

Judíos ererecua mbĩcuãse Pablo rĩĩ

24 Cinco días mose que sacerdote rerecua ngasẽ Cesaréaa cote ra. Ananías, i equia sacerdote rerecua je. Ererecua ataque mo ngue ngasẽ erese ra. Tértulo abe que ngasẽ erese ra. Abogado rei Tértulo. Ngasẽ ngue ecuaẽ ñee ñooño Félix je ra. Pablo rĩĩ. ² Soldados que Pablo curucuaẽ ererecua chumunua mose ra. Tértulo que ñee icuã tuchi Pablo rĩĩ cote ra. Ererecua nda embĩcuã nguĩã Pablo rĩĩcharã ña. Ñee ngue ererecua je ra. —Ndeturãte eriqui ure je co, Ure rerecua. Ndeaquiátute eriqui ur e je co. Urembiate equia co. ³ Nyebe “iaanye” ure bei nguĩã ndeje co, Félix. ⁴ Ureandu mbĩĩĩ na. Urecheẽ oco eã nda ndeje nye. ⁵ Pablo quiarei siqui chooñoa judíos je. Judíos mbuchesea sea ja. Embĩcuã icuã uchue. Nazarenos, i que judíos ataque mo je ra. ũquĩ nderecua rei Pablo. ⁶ Pablo que Dios chuchua mbĩcuã serĩte rei ra. Nyebe ureisi nguĩã. Urerao rei que judíos rerecua chumunua mose ra. ⁷ Lisias tu chõchĩ soldados rurucuaẽ cote. Ureriquisã. Pablo rirõ icuã ureo si. ⁸ “Jeñee icuãse mose Pablo rĩĩ, jeñee ño oso Félix je”, i que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, i rei que Tértulo Félix je ra. ⁹ —Ae beite, i ja judíos Tértulo cheẽ mose. Ñee icuã icuã ja Pablo rĩĩ.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeẽ seje cote, i chõ ñoomee nguĩã ee. Pablo que ñee ee cote ra. —Urererecua ima nde. Ndeaquiátute. Nyebe sebite riqui nguĩã secheẽ mose ndeje. ã ngue ñee ñooño nguia serĩĩ nda. Echeẽ tasibishorõ ndeje. ¹¹ Namó jiri que aso Jerusalén nda. Doce días. Acheẽ ñee ngue oso Dios je ra. Echeẽ ñee mbia je ae. Sã mbia nembirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunúasa que aico eã mbia mbĩcuã icuã nda. Mbia chuchua ite re abe que aico eã mbia mbĩcuã icuã no nda. ¹³ ã ñee ñooño ño nguĩã serĩĩ. ã mae ãte seicuã mo ndese resẽ. ¹⁴ Aque mĩĩ ndese chõ aico resẽ. Dios cheẽ yasu rui bei chõ aico nguĩã co. Dios cheẽ yasu quiarei eicuã eã. Dios rei ureru rerecua bei. Co aico

Dios icua co. Co aico Moisés cheẽ icua co no. Co aico Dios cheẽ mbuchecuasa chimbessa icua co no. ¹⁵ Co aico Dios icua ũquĩ na si co. Mbia raaque ra quera si no. ũquĩ aicuate. Mbia icuã nda quera si. Mbia turã na si. Quera ja chõ ndae. ¹⁶ Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achĩmbuturã ngue Dios chuchúaa ra. Mbia eãsa. Mbia ambĩcuã eã. Judíos Asia jenda que mae serese ra. Dios chuchúaa. ¹⁹ Sã ũquĩ ngaẽ serenei ndeje. Seicuã mose, sã ũquĩ ngaẽ ñee ndeje. ²⁰ Sã ã abe ñee ndeje. Seruruchoĩ rei que judíos rerecua chumunua mose ra. Mbae i ãte que seje ra. “Mbae icuã ngue eresaã nda”, i eã ngue ererecua seje ra. ²¹ “Mbia mano je ra quera si, ae chõ ndei nguĩã co. ũquĩ je chõ ngue sereru nguĩã jêje”, ae que ererecua je ra. ũquĩ i equia seje reae, i que Pablo Félix je ra. Félix rei ererecua.

²² —Emo mose ra acheẽ ndeje, i que Félix Pablo je ra. Félix jirandu tuchi rei Jesús chĩmbaaquiato rese reã. —Sã soldados rerecua ru rã. Huee quia nda acheẽ nguĩã cote. Mañi ño nda aba ndeje cote, i que ererecua Pablo je ra. ²³ Félix que ñee capitán je cote ra. —Pablo jêteaquiato bei jẽ. Jẽhui jẽhui jiri esi. Sã equiãto ngaẽ ngaẽ eã. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheẽ tachandu rã. Jesucristo rĩĩ tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Sercochĩ mose ra acheembe ndeje, i que Félix Pablo je ra. ²⁶ —Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguĩã Pablo je. ²⁷ Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mĩĩ nda. —ĩ nda judíos paama iã seje, i que ra.

Pablo ñee ererecua Festo je

25 Festo que ngasẽ Cesaréaa cote ra. Félix randaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo rĩĩ nda. Judíos rerecua abe ñee icuã ja Pablo rĩĩ. Festo je ñee ñee Pablo rĩĩ. ³ —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa. ⁴ —Pablo tarõ ji ñi Cesarea pee. Aruã nda se. Namó jiri ra aso

pee, i que Festo ra. ⁵—Sã jenderecua abe nyoi serese Cesaréaa. ¿Mbae jenyé quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rá. Echeẽ tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo rĩĩ nda. Maende rocoĩ mbae icuã naa mose. Ñee ñooño eriĩ. ⁸ Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chĩmbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambĩcuã eãte no ndesẽ, i que Pablo ra. ⁹—¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —Ĩ nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. —Romanos nderecua raque jẽ. Aico raque jẽsaa a. Jẽ nguiatu jeñee seje. Ā jẽingo raque seicuate ã. Mbae icuã mo asaã eãte judíos je resẽ. ¹¹ Se mbae icuã naa tuchi mose, ¿seiquia se jẽ! Judíos ñee ñooño mose serĩĩ, ¿mbaerã nda semondobe judíos je re? Semondo aroneate ee. Ererecua tuchi je semondo rá. Sã ae quia ñee seje, i que Pablo Festo je ra. ¹² Festo que ñee nye-cuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itõ mo-coĩte ra. Festo que Agripa mbiirandu ja Pablo rĩĩ nda. —A emo tarõ ji ñi a. Félix que etarõ mii nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo rĩĩ. ¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia eriĩ, sã ũquĩ ngaẽ ñee ee. Sã ñee nguia nyue sésaa”, ae que ee ra. ¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rá”, ae que isamami serimba je cote ra. ¹⁸ Pablo ucuayãsa que juã ja rei cote ra. Ñee icuã tuchite reĩ nda Pablo rĩĩ seje. Pablo chĩsaã icuã mo ngue embuchecuayã ñochĩ nguia seje. “Mbia ra Pablo mbiĩcuã tuchi chĩ nde”, aechĩ ngue se re. ¹⁹ “Judíos rá eã ño Pablo. Judío ndua rá eã ño Pablo riqui nguia ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús rĩĩ nda. “Jesús que quera si manonde ra’, i que Pablo judíos je ra”, i que Festo Agripa je ra. ²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia

nandechẽ”, ae rei que ee ra. ²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mii nguia, i que Festo Agripa je ra. ²² Agripa que ñee ee ra. —Se abe nda aque cheẽ achandu rá ña, i que Festo je ra. —Eno. Isamami nda echeẽ erechandu cote, i que Festo ra.

²³ Isamami ngue Agripa huiĩrao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra. ²⁴ Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae rĩĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei eriĩ. Cesarea jenda rá. “Sã mano”, i bei seje. ²⁵ ¿Mbae rĩĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rá ererecua tuchi je”, i que Pablo seje ra. Nyebe tamondo ee. ²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguia jẽje a. Ndeje chõ ngue aru nguia, Agripa. Echeẽ ee. Ĩ nda eicuã erembuchecua. Ĩ nda eicuã ambesa mondo ererecua tuchi je. ²⁷ ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

Pablo ñee ererecua Agripa je

26 Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra. ²—Secheẽse rete ndeje, Sererecua. Judíos que ñee icuã tuchi quia serĩĩ nda, Sererecua. ³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderoseĩ nguiatu rá secheẽ andu.

⁴ Judíos maesate raque se, señetẽ mosenda bei. Sererecua quitu. Jerusalén abe. ⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. ⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguia ee. ũquĩ ñi ño judíos riqui nguia seucuyã ã. ũquĩ ñi ño mbia riqui nguia ñimbĩcuã seje ã. ⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguia echeẽ ndui si ã. “Mbia raaque ra Dios mbuquera si”, ae sequia se abe co. ũquĩ je chõ judíos icuã icuã ndiqui nguia seje, Agripa. ⁸ ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chõ Jesús re. ¹⁰ Seicuã icuãte que ee Jerusalén nda. Sacerdote rerecua que ñee seje

ra. Nyebe ngue aico nguiã Jesús quiato tarõ tarõ mbeite cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. ¹¹ Jesús quiato que airuã nua tuchi quia ra. “Í nda hui Jesús sí”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuaã. Judíos chumunuasa mbuchesea sea. Paama ae tuchi que sequia Jesús quiato je nyii ra. Ísho tuchi que aico oso oso Jesús quiato requia ra. Seicuã tuchi sacuaã ee.

Aico uba Dios rese co cote, i Pablo

¹² Emo mose ngue aso rei nguiã Damáscoo. Sacerdote rerecua semondo mose. ¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchichĩ nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chõ erechĩmbasi mbasi nguiã aque. Ticuasú rã tuchi quiarei nde aba cheẽ mumba mose. Sã ticuasú riqui nambacua mbuti no. Sã eriqui hui mbaba ira racua echĩ no. Ûquĩ na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacuaã mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ûquĩ abe teresenei senei mbia je. ¹⁷ Judíos eã je taremondo. Secheẽ nenei nenei sacuaã. Ûquĩ o taisi eicuã icuã mose ndeje. Judíos o abe taisi eicuã icuã mose ndeje no. ¹⁸ Taremondo judíos eã je. Terembaaquiato quiatu. Í nda eriquiã mbae icuã ndese. Í nda eriqui mbae turã ndese. Í nda eriquiã aba mbĩrĩ rĩsa rui. Í nda eriqui Dios rui. Í nda Dios icua. Í nda eicuã ambutiã esi. Í nda Dios Ûquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbía Damasco jenda je. Jerusalén jenda je abe no. Judea rubinda je abe no. Judíos eã je abe no. “Íjẽicuã si jẽhui chõ jẽ! Dios icha rui jẽingo. Jẽingo turã. ‘Dios icha rui eriqui’, i nda mbia jẽje chã”, ae que ee ra. Embaaquiato quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ Í ngue Dios cheẽ mbuchecuasa embesa cose ra: “Mbía ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu ngueco mose uquera rĩ. Judíos mbiirandu.

Judíos eã ab e mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ —Aquiachã eãte se resẽ, Festo. Acheẽ nyecuate raque jẽje. Dios cheẽ tuchi chõ asenei nguiã jẽje co. ²⁶ A Agripa riqui raque a. Nandererecua tuchi. Echeẽ ee. Ae rĩrĩ aico ñee jẽje, Ûquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ —¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra. ²⁸ —“Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. —Nde miĩ eã. Seandusa ja. A jengu ja a. Jesús quiatorã na jẽ, se rã si, aechĩ nguiã jẽje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, Ûquĩ abe que juã nda. ³¹ Nyoĩ que pe jiri cote ra. Ñee ñee nyue. —Pablo mbae icuã saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que ererecua nyue ra. ³² Agripa que ñee Festo je ra. —“Semondo rã ererecua tuchi je”, i chõchĩ Pablo. Í nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

Pablo mondo Roma quitu

27 —Pablo tamondo Italia, i que ererecua ra. —Jẽisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que Ûquĩ soldados je ra. Emo abe que ecuruchoi isi ra. Se abe que aso erese ra. Lucas rei se. ² Aristarco abe que oso ureresae ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quti que urecuata ra. Sucha mbuchesea sea sacuaã hue jenda. ³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo sí uquiato rea. Equiato que eteaquiato ra. ⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresichã nguiã. Eibichĩ que ureso quia cot e ra. —Í nda quiririã nandembutiba eã, ure que ra. Chipre, i que ejoõ je ra. ⁵ Cilicia que urechucua cote ra. Panfilia abe que urechucua nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itália, i que ure je ra. —Aque ye jẽingue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que amandisha rasa ra. Urecuasẽ nyee que Gnídoo ra. Quiririã mbeite que ureruba quti ra. Nyebe ejoõ acua mo ure-

siichã nguiã. Creta, i que ejoõ je ra. Salmón ngue urechucuã nda. ⁸ Ejoõ acua que uremama jiri ra. Quiririã icuã icuã ngue ure je ra. Buenos Puertos que urecuasê cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoïte que huee ra. Quiririã tuchite chee que ra. Aba ireïte que quiririã cote ra. Ama mose. Nyebe que Pablo ñee mbia je ra. ¹⁰ —Nandecuata i i mose ra canoa ñimi nande je. Mbae ra ñimi ja canoa yenda. ¡Nande abe ra nandemanochĩ jẽ! i que Pablo ee ra. ¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra. ¹² —Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasã jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra. ¹⁴ Urecuata ramo mose que quiririã icuã tu ure je ra. Ejoõ acua quti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ure-ruba quti ra. —Sã quiririã ae nanderuruchebe serao, ure chee que ra. ¹⁶ Ejoõ quitera quti que ureso ra. Ejoõ ngue quiririã nyoote ure si ra. Claudia, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quti que canoa ñetẽ urechuchã canoa cuasu ye cote ra. Eusite raque. ¹⁷ Canoa ñetẽ ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachĩ nande je re, i que ra. Mbia siquiche tuchi que ra. —¡Eriiri iri quti ra nyaochĩ jẽ! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra. ¹⁸ Isamami abe que quiririã icuã icuã mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoï mocoï tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoï mocoï nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. Ĩ nda canoa yenda nandemomboãte ii. Mbae mbuquiachã non-dechĩ. ²² ¡Jeñimbirãcuã ño jẽ! Nande mo nda mano eã.

Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra. ²⁴ “¡Eresiquichechĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩ nda nderesenda mo manoã. Dios ra etequiatu ja,” i que ibatenda seje ra. ²⁵ Seresenda, ¡jeñimbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã.

²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoï mocoïte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embucheche ra. ¿Ecuã tuchi ere? i que nyue ra. Treinta y seis metros. Pe jiri que embucheche si no nda. Veintisiete metros cote.

²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mondo nguiã ii canoa ndiquisã sacua. Mbae usi cuatro. Anclas, i que ñquĩ je ra. Ae ecuasa chi nguiã canoa ndese embutiba. —Quiatuchu, nyaashĩ, i tuchi que equia ra.

³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembiĩĩ nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Ã chichõ eã mose canoa ye, jeñimi ja rae. Ama nda jẽiquia, i que Pablo ra. ³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoï mocoïte que. Mbae mo ngue jẽuãte catorce días. Jengueãte que catorce días no. ³⁴ Mbae mo jẽu rã cote ae. Ĩ na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. Ianye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae oseĩ uquia mbia je ra. Mbia ja que mbae u cote ra. ³⁷ Urecuabẽte que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Urechaashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoinda rese que uremae nda. Ama nimia turã. —Nyao nguichi huee. Eicoinda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoi que embucheseobe quiririã je ra. Canoa ngue ngata ama nimia turã nguiti cote ra. ⁴¹ Iãcuã eicoinda que canoa jaã nda.

Eriquiraa eãsa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiso ra. Quiata que ra. ⁴² Soldados que ñee cote ra. —Ñ ecuasa riqui ã nae, ã nandeiquia ja jê! Ñ nda echoi eã ita. Oso chee eã, ã rei ngue soldados re. ⁴³ Soldados rerecua que Pablo iquia sereã nda. Nyebe ñee nguiã soldados je. —Ëcuasa mo nda jëiquiachĩ jê! ã que soldados je ra. Ererecua que ñe e mbia je cote ra. —Eita aquiatu jëso ii. Jëso usë ama nimia ndese. ⁴⁴ Eita aquiatuã, jëso mbebi ira rese, ã que soldados rerecua ure je cote ra. Eñ ure ja que usë ama nimia ndese cote ra.

Ngasë ejoõ ácuua Máltaa

28 Uresë ja que ama nimia ndese ra. —Malta, ã que a je ra. Ejoõ acua je, ã que hue jenda ure je ra. ² Hue jenda turãte que ure je ra. Tata que emendi ure je ra. Urechee sacua. Tiquindiiseite que eriqui ure je ra. ³ Pablo que nyea queru mbuchuuta ra. Nyea mbucha mose que mbei usë asi Pablo echi ra. Mbei que Pablo o shiu ra. ⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshiu a no. Mano nda cote reae. Huicua mose, ã rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, ã rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheë mbuchebe nguiã. —Dios mo ndei Pablo, ã que mbia cote ra. ⁷ Hue robeichõ ngue ererecua mbae ibi ra. Ejoõ acua rerecua. Publio, ã que ererecua je ra. Urererao que uchuchúaa ra. Urembuquiaru turãte que ra. —Jëitõ mocoĩ jiri, ã que ure je ra. Tres días que ureitõ erese ra. ⁸ Publio ru rasite que ra. Eracuta que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra. ⁹ Aquere que mbia rasi ngaë ngaë ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechuurã.

Pablo ngasë Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, ã que aque canoa je ra. Aque canoa ye que ureso cote ra. ¹² Siracusa, ã que sucha tubiriã mo je ra. Huee que urecuasë nda. Huee que ureitõ mocoĩ nda. Tres días. ¹³ Hue si que ureso siquiibi cot e ra. Urecuasë ngue Regio ra. Huee que ureitõ nda. Isamami ngue quiririã ureichu urequite quitu ra. Canoa maña turã. Co miñ ngue ureque ama ndiite re ra. Urecuasë ngue Puteoli ra. Huee que ure-

quichi bei canoa si cote ra. ¹⁴ Jesús quiato mo ngue uretea huee ra. —Jenguchõ na urerese, ã que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaë nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, ã que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasë ngue Roma cote ra. Sucha tubiriã tuchi que Roma nda. Soldados rerecua que ecuasa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, ã que ee ra. Soldado miñ ngue Pablo reaquiatu bei quia ra.

Pablo Dios cheë senei senei Rómaa

¹⁷ Urecuasë namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose. ¹⁸ Romanos ngue ñee tuchi seje ra. “Nandehui esi”, ã rei ngue serĩ cote re. “¿Mbaerã nda nandeiquia re? Mbae icuã mo ngue esaã eãte”, ã que serĩ nda. ¹⁹ “Jëhuichĩ nda esi jê!” ã bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheë icuã eã ndei judíos rĩ. ²⁰ Nyebe “Jenyu. Tamae jendese. Tacheë jêje”, ae que jêje ra. Mbia mano je ra quera si, nande chõ ndaque equia co. Úquĩ je chõ secuasa riqui nguiã co, ã que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheë mbesa eãte imbu ure je ra. Ae ngaë ngaë nguia hue si, úquĩ abe que ñee icuã eãte quia nderĩ nda. ²² Ndecheë urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeë ure je, ã que Roma jenda Pablo je ra.

²³ —Aque mose ra urechu ndecheë andu, ã que judíos Pablo je ra. Aque mose que ecuaë jate cote ra. Pablo chuchúaa. Isamamimbe. Pablo que embaaquiato quiatu tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbesa que esenei senei ee ra. Dios cheë mbuchecuasa chimbesa abe que esenei senei ee ra. Ñ nda mbia Jesús icua. —Dios quiarei ererecua tuchi, ã tuchi que Pablo judíos je ra. ²⁴ Emo emo ngue Jesús isi ra. Pablo cheë mose judíos je. Eataque que Pablo cheë isiteã teã nda. Ichõño nei equia ee reaë. ²⁵ Pablo cheë ndui ja eã ngue ra. —Nyao rei erecha, ã que eataque ra. Nyebe Pablo ñee ee. —Espíritu Turã ngue Isafas mbucheë turã nanderamei je cose ra. Eñ ngue ñee nda:

²⁶ Eso rã ñee judíos je: “Secheë nda jeñandu rei nguiã. Jeñandu eã naanguia rae.

Jemae ndei nda erese re.
 Jemae eã naanguia ra erese.
²⁷Jeñia ãtãte.
 Aba cheẽ mumba mumba.
 Jendesa jemungue munguete.
 Secheẽ jëicua sereãte.
 Jemba sereãte seicha rui.
 Nyebe aico nguiã jembucheroãte", ì que Dios ra, ere
 ee,
 ì que Isaías chimbesa ra, ì que Pablo ra. ²⁸Pablo que
 ñee mbei ra. —Tacheẽ jëje, judíos. Judíos eã je ra Dios

cheẽ uresenei senei cote. Ñquĩ nguia ra eya tuchi
 erese. Ì nda Dios erirõ eicuã si, ì que Pablo ra. ²⁹Pablo
 cheẽ ñi ngue judíos choi guiã ñee icuã icuã nyue ra.
³⁰Dos años ngue Pablo riqui huee ra. Roma. Mbae
 isiquia que emondo mondo tuchuacha je ra. Huee eico
 mose. Pablo iate que eriqui ra. Mbia nyoì nyoì mose
 erea. ³¹Mbia mo ngue Pablo cheẽ siquisã eãte ra. Jesu-
 cristo riñ ngue eriqui ñee ñee mbia je ra. —Dios ra
 mbia rerecua tuchi, ì que equia mbia je ra. —¿Mbaerã
 ereico ñee Jesús riñ nde? ì eã ngue emo Pablo je ra.

ROMANOS

Pablo ucheẽ mbesa mondo Roma jenda je

1 Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icue ra. Ucheẽ turã nenei nenei sacua. ² —Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchĩ Jesucristo rĩĩ cote. Dios ririĩ ndei Jesucristo. David ririina ngue tu íbii cote ra. ⁴ Jesucristo manonde, Espiritu Turã ngue embuquera ra. Dios quirãcuã je que embuquera ra. Dios ririĩ ndei Jesucristo. Nyebe Espiritu Turã embuquera nguiã. Mbia mbiirandu randu sacua Dios ririĩ ndese. ⁵ Dios turãte que ure je ra. Jesucristo rĩĩ. Nyebe ureirabo mingo nguiã ucheẽ nenei nenei sacua. ⁶ Ñ nda mbia mangue chooñoa jenda abe Jesucristo icua. ⁷ Ñ nda mbia mangue chooñoa jenda abe Jesucristo cheẽ mumbayã no. ⁸ Sã jẽ Jesucristo cheẽ jemumbayãte no. Sã Dios jẽirabo no. Jesucristo rimbarã. ⁹ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icue uquiatorã nda. Nanderu chõ Dios re. Nandererecua chõ Jesucristo re. Sã ùquĩ turã mbei riqui jẽje. Sã ùquĩ ndiqui jembia tuchi.

Pablo oso sete raque Rómaa

⁸ —Jesús quiato tuchi chõ ùquĩ ndiqui re, i jate mbia quia jeniã ã. Mangue chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriiriĩ nii. Dios resa rae aico embesa mbesa jẽje a. Aico ñee mbeite Dios je jeniã co. ¹⁰ Aico ñee ñee mbeite Dios je co. ¹¹ Ñ nda Dios semondo jendea. Semondose mose ra aso jendea. ¹² Seso sete raque jendea. Jembiaaquiato quiato sacua Jesús rĩĩ. Jembirãcuã sacua Jesús rĩĩ. ¹³ Seso sete jendea. Ñmbia sacua nyiese. Nandeico tuchi sacua Jesús rui. Nande Jesús nandeicuate resẽ. ¹⁴ Taso jendea, ae beite rei que se quia ra. Taembiaaquiato quiato Jesús rĩĩ, ae rei se. Eĩ nda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁵ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiatoã abe je. ¹⁶ Nyebe aico

nguiã icoquiature co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacua mbae icua si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandeisi turã uquiatorã. Mbae turã mo nandesaã eãte raque.

Ae Jesús icua quia nae, Dios ra ùquĩ isi turã tuchi. Ùquĩ nda siqui bei cote, i ñi embesa ji re.

Mbia icua tuchi Dios je

¹⁸ Ae siqui Dios rã eãte nae, ùquĩ nda Dios mbasi ja. Ae siqui icuate quia nae, ùquĩ nda Ibatenda mbasi ja no. Ùquĩ nandeicuate quia nande co. Ichõiñoa reã ñee andu sereãte quia ñene. ¹⁹ Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. ²⁰ Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte. ²¹ Jirandu tuchi rei que Dios rese resẽ. Ñee turãya tuchi chõchĩ Dios rĩĩ. Gracias iã ñochĩ Dios je. Nyebe eriqui nguiã ndua icua icua mbei. Nyebe eriqui nguiã itongui rĩ mbei. ²² “Ureaquiature” ichõiño ñochĩ equia ùquĩ. Eaquiatoã ño siqui nguiã ùquĩ. ²³ Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ùquĩ je chõ eriquichĩ nguiã “sererecua”, i. Mbia raanguia je. Quiaa rĩnda je chõ eriquichĩ nguiã “sererecua” i. Ae mbebe quia. Ae uchã nguia. Ae nguata quia nguie rese. Ùquĩ je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icua naa naa mbei sacua cote. ²⁵ Ñee ñooño tuchi Dios rĩĩ cote. “Nandererecua” i chõchĩ Dios chiao je cote. “Nandererecua” i rocoĩ Dios mii je. “Nandererecua” i bei chõ mbichĩ aba quia Dios mii je. Amén.

²⁶ Nyebe Dios erecha ja nguiã cote. Oco chooño sacua mbae icua ndese. Ubi icua ndese. Cuña mo oco

oco nyiese si. Cuña ngu raã naa cuña nongue je. Siqui rocoĩ ngu rese. ²⁷ Hombre mo abe hombre nongue mo oseĩ oseĩ. —Seninisiã nde, i ñee ñee uchue si. Oco oco nyiese. Siqui rocoĩ nguĩnisi rese. Icha tuchi Dios si. Nyebe Dios riqui nguĩã embasi tuchi co cote.

²⁸ Dios rese jirandu sereã. Nyebe Dios hui nguĩã esi. Siqui bei bei sacua ubi icua ndese. Nyebe eĩ eĩ nguĩã nyue mbae icua ndese. ²⁹ Eicuã tuchi eriqui ũquĩ. Ico chooño tuchi equia cuña ndese ũquĩ. Ndua ndua icua mbei tuchi equia ũquĩ. —Aque rã nda se chã, i beite equia emo mbae je ũquĩ. Mbia mbasi chooñote equia ũquĩ. Mbaecha ucuaã ñooño tuchi equia ũquĩ. Mbia iquia iquia chooño tuchi equia ũquĩ. Paama i chooñote equia uchue ũquĩ. Mbia mbiĩĩ rĩ ñote equia ũquĩ. Mbia ucuaã ñooño mbeite equia ũquĩ. ³⁰ Ñee ñooño mbeite equia mbia mo ñi ũquĩ. Dios ucuaã tuchi equia ũquĩ. Ñee icua icua mbeite equia aba cheẽ ndibishorõ ũquĩ. Ucuasu raã naa ñooñote equia ũquĩ. “Se quiarei i tuchi”, i beite equia ũquĩ. Emo mbiĩcuã icua mbeite equia ũquĩ. Ngu cheẽ mumba mumba chooñote equia ũquĩ. Usi cheẽ abe mumba mumba chooñote equia ũquĩ. ³¹ Eaquiatuã tuchite ũquĩ. Ucheẽ mumba mumbate ũquĩ. Emo je eturã eãte riqui ũquĩ. Emo icua si eriqui tesareiãte ũquĩ. Eya eãte riqui emo ndese ũquĩ. ³² —Ae ũquĩ saã saã nguia mbae icua nae, ũquĩ nda amondo tata cuasu, i que Dios ra. Dios cheẽ icuare quiatu eriqui nguĩã mbae icua naa i ite. —Sã emo abe mbae icua naa naa nandechabe, i chee chee.

Dios mbia cuata tea ja

2 —Dios ra ũquĩ mbasi rã ña, erechĩ nda ũquĩ mbia icua je. Nde i mose, nde abe ra ndeicuã nyecua mbia je. —Seturãte aico co, jerechĩ nda jẽ! —Ũquĩ ndiqui mbae icua naa naa ũquĩ, nde i mose, ũquĩ icua sĩ chõ eresaã saã nguĩã nde abe aque. ² —Ae ũquĩ icua saã saã nguia, ũquĩ tambasi, i mose Dios, Dios ra embasi chooño eã. Maende erese quia ra embasi. ³ —Dios ra ũquĩ mbasi rã ña, erechĩ nguĩã huee. Eraã sĩ tuchi chõ ereicochĩ nguĩã ũquĩ sĩ raã naa aque. Nde abe ra Dios nembasi ũquĩ ndese resẽ. ⁴ Dios ia eãte raque aba icua ndese. Dios aba mbasi jei eã ndaque aba icua mosebe. Ñimbirãcuãte aba icua je. Coche ñene, ereã ñochĩ Dios chimbirãcuã mose ndeje. —Eyayã jẽ nda huĩcuã ndese chã, i Dios quia nderĩ co. Nyebe eriqui nguĩã ñimbirãcuã ndeicuã je. ⁵ Ndechiã ãtã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguia aque re. Dios nembasi nonde. Dios mbia icua mbasi ja mose ra nde abe mbasi. ⁶ Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no. ⁷ Ae eturã mbeite riqui, ũquĩ nda Dios mingo bei. Nyoi sete quia Dios rea re. Siqui bei serete quia

mbia mingo beisa rese re. Nyebe ra Dios emingo bei cote. ⁸ Dios ra paama i tuchi mbia icua je. Mbasi tuchi rae. Mbia mbiĩcuãsa tuchi quia ũquĩ nde. Dios cheẽ mumbate quiatu nguĩã. Nyebe ra Dios embasi tuchi. ⁹ Ae siqui mbae icua ndese, ũquĩ ja ra Dios mbasi. Judíos icua nane nda embasi. Judíos eã abe ra embasi no. ¹⁰ Ae siqui mbae turã ndese, ũquĩ je ra Dios turã mbei. Judíos turã nane. Judíos eã abe cote. Mbia ra ũquĩ turã icua tuchi. Dios ra ũquĩ mbia tuchi. ¹¹ Co quiatu, i eã nda Dios mbia mo mii je. Mbia mii ndese ra ebia eã. Mae turã ja chõ nda erese.

¹² Ae jirandu eãte Moisés chimbesa rese nae, ũquĩ siqui icua mose ra Dios embasi. Jirandu eãte raque Moisés chimbesa rese. Ae Moisés chimbesa icua nae, ũquĩ siqui icua mose ra Dios embasi. Moisés chimbesa cheẽ nguire ra Dios embasi. ¹³ Ae Dios cheẽ ñandu chooño nguia nae, “taĩsi turã” iã nda Dios ũquĩ je. Ae Dios cheẽ mumbayã nguia nae, ũquĩ nguia ra Dios isi turã. ¹⁴ Ae judíos eã nae, ũquĩ Moisés chimbesa ñandu eã mbeite raque. ũquĩ mo ae siqui turã turã mbei mbae turã ndese. —Mbae turã nandesaã, ite eicua. Dios cheẽ andu eãte raque emo mose. ¹⁵ Ae ae chõ mbae turã icua nguĩã. Mbae icua abe icua. Mbae icua naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶ Aque mose ra Dios ñee Jesucristo je. Ae icua mbia saã nyecuayã cuayã nguia nae, ũquĩ nda Jesucristo mbuchecua ja cote. Jesucristo ra mbia icua mbasi mbae icua ñi cote.

Judíos Moisés cheẽ mumba mumba

¹⁷ —Judíos chõ ure re, jenye equia ũquĩ. —Moisés chimbesa ra nandemingo bei, jenye chõchĩ equia ũquĩ. —Dios quiarei ebia tuchi ure mii ndese, jenye chõchĩ equia ũquĩ. ¹⁸ Ae Dios bite nae, ũquĩ jẽicuate quia jẽ ũquĩ. —Moisés cheẽ ureicuate quia ã. Nyebe mbae turã ureicua jate quia ã, jenye chõchĩ nguia ũquĩ. ¹⁹ —Ure mii ño ñeenda Dios icha ureicuachĩ, jenye bei chõchĩ equia ũquĩ. —Itondaru jenda uretesaete, jenye chõchĩ equia ũquĩ. ²⁰ —Mbia aquiatuã urembaaquiato quiatu, jenye chõchĩ nguia ũquĩ. —Mbia aracuayã urembaaquiato quiatu, jenye chõchĩ nguia ũquĩ. Jẽ Moisés chimbesa jẽicua aba reãte quia ũquĩ. —Moisés chimbesa ñee ñooño eãte, jenye raque quia eicua ũquĩ. ²¹ Jẽaracuayã mbia jembaaquiato quiatuchĩ nguĩã. ¿Mbaerã jeñimbaaquiato iã jẽ nyii re? —Mbae ra jembuquiachãchĩ, jenye chõchĩ equia ũquĩ. Jẽ sĩ chõ mbae jembuquiachã nguĩã ũquĩ. ²² —Emo ninisi rese ra jẽingochĩ, jenye chõchĩ equia ũquĩ. Jẽ sĩ chõ jẽingo nguĩã emo ninisi rese ũquĩ. —Ae je mbia riqui “Dios” i chooño nae, ũquĩ ndese ra jẽingochĩ, jenye chõchĩ equia ũquĩ. Dios abareã mbae jembuquiachã quiachã ñochĩ nguĩã ũquĩ. ²³ —Dios cheẽ ureicua tuchi quia ure

ã, jenyẽ chõchĩ equia ùquĩ. Jẽ sí echeẽ jemumbate quia ùquĩ. Nyebe mbia riqui nguiã ñee turã eãte Dios rĩĩ ã. ²⁴ Nyebe embesa ji cheẽ ndiqui nguiã ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rĩĩ ã.

²⁵ Coche circuncisión jësaã saã nguiã Dios je, jëingo bei mose Dios cheẽ ndese. Jëingo eã mose Dios cheẽ ndese, circuncisión naa eã naanguia chõ jëingo nguiã ùquĩ. ²⁶ Ae circuncisión saã eã nguia nae, ùquĩ siqui mose Dios cheẽ ndese, circuncisión naande raanguia chõ eriqui nguiã ùquĩ. ²⁷ Ae circuncisión saã eã nguia nae, ùquĩ siqui mose Dios cheẽ ndese, Dios ia tuchi chõ ùquĩ ndese re. Eyare rocoĩ jendese. Jẽ nguia Dios cheẽ jemumba mumbate nguiã. Dios cheẽ jëicuate raque. Circuncisión jësaã saãte raque. ²⁸ Ae judíos Dios cheẽ mumba mumba quia nae, judíos tuchi eã ño ùquĩ nde. Circuncisión naa naa ndaque. Ae circuncisión saã nguia nae, ùquĩ siquiã mose Espiritu Turã ndese, circuncisión turã eã ño ùquĩ nde. ²⁹ Ae Dios isi tuchi quia uchiangui re, ùquĩ nguiarei judíos tuchi. Ae siqui Espiritu Turã ndese, circuncisión tuchi chõ ùquĩ cote re. ùquĩ je ra mbia achõ ñee turã eã. Dios abe quia ra ñee turã ee.

3 ¿Mbaerã judiorã sete riqui mbia re? ¿Mbaerã circuncisión sete riqui mbia re? ² Eturãte quia mbia je re. Judíos je quiatu ngue Dios ucheẽ mondo nguiã. Mbã mo je eã. ³ Judíos mo hui hui raque Dios cheẽ sí. Dios quia ra ñee ñooñoã mbei. Echeẽ nguia ra io bei. Mbã hui hui raque esi. Mbã ñee ñooño ndaque. I ñi embesa ji re:

Ndecheẽ nda io tuchi mbia resa rae.

Mbã icuã mose ndeje, nde quia ra ere tuchi mbia sí, i que embesa ji ra. ⁵ Jemo ngue ñee no nda: —Dios turãte riqui nandeicuã je co. Mbae icuã nandesã saã mbei chõ nguia. Mbã mae sacuã Dios turã ndese. Dios nandeicuã mbasi mose, Dios icuãte, i chõchĩ jemo. ¿Mañi nande ra ùquĩ ñee mose re? ⁶ Ichõño tuchi chõ ùquĩ nde. Dios icuã aroneãte. Dios icuã mose, eĩ nda Dios mbã icuã mbasi aroneãte rei. ⁷ Jemo ngue ñee ño nda. —¡Nandecheẽ ñooño ño nguia jẽ! Nandecheẽ ñooño mose, mbã ra ñee turã Dios rĩĩ. “Ñee ñooño saã reã tuchi quia Dios riqui re,” i ra mbã Dios rĩĩ cote. Nyebe Dios riqui nguiã nandembasi ãte nandecheẽ ñooño mose, i chõchĩ jemo. ⁸ —Mbae icuã nandesã saã ño. I nda Dios turã nyecua mbã je, i chõchĩ jemo. Urecheẽ ãte ure ùquĩ ndesẽ. Ae ñee nguia ùquĩ, ùquĩ nda Dios mbasi.

Mbã mo eturã eãte

⁹ Judíos chõ nande re. ¿Nandeturã nda eriqui reĩ mbã mo sí re? Tei. Nandeturã eã ño esi re. Nandeicuã ja chõ ñene. Judíos eã icuã ja chõ ñene. Judíos icuã ja chõ eno nde. ¹⁰ I ñi embesa ji re:

Emo eturã eãte. Aque miĩ mo eã.

¹¹ “Dios icha taicua”, iãte emo.

“Dios rese taico”, iãte emo.

¹² Mbã que icha icha jate Dios sí ra.

Eicuã jate que eriqui ra.

Emo mbae turã mo saã eãte.

Aque miĩ mo eã.

¹³ ùquĩ quiarei mbã raaque tã tãsa rã.

Aba mbã eã.

Sã eriqui ñee icuã mbei.

Mbã mbĩĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbã mbĩicuãsa tuchi chõ echeẽ nde.

¹⁵ Mbã icuia chooño ño ñene.

¹⁶ Mangue chooño ño eriqui nguiã mbae icuã naa naa.

Mbã mbiayã ñooño.

¹⁷ Ico chooño mbei mbã je.

¹⁸ Dios rese ndua eã tuchi,

i ñi embesa ji re. ¹⁹ Dios que Moisés chimbesa mee ja judíos je ra. Embesa ji mumbayã sacuã. Mbã huĩcuã icua ja sacuã. —Dios cheẽ nandemumba tuchi chõ nguia re, i nda mbã ja chã. ²⁰ Emo ñee aroneãte. —Embesa ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbesa mee mbã je ra. Mbã huĩcuã icua ja sacuã.

Dios icuasa quia ra siqui bei

²¹ Dios que Jesús turã teacuquia nande je cote ra. Ae que mano nandeicuã ndiquicharõ sacuã nda. Nande Jesús icua mose, Dios ra nandeisi turã cote. Eĩ ja chõ Dios mbã je re. Dios bia eã ño mbã mo miĩ ndese. —Jẽ Moisés chimbesa mumbayã mose, taĩsi turã, iãte Dios. —Jẽ Jesús icua mose, ùquĩ mose quiatu ra jaĩsi turã, ite Dios. Embesa ji ñiinda abe que ñee ñee Jesús rĩĩ nyii no nda. ²³ Nandeicuã ja chõ ñene. —Aque eturãte, iã nda Dios nandemo je. ²⁴ Nandeicuãte raque. Dios quia eturãte nande je re. —Mbae mo je-mondo jëicuã ndibishorõ, i ãte Dios. Jesucristo que mano nandeicuã ndibishorõ ndesẽ. Nyebe Dios riqui nguiã mae turã nanderese co. ²⁵ Dios que Jesucristo mondo mbã je ra. Mano sacuã mbã icuã ndiquicharõ. —Jesús que mano seicuã ndibishorõ nda, nande i mose, ùquĩ mose ra Dios nandemingo bei. Dios que mae ñooño mbã icuã ndese nyii ra. —Seriiĩ nguia ra mano nguiã eicuã ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶ Dios riiĩ ngue mano mbã icuã ndiquicharõ nda. Mbã mae sacuã Dios turã ndese. Dios turã mbeite. Mbã icuã isi turã nonde. Mbã Jesús icua mose ra Dios mbã isi turã.

²⁷ Nande ae ra nandeicuã nandembutiã eã. Dios ae quia nandeicuã mbutiã nguiã, Jesús icua mose. Nyebe nandeico nguiã nandecuasu raã naa aroneãte. Moisés chimbesa que nandemumba mumbate quia resẽ. ²⁸ Mbia Jesús icua mose, aque mose quia ra Dios mbia isi turã. —Taëisi turã, jẽ Moisés chimbesa mumbayã mose, iãte Dios nande je. —Jẽ Jesús icua mose, ùquĩ mose quiatu ra jaëisi turã, ite Dios nande je. ²⁹ Judíos achõ nderecua eã ño Dios re. Judíos eã abe rerecua chõ ñene. ³⁰ Emo abe eãte Dios. Dios mĩ ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no. ³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

Abraham abe Dios icua

4 Nandendua mbirĩ na Abraham ndese. Nandei ñi-inda tuchi quia Abraham nde. ² Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³ I ñi embesa ji re:

Abraham ngue Dios icua ra.

Nyebe Dios eisi turã nguiã, i ñi embesa ji re. ⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵ Dios chõ mbia icuã isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. ⁶ David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷ Co rei David chimbesa co:

Ae icuã Dios mbutiã nae, ùquĩ ia tuchi chõ ñene.

⁸ Ae icuã ndese Dios riqui mae ãte nae, eicuãte raque, Dios ra eisi turã.

Ùquĩ ia tuchi chõ ñene, i ñi David chimbesa re. ⁹ ¿Aba icuã ño nda Dios mbutiã ña? Embia sacuã ña. ¿Judíos icuã achõ nda embutiã nde? ¿Ae circuncisión saã nae, ùquĩ achõ icuã nda embutiã nde? Tei. Ùquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi. ¹⁰ Abraham circuncisión naa eã mose chõ Dios eicuã mbutiã nguiã. Circuncisión naa nonde. ¹¹ Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circun-

cisión saã eã nae, ùquĩ abe chõ “seru” i nguiã Abraham je, Jesús icua mose. ¹² Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ùquĩ nyicua chõ Dios re. Sã Abraham nyicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbeiee

¹³ Dios que ñee Abraham je cose ra. —Ibi tamondo ja ndeje nembraerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham ñi nda. ¹⁴ —Nandeico bei mose Moisés chimbesa rui, aque mose ra Dios nandemingo bei, i chõchĩ judíos mo. Ùquĩ mose quiatu ra nandeico rei Jesús icua chooño. Ùquĩ mose quiatu ra Dios cheẽ ique ãte rei nande je. ¹⁵ —Ã jësaã saã, i mose Dios, emo echeẽ mumba mose, ùquĩ nda embasi. —Ã jësaã saã, iã mose, emo nda embasiã cote.

¹⁶ Dios turãte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã.

¹⁷ Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra, i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ùquĩ nyao no. ¹⁸ —Nderiirina tamee ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque aba je. ¹⁹ Amei tuchite raque. Cien añote raque. Eninisi abe arite raque. Eninisi rie chuimate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰ Abraham ngue “nducuã” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios rĩ nda. ²¹ —Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²² Nyebe Dios Abraham isi turã nguiã. —Abraham ndiqui seicua tuchite co, i que Dios ra. ²³ Abraham mĩ je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mĩ je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que

Jesús raaque mbuquera ra. ²⁵ Dios que Jesús mbu íbii nande je ra. Mano ngue nandeicua ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

Nande Jesús icua mose, Dios riqui nandeisi turã

5 ã nandeico Jesucristo icuate ã. Nyebe Dios riqui nguiã nandeisi turãte cote. Nyebe Dios riqui nguiã nandembiate cote. ² ã nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ûquĩ ño nandesarõ arõ nguiã ã. ³ Ûquĩ mii eã ño nandembia nguiã. Mbia icua icua ndaque ra nande je, ùquĩ mose abe chõ nda Dios nandembia no. Mbia icua icua mose nande je, Dios ra nandechiã mbucoi turã. Nandeico tochi sacua. ⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesarõ arõ na. Sã echeẽ ique rã nande je. ⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyesequate jendese co, i Espiritu Turã nguia nande je co.

⁶ Mbae turã ngue nandesã aroneãte nandechue, aque mose que Cristo mano nande je ra. Nandeicua mbitirõ sacua. ⁷ Mbia mo mano aroneate emo ndibishorõ. Nande turã mose, aque mose abe ra emo mano aroneãte nanderibishorõ. Eturã tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicua tuchi mose ra. Nyebe nandeico nguiã ñee: —Dios riqui nyesequa tuchite nanderese co, i. ⁹ Cristo mano mose que nandeicua mbitirõ cote ra. Ae ra nandemingo icúe Dios mbia icua mbasi mose. ¹⁰ Dios riirĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequia-torã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mii nane ngue siqui nyii ra. Aque rane ngue mbae icua saã nande je ra. Nyebe mbia icua jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³ Mbia que mbae icua saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán nane ngue Dios cheẽ mumba cose ra. Aque mose bei chõ ngue mbia mbae icua naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheẽ mbesa chee

ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

¹⁵ Adán nane tuchi que mbae icua saã nda. Jesucristo quiatu que mbia rirõ nguia mbae icua si ra. Adán mbae icua naa mose, aque mose bei que mbia mano mano cote ra. Jesucristo mbae turã naa mose, ae que mbia icua mbitirõ tirõ cote ra. Dios turã nii. Jesús chisaã nguia rei Adán chisaã na eã tuchi. ¹⁶ Adán ae rane ngue mbae icua saã cose ra. —Mbia ra mano mano ja cote, i que Dios cote ra. Adán icua ndese maende. Ae Adán saã icua nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandeisi turã, nandeicua ndese mae ndocoĩ. ¹⁷ Adán ae que mbae icua saã nyii ra. —Mbia ra mano mano ja cote, Adán mbae icua naande, i que Dios cote ra. Jesucristo ae que mbae turã saã mbia je cote ra. Mbia icua mbutiã sacua esi. Ae Jesús turã icua quia nae, ùquĩ nda Dios mingo turã mbei, ùquĩ icua ndese mae ndocoĩ.

¹⁸ Adán ae que mbae icua saã nyii ra. —Mbia ra mano mano ja cote, i que Dios cote ra. Adán icua ndese maende. Aquere que Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús riĩ ae ñene. ¹⁹ Adán Dios cheẽ mumba mose, mbia mbicua ja que ùquĩ cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰ Dios que ñee Moisés je ra. —Secheẽ embesa mbia je, i que ee ra. Ì nda mbia jirandu tuchi huicua ndese. Mbia icua i i tuchi mose, eĩ ño Dios turã i i tuchi mbia je no nde. ²¹ Adán mbae icua naa mose, mbia mbicua ja chõ ùquĩ nde. —Mbia ra mano mano cote, i que Dios cote ra. Jesucristo que mano nandeicua ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacua cote. Nandemingo bei sacua cote.

Nandeyasu chõ nandeico nguiã ã cote

6 ¿Mañi nande ra cote re? ¿Mbae icua nda nandesã i i re? ¿Dios turã i i sacua nande je re? ² Tei. Dios biãte ùquĩ. Jesús rese que nandemano ndesẽ. Nandemano ngue mbae icua naa eã sacua ndesẽ. ¿Mañi nande ra mbae icua naa naa si re? ³ ¿Jëiranuãte bautizar i rese re? —Jesús resenda tuchi chõ ùquĩ ndiqui re, i nda mbia bautizar ire nande je chã. Nande bautizar ire, nandemanonde raanguia chõ ùquĩ nde. Mbae icua naa eã sacua cote. ⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcua Jesús mbuquera eraaque mose no. Eĩ nande chõ siqui nandeyasu ae.

⁵ Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã. ⁶ Cristo mbucha mose ira rese, nandeicuã abe que Dios mbucha ira rese ra. Nande mbae icuã osei chiã sacuã ño ùquĩ nde. Mbae icuã nimba nda nandeico eã cote chã. ⁷ Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸ Nandemano mose Cristo rese ira rese, nandemingo bei ra uchiese cote. Ae rã si. ⁹ Cristo que mano nda. Quera si que cote ra. Aquere ra mano siã cote. ¹⁰ Aque miñ ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. ¹¹ Jendaaque chõ jësaã saã mbae icuã je. Jenderecuarã eã mbae icuã cote. Jesucristo rese nandeico tuchiã ã cote. Mbae yasu rã ño nandeico nguiã Jesucristo rese ã cote. ¹² ¡Mbae icuã ndese ra jëingo chĩ jenderecuarã jë! Jë mba e icuã osei mose, ¡jëteachõ ño jë! ¹³ ¡Jendete ra jemee mee chĩ mbae icuã je jë! Dios je quia jendete jemee. Mbae turã naa sacuã. Cristo rese que jemano ndesë. Jëyasu chõ ngue jëquera si Cristo rese resë. ¹⁴ Nandererecuarã eã nda mbae icuã cote. Moisés chimbesa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbae turã nimba chõ nandeico cote

¹⁵ Dios turã ae nandemingo nguiã. ¿Ûquĩ mose ra mbae icuã nandesaã saã nde? Tei. Dios biãte ùquĩ. ¹⁶ Nande nandechimondo mose mbae icuã je, mbae icuã nda nandererecuarã cote. Mbae icuã nda nandeiquia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jëingo bei que mbae icuã ndese jenderecuarã nyii ra. Mbia Jesús cheë nenei nenei mose jëje, jëisi turã ño ngue cote ra. ã jëingo echeë mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jëingoã cote. Mbae turã ndese bei ra jëingo cote. ¹⁹ Secheë ambuchecua tuchi quia jëje co. Jë eicua tuchi sacuã. Jendete que jemondo tuchi mbae icuã je nyii ra. Jë ngue jëingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacuã cote. ²⁰ Mbae icuã mbaerã ño jëingo nguiã cose. Mbae turã ngue jësaã aroneãte quia aque mose ra. ²¹ Jëireĩte mbae icuã naa naande cote. Jenyisaã saã mbae icuã ñiinda, ùquĩ ngue mbae turã mo mondo ãte jëje resë. Ae mbae icuã saã i ite quia, ùquĩ nda mano. ²² Dios que jendirõ mbae icuã si cote ra. Dios rimba chõ jë cote re. Nyebe Dios jemingo nguiã icúe mbae icuã si. Nyebe ra Dios jemingo bei ibate manonde cote. ²³ Ae mbae icuã saã saã nguia nae, ùquĩ nda Dios mbasi bei manonde. Ae Jesucristo icua quia nae, ùquĩ nguiatu ra

Dios turã mingo bei. Mbae turã naa eã ndaque. Dios turãte quia ee re.

Eraaque rã ño nandeico nguiã Moisés chimbesa je cote

⁷ Sã jenderecuia ibi jenda mo no. Echeë jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheë mumba chõ ùquĩ nde. Eru mano mose, aque mose quiatu ra ngu mo ndea cote. Dios cheë mumba eã ño ùquĩ nde.

⁴ Eraaque rã ño jëingo nguiã Moisés chimbesa je ùquĩ cote. Cristo quiatu que mano jenii nda. Quera si que jenii no nda. Cristo rese chõ jëingo nguiã ùquĩ cote. Dios je mbae turã naa naa sacuã ño jëingo nguiã erese ùquĩ cote. ⁵ Nandeico mose mbae icuã ndese nyii, mbae icuã achõ ño ngue nandechosei chosei quia aque mose ra. Nandebi tuchi que Dios cheë mumba mumba aque mose ra. Nyebe que nandeico mbae icuã naa i i tuchi aque mose ra. Eĩ nda nandeicuã nandeiquia rei aque mose. Espiritu Turã nandembiasu eã mose. ⁶ Eraaque rã ño nandeico nguiã Moisés chimbesa je ã cote. Moisés chimbesa rui eã ño nandeico nguiã ã cote. Dios cheë miñ ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiato nguiã ã cote. Moisés chimbesa achõ eã ño cote re.

⁷ —Moisés chimbesa icuãte, ae ãte raque quia co. Moisés chimbesa quiatu que sembiirandu seicuã ndese resë. —Eicuãte quia emo mbae osei osei riqui re, i que Moisés chimbesa ra. Eĩ nda seiranuãte rei ùquĩ ndese. Moisés chimbesa eande ndae. Moisés chimbesa ae ngue sembiirandu nguiã ùquĩ ndese. —Eicuãte ùquĩ, i seje. ⁸ Moisés chimbesa sembiirandure mbae icuã ndese, mbae icuã achosei i i tuchichĩ cote. —Mbae icuã nda jësaã saãchĩ, i mose chõ mbae icuã achosei i i tuchichĩ cote. Emo Moisés chimbesa icuayã mose, mbae icuã abe ra eicuayã no. ⁹ Moisés chimbesa que aicuayãte quia nyii ra. Seturã aico reĩ aque mose. Moisés chimbesa que aicua cote ra. Eicua mose que echeë amumba i i tuchi cote ra. ùquĩ mose que seicuã aicua cote ra. ¹⁰ Mbia mingo bei sacuã ndaque Moisés chimbesa. Ae que semingo bei eã nda. Moisés chimbesa amumba mumba bei chõchĩ. Nyebe aico nguiã isho tuchi Dios si aque mose. ¹¹ Seicuã ño ngue sembiirã irĩ mbei quia nyii ra. Se Moisés chimbesa icua mose, seya eã tuchi que aque mose cote ra. Seicuã nda seiquia chee, ae que se ra. ¹² Moisés chimbesa turãte raque. Dios cheë ndaque.

¹³ Moisés chimbese turâte. Ūquĩ je eã ngue Dios paa-
ma i seje ra. Seicuã ae quiatu que Dios mbupaama i
seje ra. Moisés chimbese que sembiirandu tuchi
seicuã ndese ra. Se Moisés chimbese turã icua mose,
ũquĩ mose que seicuã Dios mbupaama i seje ra. Nyebe
Dios Moisés chimbese mee nguiã nande je. Nandeicuã
mbuchecua tuchi sacua nande je.

Nandechiangui renda icuã ño nandeisi isi nguiã

¹⁴ Moisés chimbese turâte raque. Se ae seicuã nde.
Mbia chõ se re. Moisés chimbese amumba mumba
chõchĩ nguia co. ¹⁵ Mbae turã asaã mbite raque. Mbae
icuã asaã eã mbite raque. Mbae icuã nguia seisi isite
nguiã. Mbae turã uquia reã. ¿Mbaerã aico mbae turã
naa eãte re? ¹⁶ Ae asaã sereãte quia nae, ũquĩ asaã
mbeichĩ. Moisés chimbese turãt e raque. Aico echeẽ
mumba mumba beichĩ. ¹⁷ Se ae chõ eã ño aico nguiã
mbae icuã naa naa co. Sechiangui renda icuã nguia
“mbae icuã esaã saã”, ite nguiã seje co. Nyebe aico
nguiã mbae turã mo naa eã mbeite co. ¹⁸ Seicuã tuchi
chõchĩ se. Seturã mo eã tuchichĩ se. —Mbae turã
tasaã, aete raque quia co. Aico mbae icuã naa naa
mbei chõchĩ co. ¹⁹ Sebite raque mba e turã. ¿Mbaerã
aico mbae turã naa eãte re? Sebiãte raque mbae icuã.
¿Mbaerã aico mbae icuã naa naa mbeite re? ²⁰ Se ae eã
mbae icuã asaã saã nguiã. Sechiangui renda icuã
nguia “mbae icuã esaã saã” ite nguiã seje. Sechiangui
renda icuã ño seisi isi nguiã mbae turã si co.

²¹ “Mbae turã tasaã”, i mose se, mbae icuã ño
seriquisã quisachĩ nguiã co. ²² Sebite raque Dios cheẽ
sechiangui re. ²³ —Dios cheẽ ndese taico, ae rei nguiã
sechiangui re co. Sechiangui renda icuã nguia
seriquisã quisãte nguiã. Nyebe aico nguiã mbae icuã
naa i ite. ²⁴ Dios cheẽ ndese aico sete raque. Sechiangui
renda icuã nguia semingo beite nguiã mbae icuã
ndese. Seraaquete aico co. Nyebe seya eãte aico co.
¿Aba quia ra seicuã mbitirõ nde? Jesucristo quia ra
seicuã mbitirõ cote. Nyebe aico gracias i tuchi Dios je
co.

Espíritu Turã ndiqui nandembui mbae icuã si

8 Ae Jesucristo icua quia nae, ũquĩ nda Dios mbasiã
mbei. ² Nande Jesucristo icua mose, Espiritu Turã
nda nandechiã mbiasu. Espiritu Turã nda siqui nan-
derese, mbae icuã naa eã sacua. Eĩ nda nandemano
mbeite rei, mbae icuã naa naa mbei mose. ³ Moisés
chimbese que nanderirõ aroneãte mbae icuã si ra.
Echeẽ nguiatu ngue nandemumbayã aroneãte nguiã.
Mbiate quiatu ngue nande re. Nandequirãcuã nea.
Dios que ndua nanderese ra. Nyebe nguiirõ mondo
nguiã nande je. Mbia rã ngue Jesús ru íbii ra. Mbia icuã
jate raque. Ae mĩ ngue eicuã eã nda. Ae que mano
nandeicuã ndiquicharõ nda. Nyebe nandererecua eã

ño mbae icuã cote re. ⁴ Jesús que mano nande je ra.
Nyebe mbae icuã ñimbirãcuã eãte nande je cote.
Nyebe Dios cheẽ nandemumbayã arondete namo
cote. Espiritu Turã ndui chõ nandeico nguiã cote. Mbia
icuã ndui eã ño nandeico nguiã ã cote. ⁵ Ae siqui quia
Espiritu Turã ndese nae, ũquĩ ño siqui nguiã Dios cheẽ
ndui si. Ae siquiã nguia Espiritu Turã ndese nae, ũquĩ
ño siqui nguiã uchiangui renda icuã ndui si. ⁶ Ae siqui
quia Espiritu Turã ndese, ũquĩ ia bei ra eriqui. Siqui bei
rae. Ae siquiã nguia Espiritu Turã ndese, ũquĩ nda
siquiã. Mano ndae. ⁷ Nandechiangui renda icuã nguia
siqui icuã icuã mbeite nguiã Dios je. Nandechiangui
renda icuã nguiarei Dios cheẽ mumbayã aroneã. ⁸ Ae
siqui bei quia uchiangui renda icuã ndui, ũquĩ siqui
aroneãte Dios cheẽ ndui.

⁹ Eĩ jenyee eãte raque jẽ. Espiritu Turã ndui chõ jẽingo
nguiã jẽ. Espiritu Turã nguia siqui nguiã jeñiangui re.
Espiritu Turã siquiã mose emo ñiangui re, Cristo rimba
eã ño ũquĩ nde. ¹⁰ Jesucristo riqui jeñiangui re ũquĩ.
Jendete ra mano ndaque mbae icuã je. Espiritu Turã
nda jeãingue mingo bei ibate. Dios quiatu ngue jẽisi
turã nguiã. ¹¹ Dios que Jesucristo raaque mbuquera ra.
Eĩ si ra Dios nanderete raaque mbuquera Espiritu Turã
quirãcuã je no. Eĩ si ra nanderete mbiasu, Espiritu Turã
siqui mose nandechiangui re.

¹² Nandechiangui renda icuã ndui nandeico aroneãte
cote. ¹³ Nandechiangui renda icuã ndui nandeico
mose, nandemano mbei ra equia. Espiritu Turã nande-
bi icuã mbutiã mose, nandemingo bei rae. ¹⁴ Ae je Es-
píritu Turã ndiqui ñee nae, “eĩ jenyee” i nae, Dios rimba
chõ ũquĩ nde. ¹⁵ Nande Espiritu Turã isi mose, aque
mose bei chõ Dios riiirõ nande cote re. Dios rimbachõ
eã ño nande cote re. Dios riiirõ tuchi chõ nande cote re.
Nandesiquiche tuchi que equia Dios si nyii ra. Nan-
desiquicheãte esi namo cote. —Paba, nande chõ nguiã
e e co cote. ¹⁶ —Dios riiirõ tuchite jẽ, i chõ Espiritu Turã
nguiã nandembiiirandu tuchi. —Dios riiirõ tuchi rei
nande re, nande chõ nguiã nande abe nandechiangui
re co. ¹⁷ Dios riiirõ tuchite quia nande re. Nyebe ra Dios
mbae mondo tuchi nande je Jesucristo rese. Sã ñi mbia
Jesucristo mbasi cose no, eĩ si ra mbia nandembasi
nande abe. Aquere ra nandeico turã mbei erese ibate
cote.

Mbae turã mbei jee ra nande je nandeico mose ibate

¹⁸ Mbia ra nandembasi raque a nyii. Dios ra nander-
erao bei ibate cote. Aque mose ra mbae turã mbei
nande je cote. Nyebe ra nandetesarei nanderasi jua si
cote. Nandeico bei mose ibate. ¹⁹ Dios ra huicua
mbuchecua ja aque mose. —Co rei seicuasa co. Co abe
no. Co abe no, i ra Dios aque mose. ũquĩ ño nan-
desaarõ arõ nguiã ã. Ae Dios chao mbae ja, ũquĩ abe
riqui ũquĩ ndaarõ arõ ã. ²⁰ Adán mbae icuã naa namo

mose, mbae icuã ja que aquere cote ra. Dios chiao icuã ja cote. Dios que mbae mbiicuã ja Adán mbae icuã naa namo mose ra. ²¹ Eĩ mbei eã nda mbae. Mbae ra nimbirõ ja cote. Nimbiasu ra cote, Jesús tu mose íbii cote. Mbae ra manoã cote. Mbae ra shi eã cote. Jesús quiato rese ra mbae nyicuabo ja aque mose cote. ²² Dios chiao ra nyicuabo ja aque mose. Dios chiao ia eãte quia namo nde. Áquẽ ndasi rá ño eriqui nguiã namo. Nyebe ra Dios uchiao mbiasu ja cote. ²³ Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchicuabo tuchi uchiao ja rese cote. Namó ño nanderasi rasi re. Nandeya eãte abe no. Nandembuchicuabo mose, nanderete abe ra embiasu. ²⁴ —Jendete tambiasu, i que Dios nanderirõ mose mbae icuã si ra. Ũquĩ ño nandesaarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã. ²⁵ —Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶ Nandequirãcuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechẽ ndequia requia mose chõ nandeico nguiã iabu abu. Nandiabu mose chõ Espiritu Turã ndiqui nguiã ñee turã Dios je nanderĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espiritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espiritu Turã ndiqui nguiã ñee Dios je Dios icuasa rĩ. ²⁸ Ae nyesecua quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndu quiatu ngue erese nyii re.

²⁹ Ae res e Dios riqui nduate nyii nae, ũquĩ ngue Dios mingo icúe nyii ra. Jesucristo rá si embiasu sacua. Nyebe nandeico nguiã Dios ririĩ tuchi Jesucristo rese cote. Jesucristo rei nanderiquii cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandei turã ngue cote ra. —Mbia tamumae turã ja jendese jẽingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo ñimbirãcuã eã nande je cote. ³² Dios que nguiirĩ mĩ mundo nande je ra. Mano sacua nandeicuã je. Eĩ nda mbae mondo ja nande je no. Sã nguiirĩ mundo nande ja je no. ³³ Dios chesecua tuchi chõ nande re. Emo ñee icuã aroneãte nande je. Dios quiatu ngue nandei turã nguiã. ³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo

Dios mbesarei aroneãte nandesi. Nyesecua beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nanderao eã arondete raque. Mbia nandeiquia arondete raque. Ũquĩ ja ra Dios mbesarei eã tuchi nandesi. ³⁶ Mbia icuãte riqui nande je ã. Sã embesa ji riqui i no:

Nderĩ ño mbia riqui nguiã ureiquia serĩ mbeite ã. Oveja iquia iquia rá ño eriqui nguiã ure je ã, i ñi embesa ji re. ³⁷ Mbia icuã icuãte raque nande je. Nimbirãcuã eã mbei ra nande je. Jesucristo quia siqui nguiã nanderese co. Nyesecua beite quiatu nguiã nanderese co. ³⁸ Dios nyesecua tuchite quiatu nguiã nanderese co. Dios hui aroneãte nandesi. Mbia nandeiquia iquia mose, aque mose abe Dios hui aroneãte nandesi. Mbae mo nda embui eã nandesi. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ũquĩ ja ra Dios mbui eã nandesi. Dios quia nyesecua tuchite nguiã nanderese Jesucristo rĩ co.

Dios que judíos mĩ icúe umbaerã tuchi ra

⁹ Jesús icuasa chõ se resẽ. Aico ñee ñooño eãte co resẽ. Espiritu Turã abe riqui sembiirandu sechiangui re co resẽ. ² Seya eãte aico co. Seya eãte aico judíos rese co. ³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacua Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene. ⁴ Israel ndei judíos i tuchi. Seririĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenyẽ chõ ñee seje, i rei que Dios judíos mbaaquiato quiatu ra. —Mbae turã nda asaã saã mbei quia jẽje, i bei que Dios quia judíos je ra. ⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Ũquĩ mo nguiatu que judíos tuchi eã nda. Siquiã tuchi que Dios rese ra. ⁷ Abraham ndiriĩ nyeremo ndei que ra. Ismael. Isaac. Ũquĩ nyeremo ngue eririĩ ja rei ra. Dios que Isaac mĩ isi ra. —Abraham ndiriĩ, i eã ngue Dios Ismael ririĩ je ra. —Abraham ririĩ, i chõ ngue Dios Isaac ndiriĩ je ra. Isaac ndiriĩ jaje que Dios “judíos” i cote ra. ⁸ Abraham ndiriĩ nducucha que Dios isi turã ja eã ndese. Ae Dios cheẽ isi turã nguia, ũquĩ je chõ Dios riqui nguiã “seririĩ” i. ⁹ Dios que ñee Abraham je ra. —Tenda nongue ra achu. Aque mose ra áquẽ

nacuĩ mo nyaacuquia neninisi Sara je, i que Dios Abraham je ra. ¹⁰ Aquẽ ngue tiarõ cote ra. Isaac, i que ee ra. Isaac que ngũinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹ —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriirĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca riiirĩ niĩ nda. Uquĩ nyeremo niĩ:
Jacob ndese chõ aio nguiã nyesecua.
Esaú rese achesequa eãte, i que Dios ra,
i que embesa ji ra.

¹⁴ ¿Mbaerã Dios riqui aque mĩ irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no:
Seya eãse mose emo ndese, seya eãte erese.

Setutãse mose emo je, seturãte ee,
i que Dios Moisés je ra. ¹⁶ —Dios turã naa nda seje chã, i mose emo, uquĩ je eã ño Dios turã ndiqui nguiã. Ae mbae turã saã saã ndei quia, uquĩ je eã ño Dios turã ndiqui nguiã. Ae rese Dios ia eã ndiqui, uquĩ je quiatu Dios turã ndiqui nguiã. ¹⁷ Sã faraón no. Egipto jenda rerecua. Dios que ñee ee ra. —Aremiĩ ngue mbia rerecuarã nda. Sequirãcuã ndeacuquia sacuã mbia je. Mbia jirandu ja sacuã serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñiã mātã mose, ¿mbaerã nda jeñee asi echiã ãtã je re? i ra jemo ñee seje reae. ²⁰ Dios cheẽ nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no. ²¹ Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosa rã ño Dios re. ²² Ae eicuã icuã mbeite riqui Dios je nae, uquĩ je Dios siqui mingue i ite co. Uquĩ nda nyoĩ je tata cuasu. Uquĩ Dios mbasi serĩte cote. ²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandea uchesecuarã nda. Nandeico sacuã erese. ²⁴ Diobi chõ nande re. Dios que nandearabo ra. Nandemo ndei judíos. Judíos eã abe abe. Dios chiirabo ja chõ nande re. ²⁵ Sã Oseas Dios cheẽ mbesa no:

Ae serimba eã nyii nae, uquĩ nda serimbarã cote.
Ae rese mbia nyesequayã nyii, uquĩ ndese ra achesequa tuchi se cote.

²⁶ “Seresenda eã ño jẽ nde”, i que Dios ñee ee nyii ra. Hue jenda sí je ra Dios ñee cote.
“Seresenda chõ jẽ cote re”, i ra Dios si ñee ee cote,
i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:
Judíos tubiriã tuchite raque rae.
Siqui ja eã nda Dios rese.
Co mĩ mĩ ño nda siqui erese.

²⁸ Dios quia ra uquiatoã mbasi ja ibi jenda cote.
Mbasi je ra cote, i que Isaías embesa ra. ²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.
Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.
Gomorra jenda abe no,
i que Isaías embesa ra.

Judíos siqui sereã Jesús rese

³⁰ Tacheẽ nyecua jẽje. Ae judíos eã nae, uquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiã mbitirõ cote ra. ³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã quiatu ngue Dios cheẽ ndese re. ³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. ³³ Eĩ ngue embesa ji Dios cheẽ nda:

Serucucha que amĩ judíos rae ra.

Judíos ra eisiteã.

Judíos ra cuá i nyoĩ ee.

Ngoĩ ra echoĩ cuá i mose ee.

Sita rã ño serucucha ee re.

Ae serucucha icua quia nae, uquĩ nguia ra ngoĩ eã nyoĩ.

“Dios rucucha aisi jirichĩ nguia no”, i eã nda Cristo icuasa mo ñee,

i que Dios cheẽ mbesa ji ra.

10 —Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ² Judíos siqui sete raque Dios cheẽ ndui. Ñeenda quia eicuayãte nguiã Dios icha. ³ —Dios ra nandechiã mbitirõ Jesucristo rĩ, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei. ⁴ Jesucristo tu nonde que judíos siquise tuchi Moisés chimbese rese ra. Jesús que tu íbii cote ra. —Moisés chimbese rui jẽingo mose, taembitirõ turã, i ãte que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵—Emo mbae icuã mo saã eã mbei emo mose, ùquĩ nda Dios mingo bei, i rei que Moisés ra. ⁶ ã Nandeico Jesús icuate ã. Nyebe ae riqui nguiã nandemingo bei i ite ã. Nyebe nandeico nguiã ñee ãte. —Aba quia ra oso Jesús reru ibate si nande je, i ãte. —Aba quia ra oso mbia raaque rea, Jesús mbuquera sacuã, i ãte nande mo. ⁸ ã Ureico Jesucristo renei nenei mbia je ã. —Jẽ Jesucristo icua mose, jẽingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jite a. Echeẽ aba chiicua bite aba chiangui re, i ra Jesucristo icuasa ñee. ⁹—Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechiangui re. Nde i mose, Dios ra neningo bei. ¹⁰ Emo Jesucristo icua mose uchiangui re, Dios ra echĩã mbitirõ. —Jesucristo aicua quia co, i mose, Dios ra esirõ mbae icuã si. ¹¹—Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeēcua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicuã embitorõ”, i mose emo, Dios ra ùquĩ mingo bei tuchi, i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacuã, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je. Ureya tuchiite erese, i que embesa ji cose ra. ¹⁶ Mbia mĩ mĩ ño siquichĩ Dios cheẽ turã ndese ùquĩ. Sã Isaías ñee no:

Dios, mbia que urecheẽ ñandu sereãte ra, i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangu chooño eã ngue echoi Dios cheẽ nenei nenei ndesẽ. ¹⁹ ¿Judíos jiranuãte Jesús cheẽ turã ndese re? Jirandu tuchiite rei que ra. Sã Moisés Dios cheẽ mbesa no:

Dios rei se. Judíos eã ndese taico turã. Mbia aquiatuã taisi serimbarã. Judíos nda queteã tuchi serese chã, i que Moisés Dios cheẽ mbesa ra. ²⁰ Isaías abe que Dios cheẽ mbesa ra. ã Ngue embesa ra: Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra, i que Isaías siquicheãte Dios cheẽ mbesa ra. ²¹ Isaías que ñee judíos je no nda:

Dios riqui ñee jẽje co. “Jẽingo serese”, ae beite raque se quia judíos je co.

Secheẽ mumba bei chõchĩ.

“Jẽingo serese”, ae beite raque quia secheẽ mumbasa je co, i que Dios ra, i que Isaías Dios cheẽ mbesa ra.

Dios ia eãte judíos rese

11 Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re? ²—Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jẽtesarei chõ Elías cheẽ si Dios je re? Elías que ñee icuãte judíos ataque riĩ aque mose ra.

³—Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde mĩ eã ño serimba re. Serimba tubiriãte nyeresẽ. Siete mi l serimba que ngoi eãte ngũĩã ndese ñee ñee Baal naanguia je ra, i que Dios ñee Elías je cose ra. ⁵ Eĩ ño namo abe re. Judíos emo emo ño siqui nguiã Dios rese ã. ùquĩ mĩ ño Dios chiirabo ùquĩ nde. Uturã je chõ Dios ùquĩ irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je. ⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co mĩ mĩ ño ngue Dios irabo uquiatorã nda. Eataque que Jesucristo icua sereãte quia ra. ⁸ Sã embesa ji riqui ñee no:

Dios que embaaracua eã nda.

Nyebe mbae icua eãte nguiã, mae mose Dios chiao rese.

Nyebe Dios cheẽ icua eãte nguiã eandu mose no, i que embesa ji cose ra. Eĩ mbei chõ namo abe re.

⁹ David abe que ucheẽ mbesa ra. Eĩ ngue embesa ra: Sã eya chooño umbae tubiriã ndese.

“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacuã.

Sã mbae usi riqui eituquia bei,

i que David ñee nda.

¹¹ Judíos que Dios cheẽ secha rei ra. Uba je quia ra euaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos eã

mingo bei tuchi sacua cote. Judíos ra queteã tuchi chee Dios rese cote. Uba si sacua erese cote. ¹²Judíos que Dios cheẽ isiteã nda. Nyebe mbia judíos eã ja Dios cheẽ andu ja nguiã cote. Judíos Dios cheẽ mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios cheẽ isi

¹³Jêje judíos eã je aico Dios cheẽ nenei nenei a. —Judíos eã je eico secheẽ nenei nenei, i que Dios se-mondo ra. Nyebe aico nguiã Dios cheẽ nenei nenei sete. ¹⁴Judío chõ se no nde. Sã jê jêingo Dios rese no jê. Sã judíos abe riqui Dios rese jê na si. Dios erirõ sacua mbae icua si. ¹⁵Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiaturã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote. ¹⁶Sã mbia mo mbichae raã no. Mbichae ñiinda uchi turã mose, eruinda abe ra uchi turã no. Mbichae ñiinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriri abe uba chee Dios rese no. Ei turã mose, erãquiã abe ra eturã no.

¹⁷Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Uquĩ naquiã nendaque re chõ ngue Dios jemi nda. Jê judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jê. ¹⁸Jenguasu ra jêsaã saãchĩ judíos je jê! ¡Dios jêisi turã mose jê! Erãquiã injertar i ji rã achõ ño jê nde. Erãquiã nda hui mingo eã. Ei quia nda erãquiã mingo nguiã. Erãquiã na ño jêingo nguiã jê. ¹⁹—Olivo rãquiã ngue Dios chisia urembucha sacua ei rese, ¡jenyechĩ nda jenguasu raã naa jê!

²⁰Dios que echisia sia Jesucristo icua sereã mose ra. Jê Jesucristo icua mose chõ ngue Dios jembucha olivo i rese ra. Jemingo bei sacua. Nyebe jêingo jenguasu raã naa eã. Jêireĩ ireĩ jiri quia Dios si. ²¹Dios que olivo rãquiã nyisia mombo Jesús icuayã mos e ra. Eĩ nda Dios jemombo jê abe Jesús icuayã mose. ²²¡Sã Dios turãte mbia siqui mose erui no jê! ¡Sã mbia mbasi echeẽ mumba mose no jê! ¡Sã eturãte jêje no jê! ¡Jêingo bei chõ Dios turã ndese jê! Jêingo eã mose Dios rui, Dios ra jemombo. Ira rãquiã sia ji mombo rã si.

²³Judíos uba si mose Dios rese, Dios ra embucha si esiasa rese. Injertar i si ra ee. Dios mi ño eaquiato uquĩ naa nde. ²⁴Judíos eã ño jê nde. Olivos turã naquiã eã ño jê nde. Olivo mbae rãquiã na ño jê nde. Dios ae que jembucha nguiã olivo i rese. Injertar i jêje. Ae Dios nyisia nyii nae, uquĩ nda Dios mbucha si uchisia rese.

Judíos abe ra siqui chee Jesús rese

²⁵Tacheẽ nyecuayã na jêisaa. Mbia chiicuayã tasenei na jêje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguia siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶Aque mose ra Dios judíos rirõ ja huicuã si cote. Sã embesa ji riqui i no:

Mbia mbuturãsa ra tu Sion si.

Ae ra Jacob riri sirõ ja huicuã si. Judíos rirõ ja huicuã si.

²⁷Aque mose ra judíos icua ambutiã ja esi.

Secheẽ nda ique aque mose cote, i que Dios ra, i que embesa ji ra. ²⁸Judíos yete tuchi chõ Jesús cheẽ turã ucuayã nguiã uquĩ. Nyebe Dios uturã ndeacuquia nguiã jêje. Judíos eã je. Dios quia nyesecua beite nguiã judíos rese. Irabo que nyii ra. Eramei ja rĩ ño Dios judíos irabo nguiã. ²⁹—Mbae mo tamee jêje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰Jesucristo que jêicuayãte quia nyii ra. Judíos hui mose Dios si, Dios que uturã teacuquia jêje cote resẽ. ³¹Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³²Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³Dios turã tuchite. Dios aracua tuchite. —¿Mbaerã Dios uquĩ naa nde? nande aroneate. Dios chisaã nandeicua aroneate quia ã. ³⁴¿Emo ndua ndua quia Dios rã nde? ¿Emo mose mbia riqui Dios mbaaquiato re? ³⁵¿Emo nane mbae mo mondo quia Dios je re? ¿Dios mbae mondo nonde re? ³⁶Dios ae que mbae chao ja ra. Umbaerã ño echao ja nguiã mbae. Ae quia ecuasu jiri mbae ja si re. Nandecheẽ turã mbei ra equia erĩ. Amén.

Je sí chõ jeñimondo Dios je

12 Dios ia eã mbeite riqui nanderese co. Nyebe jê sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite uquĩ. Dios que mbae mondo tuchi nande je ra. Eĩ nande chõ ñimondo ee ae. ²¡Jesús quiatoã na nda jêingochĩ jê! —Nde rã si semundua ndua ramo, Paba, jenyete chõ nguia Dios je. Eĩ jenyete mose ra Dios ñeenda huicha teacuquia jêje. —Eĩ jenyete, eĩ jenyete chõ, i bei ra Dios quia jêje cote.

³Dios turã ngue seirabo ucheẽ nenei nenei sacua jêje ra. Nyebe aico nguiã jembiiirandu randu co. —Se jiri quia mbia si re, jenyete tuchite chĩ na jê! ¡Endua ndua turã ño ndechue jê! Dios nembaaquiato tuchi mose, ebite quia nde re. ⁴Mbae tubiriãte nanderete rese. Nanderesa. Nandeo. Nandeisa. Uquĩ jate nanderete

rese. Mbae miñ nda siquíã nanderete rese. Nandeo oco mbae rese. Nandesa mbae andu. Nanderesa mae mbae rese. Nandechuru ñee. Nanderete quiarei “ã nandesaã”, i tuchi nyue. Eñ si chõ Jesús icuasa nande re. Jesús rete ja chõ nande re. “Ã nandesaã”, nandete equia nandechue ã. Mbae rese jaajate que Dios uquia-to mingo ra. ⁶ Dios turã tuchi que nande je ra. —Co rese eico nde. Ñ ndese eico nde, i Dios quia nandembuchao chao co. Ûquĩ naa sacua Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷ —Mbae turã esaã saã mba je, i mose Dios emo je, sã aque mbae turã naa naa mbei mba je. —Mbia embaaquiato quiatu, i mose Dios emo je, sã embaaquiato turã tuchi. ⁸ —Seosei uquia mba je, i mose Dios emo je, sã aque Dios osei uquia turã tuchi mba je. —Mbae emee mee mba je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo miñ mose ererecuarã, sã ererecu turã tuchi aque. —Mbaecha reã je mbae esaã saã, Dios i mose emo je, sã aque ia tuchi mbae turã naa naa mbaecha reã je.

⁹ ¡Jenyese cu chooñochĩ nda jenyiese jẽ! ¡Mbae icuã si jenyicuasẽ cuasẽ tuchi quiatu jẽ! ¡Mbae turã ndese chõ jẽingo tuchi jẽ! ¹⁰ ¡Jembi turã ño jenyiese jẽ! ¡Jenongue rã nguia tu jẽingo turã tuchi jenyue jẽ! ¡Jeñee turã turã ño nguia emo niñ jẽ! ¡Nderĩ nda erecheẽ turã turãchĩ jẽ! ¹¹ ¡Jeñimbutomo tomochĩ nda jẽ! ¡Jeñimbirãtã tuchi quiatu Dios je jẽ! ¹² Jesucristo cheẽ nda io chee nande je emo mose cote. Ûquĩ ño nandesaarõ arõ nguia ã. Nyebe jẽya tuchi quiatu siqui eraarõ arõ. Mbia jembasi mbasi mose, jenyecuachõ ño nguia ee. Jeñee ñee mbei quiatu quia Dios je. ¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jẽisi turã ño jẽ!

¹⁴ Mbia mo icuã icuã mose jẽje, ¡jẽeturã ño ee jẽ! —Paba, mbae turã emondo rã ee. Ae icuãte riqui seje, Ûquĩ je, jenyue chõ Dios je. ¹⁵ Ae eyate riqui, Ûquĩ ndese chõ jẽya jẽ abe. Ae nyeseo quia, Ûquĩ je ndese abe jenyeseo no. ¹⁶ Hue rĩ ja chõ jẽingo ndua turã. ¡Jenguasu ra jẽsaã saãchĩ emo je jẽ! ¡Jẽseteã ño jẽingo jẽ! ¡Jẽaquiato ra jẽsaã saãchĩ jẽ! ¹⁷ Mbia mo icuã icuã mose jẽje, jenyecuachõ ño nguia ee. Mbae turã ño jẽsaã nguia mbae resa rae. ¹⁸ ¡Jẽingo turã ño mba je jẽ! Ñ nda jẽingo ubi turã jenyiese. ¹⁹ Mbia icuã mose jẽje, ¡jeñee icuãchĩ nda erobeishĩ jẽ! Dios quia ra embasi nguia eicuã mose. Sã embesa ji riqui i no:

Se quia mbae tambasi eicuã mose, i que Dios ra, i que embesa ji ra. ²⁰ Ae eicuãt e riqui jẽje, Ûquĩ jembuquiaru chõ eriãcuã mose. Ûquĩ jembu chõ eisei mose. Eñ jenyue mose ee, eireĩ te ra huñcuã mose cote. ²¹ Mbia icuã mose jẽje, ¡jeñeechĩ nda echeẽ ndibishorõ. Jẽingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

Sã mba riqui turã ererecu ja je

13 Mbae ja ererecu cheẽ mumbayã nguia tu. Dios ae chõ ererecu miñ nguia. Dios chimñ ja chõ mbae rerecu re. ² Ae mbae rerecu cheẽ mumba quia, Dios cheẽ abe mumba chõ nguia aque. Dios quia emiñ tare nguia. Ae ererecu cheẽ mumba mumba quia, Ûquĩ nda mbae rasi saã cote. ³ Mbae turã mbusiquiche sacua eã ño ererecu re. Mbae icuã mbusiquiche sacua nguia ñene. Nde ndeico turã mose, ererecu ra nembusiquiche eã. Ndeico turã mose, ererecu ra ñee turã mbei ndeje. ⁴ Dios ae chõ ererecu miñ nguia. Nanderaquiato turã sacua. Nde mbae icuã naa mose, ndesiquiche jiri nda esi chã. Ndeicuã mose ra ndeiruã nua arõte. Dios quiato emiñ nguia ererecuarã mbae icuã mbasi mbasi sacua. ⁵ Ererecu cheẽ nandemumbayã ño nguia. Nandembaasi asiã sacua achõ eã ño ñene. Nandendua turã sacua abe chõ ñene. ⁶ —Impuestos jẽisi isi mbae si, i que Dios ererecu miñ nda. Nyebe nandeico nguia impuestos mondo mondo turã ererecu je. Dio s cheẽ nguie chõ ererecu riqui nguia eisi isi. ⁷ Jẽ deber i mose emo je, mbae jembuchebi jei chõ ee. Jẽ deber i mose impuestos, jemondo chõ ee. Ererecu je jẽingo turã ño. Jeñee turã ño erĩ.

Jenyese cu ja quia jenyiese

⁸ Emo mbae mondo mose jẽje, jẽingo are arete chĩ nguia mbae mondo rocoĩ ee. Deber jenyechĩ nda emo je. ¡Jenyese cu ja quiatu quia jenyiese jẽ! Jenyese cu mose mbae rese, Moisés chimbesa ja jemumbayã ño nguia Ûquĩ. ⁹ Ñ ndei Moisés chimbesa ã:

Emo ninisi rese ra ereicochĩ.

Mbae mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñooñochĩ.

Emo mbae ra erechesei choseichĩ,

i que Moisés chimbesa ra. Nandechese cu mose mbae rese, nandeico embesa ji cheẽ mumbayã ã. Ñ ndei Jesucristo cheẽ ã: Sã ereico nyese cu nanderete rese no, eñ ere si chõ nyese cu emo ndese. Nde ã naa mose, Moisés chimbesa ja eremumbayã nguia ã. ¹⁰ Ae nyese cu quia mbae rese, Ûquĩ nda mbae icuã saã eã mbei emo je. Emo nyese cu mose mbae rese, Dios cheẽ ndui si chõ eriqui nguia mbae turã naa naa Ûquĩ.

¹¹ Dios rese jẽingo tuchi Ûquĩ. Nandemae jei ra Jesucristo rese cote. Nandechẽ ñue equia nyii. —Nandemae je ra Jesucristo rese, nande que equia nyii. Namo nda nandemae erese cote. Aichite eñi tu a cote. ¹² Itondaru rã ño mbae icuã ja namo nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacua nandesĩ.

¹³ Nandeico turã ño Dios resa rae. ¡Mbae quiacua ra

nandesichächĩ jě! ;Nandequiacuachĩ nda jě! ;Emo nin-
isi rese ra nandeico icochĩ jě! ;Mbae icuã nda nande-
chosei choseichĩ je! ;Nandeicuã icuächĩ nda emo
mbiicuã icuã jě! ;Emo mbae ra nandechosei choseichĩ
jě! ¹⁴ Jeñimee tuchi quia Jesucristo je. Ae nda uquirãcuã
mee tuchi jěje chã. Mbae icuã ndiquisã sacuã jěsi. Ae
icuã mbia chosei chosei quia nae, ũquĩ nda jěsaã
saächĩ jě Jesús resenda chõ jě ndesẽ.

Jeñee asiã mbei jenongue je

14 Jesús quiato mo Jesús icua tuchiã mose, jěisi
turã ño. Jeñee asi asichĩ nda ee. ² Emo emo
mbae u ja. Emo emo soo u eã tuchi no. Ae soo u eãte
quia nae, embaaquiatu tuchi iriã ño ũquĩ nde. ³ Ae soo
u guia nae, sã ũquĩ ñee asiã mbei soocua reã je. Ae
soo u eãte guia nae, sã ũquĩ ñee asiã mbei soocua je
no. Dios quiato ja chõ ñene. ⁴ Erecheẽ icuã aroneãte
ererecua rimba mo je. Ae ae mbae saã nguiã nguere-
cua je. Dios ae nda ñee nguiã nguĩmba je. Mbae raã
turã mose. Mbae raã icuã mose abe no. Dios quirãcuã
ae nda ngũimba mingo nguiã mbae turã ndese.

⁵ —Nyaashĩ mo ngue Dios irabo mbiicúe cose ra.
Ūquĩ nyaashĩ mose nandechimbaacua rã, i Jesús quia-
to mo nguia co. Jesús quiato mo nguia ñee nguiã: —Eĩ
ja chõ nyaashĩ ndesẽ, i emo no. Sã Dios quiato ja ae
riqui ndua ndua uchiangui re ae. ⁶ Dios quiato mo ñim-
baacua mose aque nyaashĩ mose, Dios je chõ eriqui
nguiã ñimbaacua. Dios quiato mo mbae raã naa mose
aque nyaashĩ mose, Jesús je chõ eriqui nguiã mbae
raã naa aque nyaashĩ mose. Ae soo u quia, Dios je chõ
eriqui nguiã soo u. Gracias, i que Dios je nyii ra. Ae soo
u eã nguia, Dios je chõ eriqui nguiã soo u eã no. Ae
abe gracias i chõ nguiã Dios je ague. ⁷ —Sebi rese chõ
taico bei, nande aroneãte. —Semanose mose quia
tamano, nande aroneãte. ⁸ Dios ae chõ nandereco
mingo nguiã. “Emano”, i mose Dios nande je, nandeico
nguiã mano. Nandereco siqui mose, Dios rimbarã ño
ñene. Nandemano mose, Dios rimbarã ño nda nande-
ico nguiã no. ⁹ Cristo que mano nda. Quera si que ra.
Mbia rerecuarã ngue quera si ra. Mbia reco rerecuarã.
Mbia mano je rerecuarã abe no.

¹⁰ Nandechẽ icuã icuã aroneãte nanderesenda mo
je. Emo mose quia ra Dios mae tuchi nanderese cote.
Nandechiangui renda ra etea tuchi cote. Ae quia nda
nandeicuã tea nguiã. Nandetura abe rea. ¹¹ Ñ ndei em-
besa j i ã:

Dios ndei se. Se rei sereco bei.
Sésaa ra mbia chi ja ngoi ngũiã ndese.
Ñee jaaja ra seje cote.
“Dios tuchi chõ nde re”, i jaaja ra seje cote, i que Dios
ra,

i que embesa ji ra. ¹² Nande ae ae ra mbae nandesenei
senei Dios je aque mose. —Ñ ngue asaã saã nguia sei-
co mose íbii ra, nande ja ja ra ee cote.

Jenongue jembicuã eã

¹³ Nyebe nandechẽ icuã eã nguia nanderesenda mo
ñi. ;Nandembia eãte chĩ nda jě! ;Mbae icuã nda nan-
desaã uquiachĩ ee jě! ¹⁴ Jesucristo que sembaaquiatu
ra. —Mbae turã ja chõ mbia chiurã nde, i que ra. —;Co
ra jěuchĩ jě! iãte Dios mbae mo ñi. —Eicuãte co, i
mose emo, sã ae mñ eu eã. Ae eu mose, eicuãte ee.
¹⁵ —;Co nandeu eã jě! Eicuãte, i mose nderesenda mo
ndeje, eu eã. Nde eu mose, erchesequa eã ño nguiã
nderesenda rese aque. Nderesenda je abe chõ ngue
Jesucristo mano ndesẽ. ;Mbaerã nda nderesenda
erembicuã ndechuubi je re? ¹⁶ Ndechuubi turã ndaque
ndeje. “Eicuãte” i mose nderesenda mo, eu eã ae. Nde
eu mose, mbia ra erembucheẽ icuã ndechue. ¹⁷ Dios
chõ nandererecua cote re. Nyebe nandendua tuchi eã
nguia nandechiurã ndese. Ae nandembei quia, ũquĩ
abe rese. Dios rese quia nandendua. Ae chõ nan-
demingo nguiã mbae turã ndese co. Ae chõ nandechiã
mbucoi nguiã co. Espiritu turã ae nandembia mingo
nguiã co. ¹⁸ Eĩ nande mose Cristo je, Dios ia tuchi ra
nanderese. Mbia abe ia ra nanderese. ¹⁹ Nandeico turã
nda nandechue chã. Eĩ nande nda Jesús osei osei
uquia nandechue chã. ²⁰ —;Aque soo ra nandechĩ jě! i
mose Jesús quiato mo, jereuchĩ nda jě! Jesús quiato ra
erembicuã arõte nde eu mose. Mbae turã ja raque
mbia chiu. “Eicuãte”, i mose Jesús quiato mo, eu eã ae.
²¹ Soo Jesús quiato mbiicuã mose, soo ra nandeu eã.
Vino Jesús quiato mbiicuã mose, vino nda nandembei
eã. Mbae mo Jesús quiato mo mbiicuã mose, nandeo-
co eã erese nande abe. Mbae mo Jesús quiato mo
mbiicha serĩ mose Dios icha si, ũquĩ ndese nandeicoã
nande. Eĩ nda ichayã esi. ²² —So o icuã eã ño ñene, i
mose Dios ndeje, echecuachõ ño nguia eu. Endua
tuchi mbae mo naa nonde. Eicuã arõ mose ndeje, esaã
eã. Etura mose ndeje, echecuachõ ño eraã. Nde ũquĩ
naa naa mose, ndeya tuchi rae. ²³ Nde ndeiranuã mose
mbae mo ndese, esaã eã. —Etura ereae. Eicuãte ere
no ae, nde i mose eriisu isu, esaã eã ño. Ndeiranuã er-
aã ñooño mose, eicuãte ũquĩ. Ndechiisu isu u mose
soo, eicuãte ũquĩ. —Eicuãte ereae, nde i mose, erei-
cochĩ nguiã eu.

Nandebi rese ra nandeicochĩ jě; nandenongue bi rese quia nandeico

15 Nande mo Jesús icuat e quia co. Ae Jesús icua
tuchiãte quia nae, ũquĩ je nandeico turã jiri ae.
Nandembaaquiatu quiatu ae. Nandebi achõ ndese ra
nandendua eã. ² Ae nandebite nande ae, ũquĩ ndese
nandeicoã. Ae Jesús quiato nongue bite nae, ũquĩ

ndese quia nandeico. Ūquĩ mose nandeico nandere-senda mbaaquiato tuchi Jesús rĩĩ co. ³ Cristo chee que siquĩ ubi rese ra. Sã embesa ji riqui ñee Cristo rĩĩ no:

Paba, ae ndeucuayãte quia nae, ūquĩ ngue ñee icuã mbeite quia seje ra,

ĩ que Cristo ñee ngu je ra,
ĩ que embesa ji ra. ⁴ Dios cheẽ mbesa ji cose ndare chõ nandembaaquiatusa re. Nandemingo mingue sacuaã. Nandembirãcuã sacuaã Jesucristo rĩĩ. Nyebe nandeico nguiã Jesucristo raarõ arõ mingue ã. ⁵ Dios chõ nandemingo mingue nguiã. Dios chõ nandembirãcuã nguiã. Dios nda jemingo turã mbei nyiese Jesucristo cheẽ ndui si chã. ⁶ Ūquĩ mose ra jẽingo ñee turã mbei Dios je. Hue rĩĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandesi turã no, eĩ jenyee si chõ nguia nyi-isi turã. Eĩ nda mbia ñee turã Dios rĩĩ. ⁸ —Eĩ tae tae, ĩ que Dios judíos i ñiinda ja je cose ra. Nyebe Cristo ru nguiã mbae turã naa naa judíos je cote. —Dios cheẽ iochĩ cote, ĩ nda judíos chã. ⁹ Judíos eã abe mundua sacuaã Dios rese que Cristo ru ra. Dios turã ndese emundua sacuaã ño ngue eru nguiã. Co rei David chimbesa co:

Paba, ndeturã tasenei senei judíos eã je.
Tairasei rasei abe ndeje,
ĩ que David embesa ra. ¹⁰ Co rei embesa ji cheẽ mo co: Judíos eã, jëya chõ Dios rese.

Sã Dios rimba iate erese no, eĩ jenyee chõ jẽ abe jëya erese,
ĩ que embesa ji ñee nda. ¹¹ Co rei embesa ji cheẽ mo co no:

Sã mbia ibi jenda ja ñee turã ja Dios rĩĩ,
ĩ que embesa ji ra. ¹² Isaías que co mbesa ra:
Isaí ririĩ nguia ra mbia judíos eã nderecuarã tuchi cote.

Mbia judíos eã nda “ichõĩñosa reã”, ĩ tuchi ee,
ĩ que Isaías embesa Jesús rĩĩ nda. ¹³ Ūquĩ jẽingo Dios icuate ūquĩ. Dios nda jembia tuchi mingo chã. Dios nda jeñia mbucoi chã. Dios ae chõ “Cristo jësaarõ arõ”, ĩ chõ nguiã nandemingo mingue ã. Espiritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴ Seyate aico jendese co, Seresenda. Jẽingo turãte quia jenyiese ūquĩ. Mbae jẽicua tuchite cote. Jẽ ae jẽingo ñĩmbaaquiato quiato turã jenyue ūquĩ. ¹⁵ Aireĩ ireĩ ãte ã mbesa jẽje, Seresenda. Jëtesareĩã sacuaã ã si. Dios turã ae ngue seirabo nguiã. Mbia mbesareĩ eã sacuaã Jesús cheẽ si. ¹⁶ Dios que seirabo Jesucristo rimbarã nda. Ucheẽ nenei nenei sacuaã mbia judíos eã je. Mbia judíos eã secheẽ isi turã mose, Espiritu Turã nda emingo icúe Dios mbaerã cote. Ūquĩ mose ra Dios judíos eã

isi turã cote. ¹⁷ Se Dios cheẽ nenei nenei mose mbia je, mbia que siqui tuchi erese secheẽ nguire ra. Nyebe ūquĩ ndiqui nguiã sembia tuchi. ¹⁸ Jesucristo que sembirãcuã nda. Ucheẽ nenei nenei sacuaã judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo ñĩ abe ra acheẽ iã cote. Jesucristo que sembirãcuã, ūquĩ mĩ ño aico nguiã ñee jẽje a. ¹⁹ Espiritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ūquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangu chooñoa jenda je abe. Ilírico jenda je abe. ²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹ Sã embesa ji riqui ñee no:

Ae jiranuãte quia Cristo rese, ūquĩ nda jirandu erese cote.

Ūquĩ nda eicua cote,
ĩ que embesa ji ra.

Aso ra Rómaa, ĩ Pablo

²² Ae mbia riqui Dios cheẽ nenei nenei eãte, huee quiato ngue aico nguiã Dios cheẽ nenei nenei. Nyebe aico nguiã osoãte jendea. ²³ Cose ndarechõ mbei chõ aico rei nguiã “taso jendea”, ĩ. A jenda mbia que Dios cheẽ ñandu tuchi cote ra. Nyebe taso jendea cote. ²⁴ Seso mose España nda aso jendea. Sembia jiri sacuaã jendese. Taico mbirĩ na jendese huee. Jẽ nda sembucuta turã mondo hue si cote chã. ²⁵ Jerusalén nane nda aso. Ofrenda mo arao quia Jesús quiato je co. ²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. —Jesús quiato mbaecha reã je mbae nandemondo rã Jerusalén jenda je, ĩ que ñee nyue nyii ra. Ūquĩ ño arao nguiã co. ²⁷ Coche ūquĩ ndiqui nguiã mbae mondo judíos Jesús quiato je. Judíos rane nguia Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España qiti cote. Aicha ra ñeenda cúa si mae jendese. ²⁹ Jesucristo ra semondo turã jendea. Ae ra nandembia ja uturã je. ³⁰ Seresenda, Jesucristo quiato quia jẽ nde. Espiritu Turã ño jembuchesequa nguiã jenyiese ūquĩ. Nyebe jeñee tuchi quia Dios je serĩĩ. Nandechẽ ja tuchi quiato ee serĩĩ. ³¹ —Paba, mbia icuã Judea jenda esiquisã Pablo si. Paba, ndequiato Jerusalén jenda nda ofrenda isi turã Pablo si chã, jenyee chõ Dios je. ³² Ūquĩ mose ra seya tuchi mae jendese cote, Dios “eno” ĩ mose seje. Jendese seico mose ra sequenea aucua tuchi cote. ³³ Sã Dios riqui bei jendese. Sã eriqui jembia.

Pablo saluda i ja mbia je

16 Febe jēisi turā ño. Jesús quiato chō aque cuña nde. Mbae turā esaã saã mbeite quia Jesús quiato Cencrea jenda je aque. ²Jēisi turā ño nguia Jesús rīř. Sã Jesús quiato riqui nyiisi turā no, eř jenyē chō Febe isi turā no. Ae que mbae turā saã saã mbeite Jesús quiato je ra. Seje abe no. Nyebe jētura ño jē abe ee. ³Aquila je saluda jenyē rã seje. Eninisi Priscila je abe no. Serese que ũquř ndiqui Jesucristo cheē nenei nenei tuchi ra. ⁴Mbia que eiquia serř serřte rei quia serřř nda. Siquicheã mbeite que equia ra. Nyebe aico nguia gracias i tuchi ee. Se ae eã. Jesús quiato judíos eã abe riqui gracias i jate ee ã. ⁵Ae Jesús quiato ñumunua nua nguia Aquila chuchua, ũquř je abe saluda jenyē. Epeneto je abe saluda jenyē. Sequiatio tuchite que aque ra. Ae rane ngue Cristo isi Acaya jenda ra. ⁶María je abe saluda jenyē. Ae que mbae saã saã tuchi Dios je jēsa ra. ⁷Andrónico je abe saluda jenyē. Junias je abe. Se sř chō ũquř nde. Serese que etarō ji riqui cárcel nda. Dios cheē nenei neneisa tuchi chō ũquř nde. ũquř nane ngue Cristo icua sesi cose ra. ⁸Amplias je abe saluda jenyē. Sequiatio tuchi chō Dios resenda aque re. ⁹Urbano je abe saluda jenyē. Ae que Dios cheē senei senei nguia urerese ra. Sequiatio Estaquis je abe saluda jenyē. ¹⁰Apeles je abe saluda jenyē. —Seicua tuchi Apeles riqui co, i que Dios Apeles rīř nda. Aristóbulo chuchua jenda je saluda jenyē seje. ¹¹Herodión je abe saluda jenyē. Se sř chō ae re. Narciso chuchua jenda, ae Jesús quiato nae, ũquř je saluda jenyē. ¹²Trifena je abe saluda jenyē seje. Trifosa je abe. ũquř ndiqui mbae raã naa tuchi Dios je ũquř. Nandequiatio Pércida je abe saluda jenyē. Ae que mbae saã saã tuchi quia Dios je ra. ¹³Rufo je abe saluda jenyē. Dios chiirabo tuchi chō ae re. Esi je abe saluda jenyē. Taĩ na tuchi que eriqui seje ra. Mbae que esaã ja tuchi quia seje ra. ¹⁴Asíncrito je saluda jenyē seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ũquř ndese, ũquř je abe saluda jenyē. ¹⁵Filólogo je abe saluda jenyē. Julia je abe. Nereo je abe. Enongue je abe. Olimpás je abe. Ae Jesús quiato riqui ũquř ndese, ũquř je abe saluda jenyē. ¹⁶Jenyiquiaama ama saluda i nyue. Tuchuamo jenda ja Cristo quiato riqui saluda i jēje ã.

¹⁷Huee emo ndiqui Jesús quiato mbiçua sete hue. Hue emo ndiqui “Jesús quiato tambiča Jesús sř”, ite hue. Jenyicuasē ño nguia ũquř si. Jesús cheē ndui si eã ño eriqui nguia mbia mbaaquiato quiato ũquř. ¹⁸—Ae Jesucristo bite, ũquř nandesaã saã, iã ño nguia ũquř. Ubi achō ño esaã saã nguia ũquř. Echeē turā aba reã ño eriqui nguia mbia je ũquř. Ae Jesucristo icua tuchi eãte quia nae, ũquř mbiçř iřř ño nguia ũquř. Jenyicuasē tuchi chō nguia ũquř si. Aba mbiçř iřřsa tuchi chō ũquř nde. ¹⁹Jē ngue Dios cheē jemumbayāte ra. Mbia que jirandu jate jendese ra. Nyebe seyate riqui nguia jendese co. Jēingo bei nda equia mbae turā ndese chã. Mbia nda jembičř iřř eã jiri quia mbae icua je chã. ²⁰Dios quiarei aba mbiasa. Namó jiri ra ae Satanás ndiquisã mbei jēsi cote. Sã Jesucristo riqui turā mbei jēje.

²¹Timoteo ucheē mondo quia saluda i jēje aque. Siqui beite equia serese Dios cheē nenei nenei co. Lucio abe ucheē mondo quia saluda i jēje aque. Jasón abe no. Sosipáter abe no. Se sř chō ũquř nde.

²²Se abe secheē amondo quia saluda i jēje aque. Tercio rei se. Se chō aico nguia Pablo cheē mbesa mbesa jēje co. Jesús icuasa ja chō nande re. ²³Gayo abe ucheē mondo quia saluda i jēje aque. A aico rã echuchua uque a. Jesús quiato chumunua nuasa bei chō a re. Gayo chuchua. Erast o abe ucheē mondo quia jēje aque. Ae chō tesorero sucha tubiriã jenda je. Cuarto nandequiatio abe ucheē mondo quia jēje aque. ²⁴Sã Jesucristo riqui jendeaquiato turā mbei. Amén.

Pablo ñee hui bei sacua cote

²⁵Nandecheē turā mbei chō nguia Dios rīř. Ae ra jembirācuã tuchi mingo ucheē turā je. Echeē turā ngue asenei senei nguia Jesucristo rīř nda. Aque cheē turā ngue mbia icuayāte quia cose nyii ra. Dios que embuchecua eã mbei mbae ao ramo mosenda bei ra. ²⁶Namó ño Dios ucheē turā mbuchecua nguia mbia je cote. Jesucristo rīř. Dios cheē nenei neneisa que echeē mbuchecua nande je cote ra. Mbesa que nande je ra. Dios que ñee seje ra. —Secheē turā esenei senei mbei quia mbia jaje cote. Siqui sacua secheē ndese. Secheē mumbayã sacua, i que Dios seje cote ra. ²⁷Dios mii nguiarei siqui bei. Dios mii ño mae ja nguia mbae ja rese. Sã Jesucristo riqui mbia mbucheē turā mbeite Dios rīř. Amén.

1 CORINTIOS

Pablo embesa Jesús quiato Corinto jenda je

1 Pablo, i que seje ra. Dios que seirabo Jesucristo renei nenei sacua nda. Aico ã mbesa jêje a. Nanderesenda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîř ũquĩ. Dios riqui jemingo icúe umbaerã ũquĩ. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ũquĩ abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîř nda. Nyebe aico nguiã gracias i tuchi Dios je jenî co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacua mbia je. Jembaaracua tuchi que ucheẽ nî nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ũquĩ cote. ⁷ Nyebe Dios turã ndiqui nguiã hui ãte jêsi co. Jembirãcuã mbeite equia querabe co. ũquĩ jêingo Jesucristo raarõ arõ ũquĩ. ⁸ Dios ra jembirãcuã mbei mingó mbae ua ja chee. Mbia mo nda ñee icuã eã jêje Jesucristo tu mose. ⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiato ngue ñee nguiã jêje. —Taemingo bei seriirî ndese Jesucristo rese, i.

Jesús quiato nyao nyao chõchĩ nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ũquĩ. Hue rîř ja chõ jêingo ndua ndua. Mbae mî ndese chõ jêingo. ¹¹ Mbia quiato ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jenî nda. ¹² —Pablo mbae chõ se re, i chõchĩ jemo nguiã seriř ũquĩ. —Apolos mbae chõ se re, i chõchĩ jemo nguiã ũquĩ no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rîř bautizar i jêje re no? ¹⁴ Se que bautizar ae eã jêje resẽ. Crispo mî je que bautizar ae ra. Gajo je abe. ¹⁵ —Pablo rîř ño ngue bautizar i nguiã se-

je, i aroneate jemo ñee seriř. ¹⁶ Estéfanos chuchua jenda abe que bautizar ae ra. Aquere que bautizar ae ãte jemo je ra. ¹⁷ Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, ř nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rîř

¹⁸ Ae ra nyoi tata cuásuu, ũquĩ ndei “ichõiñosa” isa Dios cheẽ nenei neneisa rîř. —Cristo que mano mbia riquicharõ nda, i mose ee, “ichõiño ñene” i chõ nguiã. Nande quiato que Dios nanderirõ nandeicuã si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiato tuchi” i quia, ũquĩ aquiato ra ambuquiachã esi.

Ae “searacua tuchi” i quia, ũquĩ aracua abe ra ambuquiachã esi no,

i que Dios cheẽ mbesa ji ra. ²⁰ Ae uaquiato saã saã nguia, ibi jenda ja chõ ũquĩ nde. Ae ucheẽ aquiato saã saã nguia, ibi jenda ja chõ ũquĩ no nde. Eaquiataẽte ũquĩ, i chõ Dios nguiã ũquĩ je. ²¹ Mbia ae ra Dios icuayã mbei uaquiato ae je. Dios cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ũquĩ nda Dios sirõ eicuã si. Ichõiño nguiã, i raque mbia ataque Dios cheẽ nî.

²² —Mbia mae sayã ndese nda uremae na ña, i bei que judíos quia ra. —Urechimbaaquiato tuchi rã, i bei que judíos eã nguia ñee nyue no nda. ²³ Nande quiato Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. ũquĩ si judíos ireĩte riqui ã. Cristo renei nenei mose, judíos eã ndua eã tuchi chõ nguiã erese ã. ²⁴ Nande quiato nandebite riqui nguiã Cristo renei nenei mose ã. Dios judíos mo irabo chõ nguiã. Judíos eã mo abe irabo chõ nguiã no. ũquĩ je chõ ngue Cristo Dios quirãcuã mee nguiã. ũquĩ je chõ Cristo Dios aquiato mee nguiã. ²⁵ Dios aquiataẽte, i raque mbia mo ñee Jesús mano je rîř. Dios quia equiatio tuchi jiri riqui nguiã mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguiã mbia si co.

²⁶ Dios que jëirabo ja ra. Jëaquiatu tuchi eã ndaque ee. Ererecua eã ndaque jë. Mbaecha eã ndaque jë. Dios ae chõ ngue jëirabo nguiã. Ûquĩ ndese jendua jiri. ²⁷ Ae je mbia riqui “eaquiatuãte” i nae, ùquĩ ño ngue Dios irabo nguiã. Ae ucuasu saã saã nguia nae, ùquĩ ireĩ ireĩ sacua esi. ²⁸ Ae mbia ataque ucuayãte quia nae, ùquĩ ño ngue Dios irabo nguiã. Ae ucuasu saã saã nguia nae, ùquĩ mbutiã sacua. ²⁹ Nyebe nandeico nguiã nandaquiatu raã naa aroneate Dios je ã. Nande mñ mo jiri jiriã. ³⁰ Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no:

Ae Dios saã nande je nae, ùquĩ mñ nandechë turã.
A e nandesaã nande ae nae, ùquĩ mñ nandechë turã eã,
i que embesa ji ra.

Jesucristo mñ Pablo senei senei mbia je

2 Seresenda, seso mose jendea que Dios cheë asenei senei turã jëje huee resë. Seaquiatu asaã saã eã ño nguiã jëje Dios cheë nenei nenei. ² —Jesucristo mñ ño tasenei senei jëje. Jesucristo mano nguia mbia icua ndiquicharõ nae, ùquĩ mñ ño tasenei senei jëje, ae chõ ngue oso nguiã ñee jëje. ³ Seireite que seso mose ñee jëje nyii ra. Semburirite que aque mose ra. ⁴ Seaquiatu que asaã saã eãte quia ra. Dios cheë ngue ambuchecua tuchi quia ñee ñee jëje ra. Espiritu Turã nguiatu que secheë mbirãcuã tuchi quia ñee ñee jëje ra. Nyebe mbia ñee nguiã. —Dios cheë ño eriqui re, i nguiã secheë mose. ⁵ Dios quirãcuã ae jemingo nguiã Jesucristo rese ùquĩ. Mbiamo aquiatu eã ño jemingo nguiã Jesucristo rese ùquĩ.

Espiritu Turã ndiqui mbae icua jate nande je co

⁶ Ae seaquiatute, ùquĩ ja chõ asenei senei mbei nguiã Jesús quiato je co. Ae seaquiatute nae, ibi jenda rã eã ño seaquiatu riqui nguiã co. Ae seaquiatu nae, ibi jenda rerecua rã eã ño seaquiatu riqui nguiã co. Ûquĩ aquiatu quia ra tiã jei. ⁷ Ae ureico ñee ñee nae, ùquĩ nguia mbia mbaaquiatu jiri nguiã. Dios cheëte quia ñene. —Secheë nda ambuchecua je nguiã mbia je. Mbiamingo bei sacua, i que Dios nyii mbae aononde ra. Dios que esenei eã nyii ra. Namononde ño embuchecua nguiã nande je cote. ⁸ Mbiamo rerecua que Dios aquiatu icua eãte ra. Ìnda eriri mbucha eãte rei ira rese. ⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.
Ae ra Dios saã nande je, ùquĩ ndese emo iranuate namo.

Emo mae ãte erese namo,

i que embesa ji ra. ¹⁰ Nande quia nandeico nguiã irlandu erese ã. Espiritu Turã quiatu nandembiirandu nguiã. Espiritu Turã nguia mbae icua jate nguiã co. Dios chiao abe icua jate equia co. ¹¹ Ae rese emonduqui ndua, mbiamo ùquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espiritu Turã mñ ño eicua nguiã. Dios sí chõ Espiritu Turã nde. ¹² Dios que espiritu mbuae mo monoã nande je ra. Espiritu Turã ño ngue emondo nguiã nande je. Ae Dios saã turã nguia nande je nae, ùquĩ ndese nandembiirandu sacua ño ngue Espiritu Turã mondo nguiã nande je. ¹³ Ae Dios saã turã nguia ure je nae, ùquĩ uresenei senei nguia ã. Ìndese chõ ngue Espiritu Turã urembaaquiatu nguiã. Mbiamo cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùquĩ sí Espiritu Turã ñee icuayãte quia ã. Echeë mbaranguiatuãte riqui ee ã. Nyebe eriqui nguiã echeë isiãte. ¹⁵ Ae Jesucristo icuate nae, ùquĩ nguia mbae icua jate nguiã ã. Ae eturãte nae, ae eicuãte nae, ùquĩ icua ja equia ã. ¿Mañi Jesús quiato quia re? i chõ mbiamo nguiã Jesús quiato cheë icuayã ã. ¹⁶ Tarembaaquiatu, i aroneate mbiamo Dios je. Dios quiato eã mo ndua eãte quia Dios rã sí ã. Nande quia nandendua ndua nguiã Cristo ndua rã sí ã. Dios resendate quia nandeico nguiã ã.

Mbae mñ na ño ureico nguiã Dios cheë nenei nenei

3 Jesús resenda jëingo raque ùquĩ. Jëingo tuchiãte quiatu nguiã erese ùquĩ. Ae jembite riqui nae, ùquĩ mñ ndese chõ jëingochĩ nguiã ùquĩ. Ae Cristo bite nae, ùquĩ ndese jëingoã ñochĩ nguiã ùquĩ. Nyebe jaembaaquiatu tuchi aroneate equia co. ² Mbiamo riirĩ na ño jëingochĩ nguiã secheë andu mbirĩ mbirĩ cose. Querabe chõ jëingo nguiã secheë andu sereã ùquĩ. Nyebe jaembaaquiatu quiatu tuchiã nguiã Jesús cheë ndese. Ae jembite riqui nae, ùquĩ ndese jëingo mose ra Dios cheë jëicuayã mbei. ³ Jëicuã icuãte quia jëingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiatu nguiã jenyue ùquĩ. Nyebe acheë nguiã jëje. —Ae Cristo bite nae, ùquĩ ndese jëingoã ñochĩ nguiã ùquĩ, ae chõ ndei nguiã jëje co. ⁴ —Se rei Pablo mbae, i chõchĩ jemo nguiã ñee ùquĩ. —Se rei Apolos mbae, i chõchĩ jemo no. Nyebe jëingo eã nguiã Cristo bi rese ùquĩ.

⁵ ¿Aba chõ se chã? ¿Aba chõ Apolos no ña? Mbiamo rerecua eã ño ureico nguiã ã. Dios cheë nenei nenei mose jëje que Jesús jëicua resë. ⁶ Mbae tiquia ji rã ño jë nde. Sã emo mbae eĩ tiquia no. Sã emo i icherë cherë erese no. Dios ae chõ embusuri nguiã. Anyae chõ ngue Dios cheë mingue nguiã jendese. Apolos chõ ngue jembaaquiatu quiatu nguiã cote. Dios quiarei ucheë

mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguia erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiato quiatu sacua. Tuchua ao aquiato rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchia ao hue no. Ae tuchia chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae miĩ tuchi chõ tuchia i raanguia re. ¹² Ae arõ tuchia mo nandesã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ùquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja.

¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandesĩ. Nande quia ra nandequiachãya ndaque. Nandecuasẽ ndaque ra ibate Dios je. Nandechi quiatu ra nandeico cote.

¹⁶ ¿Jêtesarei chõ ere? Dios chuchua chõ nanderete riqui co resẽ. Dios riqui beite nandeye co. Espíritu Turã ndiqui beite nandeye co. ¹⁷ Emo Dios chuchua mbiicua mose, aque ra Dios mbutiã. Nande quia Dios chuchua re. Dios que uchuchua miĩ icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸ —Nandeaquatute, jenyechĩ nguiã jeñiangui re ùquĩ. Ae eaquatute ibi jenda achõ ndese, sã ùquĩ uaquiato raã naa eã. Siqui mingue mose ra Dios embaaquiato turã cote. ¹⁹ Ae eaquatute ibi jenda achõ ndese, “eaquiatoã”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiato mbutiã ño cote.
 “Seaquiato tuchite aico co”, i quiatuchĩ ngue nyii re, i que embesa ji ra. ²⁰ Sã embesa ji riqui ñee no:
 Ae rese eaquiato riqui ndua nae, ùquĩ Dios icua tuchite quia co.

Ndua ndua iru chõ nguiã,
 i que embesa ji ra. ²¹ ¡Mbia aquiato mo ndese ra jeñim-bucha chooñochĩ jẽ! Dios quiato que mbae mondo ja jẽje ra. ²² Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingo mose, jẽje chõ emingo. Dios mbia mingo eã mose, jẽje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene.

²³ Cristo mbae chõ jẽ nde. Dios mbae chõ Cristo no nde.

Ureaquiato tuchi Jesús chimbaaquiato si, jenyechĩ nda jẽ

4 —Cristo rimba ja chõ ùquĩ nde, jenye chõ serĩ. Apolos rĩĩ abe no. —Ae ambuchecua eã mbia je nyii, ùquĩ jembuchecua checua mbia je serĩ cote, i que Dios ure je ra. ² Dios rimba mose nande, Dios cheẽ nandemumbayã mbei chõ nguia. ³ —Serimba turã ño nde re, i ra Dios seje reae. Nducuã. Aicuayãte se. —¿I se jẽje re? ae ãte se quia jẽje co. Ae ãte se quia emo je co no. Dios miĩ ño seicua nguiã. ⁴ Dios rimba turãte aico reae. Dios ae chõ seicua nguiã. ⁵ —Dios rimba turã ño aque re, jjenye jeichĩ nda emo niĩ jẽ! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiato sacua ño aico nguiã ñee jẽje co. Sechue si chõ aico nguiã ñee. Apolos rĩĩ abe chõ aico nguiã ñee. Dios rimba achõ ño ure re. Ure miĩ mo ndui jẽingo bei aroneate. Dios rimba ja rui chõ jẽingo. Eĩ jjenye mose ra embesa ji jemumbayã. ⁷ ¿Mbaerã nda jẽcuasu jẽsaã saã nde? Ae jendeco jembaerã nae, Dios chimondo ja chõ ùquĩ nde. Jẽaquiato mose, Dios ae jembaaquiato nguiã. —Se ae que sembae asaã saã nda, jjenyechĩ nda jẽcuasu raã naa jẽ!

⁸ —Ureaquiato tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jẽsaã saãchĩ ureririrõ cote. Ererecua jẽsaã ñooño na jẽ no. Se abe ra ererecua asaã saã ndei jẽ na ndeae. ⁹ Dios ucheẽ nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguiato urerese co. Angeles abe ñee nyee mae nguiato urerese. ¹⁰ Ureico tuchi mose Cristo rese, “eaquiatoã”, jjenye chõchĩ equia ure je ùquĩ. “Ureaquiato ure”, jjenye chõchĩ equia jẽ jẽingo mose Cristo rese ùquĩ. Urequirãcuã neãte ure, jẽ jẽquirãcuã mose. Mbia ureosei chiãte ure; jẽ nguia mbia jẽoseite nguiã. ¹¹ Mbae eã mbeite urembae namo abe. Ureirãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no. ¹² Mbae ure-saã saã tuchite quia ureo je co. Mbia icuã icuã mbeite riqui ure je co. Urecheẽ turã turã mbeite equia ure ee ã, ùquĩ ñee icuã icuã mose ure je. Urechecua chõte equia ñimbirãcuã ee ã. ¹³ Urecheẽ mingue beite equia ùquĩ ñee icuã mose ure je ã. Mbae quia rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jëireĩ ireĩ sacua eã ño aico nguiã ã mbesa jëje ã. Jemundua ndua sacua ño ñene. Seriiĩte quia jë nde. ¹⁵ Jembaaquiatu quiatusa tubiriãte raque Cristo riĩ. Se miĩ tuchi chõ jendu re. Se rane nguiatu ngue echeẽ turã asenei senei nguiã jëje nyii. Se quiatu ngue Cristo aicua uquia nguiã jëje. Nyebe aico nguiã “seriiĩ” i beite jëje co. ¹⁶ Nyebe jëingo se rã si. ¹⁷ Timoteo amondo quia jëje aque. Ae rei sechimbaaquiatu tuchi. Nyebe “seriiĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quiato mbaaquiatu quiatu sucha mbuchesea sea mose ra, i ra Timoteo jëje seriĩ. ¹⁸ Jemo ndiqui uaquiatu raã naa tuchi chĩ ùquĩ. —Pablo ra tu eã mbei urerea, i chõchĩ jemo nguia seriĩ ùquĩ. ¹⁹ Aso jei ra jendea, Dios eno i mose seje. Ae uaquiatu saã saã tuchi quia jemo nae, ùquĩ tatea cote. Mañi nda equia mbae raã ndeae. Echeẽ achõ achandu sereã. ²⁰ Dios rimba cheẽ achõ aroneate. Siqui eã mose Dios quirãcuã ndese. ²¹ Manyae ra jëje seso mose jendea reae. Acheẽ asi asi ra jëje reae. Aico mingue chõ nda jëje renoae. Jëhui mose jëicuã si, acheẽ asi asi eã nda seso mose jendea.

Ae siqui ngu ninisi rese, aque jemombo

5 Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jëataque jëtea chooño mbae icuã naa mose re? Ae Jesús quiato ãte nae, ùquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re? ² Jëturã jësaã saã mbei chõchĩ nguiã jë ùquĩ. Jëya eã eã ño jëingochĩ ùquĩ ndese ùquĩ. Jëireĩ ngũiã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si. ³ Ishote aico raque jësi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chõ jësi. Jesús quiato si. Jemee ño Satanás je. Ì nda Satanás erete mbasi. Ì nda eã siqui bei Jesucristo tu mose cote. ⁶ ¿Mbaerã jeingo jëturã naa naa mbae icuã ndea chooño nde? Levadura rã ño mbae icuã nde. “Levadura ñetẽ nda oso raque mbichae raã namo mose. Mbuchi-matã ja rae”. ¿Ùquĩ jeñanuãte quia re? ⁷ Ae eicuãte nae, aque jemombo jësi. Ì nda jë abe mbae icuã jësaã eã. Dios que Jesucristo iquia nandecuã ndibishorõ nda.da. Sã mbia riqui oveja iquia iquia huicua ndibishorõ no. ⁸ Nyebe nandeco turã na Dios rese, mbae icuã naa naa ndocoĩ. Cochee nandeco. Nandecuã nandesecha ja.

⁹ —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jëje nyii. ¹⁰ Ae Jesús quia-to ãte, ùquĩ niĩ eã ño ngue acheẽ nguiã jëje. Nandechẽ eã aroneate Jesús quiatoã je nandeco mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùquĩ je nandechẽ eã aroneate. ¹¹ Jesús quiato mo ùquĩ icuã naa mose, jemombo chõ jësi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jëhui chõ esi. Jëquiaru jiri jiriã tuchi ùquĩ ndese. ¹² Jesús quiatoã nandeteaquiatu aroneate. Ae Jesús quiato, ùquĩ nguiatu nandeteaquiatu. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jësi.

Jemo icuã icuã mose nyue, jë ae chõ jëingo

6 Jemo icuã icuã mose nyue, jësochĩ nguiã ñee Jesús quiatoã nderecua je. Jë ae chõ jemae erese ae. Jëicua ae. Sã Dios quiato achõ ño ñee ùquĩ je. —Eĩ jenyee jë! i ùquĩ je. ² Dios quiato quia ra “¡eĩ jenyee jë!” i ja Dios quiatoã je emo mose. Jë nguia ra “¡eĩ jenyee jë!” jenyee mbia ataque je emo mose. ¿Mbaerã jëingo “¡eĩ jenyee jë!” ise reã mbae ñetẽ naa mose re? ³ Angeles je abe chee ra “¡eĩ jenyee jë!” nande. ¿Ùquĩ ndese jëiranuãte re? Á ibi jenda je “¡eĩ jenyee jë!” nande turã ja rã ae. ⁴ Jesús quiato chõ jë nde. Ibi jenda mo niĩ jemo icuã icuã mose nyue, jë ae chõ jemae ùquĩ ndese. Jësochĩ nguiã ñee Jesús quiatoã nderecua je. Dios quiato eãte quia ùquĩ nde. ⁵ Jesús quiato mo ñee icuã icuã mose nyue, ¿jemo jëaquiatuãte ñee ee re? “¡Eĩ jenyee jë!” i ee re. Jë jëireĩ ireĩ sacua ño aico nguiã ñee jëje ùquĩ. ⁶ —¿Mañi ure ra re? i aroneate Jesús quiato ñee Jesús quiatoã nderecua je. ⁷ Jemo Jesús quiato mo icuã icuã mose nyue, echiã turã tuchi ãte quia ñene. Jeñimbirãcuã ño mbae icuã naa mose jëje. Jeñimbirãcuã ño jembae mbuquiachã mose no. ⁸ Jë abe mbae icuã jësaã saã ñochĩ, ñim-birãcuã ndocoĩ. Jë abe jendesenda mbae jem-buquiachã ñochĩ Jesús quiato mbae, ñimbirãcuã ndocoĩ. ⁹ Mbiam rerecuarã tuchi ra Dios cote. Aque mose ra mbiam icuã siquiã tuchi Dios rese. Ae siqui emo ninisi rese nae. Ae siqui ngũinisã ndese nae. Ae ndua chooño nguia Dios abareã ndese nae. Ae siqui quia nyiese ngũinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbiam je nae. ùquĩ nda siquiã tuchi Dios rese. —Eicuã abe ra siqui bei Dios rese, ¡jenyechĩ

nda ñimbirĩ irĩ jẽ! ¹¹ Eĩ ngue jemo icuã cose ra. Dios ae jembitorõ nguiã cote. Dios chõ jemĩ nguiã icúe umbaerã cote. Espiritu Turã ngue jẽisi turã Jesucristo rĩĩ cote ra.

Espiritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo ñĩ. Dios biãte nande mbae raã ja chooño mose. Mbae mo sembiicuã serĩ mose, asaã eã mbei ra se. ¹³ Nandechiurã ndei nanderie ye sacuã. Nanderie rei nandechiu rirurã. Ūquĩ ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios re. ¹⁴ Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no. ¹⁵ ¿Jẽiranuãte quia jendete rese re? Cristo nanderete mbucha quia uchiẽse co. Cristo rete chõ nandeico nguiã co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Ūquĩ ndete ja ra co mĩ cote, i que Dios cose ra. ¹⁷ Emo siqui mose Cristo rese, nguete mbucha chõ nguiã erese ūquĩ cote. Erete mĩ na ño ūquĩ cote re. ¹⁸ Jeninisiã ndese ra jẽingochĩ jẽ! Mbae icuã mo naa mose, ūquĩ nda nanderete mbiicuã yã jiri. Siqui mose ngũinisiã ndese, ūquĩ nguia ra nanderete mbiicuã tuchi cote. ¹⁹ Espiritu Turã siqui chee jẽiangui re ūquĩ. Espiritu Turã nyuchua chõ jendete re. Dios mbae chõ jẽ nde. Jembae ae eã ño jendete re. ²⁰ Eicuã nimba rei ngue jẽ nyii re. Dios quiatu ngue jẽisi nguiã cote. Nguiĩ ngue emondo jendibishorõ nda. Nyebe jẽingo jendete mee Dios je. Jẽaĩ abe jemee ee noae.

Pablo mbia mbaaquiato emo ngũinisi rerequia rĩĩ

7 Jẽnee ngue jembesa mondo seje nyii nae, ūquĩ tasibishorõ jẽje cote. Coche emo siquiã nguiã cuña mo ndese. ² Coche mbia ngũinisi ae rerequia nguiã. Coche cuña ngu mĩ nderequia nguiã no. Emo ndese siqui chooño eã sacuã ño ūquĩ nde. ³ Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ūquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embiicuã arõte cote. ⁶ —Jeninisirã jendeco, ae ãte quia jẽje co. —Jeninisibi mose, jendeco ae, ae chõ nguiã jẽje co. ⁷ —Sã Jesús quiato ja ninisiã ndiqui se rã si, ae rei que se ra. Dios

cheẽ eã ño ūquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngũinisi quereco sete nguiã no.

⁸ Ae eninisiãte nae, ūquĩ je tacheẽ. Eru checha je abe tacheẽ no. Coche jẽingo nguiã jendu eã. Coche jeninisiã ndiqui nguiã no. Se rã si. ⁹ Jẽimbirãcuã yã mose jendete je, jeninisirã mo jẽtea ae. Jendurã mo jendeco noae. Mbia mo oseĩ oseĩ rocoĩ.

¹⁰ Ae ngu quereco nae, sã ūquĩ ngu rechayã mbei. Jesús cheẽ tuchi chõ ūquĩ nde. Secheẽ ae eã ño ūquĩ nde. ¹¹ Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbucha si eã mose ngu rese. Sã eru abe ngũinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no. ¹⁴ Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriĩ abe Jesús icuayãte rei, ūquĩ ande.

¹⁵ Jesús quiato mo ninisi siquiã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu riquisã quisã eã no. Ūquĩ naa mose, Jesús quiato mbae icuã saã eãte. —Sã seriĩ ndiqui turã nyue, i quiatu que Dios nande je ra. ¹⁶ Ae Jesús quiato nae, ūquĩ ngũinisi mingo arõte Jesús rese. Ae Jesús quiato cuña nae, ūquĩ ngu mingo arõte Jesús rese no.

¹⁷ —Eĩ jenyẽ chõ nguia jẽ ae ae, i que Dios nandechiaorã mee mee nande je ra. Ūquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ūquĩ ño asenei senei nguiã Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ūquĩ nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jẽje ra. Nyebe Jesucristo rimba ae chõ jẽingo nguiã ūquĩ cote. Mbia rimba ae eã ño jẽingo nguiã ūquĩ cote. ²⁴ Dios que ñee

nande je nyii, aque mosenda raanguia bei chõ nandeco Dios rese.

²⁵ Nyucuaaque riĩ tacheẽ ndaque jėje cote. Dios que ñee äte seje ũquĩ ñi nda. Se ae chõ tacheẽ jėje. Airandu que Dios ia eã mose serese ra. Nyebe aico nguiã ñee ñooño eã tuchi jėje co. ²⁶ Sã mbia ngüinirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese erechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ũquĩ no nde. Nyucuaaque ngurã mo ndea mose, eicuã eã ño ũquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jėje. —Jẽ ae jëingo jeninisiã, i jėje. ²⁹ Tacheẽ tuchi rã jėje, Seresenda. Mbae ra ua jei ja nande je cote. Ae ngüinisi quereco quia, sã ũquĩ ndiqui ngüinisi rerequia eã naanguia. ³⁰ Ae eya eãte riqui, sã ũquĩ ia tuchi raanguia riqui no. Ae eyate riqui, sã ũquĩ ia eãte raanguia riqui no. Ae mbae isi quia, sã ũquĩ ndiqui mbae isiã naanguia no. ³¹ ã nandeco rei nguiã ibii ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

³² —Jeninisiã ño jëingo, ae que se ra. Jendua ndua eã jiri nda ibi jenda rese chã. Ae eninisiã, ũquĩ ndua ndua bei arõte Dios mii ndese. Ae Dios bite, ũquĩ esaã saã mbei arõte. ³³ Ae eninisi nae, ũquĩ ndua ndua bei arondete ibi jenda achõ ndese. Ae eninisi bite nae, ũquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ũquĩ nda esaã saã mbei ee. Siqui tuchi ra Dios rese. Ae ngu quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese.

³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jėje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicuã eã ño nguiirĩ ndurã mee ee re. ³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸ Ae nguiirĩ ndurã mo mee ee, eturã ño ũquĩ nde. Ae nguiirĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espiritu Turã abe sembuheẽ nguia reae.

Ae soo mbia mondo rei dios abareã je nae

8 —Mbia soo mondo mondo quia dios abareã je nae, ¿ũquĩ soo ra nandeu re? jenye que seje. ũquĩ tasenei jėje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesecua mose mbia rese, Dios abe rese ra nyesecua bei. ² Seaquiatute se, i mose emo, eaquiatuã ño ũquĩ nde. ³ Emo nyesecua mose Dios rese, Dios ũquĩ icua chõ nguiã ũquĩ.

⁴ Mbia soo mondo mondo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mii tuchi chõ Dios re. ⁵ Dios abareã nguia etubiriãte re. Ibi jenda. Ibei rinda abe no. Dios raanguia tubiriãte raque no. ⁶ Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandea umbaerã nda. Nandererecua mii tuchi chõ siqui nguiã co no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguiã ã.

⁷ Dios quiato mo iranuate quia ũquĩ ndese ã. Siquiche beite quiatu nguiã dios abareã si ũquĩ. Ae soo mbia mondo dios abareã je, ũquĩ mbaeiaie riqui reĩ nguiã ee. —¡ũquĩ soo jẽu eã jẽ! i reĩ Dios nguiã ee. ⁸ Ae nandeu quia nae, ũquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandei teã teã mose, ũquĩ nda nandembuã eã no. ⁹ —¡ũquĩ soo ra jëuchĩ jẽ! iãte raque Dios nande je. Mbaeiaie eãte raque ũquĩ soo. Mbaeiaie nda eriqui reĩ Jesús quiato namonda ja raẽ. Jẽ eu mose, ũquĩ abe ra eu chee. —Mbaeiaie au chõchĩ, i ra ñimbuã tuchi cote. ¹⁰ Jëquiaru mose dios abareã chuchua, Jesús quiato namonda ra mae jendese. ũquĩ abe ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguiã ee. ¹¹ Jẽ ndaque jëirandu ũquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenye chõchĩ ũquĩ mbuã arõte Dios si. ũquĩ ñi abe chõ ngue Jesucristo mano nguiã. ¹² Soo mbaeiaie riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ũquĩ Cristo je. ¹³ Jesús quiato mo ambuã sereã tuchi chõ nguiã se. Se soo u mose, ũquĩ Jesús quiato mo mbuã mose, soo ra auã mbei cote.

Mbae mo jembu seje Dios cheẽ nenei nenei ndibishorõ, i äte Pablo

9 Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jëingo nguiã Jesucristo icua ũquĩ cote. ² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee

aroneate nguiã ùquĩ seje. Ûquĩ jëingo seicua tuchite ùquĩ. Secheẽ nguire quiatu que Jesús jëicua cote resẽ.

³ Eẽ ae chõ nguiã ñee mbia ñee icuã mose seje. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús rĩ. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no. ⁶ ¿Se miñ ño nda Jesús quiato sembuquiaru aroneate reĩ jëje re? Bernabé abe rese. Ure Jesús cheẽ nenei nenei mose. ⁷ Sã soldado siqui chooño eã comandante mbae mee eã mose ee. Sã emo ndiqui mbae tiquia chooñoa no. —Sechitiquia nda au chã, i chõ nguiã. Sã emo ndiqui ticuasu raarõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ùquĩ nde. Embesa ji chõ asenei nguiã jëje. ⁹ Co rei Moisés chimbesa co: Jë ticuasu mbuquieĩ quieĩ mose, echuru jemumbi eã. Sã ae ae si quia mbae cua, i que embesa ji ra. Ticuasu achõ je eã ngue Dios ñee nguiã. ¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiiquĩ tau”, i chõ nguiã eiqui iquĩ. ¹¹ Dios cheẽ ngue uremingue mingue tuchi quia jendese resẽ. ¿Jë urembuquiaru quiaru aroneate quia cote re? ¿Ureirarã jemee aroneate quia ure je cote re? ¹² Mbae mo jemee mee nguia Jesús cheẽ nenei neneisa mo je ùquĩ. ¿Mbaerã jëingo emee eã ure abe je quiatu re? —iMbae mo nandeisi teã eo si jë! ure que equia oso mose jendea ra. Dios si jembiiicha eã sacua ño ngue mbae mo ureisi teã nguiã jësi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ùquĩ ndiqui ofrenda u u bei ae, i que Dios ñee cose ra. ¹⁴ Eẽ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiatio ataque riqui mbae mee mee mbei ùquĩ je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jësi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jëje co. Tamano ae, “mbae embu seje”, i rocoĩ jëje. ¹⁶ Dios cheẽ nenei neneisa tuchi chõ se re. Ûquĩ nii seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ùquĩ ño sebi re. —Mbae mo

embu seje Dios cheẽ nenei nenei ndibishorõ, ae ãte quia co. Ûquĩ nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judíos asaã saã ño nguiã. Judíos Jesucristo icua sacua. Ae siqui tuchi quia Moisés chimbesa rui nae, ùquĩ ite re seico mose, Moisés chimbesa asaã saã ño nguiã se abe. Ûquĩ Jesucristo icua sacua. —Moisés chimbesa rui eico, i ãte raque Dios seje. ²¹ Ae siquiã nguia Moisés chimbesa cheẽ ndui nae, ùquĩ ite re seico mose, se abe Moisés chimbesa asaã saã eã ño nguiã cote. Ûquĩ Jesucristo icua sacua. Cristo miñ ñee ño amumba mumbayã nguiã co. ²² Jesús quiato quirãcuã nea ite re seico mose, ùquĩ asaã saã ño nguiã se abe, sequirãcuã nea naa naa. Ûquĩ Jesucristo icua sacua. Ae ite re aico oso oso beite nae, ùquĩ na ño aico nguiã se abe. Ûquĩ Jesucristo icua sacua. ²³ Ûquĩ ja chõ asaã saã nguiã Dios cheẽ turã nii co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co miñ ño nda premio isi. Aque rã tuchi chõ jëingo Jesús rese. Premio isi sacua naanguia. ²⁵ Ae ra carrera saã saã nae, ùquĩ mbae icuã secha ja chõ nguiã ùquĩ. Premio isi sacua ño eriqui nguiã mbae icuã naa eã. Premio nda ua jei raque. Ae Jesús mee arõte quia nande je premio nae, ùquĩ nguia ra ua eã mbei nandesĩ. ²⁶ Se aico chooñoa nguia Jesús rese co. Jesús rese aico turã tuchi chõ nguiã se co. ²⁷ Mbae asaã saã ño nguiã serete mbirãcuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

Dios raanguia rese ra jëingochĩ jë

10 ¡Jëtesareichĩ nda nandei ñiinda si jë! ¡Moisés mosenda si jë! ¡Ùquĩ ngue siqui ja rei ibeishĩ ndui ra jë! ¡Ùquĩ ngue nyoi ja rei Ama Ireĩ ndasa Dios ñee mose ee ra jë! ² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra. ³ Ae Dios mee ndei ee echirã nae, ùquĩ ngue mbia ja u u rei ra. ⁴ Ae Dios mee ndei ee embei sacua nae, ùquĩ ngue mbia ja mbei mbei rei ra. I que tuutu quia sita si nae, ùquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ùquĩ mbia rese ra. ⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacua ño ùquĩ nde. Mbae icuã oseĩ oseĩ eã sacua nande chõ ùquĩ nde. Sã ùquĩ mbae icuã oseĩ oseĩ no. ⁷ Jëingochĩ nda dios abareã ndese. Sã

ũquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jẽ nguia jẽingo eã dios abareã ndese. ⁸ Ũquĩ nandei que siqui siqui ngũinisiã ndese no nda. Nyebe Dios ei quia i quia tuchi nguia. Veintitrés mil que mano aque nyaashĩ mose ra. i Mbae icuã nda nandesaã saãchĩ ũquĩ na jẽ! ⁹ —Ma Cristo roseĩte, nandechĩ nda mbae icuã naa jẽ. Sã nandei riqui “ma Dios roseĩte” i nyii no. Sã ñi ngue eriqui mbae icuã naa mbei cose no. Sã mbei tásie riqui ei quia i quia no. i Ũquĩ nandesaã saã eã tuchi chõ nguia nande jẽ! ¹⁰ i Jeñee icuã icuãchĩ nda Dios riĩ jẽ! Sã ũquĩ nandei ñee icuã icuã nguia Dios riĩ no. Nyebe ángel nandei ñi-inda i quia i quia tuchi nguia. ¹¹ Eĩ si tuchi que nandei ñi-inda quia nyii ra. Dios que embesa mĩ nandetesarei eã sacua nda. Mbae ua ja serĩ mose chõ Dios riqui nguia nandembesarei eã co. ¹² —Sequirãcuã tuchi chõ se re, i mose emo, i sa aque riqui nyĩcuã tuchi quiatu jẽ! Mbae icuã jeĩ nonde ee. ¹³ —i Mbae icuã esaã jẽ! i mose diablo jẽje, eĩ si chõ nguia ñee mbia ataque je. Jẽ mĩ je eã. Dios quia ra ucheẽ mbuchebiã mbei. Jendeaquiatu bei ra diablo ñee mose jẽje. Jembirãcuã ndae. Jẽ “nya” i sacua mbae icuã je.

¹⁴ Seresenda, i dios raanguia rese ra jẽingochĩ jẽ!
¹⁵ Jëaracuate rei jẽ ndesẽ. Secheẽ ndese jemaie quiatu. ¿Acheẽ ñooño se re? Acheẽ ñooño eã se reae. Jëtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeco nguia uva rique mbei mbei. —Cristo ruqui nandemitirõ ja bei quia ã, i chõ nguia uva rique mbei mbei. Mbichae nandesiquio quio quia eu nonde nae, Cristo roo rã ño ũquĩ nde. —Cristo roo nandemitirõ ja bei quia ã, i chõ nguia mbichae u u. ¹⁷ Nandetubiriãte raque Jesús quiato. Nande ja chõ aque mbichae mĩ nandeu ja nguia. Mbae mĩ na nguiatu nandeco nguia nande ja ã. ¹⁸ Judíos rese chõ jendua. Ũquĩ sacrificio raã naa mose, sacrificio eu chõ nguia ã. —Dios resete quia nandeco nguia ã, i equia ã. ¹⁹ —Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ũquĩ. ²⁰ Mbia soo mondo mondo mose dios abareã je, Dios tuchi je eã ño eriqui nguia emee mee. Aba checuayã icuã je chõ eriqui nguia emee mee. i Aba checuayã icuã ndese ra jẽingo jiri jirichĩ jẽ! ²¹ Jẽ mbae mbei mose aba checuayã ndese, Jesús ruqui mbei raanguia jësaã aronea ño nguia cote. Jëquiaru quiaru mose aba checuayã nyuchua, Santa Cena jesaã aronea ño nguia cote. ²² ¿Mbaerã jẽingo Jesucristo mbupaama ite re? ¿Jëquirãcuã tuchi chõ eriqui esi jẽ nde?

Jesús quiato ataque rese quia jẽingo ndua

²³ —Ae soo mbae mee mee nguia dios abareã je nae, ũquĩ ndese ra jëocochĩ, i ãte raque Dios nande je. Dios biãte nande mbae raã ja chooño mose. Ũquĩ ñi Dios ñee ãte raque nande je. Nande ae chõ nandecua. Mbae mo Jesús quiato mo mundua icuã mose, ũquĩ si nandehui chõ. ²⁴ —Nande ae nandeco Dios rese, jenyechĩ nda jẽ. —Mbia ja quiatu nandemingo erese, jenyé quiatu. ²⁵ Soo jëisichõ ño nguia mbae vender ísaa. —¿Dios abareã je co soo jemondo nyii re? jenyé chĩ nda ñee ee jẽ! Jëiranua mose, mbaeiaie eã ño soo jẽje cote re. Jëisichõ ño nguia jëiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ũquĩ ndei nandechiurã ja. ²⁷ —Nyao rã quiaru serese, i mose emo jẽje, jëso chõ quiaru erese jësose mose. Ae ra echara mondo jẽje, jëuchõ ño. —¿Co mbia mondo dios abareã je nyii re? jenyechĩ nda ee. Jëiranua mose, mbaeiaie eã ño jẽje cote re. Jëiranua ño jëquiaru. ²⁸ —Co soo que mbia mondo dios abareã je ra, i mose emo jẽje, jëu eã ño cote. Ae ñee jẽje nae, aque mbĩcuã eã sacua ño jëu eã. Aque soo jëu eã cote, jëirandu mose erese. Jẽ eu mose, Jesús quiato ra ndua icuã icuã cote. ²⁹ Jendua icuã eã ndaque jẽ. Emo nguia ndua icuã arõte nguia cote, jirandu mose jẽ eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰ —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesaã saã nguia nae, Dios je chõ nandesaã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeco turã mose. ³² i Mbia ra jemundua ata atate chĩ jẽ! —ã icuã ereae, i mose emo jẽje, i ũquĩ nda jësaãchĩ jẽ! Jẽ eraã mose, ũquĩ nda ndua icuã Jesús rese cote. Judíos. Judíos eã abe. Jesús quiato abe. Ũquĩ ndua icuã arõ Dios rese, jẽ eraã mose. ³³ —Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11 Se rã si chõ jẽingo. Sã aico Cristo rã si se no.

Eĩ jenyé chõ nguia u ñumunua nua mose, i Pablo cuña je

² Acheẽ turãte quia jenĩ co. Jendua beite quiatu quia serese. Acheẽ ngue jẽje nyii, ũquĩ jemumbayã mbeite quia secheẽ ũquĩ. ³ Ae ra ambesa jẽje namo, i ũquĩ jëicua tuchi quiatu jẽ! Cristo rei hombre ja rerecua. Hombre rei ngũinisi rerecua no. Sã Dios Cristo rerecua

no. ⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ùquĩ. ⁵ Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ùquĩ. Uãquĩ huĩ na ño eriqui nguiã uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguiã Dios cheẽ nenei nenei. Dios quiatu ngue hombre chao nguiã umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguiã. Hombre roquieĩ je quiatu ngue Dios cuña mo ao nguiã. ⁹ Cuña chirecorã eã ño ngue Dios hombre ao nguiã. Hombre chirecorã nguiatu ngue Dios cuña ao nguiã. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiaa ja chõ ñene. Cuña. Hombre abe. ¹³ Jẽ ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ùquĩ. —Eicuãte ùquĩ, i ja tuchi mbiamo ñooñoa nguia ùquĩ je ã. ¹⁵ Cuña mo nguiatu ea boco siqui mose, ùquĩ nguia earõte re. Ea boco que Dios mee ee ra. Eãquĩ ati sacua. ¹⁶ —Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguiã serese ùquĩ.

Jenyao chaochĩ nda Santa Cena u mose jẽ

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jenĩ nda. Nyebe seya eãte riqui nguiã jendese. ¹⁸ —Hue rĩ ja eã eriqui ndua ndua ñumunua nua mose ùquĩ, i que emo sembiirandu jenĩ nda. —Ichõiño eã ereae, ae sequia ndua ndua co. ¹⁹ Jeñimbuchao chao chõchĩ equia ùquĩ. Mbia Jesús quiato tuchi icua sacua ño jeñimbuchao chao nguiã. ²⁰ Santa Cena naa naa mose, abei chiã tuchi chõ jẽingo nguiã jenyue ùquĩ. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenyue jaaja chõchĩ nguiã Santa Cena naa naa ùquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jẽquiaru tuchi mose Santa Cena, jẽingo icuã ño nguiã Jesús quiato ataque je ùquĩ. Mbaecha reã ireĩ ño nguiã jesi ùquĩ. ¿Mañi ae ra ñee jẽje re? Eicuãte ùquĩ ndesẽ. Jenyuchua ae ae rei jẽquiaru sacua ndesẽ.

Jesús quiaru mose uchimbaaquiato rese

²³ Jesucristo ae sí que sembaaquiato ra. Ñe ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbaaquiato je cote ra. —¡Co jẽ! Jẽu. Serete rã ño mbichae riquio ji co re. Jeni ño nda serete riquio ji cote. Co jẽu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ngue uchimbaaquiato je cote ra. —Seruqui rã ño uva rique co re. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jẽ co mbichae u mose, jẽ uva rique mbei mose, Santa Cena, i chõ nguiã ùquĩ je. Jẽ Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. ùquĩ siqui icuã icuã ño nguiã Jesucristo ruqui je ùquĩ no. ²⁸ Nyebe nandendua ndua tuchi quiatu quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi. ³⁰ ùquĩ je chõ jendasi rasi bei riqui nguiã. ùquĩ je chõ jẽingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacua ño ùquĩ nde. Nandembitirõ sacua ño cote re. Dios nandemombo eã sacua tata cuasu chõ ùquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jẽje co. Jẽ Santa Cena naa naa mose, jeñumunua nua turã ño. Jẽingo turã ño jenyue. Jenyisaarõ turã ja chõ Santa Cena u nonde.

³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenyue mose, Dios ra siqui turã jẽje cote, jeñumunua nua mose. Seso mose jendea ra secheẽ ataque asenei jẽje cote.

Espíritu Turã ño nandechisaã saã sacua mondo nguiã nande ae ae je

12 Espiritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. ùquĩ ndese taembiirandu cote. ² Dios abareã ndese que jẽingo tuchi nyii ra. Mbia que jemin-go tuchi dios abareã tubiriã ndese nyii ra. Dios abareã aba cheẽ andu aroneãte. ùquĩ jẽingo Jesucristo rese ùquĩ cote. ³ Ñe ndese jendua tuchi: —Jesús icuãte riqui Dios je co, i mose emo, echeẽ ae chõ ùquĩ nde. Es-

píritu Turã embucheẽ eã ño nguiã ùquĩ. —Jesús rei Dios tuchi, i mose emo, echeẽ ae eã ño ùquĩ nde. Espíritu Turã ño embucheẽ nguiã ùquĩ.

⁴ —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. ⁷ Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacua Dios rese. ⁸ Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no. ⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eturã icua. Eicua abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacua mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶ Nandesa achõ ñee aroneate. —Eresa eã ñochĩ se. Nyebe erete resenda eã se re, i aroneate nandesa ñee. Nanderete resenda bei chõ nandesa re. ¹⁷ Nanderesa achõ mose nanderete resenda, ã nda nandeico rei mbae anuate co. Nandesa achõ mose nanderete resenda, ã nda nandeico rei mbae retõ ãte co. ¹⁸ Dios

ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda. ¹⁹ Nanderete resenda mii mose, eĩ ndei ra nanderete eãte. ²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquí nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ùquĩ nguiarei nandechireco tuchi. ²³ Ae nanderete resenda aba ireĩte nae, ùquĩ nandetea quiatu chõ nguiã. Nandechati turã ño nguiã. ²⁴ Ae nanderete resenda checuate riqui nae, ùquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ùquĩ quiatu aba queteamba re. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ Æ ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiatu tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguiã nde, i chõ nguiã emo je no. —Mbia rasi embucherõ cherõ nguiã nde, i chõ nguiã emo je no. —Ayudante eico nde, i chõ nguiã emo je no. —Iglesia rerecurã nde, i chõ nguiã emo je no. —Mbia cheemo esaã saã nguiã nde, i chõ nguiã emo je no. ²⁹ Cristo chimbaaquiatu ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ùquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

Nandechesecua eã mose, Dios chirirõ ño nande re

13 Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi

ibate mo nda arusuri raque Dios quirăcuă je. ³ Se nyesequa eă mose mbia rese, aico chooño mbei chõ nda se. Sembae ra amee ja raque mbia mbaecha reă je. Mbiamo ra serei raque, se Dios chee nenei nenei mose.

⁴ Ae nyesequate quia mbiamo rese nae, ũquĩ nguia siqui minguate nguia mbiamo je. ũquĩ nguia eturăte riqui nguia mbiamo je co. ũquĩ nguia mae icuă icuă eăte nguia emo mbae rese. ũquĩ nguia "seaquiatu tuchite se", iăte nguia co. ⁵ Ae nyesequa quia mbiamo rese nae, ũquĩ nguia "se quiatu", iăte nguia mbae mo je. Ae aba ireŕte nae, ũquĩ mo esaă saă eăte quia co. Ae nyesequa quia mbiamo rese nae, ũquĩ nguia paama i jei jei eăte nguia. ũquĩ nguia ndua icuă icuă eăte nguia emo icuă mose ee. ⁶ Ae nyesequa quia mbiamo rese nae, ũquĩ nguia eya eăte riqui nguia, emo mbae icuă naa mose. Emo mbae tură naa mose quia eyate riqui nguia. ⁷ Ae nyesequa quia mbiamo rese nae, ũquĩ ñimbirăcuă ño nguia mbae ja je. —Iichõño nguia, iă ño nguia mbiamo chee je. Siqui tochi chõ nguia.

⁸ Dios quiato ra nyesequa bei mbiamo rese, mbae ua ja chee. Dios chee nda nandesenei senei eă emo mose cote. Mbiamo chee ata mo nda nadesaă eă emo mose cote. Mbiamo mbaaquiatusa mo eă nda emo mose cote. ũquĩ nda ua ja chee. Dios quiato quiatu ra nyesequa bei quia. ⁹ Mbae mii mii ño nandeicua icua nguia namo. Jesús tu mose quia ra mbae mii nandeicua eă cote. Dios chee miite nandesenei senei nguia namo. Jesús tu mose quia ra mbae nandeicua ja cote. ¹¹ Seŕetē mose que aico ñee ñee mbiamo riirĩ na nda. Mbiamo riirĩ na ño ngue aico ndua ndua seŕetē mose ra. Mbae que aicua icua chõ nguia mbiamo riirĩ na no nda. Secuas mose que seŕetē mosenda asecha ja cote ra. ¹² Mbae cuu rese mae naanguia chõ nandeico nguia mae namo. Jesús tu mose quiatu ra mbae chequa ja nande je cote. Mbae mii mii ño aicua icua nguia namo co. Jesús tu mose quia ra mbae aicua ja cote. ¹³ Ā nandeico Dios icuate. Ā nandeico Jesucristo ru raarõ arõ. Ā nandeico nyesequa jate mbiamo rese. Nandehesecua mose quiarei, ũquĩ etură tuchi mbae ja si.

Mbiamo chee naa naa mose

14 ¡Jenyesequase tuchi quiatu quia mbiamo rese jē! Jeñee ño nguia Dios je. —Paba, ndequirăcuă emee na seje. Mbae raă naa sacua ndeje, jenyete bei chõ nguia Dios je. —Ndechee asenei senei sete ndequirăcuă je, jenyete chõ nguia ee. ² Jesús quiato mo mbiamo chee naa naa mose, mbiamo ra eicuayă jate. Dios mii ño nda eicua nguia. Dios mii je chõ eriqui nguia ñee. Uchue si chõ eriqui nguia ñee. Mbiamo quia echee icuayăte nguia. ³ Ae Dios chee senei senei nguia, ũquĩ nguia ñee nyecuate nguia mbiamo je. ũquĩ nguia mbiamo mbaaracua turăte nguia Jesucristo ri. ũquĩ nguia

mbiamo mingo uquia tuchi nguia Jesucristo rese no. ũquĩ nguia mbiamo tuchi nguia Jesucristo rese no. ⁴ Ae mbiamo chee saă saă nguia nae, mbiamo mingo uquia reă ño nguia Jesucristo rese. Ae ae umingo uquia nguia erese. Ae Dios chee senei senei nguia nae, ũquĩ nguia Jesús quiato mingo uquiate nguia Jesús rese.

⁵ Mbiamo chee nda jesaă aquiatu ja raquete seje chă. Dios chee nenei nenei aquiatu mose, ũquĩ nguia etură tuchi re. ũquĩ nguia etură tuchi mbiamo chee naa naa si re. Ae mbiamo chee saă saă nguia nae, aque uchee mbiase mose Jesús quiato je, etură ño ũquĩ no nde. Jesús quiato mingo uquia chõ nguia Jesús rese ũquĩ.

⁶ Se mbiamo chee naa naa mose jēje, ũquĩ nda jemingo uquia reăte Dios rese. Se ñee nyecua mose jēje, ũquĩ nguia eturăte re. Ae rese Dios sembiirandu nae, ũquĩ nenei nenei mose jēje, ũquĩ nguia eturăte re. Se Dios chee mbuchecua tuchi mose jēje, ũquĩ nguia eturăte no nde. Se Dios chee icua icua tuchi mose jēje, ũquĩ nguia eturăte no nde. Mbiamo chee naa naa si. ⁷ Să música no. Emo flauta mbucheē icuă icuă mose, mbiamo ra tonada icuayăte. Emo guitarra mbucheē icuă icuă mose, mbiamo ra tonada icuayă no. ⁸ Să soldados no. Emo corneta mbucheē icuă icuă mose, soldados ra icoquiatuă. ⁹ Eĩ si chõ jē no nde. Jē mbiamo chee naa naa mose, mbiamo ra jeñee icuayăte. Jē mbiamo chee naa naa mose, mbiamo eăsa ñee ñee na ño ũquĩ nde. ¹⁰ Mbiamo chee ñumumbarate eriqui rei. Uchee ae raă naa mose, echeuate ee. ¹¹ Emo uchee naa naa mose seje, se eicuayă mose, mbiamo ño aico nguia ee. Mbiamo ño ae riqui nguia seje no. ¹² Espiritu Tură quirăcuă jenyosei tuchi quia reae. Coche tuchi chõ ũquĩ nde. Jesús quiato mingo tuchi sacua Jesús rese chõ equirăcuă jenyosei jē.

¹³ Nde mbiamo chee naa naa mose Jesús quiato je, echee na Dios je. —Paba, ndequirăcuă emee na seje. Sechee mbiase sacua mbiamo je, ere chõ Dios je. ¹⁴ Se mbiamo chee naa mose Dios je, achee ñee ndaque Dios je. Mañi ae quiatu ñi se quia ñee ee. ¹⁵ Mbiamo chee abe ra asaă saă ndaque Dios je. Sechee abe ra asaă saă ee no. Mbiamo sechee icua ja sacua. Mbiamo chee abe ra asaă saă se irasei rasei mose. Sechee abe ra asaă saă se irasei rasei mose no. ¹⁶ Nde mbiamo chee naa naa mose Dios je, mbiamo ra ndechee icuayăte. Ae eaquiatuăte, ũquĩ nda ndechee icuayăte. Nyebe eriqui nguia ñee aroneate Dios je nderese. Nyebe ndechee sí chõ nadesaă Dios je. ¹⁷ Coche jēingo nguia ñee Dios je. Jeñee sí quia nda aba saă Dios je re. Jē mbiamo chee naa naa mose ee, jendesenda quia nda jeñee icuayăte nguia. ũquĩ mose ra jendesenda jemingo uquia reăte Jesús rese. ¹⁸ Mbiamo chee aicua tuchite raque quia jesi co. Gracias, aete raque quia Dios je ũquĩ ñi co. ¹⁹ Dios quiato ñumunua mose, achee nyecuase rete ee. Sechee jua chõ ndaque. Cinco palabras. Mbiamo chee nda asaă eă ee. Mbiamo chee

icuayãte quia ñene. Emo nda ñee oco raque ee, icuayãte rae.

²⁰ Mbia riirĩ naate ra jëingochĩ, Seresenda. Jendua quiatu secheẽ ndese mbia cuasu rã. Coche jëingo nguiã mbia riirĩ na mbae icuã naa ndocoĩ. ²¹ Ñ ndei Dios cheẽ mbesa ji ã:

Mbiamo tamondo rei secheẽ nenei nenei sacuaã ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra,

i que embesa ji ra. ²² Jemo mbiamo cheẽ naa naa mose, Jesús quiatoã mundua sacuaã Dios rese chõ ùquĩ nde. Jẽ Dios cheẽ nenei nenei mose, Jesús quiato mundua sacuaã ño Dios rese chõ ùquĩ no nde. ²³ Jesús quiato ñmunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese. ²⁴ Coche jëingo nguiã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicuaã ndese. —Seicuaã tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuã nae, Espiritu Turã ae ra ùquĩ mbuchecua checua nguiã ee. Nyebe ra ngoi ngũiã ndese ñee turã Dios je. —Dios riqui tuchi jendese a, i ra ñee jẽje.

Mbae jësaã turã turã ja chõ nguia jeñumunua nua mose

²⁶ —Eĩ jenyete quiatu quia ñmunua Jesús riĩ, ae ra jẽje cote. Emo irasei rasei. Emo mbia mbaaquiato quiatu Jesús riĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacuaã Dios rese chõ ùquĩ nde. ²⁷ Mbiamo cheẽ jësaã saã mose ñmunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa. ²⁸ Jemo echeemo mbiasa aquiatoã mose, mbiamo cheẽ nda jësaã saãchĩ, jeñumunua mose. Jeñumunua eã mose quiatu mbiamo cheẽ jësaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ùquĩ ñee ndese. Eĩ ngue ra, i sacuaã. Eĩ eã ngue ra, i sacuaã abe echeẽ icuã mose no. ³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacuaã. Mbia siqui tuchi sacuaã Dios rese. ³² —Nde abe ã embuchecua mbia je, i mose Dios emo je, sã emo ndaarõ mbiĩ na huĩ, emo chĩ mose Dios cheẽ nenei nenei.

³³ Jemo ñee mose jenongue cheẽ cúa, Dios biãte ùquĩ. Jeñee turã mose nyuuru uru, ùquĩ nguia Dios bite re. Eĩ ja chõ Dios quiato nguiã iglesia jenda ja. ³⁴ Jeñumunua nua mose Dios riĩ, cuña mo nda ñeechĩ. Eĩ si que Moisés chimbese no nda. Sã cuña ndiqui mbia cheẽ mumbayã mbei. ³⁵ —Ùquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatus mose. Cuña mo ñee aroneate Jesús quiato chumunua nua ite re. ³⁶ —Ichõiño nguiã ¿jenyete quia secheẽ mose re? Jẽ nane je eã ngue Dios ñee ndesẽ. Jẽ miĩ je eã ngue Dios ñee ndesẽ.

³⁷ Secheẽ ae eã ambesa nguiã jẽje co. Dios cheẽ ño ambesa nguiã jẽje. —Dios que uquirãcuã mee seje ra. Ucheẽ nenei nenei sacuaã, i mose jemo ñee, sã ùquĩ nane ñee serĩ. —Dios cheẽ tuchi chõ Pablo senei senei nguiã, sã i serĩ. ³⁸ Ùquĩ secheẽ isi sereã mose, jẽhui chõ esi. Sã eaquiatoã ae riqui. ³⁹ ¡Dios cheẽ jëseni seneise tuchi quiatu jẽ! Jemo mbiamo cheẽ naa naa mose jechẽ nda jësiquisã quisãchĩ jẽ! ⁴⁰ ¡Mbae jësaã turã turã ja chõ nguia jeñumunua nua mose jẽ! Jenyuuru uru turã ño nguia.

Cristo quera si mose

15 Dios cheẽ turã ngue asenei senei nguia jẽje Jesucristo riĩ nae, ùquĩ sí rese chõ aico nguiã je-mundua ndua co. Ùquĩ ngue jëisi turãte. Jëingo beite ùquĩ ndese ùquĩ. ² Ùquĩ ndiqui jemingo beite ùquĩ, jëtesareia mose secheẽ si. Ùquĩ jëingo Jesucristo icua iruã ùquĩ. ³ Ae Dios senei senei seje nae, ùquĩ nane ngue asenei senei jẽje ra: Jesucristo que mano nan-deicuã ndiquicharõ. Embesa ji cheẽ nguire. ⁴ Mbia que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiato doce je cote. ⁶ Quinientos uquiato je que nyecua cote. Hue equiato chi ja mose ñmunua. Ùquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiato jaje cote. ⁸ Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ùquĩ na si chõ aico rei nguiã se co. ⁹ Se quia señetẽ jiri riqui nguiã Jesús chim-baaquiato ataque si co. —Jesús chimbaaquiato chõ se re, ae eã jiri quia co. Seicuaã tuchi quiatu ngue Dios quiato je nyii re. ¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹ —Aba Dios cheẽ senei senei tuchi quia reae, ure ãte equia co. Ùquĩ ñene. Uresenei senei ja chõ equia ã ndesẽ. Jẽ ngue ure-chisenei senei jëisi turãte quia resẽ.

Mbia raaque quera si mose

¹² —Cristo que quera si manonde ra, ure que equia erenei nenei jêje. Urecheẽ ngue jêisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³ ¿Cristo raaque bei namo nde? —Mbia raaque ra querayã mbei, jenyê mose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jêicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jêingo rei Cristo icua iru no. Eĩ nda jêingo rei jêicua nderequia beite no. ¹⁸ Eĩ nda Cristo quiato quiachã mbei rei manonde no. ¹⁹ A miĩ eã ño Cristo riqui nguiã nanderese. Nandemanonde abe ra eriqui bei nanderese no. A miĩ mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán miĩ nane ngue mano huicua je cose ra. Nyebe nandeico nguiã mano mano mbei cote. Eĩ si chõ Cristo miĩ quera si nguiã cote. Nyebe ra uquiato mbuquera si ja cote. ²² Sã nandeico mano mano ja Adán ndui ã no, eĩ si ra Cristo nandembuquera quera no. ²³ Dios que Cristo rane mbuquera nandesĩ ra. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquiã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶ Mbia mano mano mose, Cristo biãte ũquĩ. ũquĩ abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacua. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirĩte quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque rĩĩ ũquĩ. Eraaque quera si eã mose ¿mbaerã ũquĩ ndiqui bautizar i eraaque rĩĩ nde? ³⁰ Mbia raaque quera eã mose, eĩ nda ureico rei Dios cheẽ nenei nenei ãte mbia je co. Eĩ nda mbia riqui rei ureiquia serĩ serĩ ãte. ³¹ Mbia “taiquia” i bei beite quia seje ã. Acheẽ ñooño eãte jêje. Sã seyate riqui jendese co no. ³² Nyacua rã tuchi que Efeso jenda riqui seje ra. ũquĩ ngue asiquisã tuchi rei

quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeico rei ñee. —Mbae nandembei chooño. Mbae nandeu chooño. Mano mbei cote, i. ³³ —Eĩ jenyê quiatu jichĩ nda mbia jembĩrĩ irĩ jê! Jeingo mose mbia icuã ndese, jembĩcuã icuã nda jê abe cote. ³⁴ Jendua quiatu. Mbae turã nguiatu jêsaã saã nguia. Mbae icuã jêsaã eã nguiatu quia. Jemo emo ndiqui Dios icuayãte ũquĩ. Aba ireĩ tuchi quiarei ũquĩ.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ũquĩ. Sã nandeico mbae eĩ tiquia no. Mbae eĩ nda soõ suri sacua cote. Eĩ si chõ nda nanderete soõ nandemano mose. Nanderete yasu sacua cote. ³⁷ Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸ —ĩ ño nda ndei, i chõ Dios nguiã mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa riinda rete no nde. Ae mbebe quia, erete ae chõ ũquĩ no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ũquĩ ndei soõ je ũquĩ. Ae ra quera si nae, ũquĩ nda soõ eã mbei cote. Manoa mbei ra eno. ⁴³ Ae nandechitiquia quia nae, eraaque tuchi chõ ũquĩ nde. Ae ra quera si nae, enininya tuchi chõ ũquĩ cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ũquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ũquĩ nda manoa no. ⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae, mano mano mbei arõte. ũquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ũquĩ cote. ⁴⁹ Ae Dios chao ibi je nyii nae, Adán i equia ee nae, aque rã si chõ nan-

deico nguiã nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. Ûquĩ oso aroneate ibate Dios récuua. Ae mano nguia soõ nae, ùquĩ nyoĩ aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ùquĩ tasenei na jėje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ùquĩ mose ra embesa ji cheẽ io cote: "Nandemano ngue ua tuchi cote ra", i ñi embesa ji re. ⁵⁵ Nanderasi ra nandequiayã cote. Ibicua ra nanderaarõ cote. ⁵⁶ Nandecuã ño nandemano mbu uquia nguiã nande je co. Moisés chimbesa chõ nandecuã mbuchecua nguiã nande je co. ⁵⁷ Dios ra nandemano siquisã mbei nandesi cote Jesucristo rĩĩ. Nyebe nandeico nguiã gracias i tuchi Dios je ã cote. ⁵⁸ Seresenda ¡jeñimbirãcuã tuchi quiatu quia jê! ¡Jesucristo rese jëingo bei quiatu quia jê! ¡Echeẽ jësenei senei mbei tuchi quiatu quia jê! Ae jësaã saã nguia Jesucristo rese nae, jësaã iru iruã ño nguiã ùquĩ.

Ofrenda jembae jendecoquiato, i Pablo

16 Ae ofrenda ra jemondo Jesús icuasa je nae, ùquĩ tasenei jėje. Acheẽ ngue Jesús quiato je ra. Galacia jenda je ra. Eraã si chõ jëingo ae. ² Domingo mose bei jëingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi mĩte quia, sã aque co mĩ jiri rerecúe ofrendarã ae. Ûquĩ jemunua ino seso nonde jendea ae. Eĩ mose ra ofrendarã jësaã eã seico mose jendese cote. ³ Secuasẽ mose huee, jeñimondo sacua mo jëirabo ino, ofrenda rerao sacua. Cartas nandemondo ùquĩ oo. Ofrenda rese. Ûquĩ nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jėje cote. ⁶ Aico arete jiri ra jendese huee reae. Ama mose bei ra aico jendese huee reae. Eĩ jenyen da sem-

bucuata turã mondo cote, seso mose mbaranguiti. ⁷ Amaeño sereãte jendese secua mose. Aico arese rete jendese huee, Dios eno i mose seje. ⁸ Efeso taico are rã nyii. Fiesta de Pentecostés mose. ⁹ Dios cheẽ asenei senei arõ tuchite mbia je a. Mbiam seanduse rete. Emo emo icua icuãte riqui Dios cheẽ nenei nenei mose seje ã no.

¹⁰ Timoteo ngasẽ mose jėje ¡jëisi turã ño jê! ¡Sã eireĩ nguiã tuchi jësi jê! Se rã si chõ eriqui bei nguiã Dios cheẽ nenei nenei mbiam je aque. ¹¹ ¡Nyebe jemo Timoteo isiteã eã jê! ¡Jembucuata turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. —Nde abe eso erea, ae rei que ee jenii nda. Oso sereã ngue namo nda. Osobi mose quia nda esi nguiã jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jëicua tuchi quiatu quia jê! ¡Jësiquicheã tuchi quiatu quia jê! ¡Jëquirãcuã tuchi quiatu quia jê! ¹⁴ ¡Mbiam rese jenyese-cua tuchi quiatu quia mbae raã naa mose jê! ¹⁵ Seresenda, jëingo Estéfanos chuchua jenda icua jate ùquĩ. Ûquĩ nane tuchi ngue Jesús icua Acaya jenda nyii nae. Ûquĩ ndiqui mbae mondo mondo bei Jesús quiato je ùquĩ. Ûquĩ ndiqui mbae raã naa mbei Jesús quiato je ùquĩ. ¹⁶ Ûquĩ na si chõ jëingo. Ûquĩ ñee nda jemumbachĩ. Ae Dios cheẽ senei senei nguia nae ¡ùquĩ ñee nda jemumbachĩ jê! ¹⁷ Seya tuchi Estéfanos ngaẽ mose serea. Fortunato abe. Acaico abe. Ûquĩ ngue sembia tuchi ngaẽ jëingoã mose a ra. Ae jësaã aroneate quia seje nae, ùquĩ ño ngue esaã ngaẽ seje a ra. ¹⁸ Ûquĩ ngue sechiã mbucoite Dios rese ra. Jeñia abe mbucoite ereae. Gracias jenyen bei ùquĩ je.

¹⁹ Jesús quiato Asia jenda ja chõ saludos mondo quia jėje aque. Aquila abe saludos mondo quia jėje aque. Priscila abe. Ae Jesús quiato ñumunua nua nguia ùquĩ nyuchua nae, ùquĩ ja abe saludos mondo quia jėje Jesucristo rĩĩ aque. ²⁰ Jesús quiato a jenda ja saludos mondo quia jėje aque. Jenyiquiaama ama ja quiatu quia Jesús rĩĩ.

²¹ Seo je tuchi co saludo ambesa mondo quia jėje aque. Pablo tuchi chõ se re. ²² Emo nyesequayã mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesequa ja chõ nguiã jendese Jesucristo rĩĩ co. Amén.

2 CORINTIOS

Pablo ucheẽ mbesa mondo Corinto jenda je

1 Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jẽje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo rĩĩ ã. Cristo riqui urembia tuchi ure abe ùquĩ mose co. ⁶ Ure mbae rasi raã mose, jẽje chõ ñene. Ure mbae rasi raã mose nyii, jẽingo sacuã Dios rese chõ ñene. Ì nda jẽya bei riqui mbae rasi raã mose. Dios ureya eã mbuquiachã mose, jẽya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷ —Mbae icuã tu mose ee, ñimbirãcuã turã nda Dios rĩĩ, ure beite equia jenii ã. Mbae icuã tu mose jẽje, Dios ra jẽya eã mbuquiachã jẽsi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ùquĩ ndese taembiirandu. Mbia que urecuayãte quia ra. Aete ureico ñimbirãcuã eã. —Mbae icuã nda hui eã mbeichĩ nandesĩ re, ure rei que equia ra. ⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ùquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ùquĩ si que Dios ae urerirõ nda. Ùquĩ si eriqui urerirõ ndirõ mbei ã. Ùquĩ si ra eriqui urerirõ mbei no. Ùquĩ ureicuate quia ã. ¹¹ Jẽ abe jeñee Dios je urerĩĩ no. Mbia tubiriã ñee mose Dios je urerĩĩ, Dios ra ùquĩ ñee ñandu. Dios ra uturã mondo tuchi ure je. Ùquĩ nda gracias i tuchi Dios je urerĩĩ cote.

Pablo oso jei eã Corinto

¹² Ure que mbia mo urembĩĩĩ irĩĩ ãte quia ra. Jẽ abe mbĩĩĩ iriã no. Dios resendate que ureico jẽje ra. Ureyate mbae turã naa naa mose jẽje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³ Ae urembesa mondo quia jẽje nyii, ùquĩ jẽicuate raque quia ùquĩ. Urechimbesa checuate raque. Urechimbesa nda jẽicua ja tuchi rã seje chã. ¹⁴ Jẽ seicua jiri raque quia ùquĩ. Jẽya tuchi rã nda urerese Jesucristo tu mose chã. Sã ureyate riqui jendese ã no.

¹⁵ Sã jẽyate riqui serese co no. Ùquĩ aicuate quia se abe co. Nyebe acheẽ ndei nguiã sechiangui re nyii. —Tasobe rã erea. Ì nda eyabe jiri sesobe mose erea, ae rei que se nyii ra. ¹⁶ —Seso mose Macedonia, taicha bei oso jendea, ae rei que se ra. —Obei abe nda aichabe erea chã. Ì nda mbae mo mee seje sembu bei sacuã Judea, ae rei que se no nda. ¹⁷ Se ndua mose ùquĩ ndese, ¿eicuãte ùquĩ nde? ¿Acheẽ ñooño ño se quia ùquĩ nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ùquĩ saã nguiã. ¹⁸ Sã Dios ñee ñooñoa no. Eĩ ure quia ure abe urecheẽ mbuchebiã jẽje ã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jẽje resẽ. Timoteo rese. Silvano abe rese no. ²⁰ —Mbae turã nda asaã jẽje, i tuchi rei que Dios quia nande je nyii ra. Jesús rĩĩ ño eriqui nguiã ùquĩ naa naa nande je ã cote. Jesús rĩĩ ño nandeico nguiã Amén i Dios je ã cote. ²¹ Dios ae chõ nandembirãcuã mingo nguiã Cristo rese co. Nandemingo icúe umbaerã. ²² Dios que nandisirõ umbaerã nda. Umbaerã marca que emii naanguia nanderese ra. Espiritu Turã ngue emondo nandechiangui re ra. Nanderereco quiatu sacuã umbaerã.

²³ Aso eã equia jendea nae, jẽireĩ nguíã sacuã ño asoã nguiã jendea aque mose. Seso sereã ae eã ngue eno nde. Acheẽ ñooño eã ño nguiã jẽje co. Dios riqui sechiã icuate co. ²⁴ —Jendecuarã nda se, ae ãte quia co. —Co rese chõ jẽingo ndua, ae aroneate quia jẽje co. Taambia chõ Jesús rese. Ùquĩ mii ño asaã nguiã jẽje. Jẽ ae chõ jeñimbirãcuã nguia Jesús icua ùquĩ.

2 —Aso si eã nda ñee asi asi jẽje jembia eã, ae que se ra. ² Seso mose jembia eã, aba quia ra sembia

se cote. Jě ño sembia quia resẽ. ³ Nyebe ambesa mondo jěje nyii resẽ. Jě mbae mbitirõ sacua seso nonde jendea. Seso sereãte que oso mae jěicua ndese ra. Sembia eã sacua. Jě nguia nda sembia nguia ña. —Seya mose ra jěya jě abe, ae que se ra. ⁴ Ae ambesa mondo jěje nyii nae, ũquĩ mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguia jěje. —Pablo ndua tuchichĩ nanderese, i sacua ño ngue ambesa mondo nguia jěje.

Ae mbae icua saã nguia nyii nae, aque jěisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se mii eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huicua nii cote ra. Jě emombo mose nyii. Jěisi turã ño cote. ⁷ Aque icua si jětesarei chõ cote. Jěturã ño ee cote. Jembia jiri. Ĩ nda eya eã embiicha eã Dios si. ⁸ Jenyesequa tuchi chõ nguia erese jě. Jěturã sí chõ ee jě. ⁹ —Ma secheẽ mumba eã, ae que embesa mondo jěje nyii ra. ¹⁰ Jětesarei mose aque icua si, se abe atesarei chõ nguia esi co. Jenii ño aico nguia tesarei esi co. Cristo resa rae chõ aico nguia tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbiĩĩ mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguia. Nyebe “co acua quia co” ae nguia hue jenda je. Macedóniaa ngue aso cote ra.

Dios uremingo turã mbeite quia Cristo rĩĩ co

¹⁴ Aico gracias i beite Dios je co. Ae chõ uremingo turã mbeite nguia Cristo rĩĩ co. Ae chõ urembirãcuã nguia mbae icua si co. Ae chõ ucheẽ senei senei uquia nguia ure je mangue jenda chooñoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no. ¹⁵ Cristo riqui urechiangui re co. Nyebe ureico nguia aba mbushimbusa rãte Dios je ã. Ure Dios cheẽ nenei nenei mose, emo emo ño echeẽ isi nguia. Siqui bei sacua. Emo emo ño echeẽ isiã nguia no. Nyoĩ sacua tata cuasu. ¹⁶ Ae ra nyoĩ tata cuasu nae, mbae shimbu icua naanguia chõ Dios cheẽ ndiqui nguia ee. Ae ra siqui bei quia nae, aba mbushimbusa turã naanguia chõ Dios cheẽ ndiqui nguia ee. ¿Aba chõ eaquiato Dios cheẽ nenei nenei ña? ¹⁷ Ae Dios cheẽ senei senei ñooño nguia nae, ũquĩ na eã ño ureico nguia Dios cheẽ nenei nenei ure ã. —Mbae mo jembu rã ure je,

ureã tuchi chõ nguia Dios cheẽ nenei nenei mose jěje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguia ure. Ureico mingue chõ nguia erenei nenei ure ã. Dios chõ ngue ureirabo nguia ure. Cristo quiato chõ ure re. Dios résaa chõ ureico nguia echeẽ nenei nenei ã.

Jesús cheẽ yasu nandereco quia ã cote

³ ¿Urecuasú uresaã saã si reĩ nguia jěje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jěje re? ¿Emo nda jěturã senei mbesa imbu ure je re no? Tei. Nandechiicua ja chõ equia ã ndesẽ. ² Aico jenderequia beite sechiangui re co. Embesa ji rese mae na ño mbia riqui nguia mae jendese ã. ³ Urechimbaaquiato chõ jě ndesẽ. Cristo chimbese rã ño jěingo nguia. Tinta je eã ngue jembesa ra. Espiritu Turã je chõ ngue jembesa nguia. Sita eã ngue Cristo mbesa nguia. Jeñia ño ngue embesa nguia. ⁴ Cristo chõ ã icua nguia seje. Dios résaa chõ aico nguia ñee jěje ã. ⁵ Sequirãcuã ae je ra mbae aicuayã. Dios chõ uquirãcuã mee nguia seje mbae icua sacua. ⁶ Dios chõ uquirãcuã mee nguia seje, ucheẽ yasu renei nenei sacua. —Embese ji cheẽ jemumbayã mose ra jaemingo bei, i ãte Dios quia nande je ã. Espiritu Turã ae chõ aba mingo bei nguia. —Embese ji cheẽ tamumbayã mbei chõ nguia seico bei sacua, i mose emo, aque ra siqui bei eã. Espiritu Turã ae nandemingo beisa re.

⁷ Sita mbese ji Moisés quereco quia nae, mbae nininya tuchi que eriqui aque mose ra. Mbise mae sayã tuchi que Moisés ruba riqui ra. Moisés ruba nininyate quiato ngue eriqui nguia ee. Enininya que uque uquete oso quia cote ra. Moisés chimbese mbise mingo bei aroneate. —Mbise siqui icua mose, mbise ra mano, i que Moisés chimbese mbise mbiirandu ra. ⁸ Mbae nininyate raque aque mose. Ae Jesús cheẽ yasu nandereco namo ã nae, ũquĩ nguiareĩ enininya tuchi Moisés chimbese si. ⁹ Moisés chimbese quiato que mbise mbiirandu tuchi huicua ndese ra. Jesús cheẽ yasu quiareĩ nandembiirandu nandecuã mbitirõ ndese. Jesús cheẽ yasu quiareĩ enininya tuchi Moisés chimbese si. ¹⁰ Moisés chimbese quiareĩ enininya eã jiri Jesús cheẽ yasu si. Jesús cheẽ yasu quiareĩ i tuchi Moisés chimbese si. ¹¹ Moisés chimbese que siqui bei sacua eã nda. Jesús cheẽ yasu quia siqui bei sacua nde. Nyebe Jesús cheẽ yasu enininya tuchi Moisés chimbese si re.

¹² Jesús cheẽ yasu ra siqui bei. ũquĩ nandecuante quia ã. Nyebe ureico nguia ñee tuchi jěje ã. Mbae mbuchecua tuchi jěje. ¹³ Moisés rã eã ño ureico nguia ure ã. Moisés que nguba chatite quia aque mose ra. —Ĩ nda judíos mae eã seruba nininya que rese, i.

¹⁴ Judíos que Moisés chimbese icuayãte quia ra. Namó

abe eicuayâte. Emo leer ì mose Moisés chimbese je judíos je, icuayã mbeite. Ae siqui Cristo rese nae, ùquĩ mñ ño Moisés chimbese icua nguia. ¹⁵ Namò abe judíos Moisés chimbese icuayâte quia ã. Emo leer ì mose ee, echecuayã mbeite riqui ee ã. ¹⁶ Emo uba mose Jesús rese, Moisés chimbese abe ra echecuate ee cote. ¹⁷ Jesús sì rei Espíritu Turã. Nandeico mose Espíritu Turã ndese, ae chõ nandembui mingo nguia Moisés chimbese sì ã. ¹⁸ Nande Jesús icua mose, espejo rã ño nanderuba riqui nguia. Jesús ruba nininya rã ì chõ nande re. Espíritu Turã abe siqui ì chõ nguia nanderese. Nyebe nandeico ì ì nguia Cristo rã ã.

4 Dios turãte eriqui ure je co. —Jesús cheẽ yasu jësenei senei mbei mbia je, ì Dios quia ure je co. Nyebe ureico nguia ñimondocho ãte echeẽ nenei nenei mbia je ã. ² Mbae icuã asaã saã nyecuayã eãte quia co. Ae aba ireĩte riqui nae, ùquĩ asaã saã eãte quia co no. Mbia ambñĩrĩ ìrĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui sì tuchĩ chõ aico nguia erenei nenei co. Dios rësaa chõ aico nguia erenei nenei co. Secheẽ ñooñoa mbia icuate raque quia uchiangui re ùquĩ. ³ Ae asenei senei mbeite quia Jesús rĩrĩ nae, echecuayã eã ño ùquĩ nde. Ae ra nyoĩ tata cuasu nae, ùquĩ mñ je chõ echecuayã nde. ⁴ Jesús icua eãte quiatu nguia. Nyebe aba checuayã nderecua riqui nguia embaaracuayã Cristo cheẽ turã ñĩ co. Nyebe eriqui nguia Cristo nininya icuayãte co. Dios rã tuchĩ rei Cristo. ⁵ Se mbia mbaaquiato quiatu mose, serĩ eã ño aico nguia ñee ee. Jesucristo rĩrĩ ño ñene. Ae rei mbia rerecuarã tuchĩ. Jenimba rã ño aico nguia Jesús rĩrĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiato quiatu Jesucristo rĩrĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã sì.

Dios ae rese aico co, ì ñĩ Pablo re

⁷ Ure ae urenininya eãte raque. Tuchu achõ na ño ureico nguia Jesucristo nininya siquiã mose urerese. Dios ae chõ uquirãcuã mee nguia ure je co. ⁸ Mbae icuã tã ì bei beite raque ure je. Urechimondocho eã mbei rae. Mbae aba mbecoteã chĩchĩte raque. Urehui eã mbei ra Jesús sì. ⁹ Mbia siqui icuã icuãte raque ure je. Dios quia hui ãte nguia uresi co. Mbia ureririrõte raque. Urembui eã mbei quia nda Dios sì re. ¹⁰ Sã mbia icuã icuã ndiqui Jesús je cose no. Sã eiquia no. Eĩ sì chõ mbia nguia ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera sì nae, aque quirãcuã ndese mae sacuã ño ùquĩ nde. ¹¹ Ureico raque ure ã. Mbia ureiquia serĩ serĩ mbeite quia Jesús rĩrĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde. ¹² Uremano serĩ serĩte equia ã.

Jëingo turã sacuã Jesús rese chõ ùquĩ nde. ¹³ Sã embesa ji ñee no: “Dios icuare chõ aico nguia ñee”, sã ì no. Eĩ sì chõ ure no nde. Dios icuare chõ ureico nguia ñee. ¹⁴ Sã Dios quirãcuã Jesús raaque mbuquera no. Eĩ sì ra Dios nandembuquera Jesús rĩrĩ nande abe. Ae ra nandemingo turã ja ujii cote. ¹⁵ Seje mbae icuã icuã mose, jemingo turã sacuã ño ùquĩ nde. Ì nda Dios uturã mee mbia tubiriã je. Ì nda mbia tubiriã gracias ì tuchĩ Dios je. Dios iate mbia ùquĩ naa mose.

¹⁶ Nyebe ureico nguia ñimondocho eã mbei. Urerete sì raque quia ngoite qui cote. Urechimbiasu ì ì chõ nguia urechiangui re ã. ¹⁷ Ae rasi uresaã nguia ã nae, ùquĩ ndasi ra ua jei chõ. ùquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸ Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguia ra ua eã mbei. Nyebe ureico nguia ndua mbae nandemae sayã ndese.

5 Sã tuchia riqui shĩrĩ jeite no jẽ. Eĩ sì chõ nanderete no nde. Mano jei. Mbia serete iquia mose, tuchia ao ji mo ñĩ ibate seraarõ arõ pe. Dios chisaã ño hue re. Hue tuchia ra shĩrĩ eã mbei. Mbia chisaã eã ño ñene. ² Tuchua mo na ndei nanderete. Shĩrĩrĩrĩrĩrĩ. Co serete rerequia mose, aico jibute co. Co aico oso sete sechuchua ibatenda rea co. ³ Ì nda serete yasu areco bei pee ibate. ⁴ Tuchua mo na ndei nanderete. Co serete rerequia mose, aico jibute co. Seya eãte aico co. Semano sereãte raque. Serete yasu quia areco sete nguia. Mbae yasu ja ra aque mose seje cote. Amanoa mbei ra aque mose cote. ⁵ ùquĩ je chõ ngue Dios sererecoquiato nguia. Semingo turã mbei ra cote. Nyebe Espíritu Turã mondo nguia seje. Sembiirandu sacuã ùquĩ ndese. Dios Espíritu Turã mondo mose seje, umbae marca mñ naanguia serese chõ ùquĩ nde.

⁶ Nyebe aico nguia ñimondocho eãte co. Ì nanderete rerequia bei mose, eĩ nda nandesoro aroneate rei ibate siqui Jesús rese. ⁷ Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸ Nyebe aico nguia ñimondocho eãte co. Co serete ajea bite raque oso sacuã ibate siqui bei nonde Jesús rese. ⁹ Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰ Cristo rësaa ra nandecu ja emo mose. Ae nanderea sacuã. Nandeicua sacuã. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icuã saã saã nguia siqui mose íbii nae, ùquĩ je ra Cristo mbae icuã mondo

Dios ae nandemingo turã nguia uchiese Jesucristo rĩrĩ co

¹¹ Aba siquichesa tuchĩ cho Dios re, mbia siqui eã mose erese. Nyebe ureico nguia mbia mbuti mbuti

tuchi co. Dios riqui ureicuate co. Jě abe jěingo ureicuate ũquĩ ndenoae. ¹² Ā ureico urecuasu raã naa si ãte raque ã. Jembia sacua ño ureico nguiã ñee urerĩĩ sí ã. Ī nda jeñee aquiatu mbia icuã ñee ndibishorõ. Ae uturã saã ñooño nguia nae, ũquĩ ñee ndibishorõ sacua ño ñene. ¹³ Urearacuayã mose, Dios cheẽ ndese siqui sacua ño ñene. Urearacua mose, jembaaquiatu sacua ño ũquĩ no nde. ¹⁴ Sã Cristo nyesecua tuchi nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵ Cristo que mano nande ja je ra. Ae nandebite riqui nae, ũquĩ ndese nandeico eã sacua ño Cristo mano nguiã. Ae Cristo bite riqui nae, ũquĩ ndese nandeico sacua nguiatu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷ Emo ñimbucha mose Cristo rese, mbia yasu rã ño ũquĩ cote re. Ae esaã saã nguia mbae icuã nyii nae, ũquĩ si que hui ja cote ra. Mbae yasu ja chõ ee cote re. ¹⁸ Dios ae ũquĩ saã ja nguiã nande je co. Dios ae nandemingo turã nguiã uchiese Jesucristo rĩĩ co. —Mbia emingo mingo bei serese sequia torã jě, i que Dios seje ra. ¹⁹ —Sã mbia sequiatorã ja, i que Dios Cristo rĩĩ nda. ũquĩ je chõ ngue Cristo mano nguiã. Mbia icuã mbutiã sacua esi chõ ngue Cristo mano nguiã. —Mbia emingo mingo bei serese sequiatorã jě, i que Dios seje ra. ²⁰ Cristo chõ sembuheẽ nguiã co. Secheẽ ae eã ñene. Dios ñee na jěje chõ aico nguiã ñee jěje co: Dios quiatorã ño jěingo jě. ²¹ Mbae icuã mo ngue Cristo saã eãte rei ra. Dios que mbae icuã naasa saã tuchi ee ra. Dios nandemingo turã mbei sacua ño ũquĩ nde. Sã Dios nandemingo turã mbei nandeico mose Cristo rese no.

6 Dios resenda chõ ureico nguiã Dios cheẽ nenei nenei ã. Dios turã jěisi chooñoa ño nguia jě. Jěisi tuchi quiatu jě. ² Eĩ ngue embesa ji huĩ Dios cheẽ nda: “Jeñee mose seje, jeñee ngue achandu ra.

Aendirõ ngue mbae icuã si ra”, i que Dios mbi a je cose ra, i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicuã si co no. ³ Ā ureico mbia mo mbĩĩĩ irĩ eãt e ã. Ī nda mbia urecheẽ andu turã Jesús rĩĩ. ⁴ Mbae uresaã turã sete quia ure ã. —Dios rimba turã ño ũquĩ nde, i nonde mbia ure rĩĩ. Nyebe ureico nguiã ñimbirãcuã tuchi mbia icuã mose ure je ã. Mbae tiã mose abe ure je. ⁵ Ureirua nua ngue equia ra. Uretarõ tarõ mbei que equia ra. Urerocoteã mbei que eriqui ra. Ureque reã tuchi que equia ra. Urieriãcuã tuchi que eriqui no nda. ⁶ ũquĩ icuã eĩ eĩ mose ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda.

Espíritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁷ Dios cheẽ ichoiñoa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũquĩ mii ño urereaquiatu bei nguiã co. ⁸ Emo emo mose mbia riqui ñee turã urerĩĩ ã. Emo emo mose mbia ñee icuã urerĩĩ no. —Aba mbĩĩĩ irĩsa, i tuchi que mbia quia ure je emo emo mose no nda. —iAe bei jě i tuchi que equia urecheẽ je emo emo mose no nda. ⁹ Mbia riqui ureririrõ ndrõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹ Urecheẽ nyecuate que jěje ra. Urecheẽ ngue jembĩĩĩ iriã tuchi quia ra, Corinto jenda. Ureico nyesecua tuchi jendese a. ¹² Ure que urechao eã jěsi ra. Jě nguiatu ngue jenyao nguiã ure si. ¹³ Sã mbia mo ndiqui ñee nguiĩĩ je no. Eĩ ae chõ nguiã ñee jěje. Jendu rã ño aico nguiã jěje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁴ Dios quiatoã ndese ra jeñimbuchachĩ jě. Dios quiatoã na eã ño jě nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no. ¹⁵ Sã Cristo riquiã Satanás ndese no. Eĩ si chõ Cristo quiato siqui aroneate nguiã Cristo quiatoã ndese no. ¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ũquĩ. Sã Dios ñee ã no:

Erete ye ra aico. Ererecuarã nda se.
Mbia ra siqui serui,
sã i Dios no. ¹⁷ Dios cheẽ ño ã no nde:
Jěhui chõ mbae icuã si. Icuã jěingo.
Mbae icuã ndese ra jěocochĩ.
Jaěisi turã nda se chã.
¹⁸ Jendurã nda se chã.
Seriirina nda jě ña.
Sequirãcuãte se,
i que Dios cheẽ mbesa ji ra.

7 Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeico Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jě. Mbae icuã mo ngue uresaã ãte jemo je ra jě. Ureico que equia jembĩĩĩ irĩ ãte ra jě.

³Jëicuã ì sacuaã eã ño aico nguiã ñee jëje. Achesecua tuchite quia jendese co. Semano mose chee. Sã ñi acheë jëje nyii no. ⁴Seyate aico jendese co. Secheë nda emumbayã, aete se quia jenii co. Mbia icuã icuã mose seje, seyate aico jendese co.

⁵Urechu que aa Macedóniaa, aque mose bei que urerecoteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra. ⁶Dios que sechiã mbocoi Tito ngasë mose cote ra. Sã Dios riqui uquiato mbia beite eya eã mose no. ⁷Tito mii ndese eã ño seya re. Seya tuchi que sembiirandu mose jendese no nda. Jë nane ngue jeñee Tito mbirãcuã nda. Aquere que Tito ru sembirãcuã cote ra. —Hue echì ndua tuchite nderese huee, ì que u ñee seje ra. Nyebe seya tuchite riqui nguiã jendese. Jëtesarei eãte quia equia sesi reaë. ⁸Ae ambesa mondo jëje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae ãte se quia co cote. ⁹Seyate aico jendese co cote. Jëya eã nii eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jëicuã ndese, Dios rese que jendua cote ra. Sechimbesa chõ jemingo turã nguiã cote. ¹⁰Emo ia eã ñooño mose huiicuã ndese, ùquĩ nda nyoì tata cuasu. Emo ia eã tuchi mose huiicuã ndese, hui ra huiicuã si cote. Dios ra emingo bei cote. —Ahui jirichĩ nguia seicuã si, iã tuchi rae. ¹¹Sechimbesa oso mose jëje, jëya eã tuchi que jëicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue ursaã eãte resë, jenyè eãte que ra. Mbae icuã ndese que jemaè sereã tuchi cote ra. Jëireĩ ireĩte que equia mbae icuã si ra. Jemaè sete que equia serese ra. Ae siqui ngu ninisi rese nae, aque que jemombo cote ra. Mbae que jësaã turã jate ra. Eicuãte ì aroneate que emo nguia jëje ra. ¹²Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jë ja je chõ ngue ambesa mondo nguiã. —Pablo riqui nyesequa tuchichĩ nanderese, ì ja nonde chõ ngue ambesa mondo nguiã. ¹³Nyebe ureya tuchi riqui nguiã jendese co cote. Jë ngue Tito abe jembia cote ra. Jë hui mose mbae icuã si. Seirandu mose ùquĩ ndese que seya tuchi se abe cote ra. ¹⁴Sã ñi aico jëturã nenei nenei Tito je nyii no. Eĩ jenyè si tuchi equia siqui turãte ùquĩ. Nyebe seireĩ ngüiãte riqui nguiã ñee jenii ùquĩ. Acheë ñooñoa ngue jëturã nii Tito je ra. Sã aico ñee ñooñoa emo mose jëje no. ¹⁵Tito riqui nyesequa ì ite jendese co. Ndua beite equia jendese co. Echeë nguiatu que jemumbayã tuchi quia ra. Cocheete quiatu que jëingo ee ra. Jëisi turãte quiatu que equia ra. ¹⁶—Ùquĩ nda siqui tuchi Dios rese, ae tuchi se quia jenii co. Co seyate aico jendese co.

Jembae jemee jiri quia Dios je

8 Jesús quiato Macedonia jenda tasenei jëje cote, Seresenda. Hue jenda ja iglesias. Dios turã tuchi que eriqui ùquĩ ja je ra. ²Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. ³Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴—Ure abe ra urembae uremee tuchi Jesús quiato je, ì tuchi que seje ra. ⁵Mbaechõ eã ngue emee Dios je ra. Nguete rane ngue emee ee ra. Ure je abe que ngueco mee nda. Mbae turã naa naa mbei sacua ure je Dios riĩ. Aquere que umbae mee tuchi Jesús quiato je cote ra. ⁶Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã ì no. ⁷Sã jëingo Dios icua tuchi no. Sã jëingo Dios cheë icua jate no. Sã jëaquiatute mbia mbaequiatu no. Sã jëingo sete riqui Dios cheë ndese no. Sã jëingo nyesequate serese no. Nyebe jembae jemee tuchi quiatu ofrendarã cote.

⁸—Secheë nguire quiatu jembae jemondo Dios je, ae ãte se quia co. Jë ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹Nandererecua tuchi chõ Jesucristo re. Jesucristo turã jëicuate quia ùquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Eriĩ ño Dios riqui nguiã mbae mondo tuchi nande je. Ae mbaecha reã naa mose u íbii. ¹⁰Tacheë tuchi rã jëje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jë nane ngue “ofrenda nandemondo” jenyè Macedonia jenda si ra. Cosete que jeñee ñee. Jemondo turã cote. ¹¹Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mii mose, co mii jemondo ee. ¹²Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³—Jembae jemondo ja tuchi mbaecha reã je, ae ãte quia jëje co. ¹⁴Sã jembae nyiabiã jiri mbaecha reã mbae rese. Sã jembae tubiriã namo no. Emeè sacua ùquĩ je. Emo mose ra ùquĩ mbae tubiriãte no. Emondo sacua jëje jembae eã mose no. Ùquĩ mose ra jembae nyiabiã jiri ja cote. ¹⁵Sã embesa ji riqui ñee no:

Ae mbae tubiriãte nae, embae rire eãte que ra.

Ae embae miite nae, embae que ua eãte ra, ì que embesa ji ra.

Tito ra nyoï jendea, i Pablo

¹⁶ Sã aico ndua tuchi jendese co no. Eï si tuchi Dios quia Tito mundua jendese co. Nyebe aico nguiã gracias ite Dios je co. ¹⁷ Tito si quia jendea aque. Secheë nguire achõ eã esi nguiã jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riï aque. Jesús cheë nguiatu esenei senei mbeite nguiã aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jêje. ²⁰ Ae que siqui beite urerese ofrenda isi isi mose ra. Mbia ñee icua eã sacua ure riï. “Ofrenda que embuquiachã nda”, i eã sacua mbia ureriï. ²¹ Mbae uresaã turãse rete quia ã. Dios ia tuchi sacua ure rese. Mbia abe ñee icua eã sacua ure riï. ²² Uresenda mo abe uremondo quia ñquï ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqui bei que equia serese Dios cheë nenei nenei mose ra. Ae nyoï quia jendea Tito rese nae, iglesias chõ emondo nguiã jendea ñquï. Cristo quiato tuchi chõ ñquï nde. ²⁴ Ñquï jêisi turã ja chõ jê. Sã urecheë ee jeni nyii no. —Jêisi turã ndae. Nyesecua tuchi ra jendese, ure que ee nyii ra. Nyebe jêisi turã ño. Eï nda iglesias jenda ja abe “eturã” i jeni.

Jembae ofrenda jemunua ja rã emondo sacua mbaecha reã je

9 Aete aico embesa eã jêje ofrenda riï. —Ae ae chõ nda mbae mo mondo nguiã Jesús quiato je, se ñee mose rocoï ee, ae que se ra. ² Jê ae chõ mbae jemondose nguiã Jesús quiato mbaecha reã je ñquï. Jeni ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ñquï, ae se quia Macedonia jenda je jeni co. Nyebe ñquï abe riqui nguiã mbae mee sete ee cote. Jirandure jendese. ³ Aque mbia amondo quia jendea aque. Jê icoquiato sacua. Mbae jemondo sacua Jesús quiato mbaecha reã je. Ureireïte ra jê ofrenda mondo eã mose se ñeende jeni nyii. ⁴ Seso mose jendea, Macedonia jenda mo abe ra nyoï serese reae. Jê ofrenda munua eã mbei mose, ureireïte ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacua. Ae riï jeñee ndei tenda nongue mose. —Ofrenda jemunua na, ae bei sereãte se. Jê ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae mi jiri chitiquia quia, aque ra mbae a ucua mi jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemondose mose nandechiangui re, mbae ata nandemondo chõ. Mbae mi nandemondose mose nan-

dechiangui re, mbae mi nandemondo chõ. —Mbae amondo jirichï, nande mose nandechiangui re, eicuãte ñquï. Ae eyate riqui umbae mee mose emo je nae, Dios bite ñquï. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacua nandesì. Mbae nandemondo mondo bei sacua Dios quiato mbaecha reã je. ⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesarei eã mbei, i que embesa ji ra. ¹⁰ Dios chõ mbae eï mondo nguiã nande je etiquia sacua. Dios chõ mbae mondo nguiã nandechiurã no. Dios chõ “iabei chõ jê jê!” i nguiã nande je. Dios chõ mbae mee nguiã nande je emondo sacua mbia mo je. ¹¹ Dios ra mbae mondo tuchi jêje. Eï nda jê mbae jemondo tuchi ofrendarã. Se jeñimee ofrenda mondo mose mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. Ñquïño eã nda esaã nguia. Gracias i abe ra Dios je. ¹³ Jê mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheë emumbayã tuchi quia ã, i ra jeni cote. —Eriqui mbae mee tuchichï mbia ja je, i ra ñee turã jeni cote. ¹⁴ Mbaecha reã nda ñee tuchi jeni Dios je cote. Dios jendeaquiato sacua. Mbaecha reã nda ndua tuchite jendese cote. Jê mbae mondore ee nyii. ¹⁵ Dios quiato que mbae turã tuchi mondo nande je ra. Nyebe nandeco nguiã gracias i ee.

Mbia mbaaquiato sacua ño Dios semï nguiã

10 Se rei Pablo. Tacheë nyecua jêje. Nandeico mingue chõ nguia Cristo rã si jê. Cochee chõ nandeico Cristo rã si jê. —Cochee chõ Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenyẽ chõchï equia serï ñquï. ² Mbae jesaã turã turã ja chõ nguia. Ñ nda acheë asi asiã jêje seso mose jendea. Emo emo ñee icua ño nguiã serï. —Dios je eã ño Pablo riqui nguiã mbae raã naa, i serï. Ñquï je quiato acheë asi asi arõte nguiã. ³ Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co. ⁴ Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icua ndiquisã quisã co. Mbia icua quirãcuãteraque. ⁵ Ae mbia mundua icua icua nguia Dios riï nae, ñquï asiquisã quisã ño nguiã co. Mbia amundua turã ja quia Cristo riï co. Cristo cheë mumbayã sacua cote. ⁶ Jê nane Dios cheë jemumbayã na jê. Aquere ra Dios cheë mumbasa amombo ja cote.

⁷ Mbia chiangui renda rese jemae ãte. Earonda rese chõ jêingo nguiã mae. —Cristo mbae chõ se re, i mose

emo, ae mii eã ño Cristo mbae re. Se abe chõ ñene.
⁸ Se ecuasú raã naa mose, seireĩ ngũiate. Dios quiatu ngue semii nguiã ererecuarã. Jembaaquiato turã sacuaã ño ngue Dios semii nguiã ererecuarã. Jembiiacuã sacuaã eã ño ñene. ⁹ Jaembusiquiche sereãte sechimbese ja.
¹⁰ Mbia ñee icuãte raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia serĩĩ ùquĩ. —Siqui mose nanderese, ererecuarã naa aquiatuãte cote, i jemo nguia serĩĩ ùquĩ. ¹¹ Ae ñee nguia ùquĩ nae, ùquĩ je tacheẽ. Co secheẽ asi asi ambesa mondo quia jẽje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee.
¹² Ae ñee mbeite quia uturã ñi, ùquĩ na eã ño se re. —Aque rá sí chõ aico nguiã se co, i beite equia ùquĩ. —Seturãte aico aque sí co, i beite equia ùquĩ no. Ùquĩ ñee mose ùquĩ, earacuayãte riqui ùquĩ.
¹³ Seturã nda asaã saã eã. Dios ae chõ “hue eso, pe eso”, i nguiã seje co. Ae chõ ngue semondo nguiã jendea. ¹⁴ Se rane ngue Dios semondo jẽje Cristo cheẽ nenei nenei sacuaã nda. Nyebe hue jenda ja sembaerã, se embaaquiato sacuaã Dios cheẽ ndese. Ae Dios riqui “hue eso” i ãte seje nae, huee ra asoã. ¹⁵ —Sechimbbaaquiato chõ ùquĩ nde, ae aronea tuchite quia emo ñimbaaquiato je co. Jẽ Cristo icua i i tuchi mose, jendobeinda quia ra ambaaquiato i i tuchi oso cote reae. ¹⁶ Sesó sete jendobei Cristo cheẽ nenei nenei hue jenda je. Sechimbbaaquiato ae aroneate emo ñimbaaquiato je. ¹⁷ Emo ñee turãse mose mbae mo ñi, sã Dios rĩĩ nguiatu ñee turã. ¹⁸ Ae uturã saã saã nguia nae, Dios biãte ùquĩ. Ae rĩĩ nguiatu Dios riqui ñee turãte nae, ùquĩ nguiatu Diobi tuchi re.

Mbia mbaaquiato icuã icuãsa rese ra jẽingochĩ

11 Jeñimbirãcuã jiri se ñee mose jẽje jẽ. Seturã tasaã saã jiri ñee jẽje. ² Aqueteãte jendese jẽ. Dios mbaerã jẽ, ae que se ra jẽ. Sã acuanĩ mo ndiqui siqui eã mbei ngu mo ndese no. Sã mbia emee acuanĩndu mo je cote no. Eĩ tae sí chõ jemee Cristo je. Cristo mii mbaerã nda jẽ cote chã. ³ Sã mbei Eva mbiĩĩ irĩ cose no. Eĩ jenyee sí arõte jẽ ndeae. Eĩ sí arõ mbia jembiiicha Cristo icha sí. Jemundua icuãte chõ nda reae. Cristo mii ndese chõ jẽingo jẽ. Sã acuanĩ ndiqui ngu mii ndese no. ⁴ ¿Mbaerã jenyiisaquia turã mbia jembaaquiato icuã icuã mose re? Mbia Jesús abareã nenei nenei mose jẽje re. Mbia Espiritu Turã abareã abe renei nenei mose jẽje re. Mbia Jesús cheẽ turã abareã nenei nenei mose jẽje re no. Se que ùquĩ asenei senei ãte quia jẽje resẽ. ⁵ Ùquĩ ñee ndese que jenyiisaquia, ¿mbaerã nda jenyiisaquia eã secheẽ abe rese re? Se quia Jesús cheẽ aicua tuchi quia ùquĩ sí co resẽ. ⁶ Secheẽ turã eãt e raque. Seaquiatute quia aico nguiã Dios cheẽ ndese co. Jẽingo seicuate ùquĩ ndesẽ.

⁷ —Mbae jemondo seje, ae ãte que se quia Dios cheẽ nenei nenei mose jẽje ra. ¿Eicuãte ùquĩ nde? Aico mingue que se quia jẽje ra. Jẽingo turã sacuaã Cristo rese. ¿Eicuãte ùquĩ nde no? ⁸ Seico mose jendese jembaaquiato quiato mose, mbae mo ngue jemee ãte quia seje ra. Jesús quiato ishonda quiato que mbae mo mee mee nguia seje ra, se siqui mose jendese. ⁹ Seico mose jendese que mbae jemondo eãte seje resẽ. Sembae eã mose que “mbae embu seje” ae ãte jẽje resẽ. Jesús quiato que ngaẽ Macedonia sí nae, ùquĩ nguiatu que mbae mee tuchi sembae eã mose resẽ. “Mbae embu seje” ae eã mbei ra jẽje. ¹⁰ Cristo riqui sechiangui re co. Ùquĩ aicuate. Sebite “mbae embu seje” iã mose se jẽje. “Acaya jenda que mbae mee tuchi ndeje ra”, i aroneate emo seje jeni. ¹¹ ¿Mbaerã ño mbae aisiã jẽsi chã? Achesequa eãte quia jendese reae. Tei. Ùquĩ eã ñene. Achesequate rei jendese resẽ.
¹² Mbia ñee eã sacuaã nda mbae aisiã mbei jẽsi resẽ. Ae Jesús abareã senei senei nguia nae, ùquĩ ñee eã sacuaã. “Pablo rá sí chõ ure re” ùquĩ i eã sacuaã. ¹³ Cristo cheẽ nenei neneisa turã eã ño ùquĩ nde. Mbia mbiĩĩ irĩsa chõ ùquĩ nde. Cristo cheẽ nenei neneisa raã ñooño ño nguiã ùquĩ. ¹⁴ Satanás na sí chõ ùquĩ ndiqui nguiã ùquĩ. Satanás uturã saã saã ño nguiã. Angel turã naa naa ño nguiã no. ¹⁵ Ae siqui Satanás ndui nae, ùquĩ nda uturã saã ñooño Satanás na sí. Nyebe ra Dios ùquĩ mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechĩ nda seje jẽ. “Earacuayã” jenyee raque seje, seandu rá se. Secuasú tasaã saã mbiĩĩ na jẽje. ¹⁷ Ae aico ñee jẽje namo nae, Dios cheẽ eã ño ùquĩ nde. Earacuayã na ño aico nguiã ñee jẽje. Secuasú asaã saã ño nguiã ñee jẽje co. ¹⁸ Sã mbia riqui ucuasú raã naa jate no. Eĩ tae rá se abe secuasú raã naa jẽje. ¹⁹ Jẽaquiatute reĩ jẽ ndeae. Jẽingo ñimbirãcuãte eaquiata je ùquĩ. Seaquiata je abe jeñimbirãcuã ño. ²⁰ Ae icuã icuã mbeite riqui jẽje nae, ùquĩ je jẽingo ñimbirãcuã mbeite ùquĩ. Jembuquieĩ quieĩ chooño mose. Jembae mbutiã chooño mose abe no. Ucuasú raã naa mose abe no. Ucuã mose jẽsiba rese abe no. Ùquĩ je jẽingo ñimbirãcuãte ùquĩ. ²¹ Se quiato que ùquĩ asaã saã eãte quia jẽje ra. Aico mingue chõchĩ jẽje. Acheẽ asi asi eã ñochĩ jẽje. Emo ucuasú raã naa mose, se quia secuasú asaã saã mbite nguiã esi. Earacuayã na ño aico nguiã ñee se co. ²² ¿Hebreos ùquĩ nde? Se abe chõ ñene. ¿Israelitas ùquĩ nde? Se abe chõ ñene. ¿Abraham nducucha riirĩ ùquĩ nde? Se abe chõ eno nde. ²³ ¿Cristo rimba chõ ùquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seirua nua tuchi nguiã esi. Se quiato ngue mbia sematã matã tuchi nguiã esi. Se

quiatu ngue mbia sequia serĩ serĩ tuchi nguiã.

²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee.

²⁵ Ira que euru uru serese tres veces ra. Emo mose que sei sei sita je ra. Tres veces que barco ñiimi ama ndiite re seje ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ mi abe que amumba quia mbebi ra. Barco ñiimi mose seje. ²⁶ Acuata tuchi que sequia ra. Mbae icuã ngue sequia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbia mbae mbuquiachãsa que sequia arõ arõ tuchi quia no nda. Seresenda abe que sequia arõ tuchi no nda.

Judíos eã abe que sequia arõte no nda. Jesús quiato chooño abe que sequia arõte no nda. ²⁷ Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia no nda. Seriaçuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ Ūquĩ mi eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã. ³¹ Acheẽ ñooño eãte quia co. Dios quia secheẽ icuate nguiã. Jesucristo ru chõ Dios re. Sã mbia riqui ñee turã mbei erĩ. ³² Aretas resenda que serequia rei Damáscoo ra. Sequia sacuã. Ae que alcalde ra. Ae que mbia mondo rei eiquesa raarõ nda. Setarõ nda eña nde. ³³ Hue rĩ ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icuã si ra.

Pablo ibatenda tea cuu

12 Secuasu asaã saã ñochĩ nguia co. Ae rese Dios semumae mae mbeite cuu nae, ūquĩ nguiatu tasenei jėje. ² Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ūquĩ nda ereseneichĩ mbia je, i que Dios seje ra. ⁵ Ibatenda cheẽ andure secuasus asaã saã arondete raque se. Sequirãcuã je ra secuasus asaã saã eã. Sequirãcuã nea ndese chõ seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶ Secuasus ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuã. Secuasus ra asaã saã eãte jėje. Jẽ ae chõ nda jemaẽ nguiã serese seicua nonde. Jẽ ae chõ nda secheẽ jeñandu

nguiã seicua no. ⁷ Ae rese Dios semumae cuu nae, ūquĩ eturã tuchite seje. Ūquĩ ndese maende que aico secuasus raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacuã. Dios semingo tochi sacuã. ⁸ —Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ūquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ūquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose serĩ. Jẽ nguiatu jeñee turã mbite raque serĩ, mbia ñee icuã mose seje. Ae rui jëingo nae, ūquĩ eaquiatu ãte riqui sesi ūquĩ. Seaquiatu eã ndaque se abe. Ae rui jëingo nae, Jesús cheẽ mbuchecuasa chooño ño ūquĩ nde. ¹² Dios cheẽ mbuchecuasa tuchi chõ se re. Seico mose jendese. Aico minguete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jėje ra. Sã aico turãte iglesias ataque jenda je no. Eĩ si. Jẽ mi je chõ ngue “mbae jembu seje” ae eã nguiã. ¿Ūquĩ eicuate jėje re? “Mbae jembu seje”, iã mose jėje.

¹⁴ Aico icoquiatu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jėje. Mbae achosei chiãte jembae. Jesús rese jëingo mose, ūquĩ mi ño achosei nguiã. Jendu rã ño aico nguiã jėje. Sã mbia ririĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiĩrĩ je no. ¹⁵ Sembae amondo ja bite raque jëingo sacuã Cristo rui. Sereco abe amondo bite raque jëingo sacuã Cristo rui. Sechesequa tuchi mose jendese, ¿mbaerã jëingo nyesequa eãte serese jẽ nde? ¹⁶ “Mbae jembu seje”, ae ãte que sequia jėje. Ūquĩ jëicuate raque. ¿Mbaerã nguia jëingo ñee ñooño nde? “Pablo que nandembĩrĩ irĩ nda”, ¿mbaerã jenyere? ¹⁷ ¿Mbaerã jeñee ūquĩ nde? Ae amondo jėje jembaaquiatu sacuã nae, ūquĩ abe que jembĩrĩ irĩ eãte resẽ. Ūquĩ ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jėje resẽ.

¹⁹ Achiquisã eãte sequia jēsĩ co resẽ. Dios resaa chõ aico nguiã ñee jėje. Cristo rĩ ño aico nguiã ñee jėje. Se

mbae mo naa mose jėje, jěingo tuchi sacua Cristo rese chõ ñene. ²⁰ Seso mose jendea, sembia eã arõte. Ae sebite se, ũquĩ jěsaã eã arõte seje. Ae jembite nae, ũquĩ asaã eã arõte se abe jėje. Jeñee icua icua nda jenyue serésaa reae. Jěingo icua icua ja ra jenyue reae. Jenongue mbae ra jenyosei chosei jě sí chõ ndeae. Jenguasu ra jěsaã ñooño sésaa reae. ²¹ Seso mose jendea ra Dios sembia eã tuchi se mae mose jěicua ndese reae. Seireĩte ra jěicua ndese mae mose. Jěicua cose ndare si jěhui eã mbei chõchĩ namo nyee. Ae jeninisiã nae, ũquĩ ndese jěingo bei chõchĩ ũquĩ. Ae jendu eã nae, ũquĩ ndese abe jěingo bei chõchĩ ũquĩ no. Mbae aba ireingua rese jěingo bei chõchĩ ũquĩ.

Hui bei Pablo saludar i mbia je

13 Aso quia jendea aque cote. Co rei tres veces co cote. Emo mĩ sembiirandu mose mbae icua ndese, achanduchõ nda se. Emo nyeremo ñee mose, aque mose quiatu ra echeẽ achandu cote. ² Ae eicua saã saã nguia nyii nae, sã aico ñee asi asite ee nyii no. ũquĩ sí je chõ aico nguia ã mbesa ã. Huĩcua ndecha eã mose ra achimbirãcua eã ee cote. Jě ja je chõ aico nguia ñee ũquĩ. Seico mose raanguia jendese. ³ —¿Ma Cristo quirãcua ndiqui Pablo rese ma nde? jenyue equia nyii nae. Cristo quirãcua ndese ra jemaẽ secheẽ asi mose quiatu jėje cote. Cristo que mbae saã ja tuchi jě-je uquirãcua je ra. ⁴ Cristo mbia mbucha quia ira rese iquia nyii nae, aque mose que equirãcua neate rei ra. Dios quirãcua nguia emingo bei nguia co cote. Sã Cristo quirãcua nea ndei nyii no. Eĩ ño urequirãcua nea ure namo nde. Ureico rei nguia erese co. Ae chõ ure-

mingo nguia Dios quirãcua je co. Ae quirãcua je ra ureico jembaaquiato quiatu.

⁵ Jě ae chõ jendua. —¿Cristo aicua quia sechiangui re re? jenyue ja ja chõ jeñiangui re. Jemaẽ nguia jenyese sí. Jě Cristo icua chooñoa mose, Cristo riqui jeñiangui re ũquĩ. ¿ũquĩ ndese jěingo iranuate re? ⁶ Ure quia Cristo ureicua chooñoa nguia ã. ũquĩ ndese nda jěirandu rã seje chã. ⁷ Urecheẽ tuchi quia Dios je jeniã ã. Jě mbae icua naa eã sacua. Mbia ndua turã sacua eã ure rĩ ño ureico nguia ñee Dios je jeniã ã. Jě mbae icua naa eã sacua ño ñene. Mbia ra ñee icua ndaque ure je. ⁸ Mbae icua mo nandesaã aroneate Dios cheẽ ndobeishĩ. Mbae turã nguiatu nandesaã Dios cheẽ mose. Dios cheẽ nguia ichõiño eã nde. ⁹ Coche mbia riqui nguia ñee icua icua ure je. Jě nguia jěingo bei Cristo quirãcua ndese. Jě nda Cristo jěicua tuchi rã seje chã. ¹⁰ Secheẽ asi asi ambesa quia seso nonde jendea a. Se ñee asi eã sacua seico mose jendese. Dios quiatu ngue uquirãcua mee nguia seje. Jembicua sacua eã ño ngue Dios uquirãcua mee nguia seje. Jemingo tuchi sacua Cristo rese chõ ñene.

¹¹ Aico hui secheẽ mbesa mbesa si a cote, Seresenda. Jesucristo jěicua tuchi quia. Jěya bei tuchi jěingo erese. Jěingo turã mbei chõ nguia jenyese. ũquĩ mose ra Dios siqui tuchi jendese. Ae ra jemingo turã mbei jenyese. ¹² Saludar jenyue turã mbei quiatu quia jenyue. ¹³ Jesús quiato a jenda saludos mondo quia jě-je aque. ¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espiritu Turã ndiqui bei jendese no. Amén.

GALATAS

Ilo ucheẽ mbesa mondo Galacia jenda je

1 Pablo chõ se re. Jesucristo chiirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacua. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandeicuã ndibishorõ. Nandembui sacua mbae icuã sí. Ae icuã ndese nandeico mae mae nae, ùquĩ sí. Nanderu cheẽ nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo mñi mbia rirõsa huicuã sí

⁶ ¿Mbaerã jêingo hui hui jei Dios sí ùquĩ nde? Ae sí chõ ngue “jêingo Cristo turã ndese” i jêje resẽ. ¿Mbaerã jêingo Cristo cheẽ abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã mñi je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje ùquĩ. ⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ùquĩ mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi rae, ùquĩ ñee mose. ⁹ Acheẽ namo ngue jêje, ùquĩ taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ùquĩ mbasi tuchi. Ae acheẽ jêje nyii nae, ùquĩ abi tuchi chõ eriqui nguiã ñee ùquĩ. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

Cristo chimbaaquiato chee que Pablo ra

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ùquĩ nde. Mbia cheẽ ae eã ño eno nde. Dios cheẽ ae chõ ñene. ¹² Mbia mo ngue esenei eãte seje ra. Jesucristo mñi ño ngue esenei

nguiã seje. ¹³ Jêirandu que equia serese cose resẽ. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheẽ ndui. Seicuã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheẽ ndui que aico tuchi rei sembuchejaa ja sí ra. Seramei ñee ndui que aico tuchi rei quia mbia ja sí ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiĩr teacuquia seje cote ra. Se Dios riiĩr nenei nenei sacua judíos eã je. “¿Mañi ae ra se re?” ae eã ngue oso ñee mbia mo je ra. Dios nguiĩr ndeacuquia mose seje. ¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chimbaaquiato ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra. ¹⁹ Jacobo abe rese que amae huee ra. Jesús nongue que ae ra. ùquĩ mñi ndese que amae Jesús chimbaaquiato ra. ²⁰ Acheẽ ñooñoa tuchi chõ nguiã ã mbesa jêje a. Dios secheẽ ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque mose ra. ²³ Jirandu randuchõ ño ngue equia serese ra. “Ae icuã icuã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacua”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

Cristo chimbaaquiato ataque Pablo isi turã

2 Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ùquĩ mñi ngue acheẽ ja Jesús quiato rerecua je ra. ùquĩ secheẽ icua sacua. ùquĩ sembaaquiato sacua se Dios cheẽ abi mose. ³ “Circuncisión nandesaã na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuã naa naa sacua ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo mñi ndese ra.

“Sã eriqui judíos ramei ñee ndui bei”, i chõ ngue equia ra. ⁵ Ûquĩ ñee ngue uresiquisã tuchi quia ra. Jẽingo bei sacua Dios cheẽ turã mi ndese. “Jesucristo turã ae nandemingo bei nguiã co”, jenyê sacua. Jẽingo rocoĩ judíos rerecua cheẽ ndui. ⁶ Dios quiato rerecua que sembaaquiatu quiatu eãte mbae mo ni nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ùquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo judíos je no jẽ. Dios cheẽ nenei nenei sacua no. Eĩ si chõ Dios Pablo mondo quia judíos eã je re. Dios cheẽ nenei nenei sacua ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacua ee. Dios ùquĩ mingo bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i mi ño ngue ure je ra. Ûquĩ ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icua nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireĩte que judíos si ra. Nyebe nyiicuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyiicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyiicuasẽ judíos eã si cote ra. Pedro rui si no. ¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyiicuasẽ mose judíos eã si. Nyebe acheẽ asi nguiã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icua na eã ndaque nande. ¹⁶ Emo mi siqui turãyã mbeite quia Moisés cheẽ ndui si co. Dios emingo bei sacua. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã.

Dios nandemingo bei sacua. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicua ni nda”, nande bei equia ã. ¿Ûquĩ ño nandembiicua nguia re? Tei. Cristo riqui nandembiicua eã mbei co. Cristo quiatu nandembiirandu quia nandeicua ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ùquĩ cote. ¹⁹ Moisés cheẽ ngue aicuate rei ra. Ûquĩ ngue seicua mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicua mbutiã cote ra. Seico bei nonde cote. ²⁰ Cristo mano mose, se abe que amano erese ra. Se ae aicoã nguiã co cote. Cristo riqui sechiangui re co cote. Equirãcua je chõ aico nguiã mbae raã naa co. Dios ririĩ aicuate quia co. Ae chõ ngue nyesecua tuchi nguiã serese. Ae chõ ngue mano nguiã seicua ni. ²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icua mbutiã. Ûquinde rae, Jesús manoño.

Moisés chimbesa aba mingo bei aronea

3 ¿Mbaerã jẽaquiatuã tuchi riqui re, Galicia jenda? ¿Aba jembaaquiatu icua tuchi quia Cristo ririĩ nde? Cristo mano ngue asenei tuchi rei jẽje resẽ. Jẽisi turãte rei que equia nyii. ¿Mbaerã jẽingo hui serĩ serĩte esi cote re? ² Moisés cheẽ mumbayã mose eã ño Espiritu Turã ique nguiã jeñiangui re. Jẽ Jesucristo icua mose chõ ngue re. Se Jesucristo renei mose jẽje chõ ngue re. ³ ¿Mbaerã jẽaquiatuãte riqui re? Moisés chimbesa que jẽicua mbutiã eã ndesẽ. ¿Mbaerã jẽingo siqui beite erese re? Siqui rocoĩ Jesucristo mi ndese. ⁴ Mbae rasi que jẽsaã tuchi quia Jesucristo ririĩ nyii resẽ. Jẽhui eã ño esi jẽ. Ñ nda ae rasi jẽsaã nguia nyii nae, ùquĩ iru eã. ⁵ ¿Mbaerã Dios Espiritu Turã mondo jẽje chã? ¿Mbaerã ño Dios mbia mae sayã naa naa jẽje chã? ¿Moisés cheẽ jemumbayãte quiatu quia ee re? Tei. Ûquĩ eã ñene. Jẽ nguia Jesucristo jẽicuate nguiã ùquĩ. ⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã. ⁷ Nyebe Dios riqui nguiã “Abraham nducucha” i huiicuaa je co. ⁸ “Judíos eã abe ra Dios ririĩ icua. Ûquĩ abe ra Dios mingo bei”, i que embesa ji cose ra. “Nderiĩ nda aico turã mbia ja je”, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ùquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ûquĩ nda nyoĩ chõ tata cuasu. Sã embesa ji riqui ñee no. “Emo embesa ji cheẽ mumba mbiriĩ mose, echeẽ mumba tuchi raanguia chõ ùquĩ nde”, i que embesa ji ra. ¹¹ Dios ra ñee jiri jiriã emo ni. “Co que embesa ji cheẽ mumbayã mbei quia ra. Nyebe taisi turã”, i eã nda

Dios emo je. Ae je Dios riqui “co taisi turã”, i nae, Dios icuate quiatu nguiã ee ùquĩ. Nyebe ra ùquĩ ndeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ùquĩ. ¹³ Cristo que nandembui Moisés cheẽ si cote ra. Nande Moisés cheẽ mumba mose, ùquĩ nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacuaã judíos eã je chõ ngue Jesús mbae rasi aba ireingua saã tuchi nguiã. Dios judíos eã mingo bei sacuaã ño ngue re. Sã Dios turãte riqui Abraham je nyii no nae. Eĩ si sacuaã Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã fir-mar i embesa mii no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiirĩ je abe no. “Abraham ndiirĩ ja je”, i eã ngue embesa ji ra. “Abraham ndiirĩ je”, i chõ ngue ñee nguiã aque mii je. Cristo riĩ ño ngue ñee nguiã. ¹⁷ Tacheẽ nyecua tuchi rã jėje. Dios que contrato saã Abraham je cose ra. —Mbae tasaã ndeje. Nderiirĩ je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ ngue contrato mbutiã aroneate ra. Dios cheẽte quiatu ngue contrato re. ¹⁸ Dios que ñee Abraham je cose ra. —Mbae tasaãño ndeje. Nde mbae mo naa ndocoĩ seje, i que Dios ñee Abraham je cose ra. —Nde Moisés cheẽ mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoĩ, i chõ ngue ee ra. ¹⁹ ¿Mbaerã ño nda Moisés chimbasa cheẽ nandechandu chã? Mbia huĩcuã icua sacuaã ño Moisés chimbasa re. Cristo tu mose chõ ngue Moisés chimbasa cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui ro-coĩ

²¹ Ae contrato Dios saã Abraham je nae, Moisés chimbasa ùquĩ mbutiã aroneate quia co. Moisés chimbasa aba mingo bei arõ mose, eĩ nda Jesucristo manoate rei. Moisés chimbasa aba mingo bei

aroneate. Nandechiã abe mbitirõ aroneate no. ²² “Mbia icuaã ja chõ ñene”, i que embesa ji ra. Nyebe nandemo mbae mo turã naa aroneate siqui bei sacuaã. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, ùquĩ ño ngue nandesaarõ arõ nguia ra. ²⁴ Mbia mbaaquiatusa rã ño Moisés chimbasa re. Mbia mbiirandu que Cristo rese ra. Mbia siqui nonde Cristo mii ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe Dios riirĩ ja chõ nande re. ²⁷ Nandembucha ji nandeico mose Cristo riĩ, Cristo rã sí chõ nandeico nguiã ã cote. ²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mii na tuchi chõ nda nandeico ja nguiã Cristo rese cote. ²⁹ Cristo icuasa chõ jëingo nguiã ùquĩ. Nyebe Abraham ndiirĩ abe chõ jëingo nguiã ùquĩ no. Ae turã nda Dios saã Abraham ndiirĩ je nae, jėje chõ nda eraã nguiã.

4 Sã mbaecha riirĩ mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, ùquĩ ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde. ⁴ Dios que “coche ñene” i cote ra. ùquĩ mose que nguiirĩ mondo mbia je íbii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose íbii ra. ⁵ Ae que tu nandembui bei Moisés cheẽ si cote ra. Dios nandererequia sacuaã nguiirĩ na cote. ⁶ Dios riirĩ ño nande cote re. Nyebe Dios Espiritu Turã mondo nguiã nandechiangui re cote. Nyebe nandeico nguiã Paba i tuchi Dios je namo cote. ⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jëicuayãte quia nyii ra. Dios abareã ndese chõ ngue jëingo aque mose ra. ⁹ ùquĩ jëingo Dios icuate ùquĩ cote. Dios abe riqui jëicuate co cote. ¿Mbaerã nguia jëingo hui serĩte esi cote re? ¿Mbaerã nda jëingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneate nande je resẽ. ¹⁰ “Co tenda mbae mo nandesã Dios je Dios

nandeisi turã sacuaã", jenyẽ chõchĩ nguiã ùquĩ. "Co nyasi mbae mo nandesaã Dios je Dios nandeisi turã sacuaã", jenyẽ chõchĩ nguiã ùquĩ no. Eicuaã tuchi chõ ùquĩ nde. ¹¹ Jaembaaquiatu quiatu iru chõ se reae.

¹² Se rã ño jẽingo ae. Sã aico eãte Moisés chimbesa cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no. ¹³ Se Jesucristo renei namo mose jẽje, serasite quiatu ngue se aque mose re. Ùquĩ jẽicuate quia ùquĩ. ¹⁴ Mbae rasi que asaã tuchite rei aque mose ra. Serasi que jẽucuaã eãte quia aque mose ra. Serasi que jẽisiteã eãte quia aque mose no nda. Angeles que jẽsaã ño seisi turã aque mose ra. Jesucristo que jẽsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jẽingo secheẽ isi sereãte cote re? ¹⁶ Dios cheẽ ngue asenei turã tuchi quia jẽje. ¿Ùquĩ je chõ jẽingo seucuãyãte cote re? ¹⁷ Ae riqui jembaaquiatu icuã icuãte ùquĩ nae, ùquĩ siqui sete raque jendese ùquĩ. Mbae turã nii eã ño ñene. Jembiiicha sacuaã ure sí chõ ñene. Jẽingo sacuaã ùquĩ achõ ndese chõ ñene. ¹⁸ Coche rei ùquĩ siqui jendese Dios cheẽ nenei nenei turã mose jẽje. Sã eriqui jembaaquiatu turã turã mbei. Seicoã mose abe jendese. ¹⁹ ¿Mbaerã jẽingo sembia eã tuchi ùquĩ nde? Jẽhui serĩ serĩ mose Dios turã sí. Sã ãquẽ ndasi riqui cuña je no. Eĩ ño seya eã ndasi nguiã jendese co. Jẽingo sacuaã Cristo rã sí. ²⁰ ¿Mañi ae ra se quia jẽje re? Aico rã nda jendese chã. Se ñee tuchi nonde jẽje. Secheẽ mbesa rocoĩ mondo jẽje.

Sã Abraham ndiirĩ nyeremo no

²¹ ¿Mbaerã jẽingo ñee nde? "Moisés cheẽ nandemumbayã, Dios nandemingo bei sacuaã", ¿mbaerã jẽingo i re? Moisés cheẽ jẽicuaãyãte quia reae. ²² Moisés chimbesa chõ nandembiirandu nguiã Abraham rese co. Abraham ndiirĩ nyeremo ndei que ra. Co mĩ ngue eninisite riiirĩ nda. Sara, i que eninisite je ra. Agar, i que erimba je ra. Aque abe que Abraham nbiiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã sí chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ùquĩ io sacuaã ño eninisite tiirĩ cote ra. ²⁴ Nandemundua sacuaã ño ùquĩ nde. Contrato rã sí chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã sí chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde. ²⁵ Sinaí rã sí chõ Agar re. Arabia jenda chõ Sinaí re. Jerusalén na sí chõ Sinaí re. Ae siqui quia Jerusalén nae, erimba rã sí chõ ùquĩ nde. Erimba rã sí chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia rimba mo eã ño ùquĩ nde. Hue jenda chõ nande abe no nde. ²⁷ Sã embesa ji riqui ñee no:

Ndeya chõ eico, tiiriã je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua sí cote, i que embesa ji ra. ²⁸ Dios riiirĩ tuchi chõ nande re. "Seriirĩ tuchi ra ùquĩ", ã i Dios nanderĩ nyii no. Sã ñee Isaac nii nyii no. ²⁹ Sã Dios ñee Abraham je nyii no. "Nderiiri-na tamondo ndeje Isaac", sã i ee no. Sã Isaac nyaacuquia Espiritu Turã nii no. Sã Agar riiirĩ icuã icuã Isaac je cote no. Eĩ sí chõ namo no nde. Ae siqui tuchi judíos cheẽ ndui nae, ùquĩ icuã icuã ndiqui namo nande je ã no. ³⁰ ¿Mañi ño embesa ji cheẽ ña? "Erimba emombo chõ. Eriirĩ ndese. Eninisite riiirĩ na eã ño erimba riiirĩ nde. Erimba riiirĩ siqui aroneate eninisite riiirĩ ndese", i que embesa ji ra. Eĩ sí chõ ae siqui tuchi quia judíos cheẽ ndui nae. Siqui aroneate Jesús quiatorã. ³¹ Erimba riiirĩ na eã tuchi chõ nande re. Eninisite riiirĩ na tuchi chõ nande re. Nande Jesús icua mose.

Cristo nandembui Moisés chimbesa sí cote

5 Cristo que nandembui Moisés chimbesa sí cote ra. "Moisés chimbesa cheẽ nda semingo bei", jenyechĩ nda jẽ. Ae ra i ùquĩ, mbia rimba rã ño ùquĩ nde. ² Tacheẽ nyecua tuchi rã jẽje. Circuncisión nda jẽsaãchĩ. Moisés chimbesa cheẽ ndui ra jẽingochĩ cote jẽ. Cristo mĩ ndese chõ jẽingo cote. Jẽ circuncisión naa mose, jẽingo turã eã ño nguiã Cristo rui ùquĩ cote. ³ "Moisés chimbesa cheẽ tamumbayã mbei", i raanguia chõ circuncisión nde. ⁴ "Dios ra seisi turã seico bei mose Moisés cheẽ ndui" i mose jemo, Dios chẽẽ abi tuchi chõ ùquĩ nde. Dios turã sí nyiiicuasẽ tuchi chõ ùquĩ nde. ⁵ Espiritu Turã ndiqui nanderese co. Nande Jesucristo nandecuate quia ã. Nyebe ra Dios nandeisi turã Jesucristo mĩ nii. ⁶ Nandeico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ùquĩ nguia eturã tuchi re. Nandech-esecua mose mbia rese, ùquĩ nguia eturã tuchi no nde. ⁷ Jẽingo turãte rei que equia nyii. ¿Aba jembui Cristo cheẽ sí cote re? ⁸ Dios eã ño ngue jembui nguiã esi. Dios chõ ngue "jenyu" i nguiã jẽje. ⁹ Sã levadura riqui no. Eñetẽ mondo mose mbichae ye, mbuquiche ja rae. ¹⁰ Dios ra jendeaquiatu bei. Mbia mo jembiiicha eã sacuaã esi. Ae jembiiicha serĩte quia esi nae, ùquĩ nda Dios mbasi. Ererecua raque ra emo. ¹¹ "Circuncisión jẽsaã na", ae ãte quia mbia mo je co. "Circuncisión jẽsaã na", se i mose, eĩ nda judíos icuã icuã eãte rei seje. Eĩ nda judíos paama i ãte rei seje Cristo mano nenei nenei mose mbia je. ¹² Ae "circuncisión jẽsaã na", i quia jẽje nae, ùquĩ nda nguete chisia tuchi rã jendecha chã.

¹³ Jesucristo que jembui Moisés cheẽ sí ra, Seresenda. Ae icuã jenyosei chosei quia nae, ùquĩ ndese ra

jëingo chĩ cote jë. Jëingo turã nguiatu quia jenyue. Jenyesequa tuchi quiatu quia jenyiese. ¹⁴ Dios cheẽ ja tuchi chõ ã nde: "Sã ereico nyesequa ndechiese no. Eĩ ere si chõ nyesequa emo ndese", i que Dios cheẽ nda. Nandehesequa mose mbia rese, Dios cheẽ nandemumbayã tuchi chõ nguiã ùquĩ. ¹⁵ Paama jenyechĩ nda jenyue jë. Jenyishiũ shiuchĩ nda eno jë. Ùquĩ naa naa mose ra jëhui ja ja chee Cristo si.

Ae icuã nandehosei chosei quia nae, ùquĩ si nandehui

¹⁶ Tacheẽ nyecua tuchi jëje. Espiritu Turã ñee ndui bei jëingo. Ae icuã jenyosei chosei quia nae, ùquĩ ndese nda jëingoã cote chã. ¹⁷ Ae mbae icuã nandehosei chosei quia nae, Espiritu Turã quiatoã tuchi chõ ùquĩ nde. Ùquĩ quiatoã tuchi chõ Espiritu Turã no nde. Ae nandehosei chosei quia, nyebe ra ùquĩ nandesaã eã. ¹⁸ Jëingo mose Espiritu Turã ndui, "Moisés cheẽ nda nandemingo bei" jenyue eã nda cote. ¹⁹ Ae siqui quia ubi icuã ndese nae, mbae icuã esaã ata atate quia ã. Siqui siqui chõ nguiã ngu eã ndese no. Siqui chooño mbia rese. ²⁰ Dios abareã ndese siqui chooño. Brujería abe rese siqui chooño. Mbia ucuãyã cuãyã. Siqui icuã icuã nyue. Mae icuã icuã emo ndese. Paama i jei jei emo je. Abei chiã. Mbia mbuqueta queta. ²¹ "I ãchĩ sembae", i mbia mbae osei osei. Mbia iquia. Quiacua. Siqui chooño mbae ja rese. Ae ã icuã ñumumbara saã saã mbeite quia nae, ùquĩ nderecuarã eã mbei ra Dios.

Espiritu Turã ño aba mingo nguiã mbae turã ndese

²² Ae siqui quia Espiritu Turã ndese nae, Espiritu Turã ño emingo nguiã mbae turã ndese ã. Nyesequa chõ nguiã mbia rese. Eya chõ eriqui nguiã. Quicoi coi eã ño nguiã. Siqui tochi chõ nguiã. Siqui turã ño nguiã. Ucheẽ mbuchebe chebiã ño nguiã. ²³ Eseteã ño eriqui nguiã. Ae ae chõ nyiteaquiatu nguiã mbae icuã si. Nande ùquĩ naa naa mose, emo ñee aroneãte nande je cote. ²⁴ Sã Cristo mano nyii no. Eĩ si chõ Cristo quiato undua icuã mbutiã nguiã no. Cristo mano nyabe.

²⁵ Sã Espiritu Turã ndiqui nandereco mingo turã co no. Eĩ nande sí siqui turã erui jë. Ae nandererequia turã bei nonde mbae turã ndese. ²⁶ Nandecuasu ra nandesaã saãchĩ jë. Nandecuaã techĩ nda nandehue jë. "Aque rã eãchĩ se", nandechĩ nda mae icuã icuã nandenongue rese jë.

Jendua chõ nguia nyiese mbae mo naa jenongue je

6 Emo mbae icuã naase i i mose, "Dios rui eico" jenyue chõ ee. Ae jemo siqui tuchi quia Dios rese, ùquĩ mo ñee ee. Embucuata turã sí nonde Dios rese.

Jënee mingue mingue chõ nguia ee. "Mbae icuã tã i arõte se abe je", jenyue chõ nguia ndua jë abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ùquĩ nde. ³ "Seaquiatute rei ñene", i mose eaquiatuã mo, ae sí chõ ñimbĩĩrĩ irĩ nguiã aque. ⁴ Ae ra eresaã mbae mo nae, esaã turã mbei chõ nguia. Ùquĩ mose ra ndeya quiatu tuchi ndechisaã ndese. Mae ndocoĩ emo nyisaã ndese. ⁵ Nande ae ae nandehimbirãcuã nguiatu nandeya eã ndasi ae ae je.

⁶ Emo siqui mose jembaaquiatu quiatu Cristo rĩĩ, mbae ja quia jemondo mondo quia ee. ⁷ Erechimbĩĩrĩ irĩchĩ nda ndehue si jë. Dios abe erembĩĩrĩ irĩ aroneate. Ae ra erechitiquia mbae mo nae, ùquĩ sí chõ nda ereucua. ⁸ Ae siqui quia ubi achõ ndese nae, ùquĩ nda ua chee. Ae siqui Espiritu Turã ndui nae, ùquĩ nda Espiritu Turã mingo bei. ⁹ Nandehimondocho eã ño nguia mbae turã naa naa mbei jë. Nandehui eã mbei chõ nguia esi jë. Ùquĩ mose ra Dios mbae mee tuchi jee nande je cote. ¹⁰ Mbae turã nandesaã saã mbei chõ nguia mbia je. Jesús quiato je quia mbae turã nandesaã saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguiã jëje aque. Sã letras cuasute. ¹² Ae "circuncisión jësaã", i quia jëje nae, siqui turã sacua mbia rese chõ ùquĩ nde. Siqui turã ndocoĩ Cristo rese. "Cristo ae ra aba mingo bei" i sereã. Siquichete quiatu mbia si re. ¹³ Ae circuncisión saã nguia nae, ùquĩ abe riqui eã Moisés cheẽ ndui ùquĩ. "I nda mbia riqui urerui", i chõ nguiã "circuncisión jësaã" i jëje ùquĩ. Ucuasu ra esaã saã jë circuncisión naa mose. Eyate ra jendese cote, jëingo mose erese. ¹⁴ Jesucristo mii ndese chõ nda seya se. Ae mano ira rese. Ae mii ñi nda acheẽ ñee mbia je. Mbae mo ndese abe eã nda seya se. Jesucristo mano mose ira rese, se abe que amano mbae icuã si ra. Mbae icuã abe que mano sesi no nda. ¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandehiã mbiasu mose, ùquĩ nguiatu eturã tuchi re. ¹⁶ Ae siqui quia Jesucristo mii ndese nae, sã Dios turã ndiqui bei ùquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jësbishorõchĩ namo jë. Emo mose abe jë. "Pablo eaquiatuãte", sã emo i eã cote. Sã mbae rasi airara rara beite quia Cristo rĩĩ co no. Sã seiruã nuasa cherõ areco serete rese co no jë. Jesucristo rĩĩ ño ùquĩ nde. ¹⁸ Sã Jesucristo turã ndiqui bei jendese, Seresenda. Amén.

EFESIOS

Pablo embesa Jesús quiato Efeso jenda je

1 Se rei Pablo. Dios que seirabo ra. Jesucristo chim-baaquiatu sacuaã. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechẽ turã mbei chõ nguia Dios rĩĩ. Jesucristo ru rĩĩ. Jesucristo rese chõ nandeico nguiaã ã cote. Ibatenda chõ nandeico nguiaã ã cote. Nyebe Dios riqui nguiaã mbae turã naa jate nande je co. ⁴ Dios que nandairabo nyii ra. Cristo rĩĩ. Mbae ao ja nonde. Nyesecua tuchi que nanderese ra. Nyebe nandeicuã mbutiã ja nguiaã nandesĩ. Nandeico turã sacuaã enonde. ⁵ Dios que nandairabo tuchi coose ra. Mbae ao nonde. —Jesucristo rĩĩ nda seriirina jê, i que nande je nandeicuã mose ra. ⁶ Nandechẽ mbei sacuaã Dios turã niĩ. Uturã je chõ nandeisi nguiaã Jesucristo rĩĩ. ⁷ Jesucristo mĩĩ ngue mano nanderiõ sacuaã mbae icuaã si ra. Ae rĩĩ ño Dios nandeicuã mbutiã nguiaã nande si cote. Dios turãte quia nande je re. ⁸ Dios que uturã teacuquia ja nande je ra. Nyebe eriqui nguiaã mbae icua jate nande je. ⁹ —Seriirĩ nda amondo mbia je íbii. Ae ra mbia mangue choõnoa jenda mingo ja serese cote, i que Dios cose ra. ũquĩ ngue eteacuquia nande je cote ra. Nande eicua sacuaã. ¹⁰ Dios icoquiatu mose ra mbae mbuchicuabo ja cote. Nandemunua ja ra ñno Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ niĩ ño ngue Dios nandairabo nguiaã cose. Mbae tiã mose que Dios nandairabo nyii ra. Ae sí mbae turã naa naa sacuaã nande je. Dios cheẽ nguire mbae riqui nyecua bei ã. ¹² Urecheẽ turã mbei sacuaã Dios rĩĩ ño ngue ureirabo nguiaã. Ure rane ngue Cristo ureicua nyii ra. ¹³ Jê abe que Cristo jêicua chee cote ra. Jê echeẽ turã andu mose. —Cristo ra jendiro jêicuã si, i mose jêje. Jê Cristo icua mose que Espiritu Turã Cristo mbae marca mĩĩ jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca mĩĩ jendese cote ra. ¹⁴ Espiritu Turã ndiqui nandechiangui re co. Nyebe nandeico nguiaã ñee. —Dios ra mbae mee ja nande je ucheẽ nguire, i. Dios que nandeisi Jesús ruqui

ribishorõ nda. Nandemingo bei ra erese cote. ũquĩ niĩ ño Espiritu Turã Cristo mbae marca mĩĩ nguiaã nanderese. Nandechẽ turã mbei sacuaã Dios rĩĩ ño ngue ũquĩ nde.

Sã Dios jembirandu uquirãcuã ndese, i Pablo

¹⁵ Airandu que jendese ra. Jesús jêicua tuchite quia ũquĩ. Jenysecua tuchite equia Dios quiato ja rese ũquĩ. ¹⁶ Nyebe aico nguiaã ñee hui ãte Dios je. Gracias, i bei ee jenĩ. ¹⁷ —Paba, ndequiato embaaquiatu tuchi Cristo rĩĩ. Cristo eicua uquia tuchi ee, ae beite se quia Dios turã je jenĩ co. ¹⁸ Acheẽ mbeite quia Dios je jenĩ co. —Paba, ae turã nda eresaã je ndequiato je nae, ũquĩ ndese embirandu jiri namo. Ae turã nda eremeje ee nae, ũquĩ ndese abe embirandu. ¹⁹ Ndequirãcuã ndese abe embirandu, ae beite quia Dios je jenĩ co. Dios quirãcuã nda ua eã mbei. Equirãcuã ndiqui Jesús quiato chianguí re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi mĩĩ ujii ra. ²¹ Dios que Jesús mĩĩ mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasu tuchi ibi jenda ja si. Ibatenda abe mo si. ²² —Mbae ja rerecua tuchi rei Jesús, i que Dios ra. —Sequiato rerecua ja chõ ae re, i que Dios ra. ²³ Dios quiato rei Jesús rete rã. Jesús riqui uquiato chianguí re co. Manguiti eriqui eã aroneate. Mbae aosa ja chõ ae re.

Uturã niĩ Dios aba riroõ aba icuaã si

2 Dios que ngueco mondo jêje cote ra. Jêicuã niĩ ño ngue jêingo nguiaã eraaque rã nyii. ² Mbua ataque rã tuchi que jêingo aque mose ra. Mbae icuaã naa naa ndesechi. Satanás ñee ndui beite que jêingo nyii ra. Equirãcuãte que eriqui jêje ra. Ae siqui ãte quia Dios rese nae, ũquĩ ño Satanás ñee mumbayã nguiaã ã. ³ Eĩ nande que equia cose nyii ra. Ae nandebite riqui mbae icuaã nyii nae, ũquĩ ndesechõ ño ngue nandeico ra. Ae rese nandeico ndua beite mbae icuaã nyii nae, ũquĩ ndesechõ ño ngue nandeico nyii ra. Mbua ataque rã sí chõ ngue nandeico mbae icuaã naa naa nda. Dios nda nandembasi nguiaã nandeicuã niĩ ña. ⁴ Eyayãte quiatu ngue eriqui rei nguiaã nanderese. Nyesecua tuchite quiatu que equia nanderese ra. ⁵ Eraaque raãte raque nande nandeicuã niĩ nyii. Nyebe ngueco turã mondo nguiaã nande je Cristo raaque mbuquera si mose. Dios

turã ae chõ jendirõ nguiã jêicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo rîf co. Ì nda mbia jirandu randu Dios chisaã turã ndese emo mose. Ibátee nandeico mose abe no. ⁸ Jê ngue Jesús jêicua ra. Nyebe que Dios jendirõ jêicuã si ra. Uturã niñ ño ngue jendirõ nguiã jêicuã si. Jê ae jeñimbucha aroneate Jesús rese. Dios ae ngue jembucha nguiã erese. ⁹ Nandechisaã turã niñ eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderîf cose ra.

Cristo miñ ño mbia mingo turã turã nguiã nyiese

¹¹ Dios rese que jêingo áte nyii ra. Ûquĩ si jêtesareia ño. Judíos eã ño ngue jê ndesê. Nyebe judíos jendirirõ nguiã. Circuncisión ngue jêsaã eãte judíos rã ndesê. ¹² Jêingo eãte que Cristo rese nyii resê. Jêingo turã eãte que equia Dios rimba je resê. Dios cheê si que jêingo ishote resê. —Dios ra mbae turã saã nande je, jeye áte que equia ndua aque mose resê. ¹³ Jesucristo mbae chõ jê cote re. Ishote jêingo raque Dios si cose. Dios que jembucha tuchi uchiese Jesucristo mano niñ nda. ¹⁴ Cristo miñ ño nandemingo turã nguiã nyiese ã. Ae miñ ño judíos mingo turã nguiã judíos eã ndese co. Ae miñ ño judíos eã mingo turã nguiã judíos rese co no. Ûquĩ ngue siqui icuãte quia nyue Cristo icuayã mose nyii ra. Mbia miñ na ño eriqui nguiã siqui turã nyue ã cote. ¹⁵ Umano mose que Jesús judíos mbui mondo Moisés cheê si cote ra. Ae Moisés ñee, judíos echeê mumba eã sacua nae, ùquĩ si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ûquĩ siqui mose Jesús rese, co miñ na ño eriqui nguiã ã cote. ¹⁶ Ûquĩ icuã icuã mose nyue que Cristo mano ùquĩ icuã ndiquicharõ nda. Ûquĩ mingo turã ja nonde Dios rese. Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espíritu Turã miñ nandemingo ja nguiã nyiese ã. Dios nandesîchã ja arõte qui a ã cote. ¹⁹ Mbiamo eã ño jê Dios je cote re. Á jêingo ishote eãte Dios si ã cote. Dios riirîf tuchi chõ jê cote re. Cristo resenda ataque rã sí chõ jêingo nguiã ã cote. ²⁰ Tuchua raã ji mo na ndei jê. Jesús chimbuaquiatu rei tuchia i rã. Dios cheê mbuchecuaa cose ndare abe rei tuchia i rã no. Jesucristo rei ùquĩ i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã.

Nande Jesús quiato tubirîa i ite riqui ã. ²² Espíritu Turã ño jemingo nguiã Dios rese jê abe ùquĩ. Nyebe jê abe jêingo Dios chuchuarã ùquĩ. Dios riqui jeñiangui re ùquĩ.

Judíos eã abe ra siqui Dios rese, i Pablo

3 Se rei Pablo. Jesucristo rimba. A setarõ ji ñi jeniñ a. Jê judíos eã niñ. —Judíos eã abe riqui Dios rimba ã, ae beite que se quia jeniñ nda. Nyebe setarõ ji ñi nguiã a. ² —Judíos eã je chõ seturã esenei senei nde, i que Dios seje ra. Ûquĩ ndese beite aico co. Jêirandu equia serese reae. ³ —Judíos eã abe ra siqui serese. Secheê turã esenei senei ee, i tuchi que Dios sembaaquiatu ra. Ûquĩ ngue asenei jua chõ jêje ra, se embesa mose jêje nyii. ⁴ Sechimbesa rese jemaie mose ra jeñee cote. —Pablo Dios cheê icua tuchi chõ nguia judíos eã niñ nde, jeye ra cote. ⁵ —Judíos eã abe ra siqui serese judíos rã si tuchi, i eã ngue Dios mbia mo je cose ra. Namõ ño mbia jirandu nguiã ùquĩ ndese. Namõ ño Espíritu Turã Jesús chimbuaquiatu mbiirandu nguiã ùquĩ ndese. Dios cheê mbuchecuaa abe mbiirandu ùquĩ ndese. ⁶ Á ndei Dios cheê mbuchecua ramo ji ã: Judíos eã abe ra siqui Dios rese judíos rã si tuchi cote. Mbia rete miñ na nda eriqui ja cote. —Mbae turã tasaã jêje Jesucristo rîf, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷ —Ûquĩ secheê esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ùquĩ naa sacua nda. ⁸ Dios turã tuchite que seje ra. Se mbae raande rocof ee nyii. Nyebe ñee nguiã seje. —Secheê esenei senei mbei quia judíos eã je. Ae rese mbia riqui jiranuate Cristo turã nae, ùquĩ esenei senei judíos eã je, i que seje ra. ⁹ —Ae turã nda asaã judíos eã je nae, ùquĩ ndese mbia embiirandu ja cote, i que Dios seje ra. Dios quiarei ndua ndua ùquĩ nyii. Mbae ao ja nonde nyii. ¹⁰ Mbaerã ño Dios mbia mbiirandu ùquĩ ndese cote chã. Mbia jirandu sacua Dios aquiatu rese chõ ñene. Dios judíos eã mingo turã mose judíos rese, mbia ra nyuruirã tuchi mae Dios quirãcuã ndese. Ibatenda abe ra nyuruirã tuchi mae erese no. ¹¹ Dios ndua ndua ùquĩ nyii. —Mbia chumubarate riqui raque ã. Emo emo nda ambucha nyiese Cristo mano mose, i que Dios cose ra. Ûquĩ ngue esaã Jesucristo rîf cote ra. ¹² Nandeico Jesucristo icuate ã cote. Nyebe nandeico nguiã siquicheate ñee Dios je ã cote. ¹³ Ae mbae rasi asaã nguia cárcel co nae, jeniñ ño ñene. Seyate se mbae rasi raã mose jeniñ. Jê abe jeñimbua chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguiã uchiese. Nyebe aico nguiã gracias i bei Dios je co. ¹⁵ Á nan-

dechumumbarate riqui íbii ã nae, ùquĩ ndu ja chõ Dios re. Ibatenda abe ru chõ ae no nde. ¹⁶ Dios mbae saã ja arõte nande je. Ebite mbae raã mose nande je. Nyebe aico nguiã ñee ee jenii a. —Paba, Espiritu Turã emondo tuchi echiangui re. Embuquirãcuã sacua, ae chõ nguiã ee a. ¹⁷ —Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jenii co. ¹⁸ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiatu quia ùquĩ ndese. Sã Cristo quiato riqui ndua ja ùquĩ ndese. Sã Dios riqui tuchi jeñiangui re. ²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùquĩ abe chee esaã arõte quia nande je co. ²¹ Sã Jesucristo quiato riqui ñee turã mbei Dios je Jesucristo rĩ. Mbae ua ja mose chee. Eĩ si ra equiato quia ñee turã mbei erĩ. Amén.

Hue rĩ ja chõ Espiritu Turã ndiqui nguiã Jesús quiato mundua

4 Setarõ ji aĩ Jesús rĩ a. Secheẽ amondo quia jẽje aque. Jẽingo turã ño nguia Cristo rã si. Dios chirabote quia jẽ nde. ² Jẽseteã ño jẽingo. Jẽingo tochi chõ nguia. Jendosẽ nguiatu chõ nguia jenyue. Jenyesequa chõ nguia jenyese. ³ —Hue rĩ ja chõ nandeico ndua jẽ, jenyẽ chõ nguia jenyue. Sã Espiritu Turã ndiqui jemundua hue rĩ ja. ⁴ Jesús rete mii na ño nande re. Espiritu Turã mii ño siqui nguiã nandechiangui re co no. Jesús mii na nda nande ja nandeico. ⁵ Ae mii ño nandererecua ja re. Ae mii ndese chõ nandeico ja nguiã ã. Aque mii ñi ño ngue bautizar i nguiã nande je no. ⁶ Dios mii ño nanderu ja re. Ae mii ño nandemingo nguiã mbae rese. Ae mii ño siqui nguiã nandeite re co no. ⁷ Dios que nandechisaã ae aerã mee nande je ra. Cristo que uturã mee mee nande je ra. Ae ra nandesaã saã, ùquĩ naa naa turã sacua. ⁸ Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra, i que embesa ji ra. ⁹ Jesús que siqui íbatee nyii ra. Aquere que eru nguichi íbii cote ra. ¹⁰ Ae sí que oso nyui ibei robei cote ra. Mbae rerecuarã ja sacua ngue ae cote ra. ¹¹ Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei serĩ, i que emo emo je ra. —Mbia serimba etequiatu bei, i que emo emo je ra. —Mbia embaaquiato quiatu bei quia, i que emo emo je no nda. ¹² Eĩ ngue Dios uquiato mbaaracua racua ja uchisaã ae aerã ndese ra.

Ùquĩ mose ra Jesús quiato Jesús ose i i tuchi cote. ¹³ Ùquĩ mose ra nandendua ja Jesucristo rese hue rĩ ja. Ùquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. ¹⁴ Ùquĩ mose ra nandeico ñimbirãcuã tuchi Cristo rese. “Tambĩĩĩ irĩ Cristo rĩ” i mose emo nande je, nandeicoã nda ùquĩ ndese. Nandendua ata ata eã nda Cristo rĩ. Ae mii ndese chõ nda nandeico bei. Mbia riiĩ na nda nandeico ndua ata ata eã. ¹⁵ Ùquĩ mose ra nandechẽ ñooño eã. Mbia ra nandembĩĩĩ iriã. Nandechesequa ja ra equia mbia rese. Cristo rã si chõ nda nandeico turã. Dios quiato rerecua tuchite quia ae re. Sã nandẽquĩ nanderete rerecua no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyese. Sã nanderete no. Nanderete resenda siqui turã ja mose, nanderete rasiã ja rae.

Ae icuã jẽsaã saã nguia nyii nae, ùquĩ jẽsaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jẽingochĩ cote jẽ. Ndua chooño ño nguiã mbae rese ùquĩ. ¹⁸ Eãquĩ ãtã ño ùquĩ nde. Dios cheẽ andu sereã nea je chõ ùquĩ nde. Nyebe Dios riqui nguiã ngueco mee eã tuchi ùquĩ je. ¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. ²⁰ Ùquĩ ngue Cristo jembaaquiato quiatu eã jẽ nda. ²¹ Jẽirandu que Jesús rese resẽ. Ae sí chõ ngue jembaaquiato resẽ. Jembaaquiato que ucheẽ turã nii nda. ²² Jeñiangui renda icuã si jẽhui chõ. Aba mbĩcuãsa tuchi chõ ùquĩ nde. Aba mbĩĩĩ irĩ ño ùquĩ nde. ²³ Jendua ndua jembiasu chõ ae. Ae rese jẽingo ndua icuã icuã nyii nae, ùquĩ si jẽtesareĩ chõ cote ae. ²⁴ Jeñimbiasu chõ nguia ae. Ùquĩ mose ra jẽingo Dios rã si. Jẽingo turã tuchi ra equia ee.

²⁵ Jeñee ñooño eã ná nguia jendesenda mo je cote ae. Nyiesenda ja chõ nande cote re. ²⁶ Jẽ paama i mose, paama jenyẽ turã ño nguia. Paama jenyẽ ocoã ño nguia. Tenda oso nonde ti jenyẽ. ²⁷ Jẽ paama i oco mose, diablo ra jembiãcuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote. ²⁹ Jenyuru jendecochõ ño nguia ñee ndocoĩ mbae icuã nii jẽ. Mbae turã nii ño jẽingo ñee mbia je jẽ. Emundua ndua sacua Dios rese. ³⁰ Espiritu Turã nda jembia eã eãchĩ jẽ. Ae chõ ngue Cristo mbae marca mii nguiã jendese. Nyebe jẽingo nguiã ñee. —Cristo ra nandembiasu erã si, i. ³¹ Paama jenyechĩ nda emo nii. —Ĩ ãchĩ se, jenyechĩ nda emo nii jẽ. Jẽtasẽ tasẽchĩ nda emo je. Jeñee icuã icuãchĩ nda emo nii. ³² Jẽturã ño jẽingo jenyue. Jẽseteã ño jẽingo jenyue. Jendesenda icuã icuã

mose jêje, jêtesarei chõ eicuã si. Sã Dios jêicuã mbutiã jê Cristo rîř nyii no.

Dios quiato siqui bei mbae turã ndese

5 Dios ririř tuchi chõ jêingo nguiã ã. Nyesequa tuchi equia jendese co. Erã si chõ jêingo. ² Jenyesequa tuchi quia mbia rese. Sã Cristo riqui nyesequa tuchite nanderese no. Sã mano nandeicuã ndiquicharõ oveja rã no. Emano mose que Dios ia tuchi erese ra.

³ Cristo mbae chõ jê cote re. Nyebe jêingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ũquĩ. ⁴ Jenyuru jendecochõ ño nguia ñee ndocoĩ mbae icuã ñi. Mbae icuã aba ireingua rîř jeñee eã. Eicuãte ñee mose ũquĩ. Gracias jenyequi quia Dios je. ⁵ Emo siqui mose ngüinisiã ndese, aque ra siqui eã Cristo rese, Cristo siqui mose ererecua. Ae mbae icuã saã saã mbeite quia nae. Ae emo mbae chosei chosei quia nae, ũquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ũquĩ no nde. ⁶ Ae ũquĩ saã saã nguia mbae icuã nae, ũquĩ je ra Dios mbae rasi raanguia tuchi. "Ichõĩño ñene" ichĩ nda emo jembĩrĩ irĩ jê. ⁷ Ae ũquĩ saã saã nguia mbae icuã nae, ũquĩ ndese ra jêingochĩ jê. ⁸ Itondaruqui re rã ngue jêingo cose ra. Nyaášhĩ ño jêingo nguiã Jesús rese ã cote. Nyebe jêingo turã. ⁹ Ae siqui nyaášhĩ nae, ũquĩ siqui turã ño nguiã ã. Ñee ñooño eã ño nguiã emo je ã. Siqui ãte equia mbae icuã mo ndese ã. ¹⁰ Ae Dios bite riqui nae, ũquĩ ndese chõ jêingo ñimbaaquiato quiatu. ¹¹ Ae itondaruqui riinda saã saã nguia mbae icuã nae, ũquĩ nda jêsaã saãchĩ erese jê. Echiao icuã ñi ño jeñee ee emundua jê. ¹² Ae ũquĩ saã nyecuayã cuayã nguia mbae icuã nae, aba ireĩte ñee ũquĩ ñi. ¹³ Jê ũquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui riinda recha mbae icuã. ¹⁴ Sã embesa ji riqui ñee no: Ae uque saã saã nguia nae, sã ũquĩ ñumumba. Ae siqui quia eraaque rã nae, sã ũquĩ quera si. ũquĩ mose ra Cristo uturã ndeacuquia ee,

ĩ que embesa ji ra.

¹⁵ Cochee tuchi chõ jêingo Dios rese. Mbia aquiataũ na nda jêingochĩ. Mbia aquiatu rã nguiatu jêingo. ¹⁶ Ae Dios bite riqui nae, ũquĩ ndese chõ jêingo ñimbecoteã. Mbae icuã icuãte eriqui ã cote. ¹⁷ Jêaquiataũ eã ño jêingo Dios rese. Ae Dios bite riqui nae, ũquĩ ndese chõ jêingo ñimbaaquiato quiatu. ¹⁸ Jêquiacua quiacuachĩ nda equia jê. Jêquiacua mose mbae icuã jêsaã saã ja arondete. Espiritu Turã nguiatu jemingo tuchi jeñiangui re. ¹⁹ Cristo rîř jeñee turã tuchi quiatu quia jenyue. Jêirasei rasei tuchi quiatu quia Dios je. Himnos. Salmos. Jêya chõ jêingo irasei rasei Dios je. ²⁰ Dios rei nanderu. Ae chõ mbae ja mee mee nguiã nande je co. Nyebe "gracias" jenyee bei quiatu quia ee Jesucristo rîř.

Jêingo turã ja chõ nguia jenyuchua jenda ja je

²¹ Jenongue cheẽ jemumbayã ño nguia. Cristobi tuchi chõ ũquĩ nde. ²² Sã cuña ngu cheẽ mumbayã. Sã eriqui Dios cheẽ mumbayãte no. ²³ Eru quia rei ngüinisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguiã eicuã si. ²⁴ Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. ²⁵ Sã eru riqui nyesequa tuchi ngüinisi rese. Sã Cristo nyesequa tuchi uquiato rese no. Sã mano nyee eriquicharõ no. ²⁶ Uquiato no sacua icúe chõ ũquĩ nde. Irei que i je ra. Ucheẽ je abe que eirei no nda. ²⁷ Cristo uquiato mburã turã ja quia co. Mbae icuã ndese emingo uquia reãte. Nyebe eyate riqui nguiã erese co. ²⁸ Sã Cristo riqui nyesequa tuchi uquiato rese no. Eĩ si chõ mbia quia nyesequa ngüinisi rese. Sã emo ndiqui ngueteãte nguete rese no. Emo ngueteã mose ngüinisi rese, nguete rese ngueteã naanguia chõ ũquĩ nde. ²⁹ Emo nda nguete ucuayã eã. Nguete ra equereco turã. Teaquiatu turã nda equia. Eĩ si Cristo quia uquiato rerequia turã co no. ³⁰ Cristo rete rã si chõ equiatio re. Nande abe chõ Cristo rete rã no nde. ³¹ Dios que ñee nyii ra. Emo ngüinisiã ndea mose, sã nyao usi si. Ngu si abe no. Sã ngüinisi mii ndese chõ eriqui. Co mii siqui rã ño eriqui nguiã nyiese cote. ³² Mbaranguiatuãte raque ũquĩ icua. Nyeremo siqui mose co mii na. Cristo rîř ño eriqui nguiã ñee. Equiatio rîř abe no. ³³ Jêje abe chõ eriqui nguiã ñee. Jê nyesequa tuchi sacua jeninisi rese. Sã jêingo nyesequate jendete rese no. Sã cuña abe riqui ngu cheẽ mumbayã mbei.

6 Mbia ririř, jendu cheẽ jemumbayã ño nguia. Jêsi cheẽ abe. ² Ñe ngu Dios ñee cose ra: "Jêingo turã ño nguia jêsi je jê. Jendu je abe. Jêingo turã mbei ra equia ũquĩ mose. Jendeco ra jêingo arete íbii," ĩ que Dios mbia je cose ra. ⁴ Eru je tacheẽ cote. Esi abe je. Jeñee icuã icuã tuchite chĩ nda jendiirĩ je jê. Paama ĩ chee ra jêje. Jembaaquiato turã turã quiatu quia. Jemingo turã quiatu quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jêingo ee. Jêingo turã ño nguia jenderecua je. Cristo bite ũquĩ. ⁶ Jenderecua mae eã mose jendese, ũquĩ mose abe chõ jêingo embae raã naa turã ee. Mbae jêsaã turã ja quiatu quia Dios cheẽ ndui si. Cristo rimbate quia jê nde. ⁷ Jêya chõ jêingo mbae raã naa mose jenderecua je. Dios je chõ jêingo nguiã eraã ũquĩ. Jenderecua ibi jenda mii je eã ño ñene. ⁸ Dios ra mbae turã mee jêje emo mose jenyiao turã ndibishorõ. Jêingo mose mbia rimba. Mbia rimba eã jêingo mose ra re no ae. ⁹ Mbia rerecua je tacheẽ cote. Jêingo turã ño nguia jê abe jenimba je. —Tareiruã nua, jenyechĩ nda embĩrĩ ĩrĩ jê. Jê abe chõ jenderecua no nde. Jesucristo rei jenderecua. Jenimba

abe rerecua. Eĩ ja chõ mbia Dios je re. Mbia miñ ndese ra eriqui turã eã.

Soldados rã si chõ jẽingo nyiquisã mbae icuã si

¹⁰ Hui bei nonde ã tacheẽ jẽje. Dios quia rei equirãcuã tuchi. Dios quirãcuã je chõ jẽingo nguiã ñimbirãcuã. ¹¹ Sã soldado riqui armadura mingue no. Ũquĩ ndei nyiquisã sacuã ũquĩ. Eĩ jenyẽ si chõ nguia siqui tuchi Dios rese nyiquisã Satanás si. ¹² Ae icuã icuã ndiqui nande je Jesús rĩĩ nae, mbia eã ño ũquĩ nde. Satanás ño ũquĩ nde. Satanás nimba abe no. Aba checuayã icuã abe no. Mbae icuã nderecua ja chõ ũquĩ nde. Equirãcuã tuchi riqui ũquĩ. ¹³ Jẽingo tuchi Dios rese ũquĩ icuã si nyiquisã sacuã. Jẽquirãcuã jẽingo tuchi sacuã. Jẽquirãcuã mbei quia jẽingo, Satanás jembiicuã eã sacuã. ¹⁴ Jẽquirãcuã tuchi chõ jẽingo. Sã soldado riqui icoquiatu armadura mingue no. Eĩ jenyẽ si chõ nguia icoquiatu diablo jembiicuã eã sacuã. Sã soldado riqui ngũmbi cuasa mingue no. Huiisia riinda abe mingue nyiquisã sacuã no. Sã soldado riqui huiyao mingue icoquiatu no. Sã escudo abe rerequia oo no. Nyiquisã sacuã emo uu mombo mose ee. Sã huiite sucha ãtã abe mingue uãquĩ ndiquisã sacuã no. Sã tiquise abe rerequia no. Soldado rã si chõ jẽingo icoquiatu nyiquisã sacuã diablo si. Jeñee ñooño eã ño nguia. Jẽingo turã mbei chõ nguia. Jẽingoquiatu bei quia Dios cheẽ turã nenei nenei mbia je. Dios jẽicua

tuchi quiatu quia. Dios icua tuchi mose ra diablo tã i eã jẽje. Dios quirãcuã ndese quia jẽingo tuchi mbae icuã naa eã sacuã. Dios cheẽ jẽicua tuchi quiatu quia. Ũquĩ mose ra Espiritu Turã siqui tuchi jendese. ¹⁸ Jeñee mbei quiatu quia Dios je. Sã Espiritu Turã jembucheẽ turã mbei quia ee. —Mbae embu seje. ã embu seje, jenyẽ bei quiatu quia Dios je. Dios quiato ja rĩĩ ño jẽingo ñee Dios je. Dios siqui turã sacuã erese. ¹⁹ Serĩĩ abe quia jẽingo ñee mbei Dios je. Sembucheẽ turã sacuã, se echeẽ nenei nenei mose mbia je. Ae rese mbia riqui jirauate Cristo rĩĩ nae, ũquĩ asenei senei nguia mbia je co. ²⁰ Dios que semondo ucheẽ turã nenei nenei sacuã nda. Ũquĩ ñi ño setarõ ji aĩ nguiã a. Jeñee mbei quiatu quia Dios je serĩĩ. Se ireĩ ireĩ eã sacuã. Se echeẽ turã nenei nenei mbei sacuã mbia je.

Pablo ñee hui bei

²¹ Tíquico si quia jendea aque. Ae ra mbae senei ja jẽje jembiirandu serĩĩ. Ae que mbae saã turã mbeite quia serese ra. Dios rimba turã tuchi chõ ae re.

²² Nyebe amondo nguiã jendea aque. Jembiirandu ja sacuã urerese. Jembia tuchi sacuã Cristo rese abe.

²³ Jesús quiato chõ jẽ abe, se rã si re. Sã Paba ibatenda riqui jembia bei tuchi. Sã eriqui jembuchesequa tuchi mbia rese. Sã Jesucristo icua uquia tuchi jẽje. ²⁴ Ae nyesequa tuchi quia Jesucristo rese nae, sã Dios turã siqui tuchi ũquĩ ndese. Amén.

FILIPENSES

Pablo tarō ji ucheē mbesa mondo Jesús quiato je

1 Pablo chō se re. Timoteo rese. Jesucristo rimba chō ure re. A ureico ā mbesa jēje a. Felipe jenda Jesucristo quiato ja je a. Jesús quiato rerecua je abe ureico ā mbesa a. Diáconos je abe no. ² Sā Paba Ibatenda turā ndiqui jendese. Sā jembia mingo. Sā Jesucristo abe jembia mingo no.

Pablo ñee Dios je Jesús quiato rī

³ Sendua ndua mose jendese, seya beite aico jendese co. Gracias ae beite sequia Dios je jenī co. ⁴ Se ñee ñee mose Dios je jenī, seyate riqui co. ⁵ Se Jesucristo cheē nenei namo mosenda bei chō jēingo nguiā ndua bei serese co. Nyebe jēingo nguiā mbae mondo mondo bei seje co. Nyebe seya tuchi riqui nguiā jendese co. ⁶ Dios que ucheē mingue jeñiangui re, ae si ra siqui bei jendese jembitorō tirō. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiā ndua ndua eī jendese cco. Achesequa tuchite quiatu nguiā jendese. Jē ngue jēingo beite quia serese ra. Jendua ndua beite que equia serese ra. Mbae mondo mondo bei seje. Mbia icuā icuā mose seje. Se mbia cheē ndiquisā quisā mose Jesús cheē si. Mbia setarō tarō mose. Ūquī mose abe que jēingo beite serese ra. Dios turā ndese que nandeico mae mae mbeite ra. ⁸ Dios resa aico ñee co. Jesucristo rā si aico nyesequa tuchite jendese co. ⁹ Aico ñee mbeite Paba je jenī co. —Paba, ūquī embuchesequa i i tuchi mbia ja rese. Ndeaquiatu emondo i i tuchi ee, ae beite quia Paba je jenī co. ¹⁰ Eī nda mbae turā jēicua. Eī nda jēingo bei mbae turā ndese. Eī nda Jesucristo ñee asiā jēje tu mose. ¹¹ Eī nda Jesucristo jemingo bei mbae turā ndese. Eī nda mbae turā jēsaā saā ja Dios je.

Cristo miī niī ño aico nguiā se co, i Pablo

¹² Ā tasenei jēje. Mbae icuā ngue jeī jeī mbeite quia seje, ūquī ngue Jesús cheē mbutiba eā mbei ra. Ūquī jeī jeī mose seje, mbia que jirandu tuchite quia Jesucristo rese cote ra. ¹³ A setarō ji ñi cárcel a. —Cristo rī ño etarō ji ñi nguiā hue, i jate mbia quia serī ūquī. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarō ji rese, esiquicheāte riqui Dios cheē nenei nenei ūquī cote. Jesús

quiato ja riqui Dios cheē nenei nenei tuchi ūquī cote. —Dios riqui tuchi urerese co, i equia ūquī cote. Maende setarō ji rese.

¹⁵ Emo emo ndiqui Cristo renei ñooño ūquī. Ndua icuā icuā ño nguiā ūquī. Mae icuā icuā ño nguiā serese ūquī. Emo emo ndiqui Cristo renei turā tuchi ūquī no. ¹⁶ Ae Cristo senei ñooño nguia nae, ūquī icuāte riqui seje ā. —Sā Pablo tarō ji ñiño, i equia serī ā. Cristo renei ñooño ā. Emo ndese ndua eā. Nyiese chō eriqui nguiā ndua. ¹⁷ Ae Cristo senei turā nguia nae, ūquī ndua chō nguiā emo ndese. —Jesucristo cheē niī ño Pablo tarō ji ñi nguiā hue, i equia ndua serese ūquī. ¹⁸ Seyate emo Cristo renei turā mose. Seyate emo Cristo renei ñooño mose no. Cristo rī nguiatu eriqui nguia ñee. Tachimbua tuchi chō nguia ūquī Cristo renei nenei mose.

¹⁹ Jéndese abe seyate aico co. Ūquī jēingo ñee Dios je serī ūquī. Espíritu Turā ndiqui serese a no. Ae Jesucristo mbu seje. Nyebe Dios riqui nguiā setarō ji reaquiato tuchi a. Nyebe seya tuchi riqui nguiā a. ²⁰ Sesiquicheā tuchi ra se reae. Seireī ngūiā mbei nda eriqui Cristo cheē nenei nenei ña. Cristo bi achō ndese taico bei setarō ji. Mbia nda seiquia rei nguiā, se taico bei Cristo rese. Mbia nda sembusē ndei nguiā no, ūquī mose abe taico bei erese no. Eī ja chō seje re. Eturā ja chō seje no nde. ²¹ Cristo miī niī ño aico nguiā se co. Semano mose, eturā tuchi quiarei ūquī seje cote.

²² Dios semingobe mose, ae si je chō aico nguiā mbae turā naa naa co. Ma ño eturā jiri riqui seje. Mano mose ereae. Siquibe jiri mose ere no ae. Aicua eāte se. ²³ Ma ño sebi jiri. Semano sete raque oso sacua Cristo rese. Ūquī nda eturā jiri seje. ²⁴ Se seicobe mose ibii, ūquī nda eturā jiri jēje reae. ²⁵ Ūquī aicuate se. Seicobe mose, ūquī nda eturā jiri jēje reae. Nyebe ra Dios semingobe jiri jendese. Se Cristo icua uquia sacua jēje. Se jembiaabe jiri sacua Cristo rese. ²⁶ Anyae ra oso jendea. Aque mose nda jēya tuchi Jesucristo rese chā.

²⁷ Ae uresenei senei nguia Cristo rī nae, ūquī andure chō jēingo turā. Airandu turā nda se quia jendese chā. Eī nda mbia ñee seje chā. —Hue rī ja chō eriqui ndua turā nye. Huee echi mbia cheē ndiquisā quisā Jesucristo cheē si hue, i nda mbia seje chā. I nda mbia seico mose isho chā. Seico mose abe jendese. ²⁸ iTiri jenyechī nda Jesús ucuāyāsa si jē! Jēsiquicheā mose, Dios ra ūquī mundua tata cuasu rese cote. “Huee ra

asochĩ nde”, i chee rae. “Jesús icuasa ra Dios mingo bei”, i ra ũquĩ jeni cote, jēsiquicheã mose esi. ²⁹ Jē Cristo jēicuante quia ũquĩ cote. Ũquĩ mĩño eã. —Jeñim-birãcuã abe quiatu quia serĩ, mbia icuã icuã mose jēje, i Cristo quia jēje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguiã jēje ũquĩ. Nande jaje bei chõ ñene. Jemae ndei que equia serese cose resẽ. Se mbia icuã ndiquisã quisã mose. Ũquĩ sĩ rese chõ jēingo nguiã jirandu randu serese namo no.

Cristo seteã tuchi que tu ra

2 Jesucristo jembiu turãte quia co. Cristo nyesequa mose jendese, jēyate riqui ũquĩ. Espĩritu Turã abe riqui jendese ũquĩ. Jendua turãte equia emo ndese ũquĩ. ² Nyebe aico nguiã ñee jēje. Seyate aico raque jendese co. iSecheẽ jemumbayã tuchi quiatu quia jē! iSemia tuchi quiatu se jē! iJendua ata atachĩ nda jē! iHue rĩ ja chõ jēingo ndua jē! iHue rĩ ja chõ jēingo nyesequa nyiese no jē! ³ iAbei chiãte ra jēingochĩ jē! iJenguasu ra jēsaã saãchĩ! iJēseteã ño jēingo! —Nde chõchĩ ndeturã sesi, ijenye chõ jenyue! ⁴ “Se chõ jē” ijenyechĩ nda jē! Emo mbaerã abe rese quia nandeico ndua. ⁵ Sã Jesucristo riqui ndua eãte uchiese no. Erã si chõ nandeico ndua nande abe jē. ⁶ Dios rã si rei que Jesucristo ra. Ñimbuseteã tuchi que u íbii ra. Ererequa rã eã ngue eru íbii ra. —Dios rã si chõ taico bei se, iã ngue u íbii ra. ⁷ Mbia rerequa tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. ⁸ Mbia mo na ño ngue ae ra. Ibii eico mose cote. Mbia rerequa que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireĩte mano ira rese. ⁹ Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingo co cote. ¹⁰ Mbia ra ngoi ja chee ngũĩã ndese Jesucristo je ñee. Ae siqui ja íbii. Ae siqui ja íbátee no. Ae siqui ja ibiqui rĩ. Ũquĩ ja ra ñee turã Jesucristo je. ¹¹ —Jesucristo rei mbia rerequa ja, i chee ra ũquĩ ja ñee. Ũquĩ mose ra Dios ia tuchi cote.

Secheẽ jēisi chooño eẽ ño nguiã, i Pablo

¹² Secheẽ ngue jemumbayãte quia seico mose jendese. Ishote aico jēsi co. Secheẽ jemumbayã tuchi quiatu quia isho seico mose abe. Cochee jiri quiatu jēingo Dios je. Jēingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ũquĩ. Dios quia mbae turã nyosei uquia nguiã jēje. Dios mĩ ño jemingo nguiã ubi rese.

¹⁴ Mbae turã jēsaã turã ja chõ. Ñee icuã icuã ndocoĩ. Teã teã ndocoĩ. ¹⁵ Eĩ nda mbia mo ñee icuã icuã eã jēje. Eĩ nda jēicuã eã emo je. Dios riiĩ ño jē nde. Sã nyasita-

ta riqui mbae resae jate itondáruu no. Eĩ ño jē nde. Nyasitata rã si chõ jē nde. Mbia icuã ndesae ja. ¹⁶ Jēingo mbia mingo beisa renei nenei tuchi mbia je ũquĩ. Nyebe ra seya tuchi jendese Cristo tu mose. Secheẽ jēisi chooño eã ño nguiã. Jaembaaquiato chooño eã ngue Cristo rĩ nda. ¹⁷ Secheẽ nguire jēingo Dios icuate ũquĩ cote. Secheẽ nguire jendete jemee tuchi mose Dios je, seya tuchite ra jendese cote. Mbia nda seiquia rei nguiã Jesucristo rĩ, seya bei ra aico jendese, jendete jemee tuchi mose Dios je. ¹⁸ Jeñimbia chõ nguia serese. Sã seyate aico co no.

Timoteo tamondo jēje Epafrodito rese, i Pablo

¹⁹ Jesús eno i mose, Timoteo tamondo rã jendea. Eĩ nda seya jirandu mose jendese. ²⁰ Timoteo rã si ãte emo ndua tuchi jendese. ²¹ Umbaerã achõ ndese chõ eataque riqui nguiã ndua ndua. —Ã tasaã saã mbei Jesucristo je, i ãte equia ũquĩ. ²² Sã eriiĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquĩ jēicuante quia ũquĩ. ²³ Nyebe ra Timoteo amondo jendea. ã tatea rã nyii. Mbia ra setarõ ji mĩ mbei a reae. Sembusẽ nda re no ae. Ũquĩ tatea rã nyii. Ũquĩ ndeare ra Timoteo amondo jendea. ²⁴ Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jēje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co. ²⁶ Mae sete equia jendese co cote. —Mbia jiranduchĩ serasi rese re, i equia jeni co. Nyebe eya eã ndiqui nguiã nduate jendese cote. ²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. ²⁸ Nyebe Epafrodito amondo nguiã jēje aque. Jemia sacua erasiã ndese cote. Seya eã nda sasẽ jiri jemae mose erese cote. ²⁹ Nanderesenda tuchi chõ ae Jesucristo rese re. Ngasẽ mose pee, jēya chõ erese. Jēisi turã ño. Eraanguia rese jēingo turã mbei Jesús quiato. ³⁰ Jesucristo rĩ ngue mano serĩ serĩte ra. Jesucristo cheẽ nenei nenei mose. Siquiche ãte que equia ra. —Amanochĩ nda se re, i ãte que equia ra. Sereaquiato turã tuchi que equia ra. Ishote quiatu ngue jēingo nguiã jē. Sereaquiato aronea.

Cristo mĩ ndese aico cote, i Pablo

3 iJēya bei chõ jēingo Jesucristo rese jē! Ae asenei senei nguia jēje nyii nae, ũquĩ sĩ tasenei senei jēje. Sebite secheẽ nenei nenei sĩ jēje. Jendua bei sacua erese.

² Ae siqui nyacua raãte nae, ùquĩ si jenyiicuasẽ ño nguia. Eicuãte riqui ùquĩ. Aba rete sia chooño ño ùquĩ nde. Mbia mbaaquiato turã ndocoĩ. ³ Circuncisión ño nande re. Nandechiangui re chõ nandeico nguiã Dios rerequia nande ã. Nande chõ nandeya riqui nguiã Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ùquĩ. Nandequiato jiriã tuchi chõ ùquĩ nde. ⁴ —Dios ra semingo bei, mbae turã naa naa mose, ae rei que se quia nyii ra. —Seturã ñi nda Dios semingo bei, i chõchĩ emo. Seturã tuchi raque eriqui ùquĩ si. ⁵ Sechacuquia mose, ocho días mose que circuncisión naa seje ra. Israelita chõ se re. Benjamín ndiriñ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbesa que amumbayã nguia ra. ⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia serĩĩ nda. ⁷ Ùquĩ ñi ngue aico secuasuraã naa tuchi cose ra. Jesús icuayã mose se. Mbae eã tuchi chõ ùquĩ seje cote re. Cristo rese quiato aico nguiã co cote. ⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mii aicuate quia co cote. Ùquĩ eturãte mbae ja si seje cote. Jesucristo rĩĩ aico hui jate mbae si co cote. Iti rã ño mbae ja riqui nguiã seje cote. Seico bei sacuaã Cristo rese. ⁹ Cristo rese tuchi chõ aico nguiã co cote. Aico bei rei que Moisés chimbesa rui nyii ra. Ùquĩ ñi eã ño Dios seisi turã nguiã. Se Jesucristo icua mose, ùquĩ mose quiato ngue Dios seisi turã nguiã. Ae Jesucristo icua quia nae, ùquĩ Dios isi turã ño nguiã. ¹⁰ Cristo aicuae tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeuicua ndiquicharõ no. Eĩ ae rã nda mano mbae icuã si chã. ¹¹ Eĩ mose ra Dios seraaque mbuquera si mingo bei cote.

Cristo mii ndese aico ndua co cote, i Pablo

¹² Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacuaã ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacuaã tuchi chee ae rã si cote. ¹³ Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ùquĩ mii ndese chõ aico nguiã ndua co cote. ¹⁴ Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguiã erese co. Premio isi sacuaã. ¹⁵ ¡Eĩ nande ja tuchi quiato quia siqui Jesucristo rese jẽ! Nande eicua tuchi mose. Jendua ja eã mose hue rĩ,

Dios ra ñee jẽje. —Ã ndese chõ jẽingo, i ra jẽje. ¹⁶ Ae nandesiiti nae, ùquĩ ndese bei chõ nandeico. Ae rĩĩ Dios nandembaaquiato quiato nyii nae, ùquĩ ndese bei chõ nandeico. ¹⁷ Serui bei jẽingo, Seresenda. Ureico bei Jesucristo rui ã. Sã mbia siqui bei urerui. ¹⁸ Mbia tubiriã ndiqui Cristo ucuãyãte ã. Ùquĩ ae rei que se quia jẽje nyii resẽ. Aba mbucheseo serĩ. “Cristo que mano mbia riquicharõ nda”, ùquĩ andu sereãte. ¹⁹ Ùquĩ nda nyoĩ ja tata cuásuu. Ubi rese achõ ño ùquĩ ndiqui nguiã. Eireĩ nguiãte. Eya chõ eriquichĩ nguiã huicuaã ndese. Ibi jenda achõ ndese chõ eriquichĩ nguiã ndua. ²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. Ã nandeico eraarõ arõ ã namo. ²¹ Jesucristo tu mose nande je íbii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

Jẽya bei chõ jẽingo Cristo rese

4 Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. ¡Jẽingo turã tuchi chõ Jesucristo rese jẽ! ² Evodia je tacheẽ. Síntique abe je tacheẽ. ¿Mbaerã jẽingo siqui icuãte nyue re? Jẽingo turã ño jenyue ae. Jesús quiato chõ jẽ ndesẽ. ³ Nde abe je tacheẽ, Seresenda. Ùquĩ cuña emingo turã nyiese. Eteaquiato bei quia. Ùquĩ ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que ùquĩ mbae nombre mii mii libro umbae rese ra. —Ùquĩ nda siqui bei serese, i que ra. ⁴ Jeñimbia bei Jesucristo rese. ¡Jeñimbia tuchi jẽ! ⁵ Sã mbia mae ja jeturã ndese. Jẽ abei rese. Achite Jesucristo ñi tu a. ⁶ Parĩ parĩ jenyechĩ nda mbae mo je. Jeñee ja quiato Dios je. —Mbae mo embu ure je, jeye chõ nguia ee. Gracias jeye chõ nguia ee. ⁷ Ùquĩ mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingo no.

Mbae turã ndese chõ jẽingo ndua

⁸ Hui bei nonde ã abe tambesa jẽje. ¡Mbae icuã ndese ra jenduachĩ jẽ! Mbae turã ndese chõ jẽingo ndua. Ae rĩĩ nandeico ñee turãte, ùquĩ ndese chõ jẽingo ndua. Ichõiñosa reã ndese chõ jẽingo ndua. Ae Dios bite nae, ùquĩ ndese chõ jẽingo ndua. Mbae quishĩ ndese chõ jẽingo ndua. Ae rese mbia turã ndiqui mae sete, ùquĩ ndese chõ jẽingo ndua. ⁹ Ae asenei senei nguia jẽje nyii, ùquĩ ndese chõ jẽingo jẽ. Ae eraã ndese jẽingo mae mae seje nae, ùquĩ ño jesaã saã mbei quia.

Ūquĩ naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰Jendua ramombe equia serese ūquĩ. Dios sembia tuchite quia ūquĩ ndese co. Jētesarei eāte rei que equia sesi nyii ra. Mbae que jemondo aroneate quia seje nyii ra. ¹¹—Mbae āte seje. Mbae mo embu seje, ae āte se quia jēje co. Sembae eā mose, seyate ūquĩ mose. Sembae ñetē mose, seyate ūquĩ mose no. Ūquĩ je que achimbaaquiatu se ra. ¹²Sembae eā mose, seyate ūquĩ mose se. Sembae tubiriā mose, seyate ūquĩ mose no. Seya beite aico co. Seriācuā mose. Serio mose abe no. Sembae tubiriā mose. Sembae eā mose abe no. ¹³Cristo que uquirācuā mee seje ra. Equirācuā je mbae asaā ja arondete. ¹⁴Coche ngue mbae jemondo nguiā seje. Sembae eā mose. Seyate raque sembae eā mose. ¹⁵Jē ae chō ngue mbae jemondo mondo bei nguiā seje. Se Jesús cheē nenei namo mose bei chō ngue mbae jemondo mondo nguiā seje. Iglesia mo abe que mbae mee āte seje ra. Jē ae chō ngue re. Filipos jenda ja. Se Jesús cheē nenei nenei namo mose jē-

je, aque mose bei chō ngue mbae jemondo mondo seje. Seso ramo mose Macedonia si. ¹⁶Sā ñi mbae mo jemondo mondo seje Tesalónica seico mose no. Mbae eā mose seje. ¹⁷—Mbae mo jemondochō seje, ae āte quia jēje a. Dios je chō jēingo nguiā emondo ūquĩ. Dios ra mbae mondo tuchi jēje eribishorō. Ūquĩ ndese quiatu seya riqui nguiā. ¹⁸Ae jemondo seje namo Epafrodito rese nae, ūquĩ ngue aisi ja ra. Dios bite jeñi-mondo. Ofrenda turā tuchi que ūquĩ Dios je ra. Mbaete rei sembae cote re. ¹⁹Jesucristo resenda chō jē nde. Ae emoate jēje nae, ūquĩ nda Dios mee ja jēje. Dios quia mbae quereco ja nguiā. Equirācuāte quia ñene. ²⁰Sā mbia ñee turā mbei Dios riĩ. Nanderu riĩ. Amén.

Hui bei chō ā cote re

²¹Jesucristo quiato je saludar jenye ja seje. Ae Jesús quiato riqui serese nae, ūquĩ ucheē mondo quia saludar i jēje aque. ²²Jesús quiato a jenda ja ucheē mondo quia saludar i jēje aque. César chuchua jenda abe ucheē mondo quia jēje aque. Ae siqui quia Jesús rese, ūquĩ. ²³Sā Jesucristo turā tuchi riqui jē ja je. Amén.

COLOSENSES

Pablo embesa mbesa Colosas jenda je

1 Pablo chõ se re. Dios chiirabo chõ se re. Jesu-cristo que seirabo mingo ucheẽ nenei nenei sacuaã nda. Timoteo rese aico ã mbesa mbesa jêje a. Nanderesenda Timoteo. ² Dios rimba Colosas jenda je chõ aico nguiã co mbesa mbesa a. Cristo icuasa hue jenda ja je. Ae Cristo icua tuchi quia nae, ùquĩ ja je. Sã Dios turã ndiqui bei jendese. Sã eriqui jembia bei. Sã Jesu-cristo abe riqui bei jendese.

Pablo ñee Dios je Jesús quiato rĩĩ

³ Nandererecua tuchi rei Jesucristo. Dios rei eru. Ureico beite ñee Dios je jenĩ ã. Gracias ure beite equia jenĩ ã. ⁴ Ureirandu turãte quiatu ngue jendese re. Jesu-cristo jêicuante quiatu nguiã ure je ùquĩ. Jenyesequa tuchi quiatu nguiã Dios quiato rese ùquĩ. ⁵ —Cristo rese ra nandeico je ibate, jenyete quiarei equia eicua ùquĩ. Ùquĩ ndese que jêirandu tuchite nyii ra. Jesu-cristo cheẽ nenei nenei namo mose jêje nyii. ⁶ Jesu-cristo quiato echeẽ senei senei mbeite quia mangue chooñoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, eĩ si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeñia mbitirõ eandu ramo mose no. ⁷ Epafras abe que jembaaquiato quiatu Cristo rĩĩ nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re. ⁸ Ae que sembiirandu turãte jendese ra. Espiritu Turã ndiqui tuchi jendese ùquĩ. Nyebe jêingo nguiã nyesequa turãte mbia rese ùquĩ.

⁹ Ureirandu mose jendese ùquĩ ndese, aque mose bei chõ ureico nguiã ñee Dios je jenĩ ã. Dios jemingo bei sacuaã ubi rese. Ucheẽ abe rese. Dios uaquiato mee sacuaã jêje. ¹⁰ Jêingo turã sacuaã Dios mbia. Jêingo turã sacuaã mbae turã ja rese. Jê Dios icua i i tuchi sacuaã. ¹¹ Dios jembirãcuã tuchi sacuaã uaquiato je. Jeñim-birãcuã tuchi sacuaã mbae rasi je. ĩ nda jêingo tochi tuchi mbae ja je. Ùquĩ mose ra jêyate no. ¹² Ureico gracias i tuchi Dios je ã. Ae quiatu ngue nandembuchi-cabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. ¹³ Mbae icuaã nguiatu que nanderereco quia itondáruu nyii ra. Dios que nandembui ùquĩ si cote ra. Nguiĩ ndese que nandemingo

cote ra. ¹⁴ Dios riĩĩ ngue nandeisirõ umbaerã mbei ra. Mano ngue nanderiquicharõ nda. Nandeicuã ngue embutiã mbei nyesi ra.

Cristo que mano nandemingo turã sacuaã Dios rese ra

¹⁵ Mbia mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eã nda. Nguiĩ ndese quiatu ngue mbae ja ao nguiã. Mbae ibatenda ao ja. Mbae ibi rĩĩnda abe ao ja no. Ae rese nandeico mae ã nae, ùquĩ ja que Dios chao nguiĩ ndese ra. Ae rese nandeico mae aroneate nae, ùquĩ abe que echao nguiĩ ndese no nda. Mbia rerecua ja abe no. Aba checuayã ja abe no. Ùquĩ ja que Cristo chao ngu rese ra. Cristo mbaerã ño ùquĩ ja re. ¹⁷ Mbae ao ja nonde Cristo riqui rei nyii. Erĩĩ ño mbae riqui ja nguiã ã cote. ¹⁸ Dios quiato rerecua ja chõ Cristo riqui nguiã co. Sã nandeãquí nanderete rerecua no. Cristo rei mbae i tuchi. Mbae i ja. Ae rane ngue quera sí manonde ra. Ae rei mbae rerecua ja tuchi. ¹⁹ —Se rã sí tuchi Cristo jê, i que Dios ra. ²⁰ Cristo mano mose, nandemingo turã sacuaã Dios rese chõ ñene. Nande mĩ mingo turã sacuaã eã ño ñene. Mbae ja mingo turã sacuaã Dios rese chõ Cristo mano nguiã. Mbae ja ibi rĩĩnda. Mbae ibei rĩĩnda ja abe no.

²¹ Ishote que jêingo Dios sí nyii ra. Mbae icuaã naa naa mose. Ùquĩ mose que jêingo Dios ucuayãte ra. Jendua ndua icuãte que equia erĩĩ nda. Namu nguia eriqui nguiã jemingo turãte uchiese ùquĩ. ²² Cristo quiatu ngue mano nguiã jenĩ. Mbia rete raanguia rerequia mose. Mbae rasi que esaã tuchi umano mose ra. Jenĩ ño ngue mbae rasi raã nguiã. Jêicuã mbutiã sacuaã. Jemingo turã sacuaã icúe Dios mbaerã. ²³ Nyebe jeñim-birãtã jiri quia Jesús icha rui. Jeñimondocho eã mbei quiatu quia jê. Jêhui eã ño Jesús cheẽ turã sí jê. Jesús cheẽ turã ngue jeñandu tuchi quia. Mangue chooñoa jenda ja que ehandu ra. Se abe asenei senei tuchi quia Dios cheẽ nguire co. Pablo chõ se re.

Dios que seirabo ra, i Pablo

²⁴ Se mbae rasi raã mose jêje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã

mose Cristo quiato je. ²⁵ Dios que seirabo uquiato mbaaquiato quiatu ja sacua nda. Iglesia jenda ja. Dios chee mbuchecua ja tuchi sacua jje. ²⁶ Dios que seirabo judios ea mbaaquiato quiatu sacua nda. Ae Dios mbuchecua ea mbei judios je nyii nae, aico uquix mbuchecua Jesus quiato ja je a cote. A ndei a: Cristo riqui jeniangui re a cote. Ae mii no aba mingo arõ nguia Dios rese co. Uquix no Dios mbuchecua ramo nguia uquiato je co. ²⁸ Cristo mii nii no aico nguia nee mbia je co. Mbia ambuti mbuti chõ nguia Cristo icha rui co. Seaquiato je chõ aico nguia mbia mbaaquiato quiatu Cristo rix co. I nda Jesus quiato ja riqui siqui i tuchi erese. ²⁹ Nyebe serecotea tuchite riqui nguia uquix ndese co. Dios quia sembiracuã mbeite nguia co. Mbia mbuti mbuti sacua Cristo icha rui.

2 Co sechee jeniandu ra. Andua ndua tuchite se quia nimbecotea jendese co. Achee tuchite se quia Dios je jeni co. Laodicea jenda nii abe no. Ae mae ate quia serese Jesus quiato nae, uquix nii abe no. Mbia mbaaquiato icua icuasa riqui jembui serite Cristo si uquix. ² Je ja rix aico nee Dios je co. Jëingo i i sacua Dios rese jeniangui re. Jenyesequa ja sacua jenyiese. Jendua ja sacua hue rix si. Jëaquiato tuchi sacua Cristo rix. I nda Cristo jëicua tuchi cote. ³ Cristo mii tuchi chõ aba mbaaracua nguia co. Ae mii tuchi chõ aba mbaaquiato nguia Dios rese co. ⁴ Mbia jembirix irix ea sacua no aico nguia nee jje co. Mbia chee turã abareate raque. Jesus chee ndui eate quia nee. ⁵ Aico ndua ndua tuchi jendese co. Siqui rocoix jendese. Ae rese airandu jendese nae, sembia tuchi chõ uquix nde. Jëingo turã mose jenyiese. Jë Cristo icua i i tuchi mose. Nyebe seya bei tuchi riqui nguia jendese co. ⁶ Sã Jesucristo jëisi nyii no, eix jenyese si chõ nguia siqui bei erese. ⁷ Sã ira riqui ngao mondo tuchi ibiqui rix no. Nimbiracuã tuchi sacua. Eix jenyese si chõ nguia je abe je. Jenimbiracuã no nguia Cristo rui. Cristo jëicua tuchi quiatu quia. Sechee niinda rui sí. Gracias jenyese bei chõ nguia Dios je.

Dios que jembiasu Cristo rix cote ra

⁸ Mbia ra jembirix irixchix jembicha nonde Cristo si je. Uquix nee turã arõte raque. Nee iru iru chõ nguia uquix. Nimbucha eate equia Cristo rese uquix. Mbia chee achõ no echee nde. ⁹ Dios ra si tuchi rei Cristo. Mbia rete raate raaque Cristo rete. ¹⁰ Uquix jëingo nimbucha Cristo rese uquix. Cristo ra sí tuchi rei nande cote. Cristo quiarei ererequa tuchi mbia rerequa ja si. ¹¹ Cristo que jembui jenyioseise osei icua si cote ra. Jemingo que icue Dios mbaera cote ra. ¹² Uquix jëingo Dios quiracuã icuate uquix. Sã mbia Jesus raaque ati rei no. Eix si chõ je Jesus icua mose re. Jendaaque ati ra si chõ je Jesus icua mose re. Sã Dios Jesus mbuquera si uquiracuã je no. Eix si chõ je Jesus icua mose re. Jembuquera si ra no je Jesus icua mose re. Dios chõ Jesus

icua uquia nguia jje. ¹³ Isho que jëingo rei Dios si cose ra. Jenyioseise osei icua ndese siqui bei mose. Jë jëicua nderequa bei mose. Dios que ngueco mee jje cote ra. Jë Cristo icua mose. Dios que jëicua mbutiã cote ra. ¹⁴ Ae icua nandesaã saã nguia Dios je nae, Dios que uquix mbutiã nandesi ra. Ae chee nandemumba mumba quia mbia nae, uquix nee ngue Dios mbutiã nandesi cote ra. Dios nandecuã mbucha raanguia Cristo rese chõ nee. Cristo chix mose cruz rese. ¹⁵ Cristo mano mose que aba checuayã nderequa quiracuã mbutiã nda. Cristo que aba checuayã mbuquiracuã nea ja ra. Mbia resa rae que embuquiracuã nea ja ra.

Mbia chisaã saã ndese ra jëingochix jje

¹⁶ Sã emo jendiquisã quisã ea mbei mbaeia mo si. Jë mbaeia u sereã mose, jëu ea no. Jë euse mose, jëu chõ. Jë jëingose mose mbae mo ndese sãbado mose, jëingo chõ erese. Jë jëingose mose mbae mo ndese nyasi yasu mose, jëingo chõ erese. Jëingo sereã mose erese, jëingoã erese. ¹⁷ Cristo siqui nonde ibii chõ ngue uquix ja nyii re. Mbia Cristo ru raarõ sacua no ngue uquix nyii re. Cristo tu mose que uquix quiachã ja cote ra. ¹⁸ Mbia jembirix irixchix jembicha nonde Cristo si je. Ae useteã saã nooño nguia nae. Ae "Dios chõ nee" i quia ángeles je nae. "Se quiatu" i chooño no nguia equiatu rocoix. Ndua turã ea no nguia Dios rese uquix. Unduasa rese achõ no eriqui nguia ucuasu raã naa uquix. Uquix nda jembichachix Cristo si je. ¹⁹ Nimbucha ea no nguia Cristo rese uquix. Ererequa raque Cristo. Sã nandecuã ndiqui nanderete mingo turã ja no. Eix si chõ Cristo uquiato mingo turã ja nguia nyiese a. Nyebe Cristo quiato riqui nguia Cristo icua i ite a. Dios chõ Cristo icua uquia i i nguia ee.

²⁰ Cristo mano mose que je abe jemanos erese resë. Mbia chisaã saã ima si que jëhui turã ndesë. ¿Mbaera nda uquix nee ndui si jëingo si cote re? ²¹ Sã uquix ndiqui nee no: "Jëocochix nda a ndese. A nda jëuchix no. Uquix nda jëisichix jëo je no", sã eriqui i no. ¿Mbaera jëingo uquix nee mumbayate re? ²² Mbia chee achõ no uquix ndesë. Dios chee ea no uquix ndesë. Nandechiurã no mbae ja resë. ²³ Uquix nee turã arõte raque. Eaturã arõte raque mbia mbaeia ua mose. Mbia mbaeia ua mose, equiatu arõte raque. Siqui mingue arõte raque. Uquix nda aba chioseise osei icua mbutiã ea. Uquix nda aba mingo ea Dios mii ndese.

Jendua chã mbae ibatenda rese

3 Dios que jendaaque mbuquera si Cristo rese resë. Nyebe jëingo mbae ibatenda osei. Mbae ibi jenda osei rocoix. Cristo quia chix nguia ngoi ibate ngu jii hue. ² Jendua quiatu quia mbae ibatenda rese. Mbae ibi jenda rese ndua rocoix. ³ Jemanos ngue Cristo rese resë. Dios que jembucha Cristo rese resë. Nyebe Dios

riqui nguiã jendeco rerecoquiato jêje co. ⁴ Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare ră eã ño jêingo nguiã ã cote

⁵ Ae icuã jendeco quia jeñiangui re nae, ùquĩ icuã jêquiti chõ jenyiesi. Jenyiosei osei icuã jêquiti chõ jenyiesi. Jêingochĩ nda jeninisiã mo ndese. Jendu eã ndese ra jêingochĩ no. “Aque rese nda aico ră ña”, jenyechĩ nda emo nii jê. Mbae icuã mo ndese ra jendua ndua jirichĩ jê. Emo mbae ra jenyosei choseichĩ jê. Dios abareã ndese siqui raanguia chõ ùquĩ nde. ⁶ ã icuã ja riĩ nda Dios mbia mbasi. Ae echeẽ mumba mumbate quia. ⁷ Jê abe que ã icuã jêsaã saã tuchi quia nyii ra. Cristo icuayã mose. ⁸ ã icuã jêjea ja chõ jenyesi cote. Jê paama i. Jêicuã icuã nyue. Jeñee nyecua nyecua emo nii. Jenyuru icuã. ã jêjea ja chõ jenyesi. ⁹ Jeñee ñooñoohĩ nda jendesenda je jê. Jê mbae osei osei icuã ñiinda que jembuquiachã jenyesi resê. Jenyisaã saã ima jêsaã eãte quia ùquĩ cote resê. ¹⁰ Jeñimbiasu ji chõ jêingo nguiã ùquĩ. Nyebe Cristo riqui nguiã jembaaquiato tuchi Dios riĩ ùquĩ. Jêingo turã sacuã Dios ră si. ¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiataate raque. Mbia rimba raque. Mbia rimba eã ndaque. ùquĩ ja Cristo mbuchiabi abiã tuchi. ùquĩ ja chiangui re Cristo riquise rete. Cristo siqui mose nandechiangui re, ùquĩ nguiã rei eturã tuchi mbae ja si.

¹² Co Dios riqui nyesequa tuchi jendese co. Dios que jêirabo mingo icúe umbaerã nda. Nyebe jêingo nguiã siqui turãte. Jêya eã ño jêingo mbia rese. Jêseteã ño jêingo mbia rese. Jêingo tochi chõ nguiã. Jendosei nguiato chõ jêingo. ¹³ Jeñimbirãcuã ño nguiã jendesenda rese. Jêtesarei chõ nguiã jendesenda icuã icuã mose jêje. Sã Cristo tesarei jêicuã si no. ¹⁴ Jenyesequa tuchi quiato quia mbia rese jê. Dios cheẽ tuchi chõ ã nde. Jenyesequa tuchi mose mbia rese, mbae turã ja rese chõ nda jêingo tuchi cote. ¹⁵ Jeñimbia bei chõ nguiã Dios rese. ã nda jemingo turã mbei jenyue. ùquĩ nii ño Dios jemingo nguiã icúe umbaerã. Jesús rete mii na ño Dios jemingo nguiã ùquĩ. “Coche ñene” jenyé bei chõ nguiã Dios je. ¹⁶ Sã Cristo cheẽ ndiqui tuchi jeñiangui re. Jêaquiato tuchi nda jêingo chã. Jenongue jembaaquiato quiato chõ nguiã. Jenongue jembuti mbuti quiato quia Cristo cuti. Jêirasei rasei tuchi quiato quia Dios je. Himnos. Salmos. Jêya chõ jêingo irasei rasei Dios je. ¹⁷ Jê mbae raã mose, Jesús riĩ ño jêsaã. Ae jêingo ñee nae, Jesús riĩ ño jeñee. Gracias jenyé bei chõ nguiã Dios je Jesús riĩ.

Ae jêsaã nguiã nae, jêsaã ño Cristo je

¹⁸ Tacheẽ mbia ninisi je. Jendu cheẽ jemumbayã ño nguiã. Diosbi tuchi chõ ùquĩ nde. ¹⁹ Eru, jenyesequa tuchi quiato quia jeninisi rese. Jêingo tochi chõ nguiã ee. ²⁰ Mbia riirĩ, jendu cheẽ jemumbayã mbei chõ nguiã. Jêsi cheẽ abe no. Diosbi tuchi chõ ùquĩ nde. ²¹ Jendiirĩ nda jembupaama ichĩ jenyue jê. ã nda ñimondocho eã. ²² Tacheẽ erimba je cote. Jenderequa cheẽ jemumbayã mbei quiato quia. Emae eã mose abe quiato echeẽ jemumba eã. Jêseteã jêsaã ñooñoa nguiato quia ee. Dios je quiato jêingo mbae raã turã ja. Ae quia mae mbeite nguiã jendese co. ²³ Jê mbae raã mose, jêsaã turã ño nguiã. Mbia je eã ño jêingo nguiã mbae raã. Dios je chõ jêingo nguiã eraã. ²⁴ Dios ra mbae turã mee jêje jenyisaã turã ndibishorõ. Cristo je chõ jêingo nguiã mbae ao ao ùquĩ. Jenderequa tuchi chõ ae re. ²⁵ Ae mbae icuã saã nguiã nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4 Mbia rerequa je tacheẽ cote. Jenimba jembuquieie quieie chooño eã ño nguiã. Mbae jêsaã turã jiri quiato quia jenimba je. Jê abe jenderequa riqui Dios co no.

² Jeñee ñee mbei quiato quia Dios je. Jêtesa tesa bei quiato quia Dios rese. Gracias jenyé bei quiato quia ee. ³ Jeñee ñee mbei quiato quia Dios je ure riĩ. ã nda Dios riqui sembuheẽ ñee mbei tuchi mbia je Cristo riĩ. Ae rese mbia riqui jiranuate Cristo rese nae, ùquĩ asenei senei sete mbia je. Nyebe setarõ ji aĩ nguiã a. ⁴ —Paba, sã Pablo Jesucristo mbuchecua checua tuchi quia mbia je, jenyé bei quiato quia Dios je.

⁵ Jeñimbaaracua chõ nguiã siqui turã Jesús quiatoã je. Ae Dios bite nae, ùquĩ ndese chõ jêingo ñimbecoteã. ⁶ Sã embiquesa riqui mbae mbiise no. Eĩ jenyé si chõ nguiã ñee turã mbia je. ã nda jêaquiature ñee Jesús quiatoã ñee ndibishorõ.

Pablo ñee hui bei

⁷ Tíquico si quia jendea aque. Ae ra mbae senei ja jêje jembiiirandu serĩ. Ae que mbae saã turã mbeite quia serese ra. Dios rimba turã tuchi chõ ae re.

⁸ Nyebe amondo nguiã jendea aque. Jembiiirandu ja sacuã serese. Jembia tuchi sacuã Cristo rese abe.

⁹ Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. ùquĩ nyeremo nda jembiiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jêje aque. Marcos abe saludos mondo quia jêje aque. Bernabé nongue riirĩ ño ae re. Ae oso mose jendea, jêisi turã ño secheẽ nguire. Acheẽ ngue jêje eriĩ nyii. ¹¹ Jesús Justo abe saludos mondo quia jêje aque no. ùquĩ mii judíos que siqui tuchi quia serese Dios

cheẽ nenei nenei nda. Ûquĩ ngue sembiate quia mbae raã turã mose serese ra. ¹² Epafraſabe ſaludos mondo quia jẽje aque no. Criſto rimba rei ae no. Jendeſenda sí chõ ae no nde. Ae ñee mbeite quia Dios je jenii co. Jẽingo irãtã ſacuã Dios rui. Ae Dios bite riqui nae, ùquĩ ndeſe jẽingo tuchi ſacuã. ¹³ Epafraſa riqui nyeseſua tuchiſe jendeſe co. Aicuate ſe quia co. Laodicea jenda reſe abe eriqui nyeseſua tuchiſe co. Hierãpolis jenda reſe abe no. ¹⁴ Lucas abe ſaludos mondo quia jẽje aque no. Aba rasi rea reasa rei ae. Médico rei ae. Jeſús cheſeſua tuchi chõ ae re. Demaſ abe ſaludos mondo quia jẽje aque no. ¹⁵ Jeſús quiato Laodicea jenda je

ſaludar jenyẽ rã ure je. Ninfas je abe ſaludar jenyẽ. Ae ñumunua nua nguia Ninfas chuchua Jeſús quiato nae, ùquĩ abe je ſaludar jenyẽ rã ure je. ¹⁶ Ae ambesa mbeſa quia a nae, emondo nonde jẽje a nae, ã je leer jenyẽ ja rã. Aquere jemondo rã Jeſús quiato Laodicea jenda je. Ûquĩ abe leer i ſacuã ee. Ae carta ambesa Laodicea jenda je nae, jẽ abe leer jenyẽ ee no. ¹⁷ Jeñee na Arquipo je. —Ae je Jeſús ñee nae, “co eſaã ſeje” i ndeje nae, ùquĩ eſaã turã ja chõ, jenyẽ Arquipo je.

¹⁸ Hui bei ſacuã co ambesa mbeſa quia ſeo ae je co. Pablo chõ ſe re. Jendua ſereſe ſetarõ ji reſe. Sã Dios riqui turã tuchi jẽje. Amén.

1 TESALONICENSES

Pablo ã mbesa

1 Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús rĩĩ. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ùquĩ turã ndiqui bei jêje. Sã ùquĩ ndiqui jembia bei.

Jesús jêicuate quia ùquĩ

² Gracias, ure bei quia Dios je jenĩ ã. Jê ja rĩĩ. Ure ñee mose Dios je, jenĩ ño ureico nguiã ñee ñee ee ã. ³ Jesús jêicuate quia ùquĩ. Nyebe jêingo beite nguiã mbae turã ndese ùquĩ. Jenyesequate quia Jesús rese ùquĩ. Nyebe jêingo nguiã Dios cheẽ nenei nenei mbei mbia je ùquĩ. Jesús nyebi sí mose, ùquĩ ño jêsaarõ arõ u nguiã hue. Jeñĩmbirãcuã tuchi equia eraarõ arõ ùquĩ. ⁴ Seresenda, Dios riqui nyesequa tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espiritu Turã abe que jembaaquiatu quiatu ra. —Ichõĩño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. Ùquĩ ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbã icuã icuã mose jêje que Espiritu Turã ndiqui tuchi jendese ra. Jembia tuchi sacua. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbã que jirandu ja quia jendese ra. —Dios icuasa rei ùquĩ, i equia jenĩ ùquĩ. ¿Mbaerã nda Dios cheẽ asenei ee re? Jembiiirandu turã ngue eno. ⁹ Ùquĩ nguia ñee turãte nguiã jenĩ ùquĩ. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jenĩ ùquĩ. ¹⁰ —Tesalónica jenda chi Jesús raarõ arõ huee. “Tu ra nyebi ibate sí”, i u huee, i equia jenĩ ùquĩ. Jesús rei Dios reco riiĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbã icuã mbasi mose.

Dios cheẽ uresenei tuchi jêje

2 Ureso chooño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbã icuãte riqui ure je ra. Ureiruã nua ngue ra. Ùquĩ jêicuate quia ùquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbã icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiiĩrĩ irĩ eã. ⁴ —Mañĩ nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacua. Mbã mbã sacua eã ño ureico nguiã Dios cheẽ nenei nenei jêje. Dios mbã sacua ño ñene. Dios riqui mae mbeite urechiangui renda rese co. ⁵ Urecuasú que uresaã saã eãte quia jêje ra. Urecheẽ ñooño eãte que equia jêje ra. Jembiiĩrĩ irĩ eãt e que ureico quia ra. —Sã mbã mbae mo mee mee ure je, ure eãte que equia jembiiĩrĩ irĩ nda. Dios riqui maete urerese co. ⁶ —Jenderecuarã nda ure cote jê! ure eãte que equia jêje ra. Ure eãte que equia mbã mo abe je ra. Cristo chi mondo raque ure, echeẽ nenei nenei sacua jêje. ⁷ Ureico turã ngue equia jêje ra. Sã esi mo ndiqui nguiĩrĩ nderequia turã, eĩ ure chõ ngue equia jêje ra. ⁸ Urechesequa tuchi que equia jendese ra. Nyebe Dios cheẽ achõ eã uremee nguiã jêje. Mbae ja uremeese rete raque jêje. ⁹ Urechisaã saã ndese que jêingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguiã. Nyaashĩ mose achõ eã ngue ureico mbae raa naa nda. Itondaru mose ab e que ra. Ĩ nda je mbae jemondoã ure je. Ure Dios cheẽ nenei nenei mose jêje. ¹⁰ Jesús icuasa chõ jê cote re. Urecuata turãte que equia jêje ra. Jemaẽ ngue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹ Jendu rã ngue ureico jêje resẽ. Sã emo ndiqui nguiĩrĩ mundua turã no. Sã emo ndiqui nguiĩrĩ mbucuatã turã no. Eĩ si chõ ure re. Jemundua ndua. Jembucuatã turã nonde. ¹² Urecheẽ tuchi que equia jêje. —Dios quiato chõ jê cote re. Nyebe jêingo nguiã Dios mbã beite cote. Dios que jêirabo ra. Dios ra jenderecua

tuchi cote. Dios ra uturã mee jêje, ure beite que equia jêje ra.

¹³ Gracias, ure bei equia Dios je jeni a. Dios cheẽ nguiatu ngue jêisi turãte nguiã. Ure Dios cheẽ nenei nenei mose jêje, jêisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra. ¹⁴ Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguiã jêje Jesús rĩĩ ũquĩ.

¹⁵ Judíos sĩ que Jesús iquia nandererecua ra. Sã Dios cheẽ mbuchecuasa iquia nyii no, eĩ sĩ que Jesús iquia no nda. Ure abe mombo no. Judíos icuã tuchi que ũquĩ nda. ã eicuãte riqui Dios je ã. Mbia abe je eicuãte riqui ã no. Mbia ja je. ¹⁶ —¿Mbaerã nda jêso Dios cheẽ nenei nenei Judíos eã je re? i que equia ure je ra. Ureriquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacuã eicuã si. Judíos que urecheẽ siquisã quisã ño nguia ra. Judíos que huĩcuã saã i i tuchi quia ra. Nyebe que Dios pama i tuchi ee cote ra. Dios ra embasi tuchi cote.

Sesose rete jendea

¹⁷ Seresenda, ishote urecu jêsi a. Nyebe ureya eãte riqui nguiã jendese ã. Uremaese rete quia jendese ã. Urendua beite quia jendese ã. ¹⁸ Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguia ra. ¹⁹ Jesucristo ra tu si nyebi nanderea. Seya tuchi aico eraarõ arõ a. Jê nguia uremombia mbia beite nguiã ũquĩ. Jêchĩ Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jêisi turã nda. Nyebe ra Jesús ia tuchi urerese eru mose.

3 —Tairandu tuchi rã erese, ure tuchi que equia jeni nda. Urendua ndua tuchi que equia jendese ra. Nyebe ure ae ureico nguiã Atenas. ² Nyebe que Timoteo amondo rei nguiã jendea. Jirandu sacuã jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacuã Jesús rese ra. ³ Timoteo que amondo jendea ra. Ì nda jêhui eã Dios cheẽ si mbia icuã mose jêje. Mbia icuã tuchi que eriqui jêje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguiã nande je. ⁴ Ureico que equia jendese nyii, aque mose que ureico rei ñee jêje resẽ. —Mbia icuã tuchi ra eriqui nande je, ure rei que equia jêje nyii resẽ. ¡Sã ngasẽ cote jê! ¡Sã mbia icuã icuã nande je cote jê!

⁵ Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacuã. —¡Quiatu Jesús quiato rea jê! Siqiu bei rei equia Jesús rui reae. Aba mbiĩrĩ irĩsa embĩcuã eã ndei reae. Dios

cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jêsi cote ra. Ñee turãte que u jeni nda. —Hue que echĩ Dios icua tuchi ra. Hue que echĩ nyesecua tuchi Dios rese ra. Nande abe rese que echĩ nduate huee ra. Eyayãte eriqui rei nanderese, i que Timoteo u urembiirandu jeni nda. Ure abe ureyayãte riqui jendese ã. ⁷ —Hue que echĩ Dios icua tuchi ra, i mose que ureya tuchi ra. Mbia icuãte raque ure je. Seresenda, jê urembiate quia ũquĩ. ⁸ Ureya tuchite jendese, jêingo bei mose nandererecua rese. ⁹ Dios urembia tuchite quia jendese co. Nyebe ureico nguiã gracias i ee co. ¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeni nda. Ì nda jembaaquiatu ji jêingo tuchi Dios rese.

¹¹ Dios rei nanderu. Jesucristo rei nandererecua. ũquĩ je ureico ñee tuchi ã. Urererao sacuã jendea. ¹² Sã nandererecua jembuchesequa tuchi jenyiese. Mbia ja rese. Sã ureico nyesecua tuchi jendese no. Eĩ jenyese si chõ nguia nyesecua mbia rese jê abe no. ¹³ Ì nda Cristo uquirãcuã mee jêje. Ì nda Cristo jemingo icúe umbaerã tuchi. Ì nda jemingo turã mbei Dios rese. Jesucristo tu mose chee ibate si. Mbia ra ñee icuã aroneate jeni cote. Ñee icuã aroneate ra Dios je jeni. Jesucristo tu mose ra Dios mae jêturã ndese. Jesucristo ra tube uquiato ja rese.

Jêingo turã, i Dios mbia je

4 Seresenda, tacheẽ tuchi jêje. Jesús cheẽ ngue uresenei senei tuchi quia jêje ra. ũquĩ nduĩ chõ jêingo turã ndei nguiã ũquĩ. Jêingo i i tuchi quiatu erui jê. Ì nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererecua tuchi chõ Jesús re. Ae chõ urembucheẽ nguiã jêje. Ae cheẽ si jêingo tesarei ãte ũquĩ. ³ Dios jemingo sete quia icúe umbaerã co. ¡Emo ninisi rese ra jêingochĩ jê! ¡Eru eã mo ndese abe ra jêingochĩ jê! ⁴ ¡Jeninisi ae rese chõ jêingo! Jeninisi jendeco turã ño nguia. ⁵ Dios icuasa reã ño mbia ninisi oseĩ oseĩ nguiã ũquĩ. ¡Eĩ jenyechĩ nda jê jê! ⁶ ¡Jenongue ra jembĩrĩ irĩchĩ eninisi rese jê! ũquĩ naa naa mose ra Dios jembasi tuchi. Nyebe urecheẽ nguiã jêje nyii. ⁷ —Jêingo turã icúe sembaerã, i que Dios nande je ra jê. —Jêingo icuã icuã, iã equia nande je co. ⁸ ¡Urecheẽ jêisi turã ño nguia jê! Jê urecheẽ isia mose, eĩ jenyese chõ nguiã Dios ucuayã. Urecheẽ achõ eã ño uresenei senei nguiã jêje. Dios cheẽ ño ñene. Dios sĩ que Espiritu Turã mondo nande je ra.

⁹ —Jenyesequa jenyiese, aeã nda jêje cote. ¿Mbaerã nda acheẽ jêje re? Dios que ñee jêje no. Nyebe jêingo nguiã nyesecua jenongue rese ũquĩ cote. ¹⁰ Macedonia jenda rese jêingo nyesecua ũquĩ. Jesús quiato rese. Jenyesequa i i tuchi jiri erese jê. ¹¹ ¡Jêingo turã ño nguia

jê! ¡Jeñimbecoteã ño nguia jembae rese jê! ¡Jêquiei quiei bei equia jê! Ûquĩ ngue urecheẽ jêje nyii resẽ.
¹² Ûquĩ naa mose ra Jesús icuasa reã ñee turã turã jêje. Ûquĩ naa mose ra mbae tiã eã jêje no.

Jesús ra tu nyebi íbii

¹³ Mbia raaque rese taembiirandu rá. Í nda jêyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, ¡ eã ño Jesús icuasa reã nguia mbia raaque je ùquĩ. ¹⁴ Jesús que mano ndei nguia nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ûquĩ nandeicuate quia ã. ¹⁵ Nandererecua Jesús cheẽ uresenei senei nguia jêje ã. Jesús ra tube íbii. Aque mose ra mano je rane nyoĩ area. Ae nandereco nandeico ã nae, ùquĩ abe ra nyoĩ erui cote. ¹⁶ Cristo ra tu nguichi ibei si. Ererecua rá nda eru ñee mbia je. Angel nderecua ibatenda ra ñeemombo. Corneta abe ra pu ¡ Dios mbae. Cristo nguichi mose íbii. Aque mose tuchi ra Cristo icuasa mano je quera si. Ûquĩ nane nda quera si. ¹⁷ Aquere ra nandereco rerao ùquĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ Ñ ndei Dios cheẽ ã. Jeñimundua ndua bei quia erese. Í nda jêya tuchi erese.

Jêquiche je na Jesús ru chã

5 —Aque mose ra Jesús ru, ae eã nda jêje, Seresenda. ² Isa chõ mbae mbuquiachãsa riqui nguia tu. Mbia ndua eã mose ra eru. Eĩ si ra Jesús u, mbia ndua eã mose erese. ³ —Ureico turãt e quia ã ndesẽ, ¡ ra mbia. Ajee tuchi ra Jesús ru aque mose. Mbia mbutiã nonde cote. Sã nanimbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴ Jê nguia jêingo ãte nguia itondaru ùquĩ, Seresenda. Jêaquiatuã eã ño jê nde. Jê nguia ra Jesús jembua eã u. Mbae mbuquiachãsa rá eã nda eru jêje. ⁵ Nyaashĩ na ño jêingo nguia jê ja ùquĩ. Itondaru rá eã ño nandeico nguia nande ã. ⁶ Nyebe nandechumumba rá mbei chõ nandeico nguia tesa. Mbia ataque quiarei uque bei. ⁷ Ae uque quia, ùquĩ ño uque nguia itondaru. Ae quiacua quiacua quia, ùquĩ ño quiacua nguia itondaru. ⁸ Nyaashĩ jenda chõ nande re. Nyebe nandechim-

baaracua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ûquĩ nandeicuate quia ã. Nyebe ra mbae icuã ocoã nanderese. ⁹ Nandembasi sacua eã ngue Dios nandeirabo ra. Nanderirõ sacua eicuã si chõ ngue nandeirabo nguia. Jesucristo riĩ nda nanderirõ eicuã si. Jesucristo rei nandererecua. ¹⁰ Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹ Ñ ndei Dios cheẽ ã. Jê ño jeñimundua ndua nguia erese ùquĩ. ¡ Ûquĩ jêsaã saã mbei quia jê!

Pablo embaaquiatu

¹² Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguia. Jembaaquiatu quiatuchĩ equia ùquĩ. ¹³ Nyebe jêingo turã ño nguia ee. Jenyesequa tuchi quia erese. Jembaaquiatu quiatu sacua ño ùquĩ nde. ¡jêingo turã ño nguia jenyue! ¹⁴ Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ùquĩ jemingobe erese. Ae equirãcuã neate, ùquĩ jembirãcuã. Jêingo mingue chõ nguia mbia ja je. ¹⁵ Mbia icuã mose jêje ¡jêicuã eã ño ee jê! ¡jêingo turã ño jenyue jê! ¡jêingo turã ño mbia ja je no jê! ¹⁶ Jêya bei jêingo. ¹⁷ ¡Jeñee ñee mbei quia Dios je jê! ¹⁸ Gracias, jenyue quia Dios je mbae ja riĩ. Ebi tuchi quiarei ùquĩ. Jesucristo icuasa chõ jê nde. ¹⁹ Espíritu Turã nda jêisiquisãchĩ jê. ²⁰ Dios cheẽ mbuchecua cheẽ jeñandu turã ño nguia jê. ²¹ —Ma ñee ñooñoa, jenyue tuchi quiatu eicua jê. Ñee ñooño eã mose, erui jêingo. ²² ¡Mbae icuã ja rese ra jêingochĩ jê! ²³ Aba mombiasa chõ Dios riqui nguia co. Sã ae si jemingo icúe umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jenĩ cote. ²⁴ Ûquĩ nda Dios saã ja jêje. Ae quiarei ichõiñosa reã tuchi.

Pablo ñee hui bei

²⁵ Jeñee mbei quia Dios je urerĩ, Seresenda. ²⁶ Mbia nanderesenda jêquiaam a ama ja ure je hue jenda. ²⁷ Ñ sechimbesa jêsenei ja rá nandenongue hue jenda je. —Jêsenei na, ¡ Cristo quia jêje co. ²⁸ Jesucristo rei nandererecua. Sã ae riqui siqui turã mbei jendese. Amén.

1 TESALONICENSES

Pablo chimbesa

1 Pablo rei se. Silas riqi serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ũquĩ. Jesucristo icuasa chõ jêingo nguia ũquĩ. Dios rei nanderu. Jesucristo rei nandererecua. ² Sã ũquĩ turã ndiqui jêje. Sã ũquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã ã. Coche ureico nguia ñee Dios je jeniã. Jê nguia jêingo nguia Dios icua tuchite ũquĩ. Jê nguia jêingo nguia nyesequa tuchite jenyiese ũquĩ. ⁴ Nyebe ureico nguia ñee turãt e jeniã ã. Ae ñumunua nua nguia Dios je, ũquĩ ja urembiirandu turã nguia jendese ã. Jêingo mingwete quia mbia icuã je ũquĩ. Jêingo Dios icua tuchite ũquĩ. Mbia icuãte riqi raque jêje. Mbia icuã mose jêje, jê jêturãte riqi ee ũquĩ.

⁵ Sã Dios turã tuchi riqi no jê. Sã mbia mbuchecha turã no. Ae ra ñimbiirãcuãte quia mbia icuã icuã mose Jesús rĩ ee nae, ũquĩ je ra mbae turã mondo. Mbae ra emondo mbia chisaã turã ndibishorõ. Mbia chisaã icuã abe ribishorõ no. ⁶ Ae jembasi mbasi quia nae, Dios ra ũquĩ mbasi tuchi cote. ⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbia icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo rĩ. ⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquiã mbei Dios rese cote. Dios quirãcuã ndese abe ra eriquiã no. ¹⁰ ũquĩ nda Jesús saã ucheẽ mumba mumbasa je tu mose. Echiirabo quia ra ñee turã turã mbei erĩ eru mose. Eicuasa ra ñee turã turã mbei erĩ eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe ureico nguia ñee ñee mbei Dios je jeniã ã. Ae Dios bite nae, ã nda ũquĩ jêsaã saã mbei quia. ũquĩ je que Dios "jenyu" i jêje ra. Mbae turã jêsaã saãse rete quia ũquĩ. Sã Dios uquirãcuã mee jêje. Mbae turã naa naa nonde cote. Jesús icuasa chõ jengu nguia huee. ¹² Jê mbae turã naa naa mose, mbia ra ñee turã turã Jesucristo rĩ. Jê abe rĩ nda Jesucristo mbia

mbucheẽ turã turã. Dios quia eturãte riqi nguia nande je. Jesucristo abe eturãte nande je. Ae rei nandererecua.

Dios ucuãyãsa

2 Jesucristo rei nandererecua. Ae ra tu nandemunua mbucha uchiese. ũquĩ ño asenei senei nguia jêje. ² —"Co Jesús ru quia co", i que Pablo ra, ichõiño nda mbia serĩ jêje. Jeñanduchõ ño ũquĩ mose. —Co Jesús ru quia co, ae eã se quia embesa jêje a. Mbia mo nda ñee ñooño jêje. —Jesús ra tu cote. Dios que sembiirandu ra, ichõiño nda jêje. ũquĩ jeñanduchõ ño. ³ iMbia ra ñee ñooño chĩ jembĩrĩ irĩ jê! Jesús rane nda tuã nguia. Mbia rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque rĩ nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbia mbĩrĩ irĩ. —Se rei Dios, ichõiño nda huĩ mbia mbĩrĩ irĩ. ⁵ Seico mose jendese que asenei ja jêje ra. ¿Jêtesareiã ndei equia secheẽ si re? ⁶ Dios ucuãyãsa ra tu emo mose. Eriquisã ji ae riqi nguia aque. Eriquisã iriã mose ra eru. Eriquisãsa jêicua quia ũquĩ. ⁷ Mbia Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iriã mose quia ra eru cote. ⁸ Nyecua tuchi ra u mbia je cote. Jesús ra tu erĩcharã cote. Jesús nininya tuchi ra tu. Aque mose ra Dios ucuãyãsa iquia. ⁹ Satanás nda uquirãcuã mondo Dios ucuãyãsa je. Dios ucuãyãsa mbuquirãcuã sacua. Mbae icuã chumumbara tuchi ra equeru. Ñee ñooño nda u mbia je. Mbia mae sayã nda esaã saã u mbia mbĩrĩ irĩ sacua. ¹⁰ Dios ucuãyãsa icuã tuchi ra Jesús quiatoã je. Jesús quiatoã mbĩrĩ irĩ tuchi ra u. Jesús quiatoã nyesequa eã nguia Dios rese resẽ. Nyebe ra Dios ũquĩ ndiroã eicuã si. Dios ra uquiatoã mbutiã tuchi. ¹¹ Dios rese eriqui nyesequa eãte ã. Nyebe Dios aba mbĩrĩ irĩsa mondo nguia ee. Nyebe eriqui nguia "ae beite", i aba mbĩrĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icuã saã sete quia, ũquĩ je. —Jêso tata cuásuu, i ra Dios ee.

Dios chiirabo rei jê

¹³ Seresenda, Jesubite jêingo ũquĩ. Gracias, ure bei quia Dios je jeniã a. Dios que jêirabo cose nyii ra. Jendirõ sacua jêicua si. Espiritu Turã jemingo sacua icúe. Jê ichõiñosa reã jêicua sacua. ũquĩ je chõ ngue

Dios jëirabo nguiã. ¹⁴ Jesús cheë ngue uresenei senei nguia jëje huee ra. Aque mose que Dios "jenyu" i jëje ra. Jembuquirãcuã sacua Jesucristo quirãcuã je. ¹⁵ Seresenda, ¡jëhui jëhuichĩ nda esi jë! ¡Urecheë ndui jëingo bei jë! ¡Urechimbese abe rui jëingo jë! ¹⁶ Dios rei nanderu. Ae quia rei eturã tuchi nande je. Ae quia rei nyesequa tuchi nanderese. Ae quia rei nandemombia mbiasa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ùquĩ ndiqui tuchi jendese. Jëhui eã sacua echeë si. Ì nda jeñee turã mbei quia querabe. Ì nda jëingo bei mbae turã ndese querabe.

Jeñee Dios je

3 Seresenda, jeñee mbei quia Dios je ure riĩ. Ì nda isho ishonda Dios cheë andu ja. Ì nda eandu chooño eã. Ì nda eisi turã jë na si. ² Ì nda Dios mbia icua ndiquisã ure si. Mbia mñ mñ ño Dios icua nguiã ã. Mbia ja eã. ³ Nandererecua ñee ñooño eã nguiã co. Uquirãcuã nda emee jëje ucheë nguire. Mbae icua nda esiquisã jësi. ⁴ Urecheë ndui si chõ jëingo nguiã ùquĩ. Ae uresenei senei nguia jëje, ùquĩ ndese ra Dios jemin-go tuchi. ùquĩ ño aicua nguiã ã. ⁵ Sã nandererecua siqui tuchi jendese jë! Jëirandu sacua Dios nyesequa rese nanderese. Jë abe jëingo mingue sacua Jesucristo rã si.

¡Jëtomeite ra jëingochĩ jë!

⁶ Jesucristo cheë tuchi chõ ã nde, Seresenda. Jesús quiato mo tomei mose, jëhui chõ esi. Jesús quiato siqui sereã mose mbae mo ndese, jëhui chõ esi no. Jesús cheë tuchi chõ ã nde. ⁷ Ure rã si chõ jëingo. Ure-

tomei ngue uresaã saã eãte quia jëje ra. ⁸ Jë mo ngue urembuquiaru chooño eãte quia resë. Mbae mo ño ngue uremondo mondo quia urechiurã ndibishorõ ndesë. Urequei quiei beite que equia resë. Itondaru mose abe. Jë mbae mondochõ eã sacua ure je. ⁹ —Mbae mo embu se, ureã mbei que equia jëje resë. Eturete raque ùquĩ. Urequei quiei chõ ngue equia urembaerã ndesë. Jembaaquiatu sacua. Ure rã si jëingo sacua quiei quiei. ¹⁰ Ureico mose jendese que jaembiirandu rei resë. Ae quiei quiei sereãte quia, ùquĩ nda quiaruã. ¹¹ Ureirandu que jendese ra. Jëataque nda quiei quiei eã tuchi quia ra. Si qui chooñose tuchi nda equia ra. Uchuru mondo chooño ñee emo je. ¹² Sã ùquĩ ae riqui quiei quiei uchiurã ao sacua. Jesucristo cheë tuchi chõ ã nde. Nandererecua tuchi chõ a e re. ¹³ Seresenda, ¡mbae turã ndese chõ jëingo bei jë! ¡jëhuichĩ nda esi jë!

¹⁴ A urecu urecheë mbesa mbesa emondo sacua jëje a. Jë mo urecheë mumba mumba mose, ùquĩ ndese jema tuchi. Jëhui chõ ùquĩ si. Ì nda ireĩ ireĩ jiri urecheë mumbare. ¹⁵ ¡Ùquĩ nda jëucuãyã cuãyãchĩ jë! ¡Jeñee turã ño equia ee jë! ¡Jembaaquiatu quiatu turã ño jë! Jendesenda chõ ñene. Urecheë mumba mumbate raque.

Hui bei

¹⁶ Cristo rei aba mombiasa. ¡Sã ae riqui jemombia bei jë! Jëingo mose jenyuchúaa. Jengatásaa abe no. ¡Sã eriqui bei jendese jë! ¹⁷ Pablo rei se. Se ae chõ ã ambesa nguiã hui bei a. Sechimbese ae chõ ã nde. Sechimbese jëcuate quia ùquĩ ndesë. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jë ja je.

1 TIMOTEO

Pablo embesa Timoteo je

1 Pablo rei se. Jesucristo chĩmbaaquiato, Jesucristo chĩmondo. Dios abe chĩmondo. Dios ae nanderirõ nguiã nandeicuã si. Jesucristo chõ nandesaarõ arõ nguiã ã. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriiĩ i ndeje co. Dios rei nanderu. Jesucristo rei nandererecua. Sã ũquĩ turã mbei riqui ndeje. Sã ũquĩ ia eã mbei riqui nderese. Sã ũquĩ nembia tuchi.

Emo ndiqui mbia mbaaquiato icuã icuã ã, i Pablo

³ Sã acheẽ ndeje seso mose Macedonia no. “Efeso eico” ae que ndeje, huae bei chõ eico. Ae ñee ñooño nguia mbia mbaaquiato icuã icuã hue nae, ũquĩ ñee embutiba. ⁴ ũquĩ siqui bei quia mbia cheẽ ima nenei nenei mbia je ũquĩ. ũquĩ siqui bei quia amei cose ndare nenei nenei mbia je ũquĩ no. ũquĩ ñee embutiba. ũquĩ ñee icuã icuãte quia ũquĩ. ũquĩ ñee ño mbia mbaicuã icuã nguiã nyue. ũquĩ ñee nda aba mbaaquiatoã Dios rĩ. ũquĩ mose Dios icua aroneate. ⁵ Sã hue jenda turã mbei riqui Dios je jẽ. Sã hue jenda riqui ndua turã mbei jẽ. Sã hue jenda riqui Dios icua tuchi jẽ. Nyesecua tuchi nda nyiese cote chã. ⁶ Mbia hue jenda mo ndiqui tesarei Dios cheẽ si ũquĩ. Dios cheẽ abi abi. Ñee ñooño mbei equia nyue ũquĩ. ⁷ Moisés cheẽ ndese mbia tambaaquiato, i raque equia ũquĩ. Moisés cheẽ icua rocoĩ. Eaquiato rocoĩ. Echeeño ño ñene.

⁸ Dios que Moisés mbucheẽ turã mbia je ra. Mbia icuã je que embucheẽ nda. Mbia mundua sacua huicuã ndese. ⁹ Mbia turã je eã ngue Dios Moisés mbucheẽ nguiã. Mbia turã je eã ngue Dios ley mi nguiã. Dios cheẽ mumbasa je chõ ngue emi nguiã. Mbia icuã je. Dios quiatoã je. Mbia teã teã je. Usi ucuãyãsa je. Ngu abe ucuãyãsa je. Mbia iquiasa je. ¹⁰ Ucheẽ mumbasa je chõ ngue Dios ley mi nguiã. Ae siqui quia emo ninisi rese, ũquĩ je. Ae eninisirã saã saã nguia nguesenda mo je, ũquĩ je. Mbia rirõsa je abe no. Ñeeñoofosa je abe no. Ae eicuã icuãte riqui Dios cheẽ turã je, ũquĩ je abe no. ũquĩ ja je chõ ngue Dios ley mi nguiã. ¹¹ Dios que ñee ucheẽ turã ni seje ra. —Secheẽ esenei senei mbia je, i que Dios seje ra.

Dios que uturã teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirãcuã nda. Ae que semondo ucheẽ nenei nenei sacua mbia je ra. ¹³ Seicuã tuchi raque ee nyii. Acheẽ icuã icuã ndei que se quia ee nyii ra. Equiato je abe que seicuã icuã ndiqui nyii ra. Se Jesús icuayã mose. Seaquiatoã mose. Nyebe Dios ia eãte riqui nguiã serese. Nyebe Dios seicuã mbutiã nguiã sesi cote. ¹⁴ Uturã ngue eteacuquia seje ra. Nguiĩ ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesecua Jesucristo rese co cote. ¹⁵ Jesucristo que tu íbii ra. Mbia icuã mbitirõ sacua. Emingo bei nonde. Ichõñoa tuchi chõ ã nde. Sã mbia “ae beite” i ja ã je. Seicuãte raque se quiato mbia ja si. ¹⁶ Dios ia eãte que eriqui serese ra. Eroseĩ nguiato tuchi que eriqui seje ra. Nyebe mbia riqui nguiã jirandu ja Dios roseĩ nguiato rese. Sã Dios semingo bei se abe, i chee ra emo abe ñee ñee. Dios roseĩ nguiato rese jirandu mose. ¹⁷ Sã mbia riqui ñee turã mbei Dios je. Ae mi ño mbia rerecua tuchi re. Ae mi ño siqui bei tuchi nguiã co. Ae mi ño ererecua nandemae sayã nde. Ae mi ño mbae icua tuchi nguiã. Amén. ¹⁸ Timoteo, seriiĩ na tuchi chõ nde re. Dios cheẽ mbuchecua que sembiirandu nderese nyii ra. Nyebe aico nguiã ñee tuchi ndeje ũquĩ ñee na si. Mbae icuã esiquisã quisã mbei chõ nguia Jesús quiato si jẽ. ¹⁹ Dios eicua tuchi quia jẽ. Erendua ata atate chĩ nda jẽ. Mbae turã ndese chõ eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. ²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacua. Ñee icuã icuã eã sacua Dios rĩ.

Sã mbia ñee turã ja Dios je, i Pablo

2 ã tacheẽ Jesús quiato ja je: Mbia ja rĩ jẽingo bei ñee Dios je. Ñ nda Dios uturã mee mbia je. Gracias jenyje bei quia Dios je mbia ja rĩ. ² Ae ererecua nae, ũquĩ ja rĩ abe jẽingo ñee mbei Dios je. Dios uturã mee sacua ee. ũquĩ mose ra nandeico turã ja cote. ũquĩ mose ra nandeya bei nandeico cote. ũquĩ mose ra nandeico tuchi Dios rese cote. ³ ũquĩ mose ra Dios abe ia tuchi nanderese. Eicuã si mbia rirõsa chõ ae re.

⁴ Dios mbia rirõ ja sete quia eicuã si co. Dios mbia mbaaquiato quiato sete quia co no. ⁵ Dios mii ño siqui nguiã co. Mbia que icha icha jate esi ra. Jesucristo mii ño siqui nguiã mbite re co. Mbia mbucha sacua Dios rese. Mbia sí chõ ae re. ⁶ Jesucristo que mano mbia icua ndiquicharõ sacua nda. Uquĩ ndese que Dios mbia mbiirandu cote ra. ⁷ Uquĩ nii ngue Dios seirabo ra. Semondo que judíos eã je embaaquiato quiato sacua nda. Uquĩ Dios icua sacua ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huirao rese. Uachu riinda hui rese abe. Ua rese abe no. Lujo rese abe no. ¹⁰ Sã eriqui quiato ndua Dios rese. Sã eriqui mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyi-isaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiato aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiato ngue Eva ao nguiã cote. ¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icua saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesequa mose mbia rese.

Sã Jesús quiato rerecua siqui turã

3 Acheẽ ñooño eã ño se re. Jesús quiato reaquiato sacua ño taico se, i mose emo, eturãte uquĩ. ² Sã Jesús quiato rerecua riqui siqui turã mbei. Mbia ñee eã sacua ee. Sã ngūinisi mii ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiato aracua. ³ Sã eriqui quiacuayã. Sã eicuã icua eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui nguiirĩ mbaaquiato quiato turã. Aba cheẽ mumbayã sacua. Iĩ nda eriirĩ eĩ ñooño eã mbia je. ⁵ Nguiirĩ ndea chooño mose, Dios quiato reaquiato turã aroneate. ⁶ Ae Jesús icua ramote nae, Jesús quiato rerecua aroneate uquĩ. Uquĩ mose ucuasu raã naa arõte. Eicuã arõte cote. Sã Satanás abe ucuasu raã naa ñimbicuã nonde no. ⁷ Sã Jesús quiato rerecua riqui siqui turã mbei Jesús quiatoã abe je. Iĩ nda diablo embiirĩ irĩ eã embicuã. Iĩ nda Jesús quiatoã ñee turã mbei eriĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹ Sã

diáconos siqui eã tuchi mbae icua mo ndese. Sã Dios mii ndese quiato eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo nii. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngūinisi mii ño nderequia. Sã eriqui nguiirĩ nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacua mbia je.

Ae Dios saã nande je, uquĩ aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquiato sacua ño aico nguiã ã mbesa ndeje a. Iglesia jenda rerecua irabo sacua. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, uquĩ aba icua ja aroneate raque:

Dios que tu mbiarã íbii ra. Jesús, i equia ee.

“Eturã tuchi” i que Espíritu Turã eriĩ nda.

Angeles abe que mae erese ra.

Ae Jesús quiato nae, uquĩ ngue esenei senei mbia ataque je ra.

Mbia mangue chooñoa jenda ja que eicua ra.

Aquere que Dios equeraobe ibate cote ra.

Mbia ra hui hui Dios cheẽ si

4 Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiirĩ irĩsa rese ra mbia riqui tuchi. Uquĩ nda mbia mbaaquiato icua icua aba checuayã icua na. ² Ae uturã saã saã nguia nae, uquĩ ndui rui ra mbia riqui. Ae ñee ñooño nguia nae, uquĩ ndui rui ra mbia riqui no. Uquĩ siqui beite mbae icua ndese uquĩ. Nyebe eriqui nguiã mbae turã icuayãte chee cote. ³ Uquĩ nda mbia mbaaquiato icua icua. Jeninisiã nda jendecoã. Jendurã abe ra jendecoã no, i ra equia ñee mbia je. —Mbae ra jëu chooñochĩ jë, i ra equia mbia mbaaquiato icua icua. Dios mbae chao ja raque mbia chiurã. —Sã sequiato mbae ja u, gracias ire seje, i que Dios ra. ⁴ Dios chiao mbae turã ja. Mbae nandesi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecua turã

⁶ Ñ secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico

tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ ñooño je cheẽ ndese ra erechiisaquiachĩ jẽ. Echimirãcuã tuchi quiatu quia siqui Dios rese jẽ. ⁸ Nanderete quirãcuã mose, eturãte raque. Nandeico mose Jesús rese, ùquĩ nguiatu eturã tuchi nanderete quirãcuã si re. Achõ eã nandeico Jesús rese. Ibate abe quiatu nandeico erese. ⁹ Acheẽ ñooño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ ñi ño ureico nguiã quicoi coi ã. Dios cheẽ ñi ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ùquĩ nda emingo bei.

¹¹ Ñ esenei senei mbei quia mbia je. Mbia Dios cheẽ mumbayã sacua. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato résaa. Ùquĩ siqui turã sacua nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icua ndese ra eremae mae jirichĩ. ¹³ Mbia embaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecua o chono mose ndearõ, aque mose que Dios nembaaracua tuchi ra. —Ñ esaã, i que ndeje ra. Ùquĩ si ra eretesareichĩ. ¹⁵ Ùquĩ ndese eico bei. Endua ndua bei quia erese. Ùquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icua si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ùquĩ mose ra Dios nemingo turã tuchi. Ndecheẽ andusa abe ra emingo turã tuchi.

Jesús quiato siqui turã sacua

5 Erecheẽ icua icuãchĩ nda amei je nde embaaquiato quiatu mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icua icua eã ño nguia erĩ jẽ. ³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbebosa je. Ùquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ùquĩ ndese achõ eru cheecha mo siqui mose, eicuãte ùquĩ. Eraaque rã ño aque riqui nguiã. Eresco siqui raque. ⁷ Ñ esenei senei nguia mbia Jesús quiato hue jenda je. Ñ nda mbia ñee icua eã erĩ. ⁸ Emo ndua eã mose usi rese, ngu abe rese, eicuãte ùquĩ.

Mbae mee mee eã mose ee, eicuãte ùquĩ. Ùquĩ siqui ãte quia Dios rese ùquĩ. Eicuã tuchi chõ ùquĩ Dios quiatoã si re.

⁹ Ari eru cheecha je inscribir jenye rã mámbi. Ae sesenta años eãte nae, ùquĩ je inscribir jenye eã. Ae eru ata nyii nae, ùquĩ je inscribir jenye eã no. Ae eru mi nyii nae, ùquĩ mi je chõ inscribir jenye. ¹⁰ Ae ari turã aba chiicuate nae, ùquĩ achõ je chõ inscribir jenye. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ùquĩ ari je chõ inscribir jenye. ¹¹ Eru cheecha ari eã mose, ùquĩ je inscribir jenye eã. Ùquĩ nyao arondete Cristo si. Ae ebite, ùquĩ achõ ndese ndua mose. —Serurã mo tateabe, i ra cote. ¹² Ùquĩ mose ra Dios paama i ee. Ucheẽ mbuchebi chõ nguiã ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea chooño arõte. Mbia mbuchee ñee ñooño arõte emo ni. Uchuru rerequia chooño eã arõte. ¹⁴ Nyebe aico nguiã ñee eru cheecha, ae ari eãte, ùquĩ je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ùquĩ mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eã sacua ee. Ae eru cheecha eriiriãte nae, ùquĩ je quiatu iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuasua mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i que embesa ji ra. ¹⁹ —Jesús quiato rerecua que mbae icua saã nda, i mose emo, echeẽ nda jeñanduchĩ, ae mi ñee mose. Nyeremo ñee mose, ùquĩ ñee ñooñoa arõte cote. ²⁰ Jesús quiato rerecua mo siqui siqui bei mose mbae icua ndese, echeẽ asi asi ee Jesús quiato ataque résaa. Ñ nda ùquĩ abe siquiche mbae icua naa naa eã. ²¹ Eẽ ere chõ Jesús quiato rerecua je, siqui mose mbae icua ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremi jeichĩ jẽ. Emae nguiatu turã na erese nyii. Emi jei mose, eicuã arõte emo mose. —Eremi jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ũquĩ nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6 Ae Jesús quiato ererecua rimba mo nae, sã ũquĩ ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiato quiatu quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jësaã turã tuchi quiatu quia ee. Jëingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ũquĩ ndiqui nguiã. ⁴ Ucuasu raã naa ño nguiã ũquĩ. Ñee tuchi beite equia ũquĩ. Eaquiato rocoĩ. Mbia mbicuã icuãte equia ũquĩ. Mbia mbuecheẽ icuã icuãte equia nyiese ũquĩ. ⁵ Ndua icuã icuã mbeite equia ñee turã ndocoĩ ũquĩ. Eicuã icuã mbeite riqui emo je ũquĩ. —Mbia ra mbae isiquia mee seje, se Dios cheẽ nenei nenei mose ee, i beite equia ũquĩ. ũquĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mii ndese. ⁷ Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸ Nandechiurã nandereco mose, nanderao abe nandereco mose, nandeya chõ nandeico ũquĩ ndese. ⁹ Ae “mbaecha tuchi ra se” i bei quia ndua ndua, ũquĩ nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguiã. Echioseĩ oseĩ icuã nda equerao chee tata cuásuu. ¹⁰ Ae ndua beite quia mbae isiquia rese, ũquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguiã hui Dios si ã. Nyebe eya eã ndasi tuchi riqui nguiã ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesequa bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹² Echimbirãcuã tuchi quiatu quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguiã nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. ũquĩ ndese bei chõ eico. ¹³ Dios ae chõ mbae mingo ja nguiã co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae rĩ Dios ñee ndeje nae, ũquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. Ì nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je. ¹⁶ Dios mii nda manoa. Ae mii ño siqui bei nguiã nyaashĩ na co. Mbia mo nda esichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩ. Sã eriqui ñee turã mbei equirãcuã nii. Amén.

¹⁷ Ae mbaechate nae, ũquĩ je echeẽ. Sã ucuasu raã naa eã. Sã eya siquíã umbae mii ndese. Embae ra ua emo mose. Sã Dios rese quiatu eya riqui. Ae mii ño mbae mee nguiã nande je. ¹⁸ Echeẽ mbaecha je. —Mbae turã jësaã saã mbei quia jembae je jẽ. Jëingo turã jiri quia mbaecha reã je. Abei chiãte ra jëingochĩ jẽ, ere mbaecha mbaaquiato quiatu. ¹⁹ ũquĩ naa naa mose ra Dios mbae mee tuchi ee ibate. ũquĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae rĩ Dios ñee ndeje, ũquĩ emumbayã mbei quia. Mbia ñee ñooño mose nyue, nde abe ra erecheẽchĩ. ũquĩ ñee aba mundua turã eã ño nguiã. Uaquiato raã naasa chõ ũquĩ nde. ²¹ Dios cheẽ abi chõ eriqui nguiã ũquĩ naa naa ũuuuuuuuuquĩ. Dios icuasa reã ño ũquĩ nde. Sã Dios turã ndiqui bei ndeje. mén.

2 TIMOTEO

Pablo embesa Timoteo je

1 Pablo rei se. Jesucristo chĩmbaaquiatu rei se. Dios que semondo mbia mbaaquiato quiatu sacuaã nda. —Jesucristo icuasa ra siqui bei, i sacuaã ngue Dios semondo mbia je ra. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ùquĩ turã mbei riqui ndeje. Sã ùquĩ ia eã mbei riqui nderese. Sã ùquĩ nem-bia tuchi.

Pablo Dios oseĩ uquia Timoteo je

³ Gracias, ae bei se quia nderĩĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩĩ aico ñee mbeite Dios je co. Nyaashĩ mose. Isa abe. ⁴ Anduate quia nderese co. Achĩmbiate rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. Ùquĩ ngue Dios icua tuchite quia ra. Eĩ ere si quia Dios icua tuchite nde abe aque. ⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraacua tuchi ra. Ndearacua eico bei Dios cheẽ ndese. Dios cheẽ nenei nenei mbia je. ⁷ Dios siquiã nguiã nandembu siquiche mbia si ã. Dios nandembirãcuãte quia ã. Dios nandembuchesequate quia mbia rese ã no. Dios nandembraacuate quia ã no.

⁸ Dios quirãcuã ndese eico bei. Ùquĩ mose ra ereireĩ ireĩ eã Jesús renei nenei mbia je. Ùquĩ mose ra ereireĩ ireĩ eã setarõ ji si. A setarõ ji ñi Jesús rĩĩ a. Mbia icuã mose ndeje Jesús rĩĩ, echĩmbirãcuã ño. Dios ra nembirãcuã. Sã sembirãcuã no. ⁹ Dios quiatu ngue nanderirõ nguiã nandeicuã si. Dios que nandembu-turã mingo icúe umbaerã nda. Nandeturã je eã ngue nandemingo nguiã icúe umbaerã. Nduate quiatu nguiã nderese. Mbae ao ja nonde que nduate nan-derese ra. Jesucristo rĩĩ ño ngue Dios riqui nguiã nyesequa nanderese. ¹⁰ Nyebe Jesucristo mondo nguiã nanderirõ sacuaã nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingo bei co. Jesucristo tu mose que nandembiirandu ja ùquĩ ndese ra. ¹¹ Ucheẽ turã nenei nenei sacuaã ngue Dios

seirabo ra. Semondo que mbia mbaaquiato quiatu ra. Mbiamangue choõnoa jenda ja mbaaquiato quiatu.

¹² Ùquĩ je chõ mbia riqui nguiã mbae rasi raanguquia tuchi seje co. Aireĩ ireĩ eãte quia Dios si co. Dios aicu-ate quia co. Sereco que amee tuchi ee ra. Ae ra sereco teaquiato bei seje. Jesucristo tube chee mose. ¹³ Arem-baaquiato turãte que se, ùquĩ ndui eico bei. Dios eicua bei quia Jesucristo rĩĩ. Mbiamrese echesequa bei quia Je-sucristo rĩĩ. ¹⁴ Ae rĩĩ Dios ñee ndeje nae, nembraacua equia nae, ùquĩ ndese eico tuchi. Espĩritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. Ùquĩ ngue hui ja sesi ra. ¹⁶ Onesĩforo quiatu que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee que seje ra. ¹⁸ Efeso sei-co mose abe que eriqui tuchite serese ra. Serese que eriqui Dios cheẽ nenei nenei nda. ã ereicuate quia aque. Sã Dios mbae turã tuchi mondo ee Jesús tu mose.

Mbae esaã saã tuchi quia Jesús je, i Pablo Timoteo je

2 Seriirĩ naate nde, Timoteo. Jesucristo quirãcuã ndese eico ñimbucha tuchi. ² Arembaaquiato quiatu que se mbia résaã, ùquĩ esenei senei tuchi quia mbia je. Mbiamndua je secheẽ esenei senei. Ùquĩ nda esenei senei emo je no ña. ³ Mbae rasi tu mose ndeje, echĩmbirãcuã ño. Soldado rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mi ndese endua bei. ⁵ Sã de-porte no. Emo nda ganar i eã, nguerecua cheẽ mumba mose. ⁶ Sã emo ndiqui quiei quiei tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ùquĩ asenei senei nguia mbia je co. ⁹ Ùquĩ je chõ mbia riqui nguiã mbae rasi raanguquia tuchi seje ã. Ùquĩ ni ño setarõ mi nguiã a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguiã seje. ã nda Dios chiirabo Dios

cheë isi bei cote. Ì nda Dios emingo bei cote. Ì nda ùquĩ siqui bei ibate Jesucristo rese cote. ¹¹ Ñee ñooñoa tuchi chõ mbia cheë ã nde:

Nandemano ngue Jesucristo rese ra.

Nyebe ra nandeico bei erese cote.

¹² Cristo rĩĩ mbae rasi nandesaã saã mose, Cristo ra nandemii ererecuarã, ererecu tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaëicuayãte” i ra nande je.

¹³ Nandechēē iru raque ra nande, Dios quia ra ñee iru eã mbei.

Dios quia ra ucheë mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ Ì ndese mbia hue jenda embaaquiato quiato tuchi. Díósaa embaaquiato quiato tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ùquĩ nde. Mbae turã si embui chõ ùquĩ no nde. ¹⁵ Equiei quiei tuchi chõ nguia Dios je jē. Ì nda Dios “coche ñene” i ndeje. Sã emo ndiqui quiei quiei turãte nguerecu je no. Eireĩ nguiãte ra nguerecu si cote. Eĩ ere si chõ nguia Dios cheë nenei nenei mbia je. Dios cheë abi abiã. ¹⁶ Ae uchuru mondo chooñote quia nae, ùquĩ ndese eicoã. Ùquĩ ndiqui isho i ite Dios si ùquĩ. ¹⁷ Ùquĩ ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguiã ùquĩ. Fileto rese. ¹⁸ Ùquĩ ndiqui ñee Dios cheë abi abi tuchi ùquĩ. —Mbia rete raaque ra quera si eã, i chõñiño mbei equia ùquĩ. Nyebe eriqui nguiã mbia mbui mbuite Dios si ùquĩ. ¹⁹ Sita cuasu mo na ndei Dios cheë. Embuquiata aronea. Aque ñi mbei chõ nda echi. Eĩ si chõ Dios cheë nande je no nde. Dios cheë ño ã nde: “Dios riqui ngũimba icua jate ã,” i que ra. Co abe rei Dios cheë co: “Ae ‘Dios rimba rei se’ i quia nae, sã ùquĩ ndiqui nyao ja mbae icuã si”, i que ra.

²⁰ Sã mbae riru chumumbarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacua no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ùquĩ mose ra Jesús ia tuchi erese. ²² Ae icuã acuanĩndu chosei chosei quia nae, ùquĩ si ehui chõ jē. Eico turã ño Dios icha rui jē. Dios eicua tuchi chõ nguia jē. Echesequa tuchi chõ nguia mbia rese jē. Echĩmbia chõ nguia mbia rese jē. Eĩ ño Jesús quiato nguiã siqui turã nyiese ã, echĩã quishĩ ja mose. ²³ Mbia uchuru mondo chooño mose ñee nyue, nde abechĩ nda jē. Mbia mbĩcuã sacua ño ùquĩ nde. ²⁴ Dios rimba quia mbia mbĩcuã aroneate re. Eaturã tuchite quia mbia ja je re. Mbia mbaaquiato quiato turãte quia

ñene. Siqui minguete quia mbia je re. ²⁵ Ae Dios cheë isi teã teã, ùquĩ nda embaaquiato quiato mingue quia. Ùquĩ ñi nda ñee ñee Dios je. Dios emundua si sacua. Dios cheë isi turã sacua. ²⁶ Ì nda echoi oso chee uchã diablo si, ndua si mose Dios cheë ndese. Diablo quia eisite nguiã co. —Ã esaã jē, i beite diablo quia ee co.

Mbia ireĩ nguiãte ra mbae icuã naa i i

3 Jesús quiato ra mbae rasi saã tuchi Jesús tu serĩ mose. Ùquĩ eicua quiato tuchi, Timoteo. ² Umbae ae ae rese ra mbia ndua cote. Mbae isiquia mii ndese chõ nda mbia riqui ndua ndua cote. Mbia ra ucuasu saã saã tuchi. Ñee icuã icuã mbei ra equia emo ñi. Mbia ra ngu cheë mumba mumba tuchi. Usi cheë abe no. Mbia ra gracias iã tuchi nyue aque mose. Siqui sereã tuchi ra Dios rese. ³ Mbia ia eã eã nda emo ndese. Ñimbuturã sereã tuchi ra emo je. Emo nda embuqueta queta bei quia. Hui aroneãte ra mbae icuã si. Nyaba nyaba reã tuchi rae. Mbae turã nda eucuyã tuchi. ⁴ Mbia ra embuchēē ñee ngõngue rĩĩ. Mbia ra mbae ÿ ñooño. Mbia ra uaquiato saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbia saã ñooño. Dios quirãcuã icua rocoĩ. Ùquĩ mbia icuã si echao tuchi, Timoteo. ⁶ Ùquĩ mo ndiqui ique ique emo nyuchua ã. Cuña aquiatuã mbĩrĩ irĩ. Ae ndua ndua beite quia huĩcuã ndese cuña nae, ùquĩ mbĩrĩ irĩ. Ùquĩ cuña ndiqui uchioseĩ raã naa mbei mbae icuã ùquĩ. ⁷ Ùquĩ cuña ndiqui “tachĩmbaaquiato” i beite raque ùquĩ. Ñimbaaquiato aroneate Dios cheë ndese. ⁸ Sã brujos Moisés cheë mumba no. Janes, i equia ee. Jambres abe no. Eĩ si chõ cuña mbĩrĩ irĩsa nguiã Dios cheë mumba mumba ùquĩ. Ndua aquiatuã je chõ ùquĩ nde. Ùquĩ ndiqui emo mingo aroneate Dios cheë ndese ùquĩ. ⁹ Mbia ra siqui eã ùquĩ ñee ndui cote. Mbia ra “eaquiatuã” i chee erĩĩ. Sã “eaquiatuã” i chee Moisés cheë mumbasa rĩĩ brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheë ngue eresenei senei nguia se rã si ra. Ae asaã saã nguia Dios je nae, ùquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguete equia aque. Erechesequate equia mbia rese aque. ¹¹ Ereico turãte que equia mbia icuã icuã mose ndeje ra. Sã mbia icuãte riqui seje Antioquíaa no. Icónioo abe. Lístraa abe. Sã ñi aico mbae rasi raã tuchi huee no. Dios que sereaquiato ùquĩ si ra. ¹² Ae siquise rete quia Jesucristo rese nae, ùquĩ nda mbae rasi saã tuchi. Mbia icuã icuã tuchi ra ee. ¹³ Ae icuã icuãte riqui Dios je nae, ùquĩ nguia ra eicuã i i tuchi cote. Ae mbia mbĩrĩ irĩ nguia nae, ùquĩ ngui a ra mbia mbĩrĩ i i tuchi cote. Ñimmbĩrĩ i i tuchi ra equia no.

¹⁴ Nde chõ eico tuchi Dios cheẽ ndese. Ae rese erechimbaaquiato nae, õquĩ ndese eico tuchi. —Ichoiñoa tuchi que ã nda, erete equia eicua aque. Nembaaquiatusa abe ereicuate quia aque. ¹⁵ Ndeñetẽ mosenda bei chõ ereico nguiã Dios cheẽ icua aque. Dios cheẽ nembraacuate quia aque. Nyebe ereico Jesucristo icuate aque. Nyebe Dios nderirõ nguiã ndeicua si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiato. Dios cheẽ ngui a rei mbia icuã mbuchecua ee. Dios cheẽ nguia rei “eĩ jenyẽ” i tuchi nande je. Dios cheẽ nguia rei aba mingo Dios bi rese. ¹⁷ Ì nda Dios quiato siqui turã tuchi. Ì nda equiatu mbae turã naa naa ja.

4 Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbia reco rese. Mbia mano je rese abe. Ae nonde aico ñee ndeje a. ² Dios cheẽ esenei senei tuchi quia mbia je, Timoteo. Mbia eanduse mose. Mbia eandu sereã mose abe no. Embaaquiato quiato mingue bei chõ nguia. Embuti mbuti bei quiato quia Dios cuti. “Eĩ jenyẽ” ere bei quiato quia mbia je. ³ Namõ jiri quiato ra mbia Dios cheẽ turã andu sereã cote. Ubi achõ ndese chõ nda huiisa rerequia tuchi cote. Nyebe ra Dios cheẽ andu sereã. Ae mbia mbaaquiato icuã icuãte quia Dios cheẽ ndui eã nae, õquĩ ndui chõ nda mbia riqui tuchi cote. ⁴ Nyiisaquia tuchi chõ nda equia mbia ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiãtu chõ eico mbia icuã icuã mose ndeje. Equiei quiei tuchi chõ nguia Dios je. Dios cheẽ esenei senei tuchi chõ nguia mbia je.

⁶ Achuruchate ucuã quia co cote. Aico mano utate co cote. ⁷ Mbae que asaã saã tuchi quia Dios je ra. Ae je Dios riqui ñee seje nae, õquĩ ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Õquĩnde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se miĩ je eã ndae. Ae Je-

sucristo ru choseite quia nae, õquĩ ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiato ngue serecha nguiã. Ibi jenda achõ ndese chõ eriqui nguiã ndua. Ubi miĩ ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda. ¹¹ Lucas miĩ ño siqui nguiã serese co cote. Marcos abe eru bei seje. Ae nda quiei quiei jiri nguiã serese aa. ¹² Tíquico quiato que amondo Efésõo ra. ¹³ Ae asecha sacho sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ. ¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbia sererao mose ererecua je, emo ngue nyaroã tuchi serese ra. Serecha ja chõ ngue ra. Dios nda paama i eã ee õquĩ niĩ ña. ¹⁷ Jesús miĩ ngue serecha eã nda. Ae miĩ ngue sembirãcuã nda. Se echeẽ turã nenei nenei tuchi sacua. Ae judíos eã nae, õquĩ Jesús cheẽ turã andu tuchi sacua. Nyebe Jesús sembui mondo nguiã mbia icuã si. ¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei eriĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda abe no. ²² Sã Jesucristo riqui bei nderese. Sã Dios turã ndiqui bei jendese. Amén.

TITO

Pablo embesa mondo Tito je

1 Pablo rei se. Dios rimba. Jesucristo chim-baaquiatu. Dios que semondo ñee ñee sacuañ uchiirabo je ra. Ûquĩ Dios icua tuchi sacuañ ngue semondo ra. Siqui turã sacuañ Dios rã si. ²—Sechiirabo ra amingo bei, i que Dios cose ra. Ñee ñooño eã ndae. Ûquĩ ndese embiirandu sacuañ ño ngue semondo nguiã. ³Dios rei nanderirõsa mbae icuañ si. Ae que seirabo ucheẽ nenei nenei sacuañ mbia je ra. Eĩ ngue Dios ucheẽ mbuchecua mbia je cote ra. ⁴Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ùquĩ ia eã tuchi riqui nderese. Sã ùquĩ ndiqui nembia turã tuchi.

Sã Jesús quiato rerecua riqui turã

⁵Ae nandesaã ja eã huee nae, ùquĩ esaã ja rã nguia nde huee. Amei mo eirabo rabo Jesús quiato rerecuarã. Mbia recua ja ja jenda. Secheende ndeje eirabo rabo ino huee. Nyebe arerecha nguiã huee Crétaa. ⁶Amei turã ño eirabo rabo Jesús quiato rerecuarã. Eninisi miñ nderecua chõ eirabo. Ae ririĩ Jesús icua quia nae, ùquĩ miñ ño eirabo rabo. Ae eririĩ seteãte riqui nae, ùquĩ ño eirabo rabo. Ae eririĩ teã eãte nae, ùquĩ ño eirabo rabo. Jesús quiato rerecuarã. ⁷Jesús quiato rerecua quia Jesús quiato teaquiatu quiatu quia. Ûquĩ siqui icuañ aroneate. Ucuasu abe raã naa aroneate. Eroseĩ nguiã aroneate. Quiacua aroneate. O rerequia chooñoa aroneate. Mbia mo mbae oseĩ oseĩ aroneate no. ⁸Mbia nyoĩ mose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icuañ ndese. Dios rã si chõ nda eriqui. Echiichati eã ndae. Jesús quiato rerecua ra eĩ mbei quia. ⁹Sã eriqui bei Dios cheẽ ndese nandechẽ nguire. Ûquĩ mose ra ùquĩ abe mbia mbaaquiato quiatu turã. Jesús oseĩ uquia ee. Mbia icuañ ñee nda embutiba Dios si. Ûquĩ ño eirabo rabo Jesús quiato rerecuarã, Tito. ¹⁰Mbia teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹Ûquĩ nyuru esiquisã tuchi. Mbia mbaaquia tu icuañ icuãte quiatu nguiã ùquĩ. Eru mbiĩrĩ irĩ. Eninisi abe mbiĩrĩ irĩ. Eriirĩ ja abe no. —Mbia ra umbae mee mee nande je, i chõ nguiã ã. ¹²Hue jenda mo ngue ñee nda. —Ñee ñooño

je chõ ure re, Creta jenda re. Ureicuã mbei chõ ure re. Nyacua icuañ na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³Ichõñoa tuchi chõ ñene. Nyebe echeẽ asi tuchi ùquĩ je, Tito. Ì nda eriqui tuchi Jesús rese. ¹⁴Ì nda eriqui eã judíos icuañ ñee ndese. Mbia tubiriã Dios cheẽ isi teã teãte quia ùquĩ. —Ûquĩ ñee nda jemumbayãchĩ jẽ, ere chõ mbia hue jenda je. ¹⁵Echiã mbuturã ji je chõ mbae turã ja riqui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicuã eã, i chõchĩ nguiã mbae icuañ ndese siqui siqui. ¹⁶—Dios ureicuate quia ã, ichõño equia ùquĩ. Echisaã nguia eicuãte re. Nyebe nandeico nguiã eicuate, Dios rese siquiã mose. Aba biã tuchi chõ ùquĩ nde. Aba cheẽ mumbasa. Siqui aroneate mbae turã mo ndese.

Mbia embaaquiato turã, i Pablo ñee Tito je

2 Nde quia mbia embaaquiato quiatu turã jẽ. Dios cheẽ ndui si embaaquiato quiatu. ²Amei embaaquiato quiatu. Enyere chõ ñee ee: —Jẽquiacua quiacuachĩ nda jẽ. Jengata turã mbei chõ nguia jẽ. Jëaracua bei chõ nguia jẽ. Dios jëicua tuchi chõ nguia jẽ. Jenyesequa tuchi quia mbia rese jẽ. Jëingo tochi chõ nguia no jẽ, ere chõ amei mbaaquiato quiatu, Tito. ³Ari abe embaaquiato quiatu. Enyere chõ ñee ee: —Jengata turã mbei quia Dios resa rae. Jeñee icuañ icuañ techĩ nda mbia mo niñ jẽ. Jẽquiacua quiacuachĩ nda jẽ. Mbae jësaã turã ño nguia mbia resa ráee jẽ, ere chõ ari mbaaquiato quiatu, Tito. ⁴Sã ari acuanĩ mbaaquiato quiatu. Ì nda acuanĩ nyesequa jaaja ngu rese. Ì nda nyesequa jaaja nguiĩrĩ abe rese. ⁵Ì nda acuanĩ aracua ja ja. Ì nda ndua ndua ja mbae turã ndese. Ì nda uchuchua jenda abe mbuturã turã ino no. Ì nda eturã mbia je. Ì nda ngu cheẽ abe mumbayã no. Sã ari eĩ acuanĩ mbaaquiato quiatu. Ûquĩ mose mbia ñee icuañ icuañ aroneate Dios cheẽ niñ. ⁶Acuanĩndu abe embaaquiato quiatu quia no. Ì nda earacua racua ja. ⁷Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiato quiatu, cocheẽ chõ eico. Echimbirãtã tuchi chõ nguia. ⁸Ndeico mose mbia mbaaquiato quiatu, echeẽ turã turã ño nguia ee. Ì nda mbia ñee icuañ eã ndechẽ mose. Ì nda Dios cheẽ ndesenda reã ireĩ ireĩ ndechẽ si. Ì nda ñee icuañ eã jẽje. ⁹Mbia rimba abe embaaquiato quiatu.

Enyere chõ ñee ee: —Jenderecua cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ. ¹⁰ Mbae mo nda jembuquia chãchĩ jẽ. Jẽseteã ño jẽingo mbae turã ndese jẽ. Eĩ jenyue mose ra mbia ñee turã Dios cheẽ nii, jenyue chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si. ¹² Mbae ja rĩ Dios riqui nandembaaquiato quiato co. Ae echosei chiãte quia nae, ùquĩ nandesecha ja sacua. Ae icuã nandebite riqui nae, ùquĩ ndecha ja sacua no. Nandearacua sacua abe no. Nandeico sacua mbae turã ndese no. Nandendua bei sacua Dios rese abe no. Eĩ nande bei quiato quia nande namo. ¹³ Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴ Ae que tu mano nande je ra. Nandeicuã ndibishorõ nguie mano nda. Nandechiã mbuquishĩ nguie u umbaerã nda. Nandeico tuchi sacua mbae turã ndese. ¹⁵ Enyere chõ mbia mbaaquiato quiato, Tito. Ererecua rã ño eico embaaquiato quiato. Echeẽ asi asi jiri quia ee. Sã emo ndiqui ndecheẽ andu sereã nea eã.

Dios uturã teacuquia nande je

3 Echeẽ mbia je, Tito. —Ererecua cheẽ nda jemumba mumba techĩ nguia jẽ. Ererecua cheẽ jeñandu quiato quiato quia jẽ. Jeñimbirãtã tuchi quiato mbae turã naa naa nonde jẽ. ² Jeñee icuã icuãchĩ nda emo nii jẽ. Jeñee icuã icuãchĩ nda jenyue jẽ. Jẽseteã ño jẽingo jẽ. Jenguasu ra jẽsaã saãchĩ emo je jẽ, ere chõ mbia je, Tito. ³ Nandearacuayã techĩ nande abe nyii. Nandeteã teã techĩ equia nyii. Nandembirĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ùquĩ achõ ndesete nandeicochĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbia mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã nguie eteacuquia nande je ra. Uturã abe que eteacuquia nande je no

nda. ⁵ Aque mose que nanderirõ mbae icuã si ra. Eya eãte quiato nguie eriqui nguia nanderese. Nyebe nanderirõ nguia mbae icuã si. Nandeturã nii eã nguie re. Nandechiã nguie eirei mbiasu ra. Espiritu Turã je que nandechiã mbiasu ra. ⁶ Dios que Espiritu Turã mondo tuchi nande je ra. Jesucristo rĩ nguie emondo nande je ra. Jesucristo rei nanderirõsa tuchi nandeicuã si. ⁷ Dios que Espiritu Turã mondo nande je ra. Uturã je nandembitirõ sacua. Nandemingo bei tuchi sacua no. —Nandemingo bei tuchi rae, sã nandeico i ã no. ⁸ I chõñoa tuchi chõ ã nde. ã esenei senei tuchi quia mbia je. ã nda mbia emumbayã. ã nda Dios icuasa siqui ja mbae turã ndese. Ae rĩ aico ñee jẽje nae, sã mbia ùquĩ ñee mumbayã ja quiato. Aba bite ùquĩ. ⁹ Mbia ñee asi asi je si ehui chõ. Mbia ñee mbei mose ngãmei ndaaque rĩ, ùquĩ abe si ehui chõ. Mbia ñee icuã icuã mose nyue, ùquĩ abe si ehui chõ. Ae Dios senei senei nquia judíos je cose nae, ùquĩ nii mbia ñee icuã mose nyue, ùquĩ abe si ehui chõ no. Aba biãte ùquĩ ñee. Aba mbaaquiato ãte ùquĩ. ¹⁰ Emo Jesús quiato mbuqueta queta mose embicuã nonde uchue, ùquĩ abe si ehui chõ. Eicuãte ùquĩ, ere ee. Ndecheẽ andu eã mose, echeembe ee. Aquere ehui chõ esi. ¹¹ Aba chiucuate ùquĩ icuã. ùquĩ siqui turã aroneate quia ùquĩ. Huiucua eicuate quia ùquĩ.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. ùquĩ mo ngasẽ mose huee, echu serea Nicápolis cote. Huee taico bei ama mose, ae que se ra. ¹³ Apolos embucuata turã mondo. Zenas ndese. Zenas ndei embesasa. Jesús quiatote ùquĩ. Mbae mo emondo ee. ã nda echoi turã. ã nda mbae tiã eã ee. ¹⁴ Sã nanderesenda riqui mbae turã naa naa mbei ñimbaaquiato. Emo mbae ua mose, sã mbae mo mee mee ee. ùquĩ naa naa mose, siqui turã ño nguia ùquĩ cote. ¹⁵ Ae chi ja serese a nae, ùquĩ saludos mondo quia ndeje aque. Ae Jesús quiato nyeseccuate quia urerese hue jenda nae, ùquĩ je saludar ere ure je. Sã Dios turã ndiqui tuchi jẽ ja rese. Amén.

FILEMON

Pablo embesa Filemón je

1 Se rei Pablo. Setarõ ji aĩ a. Mbia que setarõ Jesucristo rĩĩ nda. Timoteo rese aico ã mbesa mbesa ndeje a, Filemón. Ureresenda tuchi chõ nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ũquĩ je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei ureresere ra. Mbia icuã icuã mose ure je Jesús cheẽ ñĩ. ³ Sã Dios riqui turã mbei jẽje. Sã jẽya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderĩĩ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyese-cua tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderĩĩ co. Ae je ereico Jesús nenei nenei nae, ã nda ũquĩ abe Jesús icua tuchi nde rã si. ⁷ Aque ereico nyese-cua tuchi Jesús quiato ja rese aque. Nyebe seya beite riqui nguiã nderese co. Nde que Jesús erechesei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiatu aico raque co. Sã ererecua riqui ñee ngũimba je no. ũquĩ asaã arõte raque ndeje. Asaã eã nda se. ⁹ Tacheẽ mingue chõ ndeje. —Mbae esaã seje, tae turã ño ndeje. Ameite se cote. Setarõ ji aĩ Jesús rĩĩ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiatu quiatu Jesús rĩĩ nda. Jesús quiato riqui co cote. Seriiĩ tuchi rã ño eriqui nguiã co cote. Jesús icua mose co cote. ¹¹ Nderimbachõ ño ngue eriqui nguiã nyii. Erequeteã eã jiri que equia erese nyii ra. Aque-teãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo

quia ndeje aque. Eisi turã mámbĩ. Sã ereico seisi turãte no. ũquĩ esaã si ee. ¹³ Amondo sereãte raque. Siquichõ ndei nda serese aa chã. Mbae mee mee sacua setarõ ji je ndecutiã. A setarõ ji ñĩ Jesús cheẽ turã ñĩ a. ¹⁴ Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachõ eã nda cote. Ndequiatu chõ nda cote. Nderesenda chõ nda cote. Co aico nyese-cua erese co. Nde quiatu ra erechese-cua tuchi erese cote. Cristo resenda chõ siqui nguiã co cote. Nderese. ¹⁷ Ndequiatu tuchi chõ se re. Sã ñĩ ereico seisi turã turãte no. Eĩ ere si chõ Onésimo isi turã se rã si.

¹⁸ Onésimo deber i mose ndeje, cobrar erechĩ nda ee. Seje quiatu cobrar ere. ¹⁹ Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios neringo bei sacua. Nyebe deber ere tuchite raque seje. ²⁰ Nyebe Onésimo eisi turã na seje. ã nda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderĩĩ co.

²² Seruacuã jendecoquiatu ino mámbĩ. Dios ra sembusẽ mondo, jeñee mbei mose ee reae. ũquĩ mose ra aso jendea.

Pablo ñee hui bei

²³ Epafras saludos mondo quia ndeje aque. Ae tarõ ji ñĩ serese a. Jesucristo cheẽ ñĩ. ²⁴ Marcos abe saludos mondo quia ndeje aque. Aristarco abe. Demas abe no. Lucas abe no. ã ndiqui Dios cheẽ nenei nenei serese ã. ²⁵ Sã Jesucristo riqui uturã ndeacuquia bei jẽje. Amén.

HEBREOS

Jesucristo mii ño Dios cheẽ mbuchecua nguiã

1 Dios que ucheẽ mbiassa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiassa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo mii ño Dios cheẽ mbuchecua checua nguiã nande je co cote. Dios nguiirĩte mbucheẽ nande je cote. Ae mii ndese chõ ngue Dios ibi ao nyii ra. Dios que emii mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandeicuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriirĩ tuchi” i chõ Dios nguiã ee. ⁵ Ña ngue Dios ñee áte ángeles mo je ra:

Seriirĩ ño nde re.

Ndereco que amee ndeje ra,
i áte que Dios ángeles mo je ra.

Nderu chõ se re.

Seriirĩ ño nde re,

i áte que Dios ángeles mo je ra. ⁶ Dios nguiirĩ mbu mose íbii que ñee nda:

Sã ángeles riqui adorar i ja seriirĩ je,
i que ra. ⁷ Ña ngue Dios ñee ángeles rĩ nda:
Quiririã tu asi rã tuchi chõ ángeles re.

Srimba chõ ángeles re.

Tata rendi rã tuchi,

i que Dios ñee ángeles rĩ nda. ⁸ Nguiirĩ je quiatu que ñee ã nda:

Nde rei Dios. Ererecuarã mbei ra nde.

Ererecua turã tuchi ereico nde co.

⁹ Mbae turã eresaã sete quia co.

Mbae icuã nguia erechousei chiãte nguiã.

Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Ndeo je que ibei erechao no nda.

¹¹ Ñquĩ nda ua ja chee.

Nde quia ra ereico bei.

Tiru ima na ja chee ra ñquĩ.

¹² Sã mbia riqui tiru ima mombo no.

Eyasu rerequia erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ña ngue Dios ñee áte ángeles mo je ra:

Ecoi seji. Nde abe ra ererecua serese.

Ae ndeucuãyãte quia nae, ñquĩ je ra ndequirãcuã atecuquia tuchi.

Ndequirãcuã tuchi chee ra ñquĩ si,

i áte que Dios ángeles mo je ra. Jesús mii je que ñee ñquĩ nda. ¹⁴ Dios riiirĩ eã ño ángeles re. Dios rimba chõ ñene. Ae ra Dios mingo bei, ñquĩ ndaarõ sacua ño ngue Dios ángeles mii nguiã.

Nandeichayã sacua Dios icha si

2 Ae nandechandu quia Dios cheẽ nae, ñquĩ ndese nandeico ndua tuchi. Ñ nda nandeichayã mbei Dios icha si. ² Ae rĩ ángeles riqui ñee mbia je cose nae, ñee ñooñoa tuchi chõ ñene. Ae ñquĩ ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiassa nande je cote ra. Nande echeẽ mumba mose ra mbae rasi nandesaã tuchi nande quiatu cote. ⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. —Jesucristo ñee ñooñoa ño nguia re, i sacua mbia que Dios Espíritu Turã mondo mbia je no nda. Ae je Dios Espíritu Turã mondo mondo sete nae, ñquĩ je chõ ngue Espíritu Turã mondo ra.

Mbia rã ngue Jesucristo ru nyii ra

⁵ Ae ra nandesemo mose nae, hue jenda rerecua eã nda ángeles. ⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ñquinde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja rĩ ño ñee nguiã. Mbae mbia cheẽ

mumbate raque quia ã. ⁹ Jesús mi ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emi mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbiam tubiriã mingo bei sacua ño ùquĩ nde. Jesús mbae rasi raã mose, ererecua turã tuchi sacua ño ùquĩ nde. ¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ nguíã nande je. ¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,

i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriirĩ Dios chimondo rese a,

i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua. ¹⁵ Ae siquiche beite quia umano si nae, mbae icua nimba raanguia chõ ùquĩ nde. Ùquĩ siquiche eã sacua ño ngue Jesús mano nguiã. ¹⁶ Angel sacua eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbiam mbitirõ sacua. ¹⁷ Nyebe Jesús ru nguiã mbiarã nande rã. Ñee turã sacua Dios je nande riĩ. Dios nandembasi eã sacua nandeicua ñi. Jesús siqui mose mbiarã ngue mano mbiam icua ñi nda. Mbiam icua mbutiã sacua esi. ¹⁸ Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icua tã i mose nande je.

Jesús quia rei i tuchi Moisés si

3 Seresenda, Dios que jemii icúe umbaerã tuchi ra. Nyebe aico nguiã ñee tuchi Jesucristo riĩ jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchia ao no. Tuchia aosa quia rei i tuchi tuchia uchiao si. ⁴ Mbiam mo tuchia chao arondete raque. Dios mi nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Á nda Dios saã je mbiam je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios riirĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã

nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoĩ Dios récuua

⁷ Jesús quia i tuchi re. Nyebe Espiritu Turã ndiqui nguiã ñee nande je ã:

Dios cheẽ jeñandu rã namo.

⁸ Jeñia átãte ra jëingochĩ jë.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ùquĩ icuãte que eriqui Dios je ra.

Dios que ñimbitirãcuã ñote quia ee ra.

⁹ Dios que siqui minguete quia ùquĩ mbiam je ra.

Cuarenta años chee que ra.

Mbiam mae sayã ngue esaã saã mbei quia ee ra.

“Ma Dios siqui minguete nande je”, i rei que mbiam jenamei nguia cose ra.

¹⁰ Nyebe Dios paama i nguiã ñee ee.

“Siqui icua mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyoĩ serécuaa”, i tuchi que Dios erĩ nda,

i que Espiritu Turã ñee embesa ji huĩ nda. ¹² Cochee chõ jëingo, Seresenda. Jëicha eã sacua Dios reco si jeñiangui re. Dios jëicua bei sacua jeñiangui re no.

¹³ —Nandeico i i tuchi quiatu quia Dios rese, jenyee jenyee bei quiatu quia jenyue. Jendeco mose ibii. Ì nda mbae icua jembiirĩ irĩ eã. Ì nda jëteã teã eã Dios cheẽ je no. ¹⁴ Sã nande Cristo nandeicua raque nyii no, eĩ nande bei chõ nguia eicua i i. Ùquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheẽ jeñandu rã namo.

Jeñia átãte ra jëingochĩ jë.

Sã cose ndare chiã átã mbeite riqui Dios cheẽ andu sereã turúquiaa eico mose no,

i que embesa ji ra. ¹⁶ ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ùquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icua saã saã nae, ùquĩ ño ngue resẽ. Nyebe mano mano nguiã turúquiaa. ¹⁸ ¿Aba je chõ Dios ñee tuchi chã? —Jengueña nda jëucuyã mbei oso serécuaa, i chã. Ae echeẽ mumba quia nae, ùquĩ je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4 —Ae seicua quia nae, ùquĩ nda nyoĩ serécuaa, i chõte Dios quia nande je co. Nyebe nandeico cochee. Cochee jëingo eã mose, jemo jengasẽ eã arõte Dios récuua. ² Nande abe je chõ Dios riqui nguiã ñee co. —Ae seicua quia nae, ùquĩ nda nyoĩ serécuaa, i. Moisés reco mosenda achõ je eã ño ngue ñee nguiã. Ùquĩ ngue Dios chandu iru chooño nda. Dios icua rocoĩ. ³ Ae Dios icua quia nae, ùquĩ achõ ño nda nyoĩ

ngasẽ Dios rėcuaa. Uquenea ucua sacua huc. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serėcuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ ã mbesa ji que chĩ nda:

Dios mbae ao jare que uqueneã ucua sėptimo dĩa ra, i que embesa ji ra. ⁵ ã abe que chĩ embesa ji rese ra:

Uquenea nda eucua eã mbei nyoĩ serėcuaa, i que embesa ji huĩ no nda. ⁶ Emo emo abe ra Dios icua. Siqui sacua erėcuaa. Ae Dios cheẽ ñandu nyii nae, ũquĩ ngue Dios icua eãte ra. Nyebe ngasẽ eãte nguiã Dios rėcuaa. Dios cheẽ nguiatu ngue emumbate nguiã.

⁷ Nyebe Dios riqui nguiã ñee nande je quiatu co. Nandeico sacua erese namo. ũquĩ echeẽ mumbare nyii. Sã David Dios cheẽ mbesa no:

Dios cheẽ jeñandu rã namo.

Jeñia ãtãte ra jėingochĩ, i que Dios ra, i que David embesa ra. ⁸ Josuė que mbia isrealitas mĩ aroneate Dios rėcuaa ra. Uqueneã ucua sacua. Ĩ nda Dios ñee ãte rei. —Taemingo serėcuaa jenguenea ucua sacua, i ãte rei. ⁹ Nyebe ra Dios quiato nyoĩ ngasẽ Dios rėcuaa. Huee ra uqueneã ucua tuchi huee cote. ¹⁰ Ae ra ngasẽ Dios rėcuaa nae, ũquĩ nda uqueneã ucua tuchi. Sã Dios uqueneã ucua tuchi mbae ao jare no.

¹¹ Nandechimbirãcuã tuchi oso nonde Dios rėcuaa. Nandequenea ucua sacua. Ae Dios icuayãte quia cose nae, ũquĩ na nda nandeicochĩ nande mo namo jė.

¹² Dios cheẽ nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chiõsei õsei abe mbuchecua tuchi aba je no. ¹³ Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esiã.

Jesús ñee turã mbei Dios je nande rĩĩ

¹⁴ Jesús rei Dios ririĩ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderĩĩ nda. Eriqui ñee ñee mbei Dios je nanderĩĩ co. Nyebe nandeico tuchi quiatu quia erese. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios rĩchã. Nyesequate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

⁵ Sacerdote rerecua judío mbae rei mbia chõ. Ae chõ ñee turã mbei nguiã mbia rĩĩ Dios je. Ae chõ mbae quishĩ ji mondo mondo nguiã Dios je. Dios mbia

chisaã saã icuã mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quirãcuã nea je. Mbia aquiatuã je abe. Mbia icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicuã mbutiã sacua esi. Mbia chisaã icuã abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote mĩ mĩ nda. Sã Aarón mĩ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emĩ nguiã. Sã Dios cheẽ mbesa ji riqui ñee no:

Seririĩ ño nde re.

Ndere co que amee ndeje ra,

sã Dios i ñe e ee no. ⁶ Sã embesa j i mo ndiqui ñee no: Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸ Dios ririĩte raque Cristo. Mbae rasi que esaã tuchi ra. Ñĩmbaaquiato chõ ngue equia ũquĩ ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ũquĩ emingo bei quia co. ¹⁰ Dios quiatu ngue emĩ nguiã sacerdote rerecuarã. Melquisedec na si no.

Jeñĩmbaaquiatoã mbei chõchĩ equia Cristo rese ã

¹¹ —Mbae tasenei tuchi Jesucristo rĩĩ jėje, ae rei que se ra. Jė nguia secheẽ jeñandu sereãte nguiã. Nyebe aico nguiã embiasa asa aroneate jėje co. ¹² Cosete que jėingo rei Jesús icua resẽ. ¿Mbaerã jėingo ñĩmbaaquiatoã mbeite re? Ĩ nguia nda jėingo nguiã emo mbaaquiato quiatu chã. Jėaquiatoã mbei chõchĩ. Dios cheẽ aba chiõcuã jėicuayã mbei chõchĩ. ãquẽ na ño jėingochĩ ã. Sã ãquẽ ndiqui usi quiandi achõ mbei no. Soo quiatu eu aroneate nguiã. ¹³ ãquẽ na jėingo bei mose, jėaquiatoãte siqui mbae turã ndese. ¹⁴ Ae ñĩmbaaquiato quiatu tuchi quia Cristo rĩĩ nae, ũquĩ nguia rei mbae turã icua tuchi, mbae icuã icua rocoĩ. Mbia cuasu rã ño ũquĩ nde.

⁶ Ae rese jeñĩmbaaquiato nyii nae, aba chiõcuate ũquĩ. ũquĩ mĩte rese jėingochĩ nguiã. Mbae aba chiõcuayã mo abe jėicua jiri Jesús rĩĩ ae. ã aba chiõcuã que asenei ja jėje nyii ra: —Jenyisaã mbae icuã si jėhui, ae que jėje nyii ra. —Dios jėicua, ae que jėje nyii no nda. Bautismo abe que asenei jėje nyii ra. —Jėo jeñono Jesús quiato arõ, ae que jėje nyii no nda. —Mbia raque ra quera si, ae que jėje nyii ra. —Mbia Dios quiatoã nda mbae rasi saã tuchi tata cuásuu, ae que jėje nyii

no nda. ³ Ūquĩ aba chĩcuate riqui ã ndesẽ. Aba chĩcuayã tasenei jẽje cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chimee icua raque nyii. Espiritu Turã abe icua raque nyii no. ⁵ Dios cheẽ turã abe icua raque nyii. Dios quirãcuã abe icua raque nyii no. ⁶ Ūquĩ hui mose Dios si, uba si aroneate erese cote. Jesús mbucha si chõ nguiã ira rese ũquĩ. Iquia iquia chõ nguiã Jesús je mbia résaa ũquĩ. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Nui achõ suri mose huee, eicuãte ũquĩ. Eĩ si chõ mbia Dios cheẽ andu chooñosa no nde. Eicuãte ũquĩ. Ūquĩ nda Dios mombo chõ tata cuásuu.

Dios ra ucheẽ mbuchebiã mbeĩ

⁹ Jeni aico nguiã ñee eã, Seresenda. Dios cheẽ jeñandu chooño eã nguia jẽ ndeae. Jesús jẽicuate quia ũquĩ. Nyebe jẽingo tuchi quia erese ũquĩ ndeae. ¹⁰ Dios turãte eriqui co. Tesareia nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ũquĩ. ¹¹ Eĩ jenyebi quiatu equia nyesecua bei emo ndese. Ĩ nda Dios mbae mee tuchi je jẽje. ¹² Jeñim-birãtã mbei chõ nguia mbae raã jẽ. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguiã ee. Eriqui beite mbae mee mee ee co.

¹³ Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ūquĩ mose que Dios jurar i umbae nombre rĩĩ nda. ¹⁵ —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eririĩ mondo chee ee ucheẽ nguire cote ra. ¹⁶ Mbia jurar i mose, Dios rĩĩ ño eriqui nguiã jurar i. —Ūquĩ nda asaã eã, i aroneate cote, jurar ire nyii. ¹⁷ —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jẽje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguiã nanderaarõ turãte nandeso mose eriichã. —Taemingo bei, i mose Dios nande je, ucheẽ nda embuchebiã. ¹⁹ —Dios ra semingo bei ibate ucheẽ nguire, nande equia ã. Nande ũquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios rĩichã sacua no. Eĩ nande chõ nguia nande abe Dios rĩichã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderĩĩ pe. Sã sacerdote riqui ñee turã mbei Dios je mbia rĩĩ

no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

Jesús i tuchi sacerdotes ataque si

7 Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví ririĩ ndaque sacerdotes. Judíos sĩ raque sacerdotes. Abraham ndiriĩ ja raque judíos no. ⁶ Melquisedec que el décimo isi Abraham si ra. Leví ririĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ũquĩ nde. Ūquĩ mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha ririĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví ririĩ décimo mee naanguia chõ ngue ee re. Ūquĩ décimo isi isi raque nguesenda si. ¹⁰ Abraham ngue ũquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. Ĩ nda Jesús tu ãte rei. Ae quia ñi tu nguiã sacerdote bei nonde cote. Melquisedec na sĩ. Aarón na eã. ¹² —Sacerdotes ra nyuuru uru eã ngõngue randaque re cote, i que Dios aque mose cote ra. —Jesús miĩ nda siqui sacerdoterã mbei cote, i que Dios cote ra. ¹³ Leví ririĩ nducucha eã ndaque Jesús. Judá ririĩ nducucha raque quia ñene. Judá ririĩ nducucha mo siquiã ndaque sacerdoterã cose. —Ūquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús miĩ nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chĩmbesa rui si eã ño Jesús riqui nguiã sacerdoterã co.

Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si,

sã Dios i ñee ee no. ¹⁸ —Sacerdotes ra nyuuru uru eã ngõngue rendaque re cote, i que Dios aque mose cote ra. Ûquĩ nguiatu ngue mbia mingo aroneate nguiã Dios rese. ¹⁹ Moisés chimbresa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰ —Sacerdoterã nde, i mose emo je nyii, emo ngue jurar i ãte quia ra. Dios Jesús miĩ mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ùquĩ contrato que mbia mingo eã Dios rese ra. Ae contrato Dios saã Jesús riĩ namo nae, ùquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote. ²⁵ Ae ra Dios siichã Jesús riĩ nae, ùquĩ nda Jesús mingo bei tuchi. Jesús quia siqui beite nguiã co, ñee turã sacuaã Dios je ùquĩ niĩ.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia ibatenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. Ûquĩ nguiatu ticuasú quishĩ quishĩ mbeite nguiã sacrificio raã naa. Dios eicuã mbutiã sacuaã esi. Mbia abe icuã mbutiã sacuaã esi. Jesús quiatu ngue ticuasú mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacuaã. Mbia icuã mbutiã ja sacuaã ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. Ûquĩ ngue mbae turã saã mbei aroneate quia ra. Dios quiatu que Jesús miĩ sacerdoterã mbei cote ra. Ae quia mbae icuã saã jiri jiriã tuchi nguiã.

Dios contrato yasu saã Jesús riĩ

8 Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quti nande je huee. ² Hue eriqui mbae raã naa Dio s chuchua ibatẽndaa huee. Dios ae chisaã tuchi chõ hue tuchua re. Mbia mo nyisaã eã ño ñene. Nyebe Dios chuchua tuchi chõ hue

re. ³ Sacerdote rerecua ja chõ sacrificio raã naa sacuaã nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ùquĩ nguia eturã tuchi sacerdote chisaã si re. Cristo siqui mose ibii, eĩ nda sacerdote eãte rei ae. Moisés chimbresa cheẽ ndui achõ ño sacerdotes ibi jenda riqui nguiã sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacuaã ño ñene. Sã Dios ñee Moisés je Dios chuchua ao nonde no. —Ndeico mose ibi ibátee que sechuchua ibei jenda ateacuquia ndeje, ùquĩ na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiataẽte que ùquĩ nda. Ae contrato Dios saã nande je namo Jesús riĩ nae, eturã tuchi chõ ùquĩ cote re. —Ã tasaã jẽje. ã abe tasaã jẽje no, i tuchi Dios quia contrato namonda riĩ nande je co. ⁷ Contrato ñiinda mbia mingo bei mose Dios rese, i nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui no:

ã ño ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ùquĩ namei je nyii nae, ùquĩ contrato rã eã nda eyasu asaã cote.

Mbia arao quia Egipto si nae, ùquĩ mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ. Contrato raande que secheẽ mumba mumba chõ nda.

Nyebe ùquĩ asecha chõ nguiã, i que Dios ra.

¹⁰ Ae contrato ra asaã je Israel jenda je, ã ndei e ã:

Secheẽ nda amii tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ùquĩ.

¹¹ Seicua ja tuchi rae. Mbia cuasu ja.

Eñetẽ abe ja chee.

Seicua ja mose, ùquĩ mose emo uataque mbaaquiatu quiatu aroneate seriĩ cote.

Seicua ja tuchi quiatu ra aque mose.

¹² Ûquĩ icuã nda ambutiã ja esi.

Atesarei bei ra eicuã si,

i que Dios cheẽ huĩ embesa ji rese ra. ¹³ —Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

Cristo rei sacerdote tuchi cote; sacerdotes ñiinda rã eã

9 —Eĩ jenyẽ jenyẽ bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda riĩ ño eriqui nguiã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue

ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chi huee no nda. ³ Cortina mbucheseco ji que siqui tuchia ite rĩ nda. Aque quitera quitu que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shĩmbu turã ndei sacua. Ira ao ji mbae riru mo abe que chĩ huee ra. Oro quitu ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitchoquia ruri abe que chĩ mbae riru imi ye no nda. ⁵ Angeles raanguia ao ji que chi ibate mbae riru arõ nda. Querubines, i que ũquĩ je ra. Ujeo que embiitee u mbae riru arõ nda. Sacrificio renda rei mbae riru. Ũquĩ cuartos nyeremo jenda asenei ja aroneate jẽje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacua Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua miñ ño ngue i que quia huee ra. Ique chĩbe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huĩque mose huee ra. Dios eicua mbutiã sacua. Mbia icua abe mbutiã sacua. ⁸ Aque mose bei que mbia mo ndiqui ique aroneate Lugar Santísimo nda. Dios rĩchã tuchi sacua. Ũquĩ ndese Espiritu Turã ndiqui urembiirandute ã. ⁹ Sacerdotes que ticuas u iquia iquia tuchi rei quia aque mose ra. Ũquĩ ngue mbia chiã mbitirõ eã mbei chõ nda. Mbia mundua ndua sacua Cristo ruqui rese chõ ngue ũquĩ nda. Ũquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae rĩ achõ ño ngue eriqui nguiã ñee. Mbaeia rĩ. Mbia chi u rĩ. Mbia chĩmbei rĩ. Mbia choita rĩ. Ũquĩ nĩ ja. Ũquĩ ñee ndui sí chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mñ ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹² Cristo quiatu ngue ticuas u ruqui sii sii eã u nguiã nande je. Chivo ruqui abe. Nguqui ae je chõ ngue nandeicua mbutiã nguiã. Mano mñ ngue mbia ja je ra. Mbia mingo bei sacua cote. ¹³ Ticuas u ruqui que mbia mbitirõ tirõ ndei quia sacerdote je ra. Chivo ruqui abe. Ticuas u rĩ rĩ ndaque rei ji cusubu abe no. ¹⁴ Cristo ruqui quia rei equirãcuã tuchi ũquĩ mbae ruqui si. Cristo ruqui mñ nguia rei nandendua nduasa mbitirõ tuchi. Ae ruqui mñ nguia rei nandemingo turã Dios reco rese. —Se ae tamano mbia icua mbitirõ sacua. Mbia mbae turã naa naa sacua Dios je cote, i que Cristo mano nda. Mbae icua mo ngue esaã jiri jiriã tuchi ra. Espiritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo erĩchã tuchi sacua cote. Dios chiirabo siqui tuchi sacua erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ũquĩ icua ñi ngue Cristo mano nda. ¹⁶ Ae contrato Cristo saã nande je nae, testamento chõ ũquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷ Testamento raãsa manoa mose, testamento chõño ño aque mose re. ¹⁸ Dios contrato ñiinda raã namo mose que ticuas u iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuas u ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuas u que mano nda. Mbae ruqui rei Dios mbae testamento valer i sacua jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icua mbutiã esi. Dios que mbia icua mbutiã choõño eã nda. Mbae quishĩ mose bei quiatu ngue eriqui nguiã mbia icua mbutiã mbei esi.

Cristo mñ aba icua mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitorõ sacua nda. Ibatenda quiatu que embitorõ eã mbae ruqui je ra. Cristo ruqui mñ je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano mñ nda. Nguqui que eichusẽ tuchi nande je ra. ²⁶ Cristo que tu mñ ibi ra. Mano mñ sacua nande je. Nandeicua mbutiã sacua. Mbae ua serĩ mose que eru mano aa ra. Mano nyĩbei ibei eã equia co. ²⁷ Sã mbia riqui mano mñ no. Sã Dios riqui ecuata mee aquere no. ²⁸ Eĩ si que Cristo mano aque mñ no nda. Mbia icua ja mbutiã sacua esi. Cristo ra tu si ibii emo mose. Aque mose ra manoa mbia icua ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ũquĩ mingo bei sacua.

10 Moisés chĩmbesa que mbia mingo turã eã ndaque ra. Mbia mundua ndua sacua Dios rĩ rĩ rĩ mano ndese chõ ngue re. Ticuas u mbia quishĩ nyĩbei

ibe rei quia nae, ũquĩ nduqui que mbia mingo turã eã no nda. ² Ũquĩ mbia chiã mbitirõ mbei mose, eã nda sacerdotes equishĩ nyĩbei ibei äte rei. Eã nda ticuasú mĩ quishĩ ndei mbia mbitirõ ja sacuaã. Eã nda mbia tesarei rei huĩcuã si. ³ Mbua ticuasú quishĩ nyĩbei ibei mose, ũquĩ ngue embutesareiãte huĩcuã si ra. Munduate quiatu que huĩcuã ndese ra. ⁴ Ticuasú ruqui ra mbia icuã mbutiã eã mbei. Chivo ruqui abe no.

⁵ Cristo ruqui mĩ nguiatu mbia icuã mbutiã nguiã esi co. Sã Cristo ñee Dios je siqui mose ibii no:

Ticuasú ruqui mbia mbitirõ eã mbeite quia ndeje co.

Nyebe que serete ereme seje ra.

Se mano sacuaã mbia icuã niĩ.

⁶ Mbae raaque rei ji abe ndebiãte.

Ticuasú mbia quishĩ quishĩ nguia huĩcuã niĩ nae, ũquĩ abe ndebiãte no.

⁷ Nyebe ngue acheẽ nguiã ndeje: “Ae ndebite nae, ũquĩ ndese seico sacuaã ño ngue achu nguiã.

Sã embesa ji riqui ñee serĩ no, ũquĩ ñee nguire que achu ra”, ae que ndeje ra,

ĩ que Cristo ngu je ra. ⁸ Nyebe Dios biãte riqui nguiã sacrificios. Mbua ticuasú quishĩ quishĩ mose huĩcuã niĩ. Mbae raaque rei ji abe ebiãte no. —Ũquĩ jẽsaã saã, ĩ

raque Moisés chimbasa huĩ. ⁹ —Ae ndebite nae, ũquĩ ndese seico sacuaã ño ngue achu nguiã, sã Cristo ĩ Dios je no. Mbua mbui sacuaã sacrificios raã naa si chõ ngue eru nguiã. Sacrificio mĩ tuchi que esaã u mano mbia icuã niĩ nda. Cristo ruqui mĩ ño mbia icuã mbitirõ mbei nguiã co cote. Sacrificio raã ĩ ĩ rocoĩ. ¹⁰ Ae Dios bite nae, ũquĩ ngue Jesucristo saã tuchi u ra. Mano mose mbia ja icuã niĩ. Mano mĩ tuchi que u ra. Nanderirõ mbei que nandeicuã si cote ra. ¹¹ Sacerdotes riqui beite raque Dios chuchua ã. Ticuasú equishĩ nyĩbei ibeite raque quia mbia icuã mbutiã sacuaã ã. Ũquĩ nda mbia icuã mbutiã eã mbei. ¹² Jesucristo quiatu que mano mĩ aque mose bei ra. Mbua icuã ndiquicharõ sacuaã ño ngue re. Aquere eñi ngoi bei Dios ribisho qiti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote.

Uquirãcuã nda eteacuquia tuchi chee uquiatoã je cote. ¹⁴ Sacrificio mĩ ngue esaã nda. Aque mĩ sacrificio je que uquiato chiã mbitirõ ja bei ra. ¹⁵ Sã Espiritu Turã abe riqui ñee ũquĩ no:

¹⁶ Ae contrato ra asaã je judíos je nae, ã ndei e ã:

Secheẽ nda amiĩ tuchi echianguĩ re.

Secheẽ nda amiĩ tuchi eãquĩ ndese no.

¹⁷ Atesarei bei ra eicuã si,

ĩ que Espiritu Turã nda. ¹⁸ Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eã nande si quiatu quia siquicheã ique Diósa. Jesucristo ruqui rĩ nandeique Diósa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo mĩ ndei sacerdote tuchi nande je cote. Dios quiato ja je cote. ²² Diósa ra nandesiquicheã ique oso cote. Nandechiã turã ño nandeico oso Dios rĩchã. —Dios ra nandei turã, nande chõ nguia nandechiangui re. Cristo quiatu ngue nanderi rii nguiã nguqui je nyii. Nandeicuã mbutiã sacuaã nande si. I turã je que nanderei ra. ²³ —Taemingo bei, ĩ que Dios nande je ra. Ñeende ũquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, ĩ. ²⁴ Sã Cristo mbae raã ja tuchi nande je no. Eã nande sí chõ nguia siqui turã nyue. Nandenongue nandembuchesecua turã nguiatu quia nyiese. Mbae turã nandesaã uquia bei quiatu quia nandenongue je. ²⁵ Cristo quiato ñumunua nua mose, nandetesareiã mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguiã tu a.

²⁶ —Mbae icuã tasaã, nande ĩ ĩ mose Jesucristo icuare, emo nda manoa nandeicuã ndiquicharõ cote. ²⁷ Ũquĩ mose, mbae icuã nda nandesaã tuchi. Ũquĩ mose, nandeso chee ra tata cuásuu no. Huee ra Dios ucuãyãsa nyoĩ ja. ²⁸ Sã mbua Moisés cheẽ mumbasa iquia iquia cose no. —Uremae ngue echeẽ mumbasa rese ra, ĩ mose mbia nyeremo, echeẽ mumbasa que mbia iquia cote ra. Mbua que etiisu isu eã tuchi eiquia ra. ²⁹ Dios ririĩ ucuãyãsa quia ra mbae rasi saã tuchi ũquĩ si. Cristo ruqui ucuãyãsa abe no. Ae Espiritu Turã isiteã teãte quia nae, ũquĩ abe no. Cristo ruqui je quiatu ngue Dios ũquĩ mĩ ndei nguiã icúe. ³⁰ Sã Dios ñee no: —Se ra mbia icuã asibishorõ mbae rasi je, sã ĩ no. —Dios sí ra mbae rasi saanguquia ngũimba je, erimba icuã mose ee, ĩ abe que embesa ji huĩ nda. ³¹ Ae ra Dios mbasi eicuã niĩ nae, mbasi tochi eã ndae. Aba mbusiquiche tuchi chõ ũquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã mingue que equia aque mose ra. Ũquĩ ndese jendua jiri ae. ³³ Mbua que ñee icuã icuã tuchite quia jemo je ra. Mbua que mbae rasi saanguquia tuchi quia jemo je no nda. Mbua tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴ Jẽya eãte que eriqui mbia tarõ ji rese ra.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eã nande si quiatu quia siquicheã ique Diósa. Jesucristo ruqui rĩ nandeique Diósa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo mĩ ndei sacerdote tuchi nande je cote. Dios quiato ja je cote. ²² Diósa ra nandesiquicheã ique oso cote. Nandechiã turã ño nandeico oso Dios rĩchã. —Dios ra nandei turã, nande chõ nguia nandechiangui re. Cristo quiatu ngue nanderi rii nguiã nguqui je nyii. Nandeicuã mbutiã sacuaã nande si. I turã je que nanderei ra. ²³ —Taemingo bei, ĩ que Dios nande je ra. Ñeende ũquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, ĩ. ²⁴ Sã Cristo mbae raã ja tuchi nande je no. Eã nande sí chõ nguia siqui turã nyue. Nandenongue nandembuchesecua turã nguiatu quia nyiese. Mbae turã nandesaã uquia bei quiatu quia nandenongue je. ²⁵ Cristo quiato ñumunua nua mose, nandetesareiã mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguiã tu a.

²⁶ —Mbae icuã tasaã, nande ĩ ĩ mose Jesucristo icuare, emo nda manoa nandeicuã ndiquicharõ cote.

²⁷ Ũquĩ mose, mbae icuã nda nandesaã tuchi. Ũquĩ mose, nandeso chee ra tata cuásuu no. Huee ra Dios ucuãyãsa nyoĩ ja.

²⁸ Sã mbua Moisés cheẽ mumbasa iquia iquia cose no. —Uremae ngue echeẽ mumbasa rese ra, ĩ mose mbia nyeremo, echeẽ mumbasa que mbia iquia cote ra.

Mbua que etiisu isu eã tuchi eiquia ra. ²⁹ Dios ririĩ ucuãyãsa quia ra mbae rasi saã tuchi ũquĩ si. Cristo ruqui ucuãyãsa abe no. Ae Espiritu Turã isiteã teãte quia nae, ũquĩ abe no. Cristo ruqui je quiatu ngue Dios ũquĩ mĩ ndei nguiã icúe.

³⁰ Sã Dios ñee no: —Se ra mbia icuã asibishorõ mbae rasi je, sã ĩ no. —Dios sí ra mbae rasi saanguquia ngũimba je, erimba icuã mose ee, ĩ abe que embesa ji huĩ nda.

³¹ Ae ra Dios mbasi eicuã niĩ nae, mbasi tochi eã ndae. Aba mbusiquiche tuchi chõ ũquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã mingue que equia aque mose ra. Ũquĩ ndese jendua jiri ae.

³³ Mbua que ñee icuã icuã tuchite quia jemo je ra. Mbua que mbae rasi saanguquia tuchi quia jemo je no nda. Mbua tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra.

³⁴ Jẽya eãte que eriqui mbia tarõ ji rese ra.

Mbia jembae rirō ndirō mose abe chee que jēyate riqui Dios rese ra. Jēirandute quiatu que equia jembae turā ibatenda rese ra. Jembae ibatenda quiatu ra ua eā mbei. ³⁵ Dios jēicua bei quiatu quia aque mosenda rā mbei. Ūquĩ mose ra Dios mbae turā tuchi mee jēje. ³⁶ Ae Dios bite nae, ūquĩ ndese bei chō jēingo. Ae mbae turā nda Dios mee jēje nae, ūquĩ jēsaarō arō mingue chō nguia cote. ³⁷ Achite Jesucristo ñi tu a. ³⁸ Ae chiā Dios mbitirō nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eā tuchi ra erese. ³⁹ Nande quia ra nandehui eā mbei esi. Ae ra hui esi nae, ūquĩ nda Dios mbutiā. Nande quiatu Dios nandeicua tuchite nguia ā. Nyebe ra nandemingo bei.

Ae Dios icua

11 Emo Dios icua mose, ¿mbae chō ūquĩ ña? Ae Dios icua nae, ūquĩ nda ñee. —Ucheē nguire ra Dios mbae mondo seje, i rae. —Ae asaarō arō nguia nae, ūquĩ nda emondo seje ucheē nguire no, i ra eno. Mae eā ndaque erese. ² Dios quiato cose ndare que Dios icua tuchi quia ra. Nyebe mbia riqui nguia jirandujate erese. ³ Dios que mbae chao ja cose mbae eā mose ra. Mbae mo je eā ngue mbae ao ra. Ucheē achō je chō ngue mbae ao ra. Nande Dios icua mose, ā abe nandeicuate quia ā. Nandemae āte raque erese.

⁴ Abel que Dios icua ra. Nyebe que Dios eisi turā nda. Ofrenda turā ngue emondo Dios je ra. Embae ofrenda que eturā tuchi Caín mbae si ra. Nyebe Dios embae ofrenda isi turā nguia. —Co eturāte riqui seje co, nyebe Dios i nguia Abel ñi. Nyebe mbia riqui nguia jirandujate Abel rese. ⁵ Enoc que Dios icua ra. Nyebe Dios ererao nguia ibate emano mose rocoĩ. Mbia mbuate que eoreā cote ra. Dios equerao quiatu quia ibate reaē. —Co eturāte riqui seje co, i quia Dios quia Enoc ñi nyii reaē. ⁶ Emo Dios icua eā mose, ūquĩ nda Dios isi turā eā mbei. —Co Dios reco riqui co, sã i quiatu nyii. —Emo Dios riichā mose, Dios turāte ra ee, sã i quiatu no. Aquere quiatu ra Dios eisi turā cote. ⁷ Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheē mose ra. Mae eā ndaque erese aque mose. Arca que esaā Dios cheē nguire ra. Nguirĩ mingue sacua eye. Mbia ataque que Dios icua eāte quia ra. Noé mñ ño ngue eicua quia ra. Nyebe Dios Noé isi turā nguia.

⁸ Abraham ngue Dios icua ra. Nyebe Dios cheē mumbayā nguia. Dios que ñee ee ra. —Eso rã a si. Ibi mo tamee ndeje mámbi, i que Dios ee ra. Abraham ngue Dios cheē mumbayā oso ra. Ae quiti esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetē quire chō ngue eriqui riqui bei huee ra. Nguirĩ ndese. Isaac. Jacob abe no.

Ūquĩ je abe que Dios ñee nda. —A ibi tamondo jē abe je, i. ¹⁰ Abraham quiatu que Dios icua tuchi quia ra. Nyebe ñee nguia. —Aico chee ra sucha tubiriā túraā. Hue ra ua eā mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguiriñ dea Dios cheē nguire ra. Ari tuchite rei que ae ra. —Dios ra seriirina mee seje ucheē nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbia tubiriā i tuchi chō ae cote re. Contar i ja aronea tuchi chō erucucha je cote re. Sã nyasitata tubiriāte riqui no. Sã ibi quishĩ tubiriāte riqui no.

¹³ Ūquĩ ngue mano ja Dios mbae mondo ja eā mose ee ra. Ae je “co tamondo jēje” i Dios ee nae, ūquĩ ndurubi quiā ño ngue mano nda. —Dios ra emondo ure je uremanonde, i que eyate quia ndua ndua ūquĩ ndese ra. Ūquĩ nguiau que Dios icuate quia ra. —Nandeico mbirĩ ndaque equia ibii ā. Ibatenda chō nandere, ite que equia eicua ra. ¹⁴ Emo ñee mose ūquĩ, siqui sete quiatu nguia Dios récuua. ¹⁵ Ūquĩ ndua ndua mose nguecua rese nda nyoĩ si nyebi re chā ae. ¹⁶ —Nanderecua turā nguiau nandetea, ite que equia ra. Dios recua je chō ngue eriqui nguia ñee. Nyebe Dios ireĩ ireĩ eā nguia esi. Dios bite “Paba” i mose ee. Dios ūquĩ ndecua turana quereco co.

¹⁷ —Ma Abraham secheē mumbayā, i que Dios Abraham ñi nda. —Nderiirĩ eiquia rã sacrificiorā, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguia nguiriñ mñ ñi. ¹⁸ —Isaac nda tiirĩ tuchi ndeje, i rei que Dios ee nyii ra. ¹⁹ Abraham ngue Dios icua tuchite quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiriñ iquia serĩ mose que Dios eo isi ra. Abraham Dios cheē mumbayā mose, nguiriñ iquia raanguia chō ngue re. Dios embuquera si raanguia chō ngue eno nde. ²⁰ Isaac que Dios icua ra. Nyebe ñee nguia nguiriñ je. —Dios ra mbae turā saā jēje, i que Jacob je ra. Esaú abe je. ²¹ Jacob que Dios icua ra. Nyebe ñee nguia José riirĩ ja je umano serĩ mose. —Dios ra mbae turā saā jēje, i que ee ra. Uchitochoquia rese que nyeco rei nyibi ñee turā Dios je ra. ²² José que Dios icua ra. Nyebe ñee nguia israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetē mose que esi embuchemĩ tres meses ra. Ererecua eiquia eā sacua. Moisés itāquieĩ turāte quia ee re. Nyebe eru riqui nguia siquicheāte ererecua si. Esi abe. ²⁴ Moisés s abe que Dios icua quia aquere cote ra. Nyebe “Egipto jenda rerecua riirĩ nducucha eā se” i nguia. ²⁵ “Dios quiato rese taico se. Mbia icuā icuā ndaque ra seje. Dios quiatoā ndese ra aicoā”, i que Moisés ucuasu mose cote ra. Mbae icuā ndese aba oote raque. Aba mbia mbirĩ ño ñene. ²⁶ —Taico chō

Dios rimba rese. Mbia ra sembasi mbasi raque Cristo rĩ, i que Moisés ra. Nyebe eriquĩã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Ñimbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. Ī nda ángel jendiĩ i iquia eã, i que Moisés ñee mbia je ra. Angel que israelita riĩrĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ũquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba rĩ abe ra aba ñee jêje re? Dios quiato tubiriãte quiatu ñene. Ũquĩ asenei ja aroneate jêje. Gedeón. Barac. Sansón. Jefté. David. Samuel. Dios cheẽ mbuchecuasa ja rĩ. ³³ Ũquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra. ³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacuaã. ³⁵ Cuña abe que Dios icuate quia ra. Nyebe Dios eririĩ ndaaque mbuquera sí nguiã ee. Emo emo abe que mbae rasi saãte quia Jesús rĩ nda. Hui sereãte quiatu que equia esi ra. —Sã seiquia rei. Dios ra sembuquera si nguiã. Serete mbuchiicuabo turã ndae, i que equia ra. ³⁶ Emo emo ngue ñimbirãcuã nguia mbia iquia iquia chooño mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saan-

guquia tuchi rei quia ee ra. Hui eã mbei que equia Dios si ra. ³⁸ Ũquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ũquĩ ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee je eã ngue ee ra. Mee je quia ra ee cote. ⁴⁰ Ũquĩ mĩ je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ũquĩ ndese.

Jesús mĩ ndese nandendua ndua

12 Sã Dios icuasa tubiriãte cose no. Ũquĩ na ño nandeico nande abe Dios icua tuchi. Ae nandembuti mbuti quia Dios si nae, ũquĩ si nandehui. Ae mbae icuã aba mbuchiishĩ arõte quia nae, ũquĩ si nandechiicuasẽ ño. Jesús mĩ ndui chõ nandeico ngata. Nandechimbirãcuã ño nguia siqui erese. ² Jesús mĩ ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chĩ nda siqui mose Dios rese jê. Sã Jesús no. Mbia icuã icuã mose ee, ñimbirãcuã mbei que equia ra. Ñimondocho eã ngue ra. ⁴ Jesús mĩ ngue mano mbae icuã ndiquisã quisã sacua mbia si ra. Jêingo mose mbae icuã ndiquisã quisã, aba mo ngue jêiquia eãte jê nguiatu ra. ⁵ ¿Embesa ji si jêtesarei chõ nde? —Seriĩrĩte quia jê nde, ite Dios quia jêje co. Sã embesa ji riqui ñee ã no:

Seriĩrĩ, Dios mbae rasi saanguquia mose ndeicuã ñi, ereisiteã teächĩ nda jê.

Dios ñee mose ndeje ndeicuã ñi, echeẽ eisi turã ño.

⁶ Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguiirina nae, ũquĩ je ra ñee eicuã ñi, i que embesa ji huĩ ñee nda. ⁷ Dios “seriĩrĩ” i tuchi quia jêje co. Nyebe eriqui nguiã mbae rasi raanguquia jêje jêicuã mose co. Sã mbia ja riqui nguiĩrĩ iruã eicuã mose no. ⁸ Dios mbae rasi raanguquia eã mose jêje, eriiriã nguiatu rei jê. ⁹ Sã nanderu ibi jenda riqui nanderuã nua nandefetẽ mose no. Nandembaaquiato sacuaã. Sã nandeico echeẽ mumbayã cote no. Eĩ nande sí chõ Pa-ba ibatenda je. Ae cheẽ nguiatu nandemumbayã tuchi. Ũquĩ mose ra nandereco siqui turã tuchi. ¹⁰ Sã nanderu ibi jenda riqui nandembaaquiato jua raque no. Nandeico turã sacuaã aa íbii. Dios quiato nandembaaquiato turã tuchi nguiã nanderu ibi jenda si co. Nandechiã mbitirõ sacuaã ae rã si. ¹¹ Dios mbae rasi

saanguquia mose nande je, nandechosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cote.

Dios cheẽ nda jëisiteã teãchĩ jẽ

¹² Jẽo tomei jembirãtã jiri ae. Jẽtima abe jembirãtã jiri siqui sacua Dios rese no ae. Jeñimondochoã jiri quia siqui Dios rese ae. ¹³ Jẽingo tuchi quiatu quia erese. Ae ndua ata atate quia nae, ñ nda ũquĩ abe siqui tuchi chee erese chã. ¹⁴ Jẽingo turã mbia ja rese. Dios rã si chõ jẽingo. Dios rã si nandeicoã mose, nandemae eã mbei ra erese. ¹⁵ Jenyiteaquiaturã ño nguia. Ñ nda jemo Dios turã isiteã eã. Emo mbae icua naa mose jẽje, jẽtesarei chõ esi. Jendua icua icuãchĩ nda jenongue rĩ jẽ. ũquĩ mose ra jeñimbiãcuã jate. ¹⁶ Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jëisiteã teãchĩ jẽ. Sã Esaú no. Aque que umbae herencia mondo ja chõ soo ñetẽ ndibishorõ nda. ¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguia cote.

¹⁸ Dios turã tuchi riqui jẽje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra. ¹⁹ Trompeta que nyuihui ee no nda. Dios que ñee ee cote ra. Mbia que Dios cheẽ ñandu sereãte ra. ²⁰ Dios quiatu ngue ñee nguia nyii: —Emo oco mose sita ibate rese, ũquĩ jẽiquia. Mbae quiaa riinda abe oco mose erese, ũquĩ abe jẽiquia no. Sita je jẽiquia. Jeñio no ae, i quiatu que Dios ee nyii ra. ²¹ Aba mbusiquiche tuchi que mae mose ũquĩ ndese ra. —Aico titi titi i tuchi esi co, i chee que Moisés abe ra. ²² Eĩ jenyẽ eã ño jẽ nde. Dios jembusiquiche ãte quia jẽ co. Dios recua jësiichã tuchi quia jẽ ã. Dios reco chuchua. Jerusalén naanguia ibatenda jësiichã tuchi quia jẽ ã. Angeles tubiriã abe jësiichã tuchi quia ã no. ²³ Dios icuasa ñiinda abe jësiichã nguia ã no. ũquĩ mbae nombres mbesa ji chi ibate pe. Dios abe jësiichã nguia ã no. Ae ra Jesús quia-toã icua tea tea ja emo mose. Mbasi ja rae. Jesús quia-to mano je abe chõ jësiichã ichã nguia ã no. ũquĩ ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jësiichãte quia ã no. Ae ruqui rĩ ngue Dios contrato yasu raã nande je ra. Ae ruqui rii ji jësiichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jẽje co. Echeẽ nda jëisiteã teãchĩ jẽ. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande je co. Ae cheẽ nandechandu sereã mose, mbae rasi ra esaanguquia tuchi nande je cote. ²⁶ Dios

cheẽ mose que ibi nyere nyere aque mose coose ra. —Namo nda ibi ambuchere si no. Ibi miñ ño eã nda ambuchere. Ibei abe ra ambuchere no. Aque miñ nda ambuchere cote, i Dios quia co. ²⁷ —Aque miñ nda mbae ambuchere ja, i Dios quia co. Aque mose ra mbae ua ja Dios chiao. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. ũquĩ mose ra eya tuchi nanderese. ²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

Jenyesequa jenyiese

13 Jenyesequa quia jenyiese jẽ. Nyiesenda chõ jẽ nde. ² Mbia ngaẽ mose jenyuchúaa, jëisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguia ee. ³ Etarõ ji rese jẽingo ndua. Mbae turã jësaã saã ño nguia ee. Jëtarõ ji raanguia chõ jẽ abe erese re. Ae je mbia icua icua ndiqui nae, ũquĩ je jẽingo turã ño. Sã jẽ abe jendete riqui no. Sã jẽ abe jëiruã nua arõte no. ⁴ Emo siqui mose ngüinisi rese, ũquĩ Dios bite. Sã emo ngüinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ũquĩ je. Ae ninisi ãte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jẽ. Jembae miñ ndese chõ jëya. —Jaendechayã mbei ra se, i quiatu Dios nguia co. ⁶ Ae bei jẽ. Dios ra nanderechayã mbei. Nyebe nandeico nguia ñee:

Dios riqui beite serese co.

Mbia mo si ra asiquicheã,
nyebe nandeico nguia i ã.

⁷ Jenderecuã rese jẽingo ndua. ũquĩ ño ngue Dios cheẽ senei senei jẽje ra. ũquĩ ndiqui Dios icuate ũquĩ. Eĩ jenyẽ Dios icua jẽ abe ũquĩ na si. ũquĩ nguia siqui turãte nguia Dios rese ũquĩ. ⁸ Eĩ mbei chõ Jesucristo re. Cose mosenda bei. Namo abe chee. Eĩ mbei ra ae quia. ⁹ Mbia jembaaquiaturã ata ata mose, echeẽ si jëhui chõ. Mbia jembaaquiaturã choño mose, echeẽ si jëhui chõ no. Ae je mbia riqui mbaeiae i nande je nae, ũquĩ si nandehui mose, ũquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguia. ¹⁰ Jesús miñ ngue mano nande je ra. Sacrificio rei ae miñ nande je. Cose ndare rã eã namo cote re. Ticuasú ra mano eã nandecua mbutiã sacua cote. Jesús ruqui miñ ño nandecua mbutiã nguia co cote. ¹¹ Sacerdote rerecuã riqui ticuasú ruqui rerao Lugar Santísimo aque. Dios mbia icua mbutiã sacua esi. Isho jiri sucha cuasu si echoi quia ticuasú roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua

nguqui je ra. ¹³ Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. ¹⁴ Nanderecua ibi jenda ra ua chõ. Dios ra nanderecuarã mee nande je ibate. Ûquĩ ngua ra ua eã mbei. ¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei eriĩ. ¹⁶ Jẽingo turã ño ngua mbia je. Jembae jemee mee ngua emo je. Ûquĩ Dios bite.

¹⁷ Jẽingo turã jenderecua je. Echeẽ jemumbayã. Jenderecua riqui jendeaquiato quiatu Dios je ùquĩ.

—¿Jeteaquiato turãte equia re? i chee ra Dios ee. Jenderecua cheẽ jemumbayã mose, eyate ra ùquĩ mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jeñee mbei quia Dios je ureriĩ. Ureico turã sete equia mbia ja je ã. Ureico ndua icuã icuã eãte emo niĩ ã no. ¹⁹ Jeñee tuchi quiatu quia seriĩ Dios je. Ì nda Dios semondo jei jendea.

Echeẽ hui bei

²⁰ Dios ae aba mombia nguiã. Dios ae que Jesús raaque mbuquera si ra. Jesús ruqui riĩ ngue Dios ucheẽ yasu mee nande je ra. Jesús ruqui riĩ ngue Dios embuquera no nda. Jesús rei oveja raarõsa rã. Nander-aarõ arõ mbei equia co. ²¹ Sã Dios riqui jembuquirãcuã tuchi. Ì nda jẽingo bei ae Dios bite ùquĩ ndese. Sã ae riqui tuchi nandechiangui re. Nandemingo tuchi sacua ae ebite ùquĩ ndese. Jesucristo quiatote quiatu nande re. Sã mbia ñee turã mbei quiatu quia eriĩ. Amén.

²² Seresenda, aico co mbesa juate jembiiirandu sacua a. Secheẽ jemiĩ tuchi rã jẽaquĩ ndese. ²³ Aico jembiiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea.

²⁴ Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque. ²⁵ Sã Dios siqui turã jẽ ja je. Amén.

SANTIAGO

Mbia icúe cúe jenda je Santiago ucheẽ mbesa mondo

1 Santiago chõ se re. Dios rimba chõ se re. Jesu-cristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mĩ ño aba mbaaquiato nguiã

² Mbae icuã tã i mose jêje, jêya bei chõ nguia, Sere-senda. ³ —Ma Dios icua tuchite, i mose mbae mo tã i jêje, jêingo tuchi chõ nguia Dios rese ùquĩ mose. Jeñimbirãcuã aquiato sacua. ⁴ Jeñimbirãcuã mbei chõ nguia Dios icua. Ì nda Dios riqui jembitorõ tirõ mbei jembuchicuabo mingo. Ùquĩ mose ra jêturã tuchi cote.

⁵ Jêingo turã aquiatuã mose, jeñee ño Dios je. Jeñim-birãcuã aquiatuã mose, jeñee ño Dios je no. Ae ra jem-baaquiato. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jenze tuchi quiatu quia. —Dios ra emee ãte rei seje, i mose jemo, eicuãte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùquĩ je. ⁸ Emo ndua ata ata mose, mbae mĩ mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiatu eya riqui. Embae ua mose, sã eya riqui ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Etura eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, jêsaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesequa quia serese nae, ùquĩ nda amingo bei, i que Dios cose ra. ¹³ —Ã esaã icuã, i mose emo jêje, Dios eã ño ñee nguiã jêje ùquĩ. —Dios que “ã esaã

icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã oseu uquia aba je. Dios eã ñene. ¹⁵ Emo mbae icuã oseu mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimon-do chõ ùquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ùquĩ nguia nyabi abi jiri nguiã. Dios quiarei nyabiã mbei emo mose. Etura mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nan-dechiangui re. —Jê nane je aico seriirĩ i co, i que Dios nane je ra. Dios ririã tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiatu quia jê. Jendua quiatu quia ñee nonde. Paama jenze jei jei techĩ nguiã emo je. ²⁰ Ae Dios bite riqui mbae nae, ùquĩ nandesaã aroneate nande paa-ma i mose. ²¹ Ae Dios ucheẽ mondo quia jeñiangui re nae, ùquĩ jêisi tuchi quiatu quia. Jêingo mingue chõ nguia Dios cheẽ je jê. Aba mingo beisa chõ Dios cheẽ nde. Ae mbae icuã ndese mbae riqui nae, ùquĩ icuã tubiriãte eriqui raque. Ùquĩ si jêhui tuchi. Mbae icuã ja si jêhui tuchi.

²² Dios cheẽ nda jeñandu chooño-chĩ jê. Echeẽ jemumbayã tuchi quiatu jê. Emo Dios cheẽ andu chooño mose, ae sí chõ ñimbiirĩ irĩ nguiã aque. ²³ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñoosa re. Tesarei jei chõ nguiã Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ùquĩ ndese ra Dios riqui tuchi echeẽ mumbayã mose. Ùquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ùquĩ nde. Ae sí chõ ñimbiirĩ irĩ nguiã ùquĩ. ²⁷ Ae Dios quiato chooñoa tuchi nae, ùquĩ ndiqui mbae turã naa ùquĩ. Ùquĩ ndiqui esi cheecha reaquiature ùquĩ.

Ūquĩ ndiqui eru cheecha reaquiature ūquĩ no. Mbae eã mose eru cheecha mbae. Ūquĩ ndiqui ñimbiñicuã icuã eãte mbae icuã mo je ūquĩ.

Mbia nandehi turã ja chõ nguia nyabiã

2 Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyabiã. 2 Sã mbaecha mo ndiqui ngasẽ jeñimunua mose jẽje no. Huiirao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. 3 Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. 4 Eĩ jenyete mose, jẽisi turã ja eã ño nguia ūquĩ. Jembuchiabi chõ nguia ūquĩ. Hue rĩ ja eã ño jẽingo nguia mbia cuata mee ūquĩ. Jendua turã eã ñochĩ nguia ūquĩ. 5 Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacua. Ūquĩ ndese quiarei Dios o tuchi mbaecha mo si. —Ūquĩ nda siqui tuchi serese se ererecua tuchi mose, i que Dios ñee nyii ra. 6 Jẽ ngue mbia mbaecha reã jenguirirõ tuchi ra. Eicuã eãte ūquĩ ndiqui raque jẽje. Mbaecha quiatu eicuãte riqui nguia jẽje. Jembirĩ irĩ ño nguia. Jenderao rao chõ nguia ererecua je, jẽ mbae mo mee mee sacua ee. 7 Mbaecha chõ ñee icuã icuã nguia Cristo rĩ. Nandererecua chõ Cristo resẽ.

8 —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ūquĩ nde. Nande ūquĩ ñee mumbayã mose, nandeico turã ndae. 9 Nande mbia mo isi turã mose, emo isi icuã mose, eicuãte ūquĩ. Nande mbia isi chiabi abi mose, Dios cheẽ nandemumba chõ nguia ūquĩ. 10 Dios cheẽ tubiriãte raque nande je echeẽ mumbayã sacua. Nande echeẽ mii mo mumba mose, echeẽ ja mumba raanguia chõ ūquĩ nde. Echeẽ ataque mumbayã ndaque. 11 Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguia ūquĩ. Nandeicoã ndaque emo ninisi rese. 12 Dios cheẽ ngue nandembui mbae icuã si cote ra. Nandehesequa sacua mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. 13 Ae eya eã eãte riqui emo ndese nae, ūquĩ ndese ra Dios ia eã eã nandecuata mee mose. Nandeya eã mose emo ndese, ūquĩ mose ra Dios nandembasiã.

Nande Dios icua mose, mbae turã abe nandesaã ño nguia

14 Sã emo ndiqui ñee no. —Dios aicuate quia co, i. Ūquĩ mbae turã naa eã mose, ūquĩ nda Dios sirõ eã mbae icuã si. Dios icua chooño ño ñene. 15 Sã Jesús quiato mbaecha reã mo ndiqui ngasẽ jẽje no. Sã eirao eã ndiqui no. Sã echiurã mo eã ndiqui no. 16 Sã jemo

ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jeñee iru chooño ño nguia ee ūquĩ. 17 Jẽingo turã eã mose emo je, Dios jẽicua chooño ño nguia ūquĩ. Jẽ Dios jẽicua mose, mbae turã jẽsaã jiri ae.

18 Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose i mañi ae ra jẽicua mbae turã naa naa eã mose re? Se quiatu mbae turã asaã saã nguia co. Nyebe ra mbia “eriqui Jesús icuate co”, i serĩ. 19 —Dios mii ño siqui nguia co, jenyete chõ nguia ūquĩ. Eaturãte raque ūquĩ. Aba checuayã abe riqui ñee ndaque Dios mii ñi co no. Siquichete esi ñee ndaque erĩ.

20 ¿Mbaerã jẽaracuayã tuchi riqui re? Emo mbae turã naa naa eã mose, Dios icua chooño ño nguia ūquĩ.

21 Sã nandehi Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguia. 22 Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeico nguia ñee. “Abraham Dios icuate”, i. 23 Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ūquĩ ngue ique tuchi cote ra.

Nyebe “Dios Quiato” i nguia Abraham je. 24 Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. 25 Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguia. 26 Sã nanderete no. Umi umi eã mose, “eraaque” i chõ mbia nguia ūquĩ je. Ūquĩ na ño mbia mo ndiqui nguia ã. Mbae turã naa eã. Nyebe nandeico nguia “Dios icuayãte” i ee ã.

Cochee chõ nandechuru nandereco

3 —Mbia mbaaquiato quiatu sacua se, jjenye jaaja techĩ nda equia jẽ! Emo emo mii ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. 2 Dios cheẽ nandechabi chabi chõ nguia nande ja ã. Emo uchuru rerequia turã mose, nguete ja abe rerequia turã ño nguia ūquĩ. 3 Sã nandeico freno mii ticuasú churu rese no. Nandehese mumbayã sacua ño ūquĩ nde. Sã freno ñetẽ je chõ nandeico ticuasú rete rurucuata nandenuasa qiti no. Ticuasú rete cuasute raque. 4 Sã lancha cuasute raque no. Sã quiririã quiricuãte riqui raque ee no. Ira ñetẽ je chõ echa riqui nguia embucuata turã unduasa qiti. 5 Eĩ ño nandechuru nguia. Nandechuru

mbae saã ata ata chõ nguiã. Eñetëte raque. Sã tata ñetëte raque no. Mbae ra esei ja tuchi oso quia.

⁶Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mbiicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷Sã nandeico quiaa riinda mo mbuseteã arõte raque no. Ae mbebe quia nae, ùquĩ abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùquĩ abe nandembuseteã arõte raque no. Ùquĩ ja que mbia mbuseteã emo mose ra. ⁸Nandechuru quiatu nandembuseteã aroneate nguiã. Nandechuru icuã nguiatu nandembuquiriri aroneate nguiã. Mbei tasi je rã tuchi chõ nandechuru riqui nguiã nande je ã. ⁹Nandechuru je nandeico ñee turã ndaque nanderu Dios je. Nandechuru sí je chõ nandeico nguiã ñee icuã mbia Dios chiao je cote. Ae rã sí raque Dios mbia ao. ¹⁰Nandechuru sí je nandeico ñee turã ndaque. Ñee icuã abe no. Ùquĩ Dios biãte, Seresenda. ¹¹Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chĩ aroneate icua mii ye. ¹²Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reẽ mbiõ no. Hue icua mii ye ra eñi ja eã. Eĩ si chõ nandechuru no nde. Nandechẽ ñumumbara mose, eicuãte ùquĩ.

Ae je Dios uaquiato mee nae

¹³Jemo aquiato mose, sã eriqui mbae turã naa naa mbei. Sã eriqui tochi bei no. ¹⁴—Paama jenyechecuayã mose jenyue, jëaquiato jësaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵Eĩ jenyue eã nda cote, Dios uaquiato mee mose jëje. Paama jenyechecuayã mose jenyue, Dios rã eã ño jë nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ùquĩ mose ra mbia siqui turãnyã nyue. Mbae icuã icuã mbei ra ee. ¹⁷Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesaã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸Nande mbia nandemingo turã mose nyiese, nandechiã turã nda nandeico cote.

Ae mbae icuã quiatote nae, Dios quiatoã ño ùquĩ nde

4 ¿Mbaerã ño jëingo nyao nyao nyiese chã? ¿Mbaerã ño jëingo ico icuã icuãte nyue chã? Jeñiangui renda icuã nii ño ñene. “Se chõ jë”, jenyue jaa-ja quiatu nguiã mbae icuã osei osei. ²Jembae eã jenyosei choseichĩ nguiã ã. Jë ererequiayã mbei mose, mbia jëiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jëicuã icuã mbeite riqui nguiã jenyue ã. “Embu seje”, jenyue ãte quiatu nguiã Dios je. Nyebe jëingo nguiã eisiã. ³“Embu seje”, jenyue mose Dios je, “embu seje” jenyue icuã icuã ño nguiã ee ã. Mbae mumba choño sacua ño jëingo nguiã “embu seje” i Dios je ã. Nyebe Dios riqui nguiã emee eã jëje. ⁴Sã cuña mo ndiqui hui ngu si no. Eĩ jenyue si chõchĩ nguiã hui hui Dios si ã. Ae Dios biãte nae, jë ùquĩ osei osei mose, Dios quiato aronea ño jë cote re. ¿Mañi jenyue quia ùquĩ icuayãte re? ⁵Sã embesa ji riqui ñee ñooño ãte no:

Espíritu Turã Dios mee nguia nandechiangui re nae, aque riqui ngueteãte nanderese co.

Nandeico sacua Dios mii ndese, i que embesa ji ra. ⁶Dios turã i ite riqui nande je co. Sã embesa ji riqui ñee no: Ae ucuasu saã saã nguia nae, Dios riqui ùquĩ ndiquisãte co. Ae siqui tochte quia nae, ùquĩ je quiatu Dios turã i ite riqui nguiã co, i que embesa ji ra. ⁷Jëingo tochi chõ nguia Dios je. Aba checuayã jëisiquisã ño nguia jenyese. Ùquĩ mose ra uchã jësi cote. ⁸Dios jësiichã tuchi quiatu quia. Ùquĩ mose ra Dios abe jendiichã tuchi. Jëingo mose mbae icuã ndese, jëhui chõ esi. Jendua ata ata mose, jeñia jembitorõ ño. ⁹¿Mbaerã jëingo iquia iquia mbae icuã naa mose re? ¿Mbaerã jëyate riqui mbae icuã naa mose re no? Jenyeseo quiatu quia jëicuã nii. Jëya eã nguiatu quia jëicuã ndese no ae. ¹⁰Jëingo tochi chõ nguia Cristo je. Aquere quia ra ae jëturã mbuchecua mbia je cote.

Nandechẽ icuã eã emo nii

¹¹Jeñee icuãchĩ nda emo nii, Seresenda. Dios cheẽ mumba chõ ùquĩ nde. —Jenyesequa chõ nguia jenyiese, i que Dios ra. Jë Dios cheẽ mumba mose, “Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocõ jë. ¹²Dios ae chõ mbia cuata mee nguiã co. Dios mii ño ucheẽ mondo nguiã nande je. Nande echeẽ mumbayã sacua. Dios ae chõ aba rirõ nguiã aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua.

Tenda nongue mose ra achube, i no. Ndua rane eã Dios rese. ¹⁴ Ūquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵ —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ūquĩ mose quiatu mbae tasaã, nande quiatu quia. ¹⁶ ¿Mbaerã jẽingo tesarei Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguiã ūquĩ. Eicuãte ūquĩ. ¹⁷ Ae mbae turã icuate quia nae, sã ūquĩ ndiqui mbae turã naa mbei. Mbae turã naa eã mose, eicuãte ūquĩ cote. Dios biãte ūquĩ cote.

Santiago ñee asi mbaecha je

5 Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. ² Jembae ra ua ja tuchi cote. Chicuaquiarĩ nda jẽirao ua tuchi. ³ Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguiã ndua. Dios rese ndua rocoĩ. Mbae isiquia jemunua nua tuchi chõ nguiã Dios jembasi sacuaã ã cote. ⁴ Mbia que quiei quiei rei quia jẽje resẽ. Mbae que jemondo turã turãya nguia jembae ishao shaosa je resẽ. Ūquĩ Dios mbiirandu raanguia chõ nguiã jeni. Nyebe ra Dios jembasi uquirãcuã je. ⁵ Sã ticuasú riqui quiaru bei ñimbuquira no. Eiquia nonde. Eĩ ño jẽ nde, mbaecha. Jembasi rese chõ ngue jẽingo bei quia ra. Jẽquiaru chooño mbei que equia ra. Siqui rocoĩ Dios rese. Nyebe ra Dios jembasi cote. ⁶ Jẽ ngue mbia turã jembasi mbasi quia ra. Jẽ ngue mbia turã jẽiquia iquia quia no nda. Mbae icuã mo esaã eãte raque jẽje. Nyebe ra Dios paama i tuchi jẽje, mbaecha.

Jesucristo jẽsaarõ arõ mingue chõ nguia

⁷ Jesucristo ra tube íbii, Seresenda. Jẽsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua

nonde. ⁸ Eĩ jenyẽ chõ nguia Jesucristo raarõ arõ mingue jẽ abe. Jeñimbirãcuã ño nguia Jesucristo raarõ arõ. Achite eñi tu a cote. ⁹ Jeñee icuã icuãchĩ nda jenyue, Seresenda. Ūquĩ mose ra Dios jembasi. Namó jiri ra Dios mbia icuã mbasi. ¹⁰ Jeñimbirãcuã mingue chõ nguia. Sã Dios cheẽ mbuchecuaasa mbia cose ndare no. Sã ñimbirãcuã mingue mbia icuã mose ee no. ¹¹ Ae ñimbirãcuã mingue quia nae, ūquĩ je chõ Dios turã ndiqui nguiã. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. Ūquĩ jẽicuate quia ã. Eĩ si chõ Dios turã tuchi nguiã mbia je co.

¹² ã abe jeñandu tuchi. Jeñee ñooñochoĩ nda jẽ. Jurar jenyechĩ nda emo mose jẽ. Ibatenda riĩ. Ibi jenda mo ñi abe no. Mbae ja mo ñi nda jurar jenyẽ jirichĩ jẽ. Eno jenyẽ mose, ūquĩ mii mbei chõ jeñee. Tei jenyẽ mose, ūquĩ mii mbei chõ jeñee no. Eĩ jenyẽ mose ra Dios ñee asiã jẽje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ūquĩ ñee Dios je erasi riĩ cote. Sã mbae quira mo quitu erasi ãquĩ ndese Jesús riĩ. ¹⁵ —Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ūquĩ nda embutiã esi no. ¹⁶ —Mbae icuã ngue asaã eã nda, jenyechĩ nda jẽ. —Mbae icuã ngue asaã nda, jenyẽ quiatu quia jenyue. Jeñee quiatu quia Dios je jenongue riĩ. Ūquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacuaã cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingo Dios rui s̄. ²⁰ Nde mbia mo mbui mose huñcuã si, eresiquisã quisã ño nguiã eso eã sacuaã tata cuásuu ūquĩ. Dios ra eicuã mbutiã esi cote.

1 PEDRO

Pedro ucheẽ mbesa mondo Jesús quiato ishonda jaaja je

1 Pedro chõ se re. Jesucristo chĩmbaaquiatu chõ se re. Aico ã mbesa jẽje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jẽ ja je aico ã mbesa a. ² Dios que jẽirabo umbaerã nyii jeã mose ra. Espiritu Turã ngue jemii icúe Dios mbaerã cote ra. Jẽ echeẽ mumbayã sacua. Jesucristo ruqui jembitirõ sacua abe jẽicuã si no. Sã Dios riqui turã i i tuchi jendese. Sã eriqui jembia i i tuchi no.

Dios ra mbae turã mee ja nande je

³ Nandechẽ turã mbei quia Dios rĩĩ. Jesu cristo rute quia ae re. Ae que eya eãte riqui nanderese ra. Nyebe nandesi nguiã mbiasu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirĩte quia nande re. Nyebe ra mbae mee ja nande je nandeico mose ibate. Mbae icua ndese ra nandemae eã tuchi aque mose cote. ⁵ Jẽingo Dios icuate ũquĩ. Nyebe ae riqui nguiã jendeaquiato tuchi uquirãcuã je co. Dios que mbae mbuquiche ja nande je ra. Nandererao sacua ibate. Mbae ua ja mose ra nandererao ja ibate cote. Co eriqui raã nguiã nandereaquiato co. ⁶ Nyebe jẽyate riqui nguiã ũquĩ. Mbae rasi tu mbirĩ arõte raque jẽje. ⁷ Sã mbia riqui oro mbuchi no. Equia rirõ sacua esi. Eĩ ño Dios nguiã jẽje co no. Jẽ Dios icua tuchi sacua ño mbae rasi riqui re. Nyebe Dios jẽicua. Mbae rasi raã naa ndaque. Etura tuchi chõ ũquĩ oro si re. Oro quia ra ua emo mose. Jẽ nguia ra jẽhua eã mbei Dios icua mose. Jesucristo tu mose nda Dios ñee turã tuchi jenii ña. ⁸ Jẽingo nyese-cuate Jesucristo rese ũquĩ. Jemae eãte raque quia erese ũquĩ. Jẽingo eicuate jeñiangui re ũquĩ. Jẽya tuchite riqui erese ũquĩ. ⁹ Jẽingo Jesucristo icuate ũquĩ. Nyebe ra Dios jẽaĩ mingo turã mbei cote.

¹⁰ Sã Dios cheẽ mbuchecua ñee cose no. —Mbia ra mae jee Dios turã ndese, i que ñee nda. Nanderĩĩ ño ngue eriqui nguiã ñee. —Mañi nda Dios quia reae. Uturã je ra mbia mingo bei reae, i que Dios cheẽ mbuchecua ndua ndua cose ra. ¹¹ Espiritu Turã ngue siqui quia Dios cheẽ mbuchecua chiangu re ra. Mbi-

irandu randu que equia Cristo rĩĩ nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espiritu Turã Dios cheẽ mbuchecua mbiirandu nyii ra. —Manosete ra ũquĩ ndeae. Aba rĩĩ eriqui “Cristo” i remi, i tuchi que Dios cheẽ mbuchecua quia ndua ndua ra.

Dios que jemii icúe umbaerã nda

¹² Dios que embiirandu ra. —Jẽ jẽtiamba quiato ra Cristo mbae rasi saã mbia mingo bei sacua. Jẽtiamba quiato ra Cristo mbae rasi saã mbia namonda je. Mbia emo mosenda je, i que Dios ra. Nanderĩĩ ño ngue eriqui nguiã “namonda” i. Nyebe mbia riqui nguiã ũquĩ ja renei nenei jẽje Cristo rĩĩ cote. Espiritu Turã abe riqui erenei nenei jẽje co cote. Angeles abe ũquĩ icua sete raque quia Cristo rĩĩ ũquĩ. ¹³ Jendua tuchi rã nguia mbae raã nonde. Jẽtesa bei quiato quia. Jesucristo tu mose, eturã tuchi ra ae jẽje aque mose. ũquĩ ndese quia jẽingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ũquĩ ndese jẽingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icúe umbaerã tuchi. Nyebe jẽingo turã tuchi ae rã si. ¹⁶ Sã Dios cheẽ mbesa ji riqui no: —Jẽturã ño jẽingo se rã si, i ñi embesa ji re. ¹⁷ ũquĩ jẽingo “Paba” i Dios je ũquĩ. Nyebe jẽingo ireĩ ireĩ jiri esi jẽingo mose íbii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ũquĩ si cote ra. Dios que mbae isiquia mondo eã nanderirõ sacua nandeicuã si ra. Oro que emondo eã no nda. Plata abe no. ¹⁹ Cristo ruqui quiato ngue nanderirõ nguiã nandeicuã si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño iquia no. ²⁰ —Cristo ra mano mbia icua ndiquicharõ, i que Dios nyii mbae ao nonde ra. Namo ño ũquĩ io nguiã jẽje cote. Namo ño Cristo mano nguiã jẽje cote. ²¹ Cristo chõ Dios icua uquia nguiã jẽje ũquĩ. Dios chõ ngue Cristo raaque mbuquera nguiã. Dios chõ uquirãcuã mee nguiã Cristo je. Nyebe jẽingo nguiã Dios icua ũquĩ cote. Nyebe jẽingo nguiã ñee. “Dios ra nandemingo bei ibate” i ũquĩ.

²² Dios cheẽ jẽisi turã mingo ũquĩ cote. Nyebe jeñia mbitirõ nguiã mbushĩ cote. Nyebe jẽingo nguiã nyese-

cua arôte mbia rese cote. Jenyesequa tuchi quiatu quia jenyiese jě. Nandechiangui re chõ nandeico nyesequa tuchi mbia rese jě. ²³ Nyaacuquia si je raanguia chõ jě cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguiã. Echeẽ nda ua eã bei. Siqui bei rae. ²⁴ Sã embesa ji riqui ñee no:

Quiata rã tuchi chõ mbia ja riqui nguiã ã.

Sã quiata riqui mano jeite no.

Quiata uti rã ño mbia riqui nguiã ã no.

Eturã mbirĩ ño chĩ ndaque nyii.

Aquere chõ ñimama cote. Mano cote.

²⁵ Dios cheẽ nguia ra ua eã mbei,

ĩ que embesa ji ra. Dios cheẽ sí chõ ngue jeñandu nguiã Jesucristo rĩ. Jemingo bei sacua.

Jěo tuchi chõ nguia Dios cheẽ ndese

2 Nyebe jěhui mbae icuã ja si. Jě nda mbia jembirĩ irĩchĩ nguia jě. Jenguasu ra jěsaã saãchĩ. Emo mbae ra jenyosei choseichĩ nguia jě. Jeñee icuã icuãchĩ nda equia emo nii jě. ² Sã ãquẽ itãqueĩ ndiqui uchiu achã asite no. Eĩ jenye bei chõ nguia oo Dios cheẽ ndese. Eĩ nda jěquirãcuã tuchi riqui Dios rese. Sã ãquẽ quirãcuã ndiqui quiambure no. ³ Dios turã ngue jěsaã ndei resẽ.

Sita turã na ño Cristo re

⁴ Jesucristo ra riqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguiã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jěsiichã i i tuchi quiatu quia jě. ⁵ Sita turã na ño jěingo nguiã jě abe ũquĩ. Sã Dios chuchua ao ji sita turã je no. Dios chuchua ao ji rã ño jě no nde. Jeñee turã mbei quiatu quia Dios je. Jě sí chõ jendete jemondo quia ee. Jěingo bei quiatu quia icúe embaerã. Ũquĩ mose ra Dios jěisi turã mbei Jesucristo rĩ cote. ⁶ Nyebe Dios cheẽ mbesa ji riqui nguiã ñee:

Jesucristo ra amĩ Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ũquĩ mo nda ñee eã.

“Jesucristo rui aico jirichĩ co”, iã nda emo,

ĩ que embesa ji ra. ⁷ Sã mbia mo tuchua ao sita turã je no. Ũquĩ sita turã na ño Jesucristo riqui nguiã co. Ũquĩ jěingo Jesucristo icuate ũquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ũquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote,

ĩ que embesa ji ra. ⁸ Sã embesa ji riqui ñee no:

Sã sita riqui pãtã i emo cúi je no jě.

Embucoi no jě,

ĩ que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jě nde

⁹ Dios que jěirabo umbaerã tuchi ra. Sacerdotes rã ño jěingo nguiã Dios je ũquĩ. Dios que jemingo icúe umbaerã nda. Jě mbia mbiirandu randu bei sacua Dios chiao turã ñi. Ae quiatu que jendirõ itondaru si ra. Jěingo sacua nyaashĩ Dios rese cote. ¹⁰ Mbia chimbutereãte que jě nyii ra. Dios quiatu tuchi chõ namo jě cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jě nde; nyebe jěingo turã

¹¹ Achesecua tuchite quia jendese co. Isho ishote jěingo jendecua si ũquĩ. Ae mbia chosei chosei quia mbae icuã nae, ũquĩ ndese ra jemaie maechĩ. Eicuãte riqui nandeaĩ je ũquĩ. ¹² Ae Dios icua eãte quia nae, ũquĩ ndesaa jěingo turã ño nguia. Ũquĩ ndiqui ñee icuã icuãte raque jenĩ ũquĩ. Jěicuã mose rocoĩ. Ũquĩ nda mae jee jeturã ndese. Ñee turã jee ra Dios rĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no. ¹⁴ Sã ererecua tuchi riqui mbia rerecuarã mĩ jaaja no. Mbia icuã mbasi mbasi sacua. Mbia turã ndeaquiato sacua abe no. Ũquĩ ñee abe jemumbayã ño nguia no. ¹⁵ Jěingo turã ño nguia jě. Jěingo turã mose ra mbia aquiatuã ñee icuã aroneate jěje. Dios bite ũquĩ. ¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icuã tasaã. Sererecua eãte rei ñene, jenyechĩ ndae. Dios rimba chõ jěingo. ¹⁷ Jěingo turã ño nguia mbia ja je. Jenyesequa chõ nguia jendesenda Jesús quiato rese. Jěireĩ ireĩ jiri Dios si. Mbia rerecua cheẽ nda jemumba mumbachĩ jě.

Cristo rã si chõ jěingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jě. Jěireĩ ireĩ jiri quia esi jě. Jenderecua icuã mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguiã jěje co. ¹⁹ Mbia icuã icuã ñooño mose nande je, nanderoseĩ nguiátu chõ nandeico. Dios bite ũquĩ. Dios rĩ nanderoseĩ nguiátu mose, ebite ũquĩ. ²⁰ Mbae turã jěsaã saã mbei chõ nguia. Mbia jěiruã nua mose jeturã ñi, jendeseĩ nguiátu chõ jěingo. Ũquĩ mose ra Dios ia tuchi jendese. Mbae icuã mo nda jěsaãchĩ. Jě

mbae icuã naa mose, Dios biãte ũquĩ. Mbia jẽirua nua mose jẽicuã nĩ, jendoseĩ nguiátu raque rae, Dios biãte ũquĩ. Jẽicuã nĩ ño ñene. ²¹ Nyebe Dios “jẽingo serui”, i nguiã nande je. Sã Cristo roseĩ nguiátu tuchi mbae rasi raã mose nande je no. Nande abe nanderoseĩ nguiátu sacuã eraã si. ²² Cristo que mbae icuã mo saã eã tuchi ra. Mbia mo ngue embĩrĩ iriã tuchi quia ra. ²³ Mbia ñee icuã mose Cristo je, ae que ñee icuã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴ Jesús mano mose ira mbuchicuan-dasa ji rese, nandeicuã ndiquicharõ ño ngue mano nguiã. Eraaque rã nandeico sacuã mbae icuã je chõ ngue re. Nandeico sacuã mbae turã ndese chõ ngue re. Cristo mbae rasi raã mose, jembitorõ sacuã ño ũquĩ nde. ²⁵ Ovejas quiachã je rã ño ngue jẽingo nguiã nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguiã jẽje co cote. Ae chõ jendeaquiatu nguiã co.

Jendu cheẽ jemumbayã ño nguia, i cuña je

3 Mbia ninisi je tacheẽ cote. Jendu cheẽ nda jemumbachĩ jẽ. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee. Jẽ Jesús cheẽ nenei neneinde rocoĩ ee. Jesús nda eicua cote chã. ² Jẽingo turã ndese ra jendu mae nyee. Echeẽ jemumbayã mose. ³ —Mbae je nda serete ambarõ na ña, jenyechĩ nda ndua ndua jẽ. Jẽo resenda rese. Jẽhui rese abe no. Tiru turã ndese abe no. Jẽa uma ji turã ndese abe no. ũquĩ mi ndese chõ nda jẽingochĩ ndua beite jẽ. ⁴ Jeñiangui re quiatu jẽingo turã. Jẽingo tochi chõ nguia. Ĩ nda jẽturã ua eã mbei jẽsi. ũquĩ nguiatu Dios bite re. ⁵ Sã cuña mo no. Dios quiato cose no. ũquĩ nguiatu que eturãte riqui uchiangui re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶ Sã Sara Abraham ñee mumbayã no. Sererecua i ee. Jẽingo turã mose, Sara rã nda jẽ cote. Mbae mo si ra jẽsiquichechĩ cote jẽ.

Jẽingo turã ño nguia jeninisi je

⁷ Tacheẽ eninisi rerecua je cote. Jẽaquiatu chõ jẽingo turã jeninisi je. Jeninisi jemingo turã. Jẽingo tochi chõ nguia ee. Jẽ nguia jeãtã jiri esi re. Dios quia eturãte jẽ ja je re. Jeninisi rese. Dios que jendeco mingo nyiese ra. Jeninisi rese. Nyebe jẽingo nguiã siqui turã jeninisi je. ũquĩ mose ra Dios jeñee andu bei, jeñee mose ee.

Mbia icuã icuã mose jẽje jẽturã mose, jẽya chõ jẽingo

⁸ Jẽingo turã ja chõ nguia jenyue no. Jẽya eã jiri jẽingo jenyiese no. Hue rĩ ja chõ jẽingo ndua ja. Jenyese-cua ja chõ nguia nyiese. Jẽseteã ño jẽingo nyue. ⁹ Mbia icuã mose jẽje, jẽicuãchĩ nda jẽ abe ee. Mbia ñee icuã

mose jẽje, jeñee icuãchĩ nda jẽ abe ee. Jeñee turã nguiatu quia ee jẽ. Jẽingo serui, i chõ ngue Dios jẽje re. Dios ñee turã mbei sacuã jeni ño ngue re. ¹⁰ Sã embesa ji riqui ñee no:

Jẽingo turãse mose, jeñee icuã eã emo nĩ.

Jẽingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si.

Mbae turã ño jẽsaã nguia.

Jẽturã ño nguia mbia ja je jẽ.

¹² Ae siqui turã nguia nae, ũquĩ Dios teaquiatu bei quia co.

ũquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ũquĩ nde, i que embesa ji ra.

¹³ Jẽingo turã mose ¿mañi nda emo mbae icuã naa jẽje re? ¹⁴ Mbia icuã icuã mose jẽje mbae turã naa mose, jẽya tuchi chõ ũquĩ mose re. —Mbae icuã nda asaã ndeje jẽ, i mose jẽje, jẽsiquicheã ño esi. ¹⁵ Jesucristo jemingo tuchi chõ nguia jeñiangui re jendecuarã. Emo ñee mose jẽje, jeñee aquiatu chõ ee.

—¿Mbaerã ereico Jesucristo rese re? i mose emo jẽje, jeñee aquiatu chõ ee. Jẽingo mingue chõ ee. ¹⁶ Jẽingo turã mbei. Diosbi rese jẽingo bei. Ĩ nda jẽya bei riqui. Ĩ nda “mbae turã asaã eã ñochĩ”, jenyee eã. Ae ñee icuã icuã nguia jeni nae, ũquĩ nda ireĩ ireĩte quia ucheẽ icuã si cote. Ireĩ ireĩ nda jẽingo turã mose Cristo rese.

¹⁷ Mbae rasi jẽsaã mose jẽturã nĩ, ũquĩ nguiarei Diosbi tuchi. Mbae rasi jẽsaã mose jẽicuã nĩ, ũquĩ nguiarei Dios biã tuchi. Mbae icuã nĩte quia ñene. ¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacuã Dios rese. Cristo rete que mano nda. Espiritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ ũquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aque-re que mbia miite ique arca ye ra. Ocho que mbia ra. Siqui bei sacuã ama ndicuasu mose. ²¹ Sã ama Noé mumbebi mingo no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ũquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecua tuchi chõ ae cote re. Angeles rerecua. Ibatenda rerecua ja.

Mbae jẽsaã turã ja

4 Sã Cristo mbae rasi saã tuchi siqui mose íbii no. Eĩ jenyee si chõ nguia ñimbirãcuã nguiátu mbae

rasi raã mose. Ae mbae rasi saã tuchi quia nae, ùquĩ nda mbae icuã saã eã mbei cote. ² Ae Dios bite nae, ùquĩ ndese ra eriqui bei cote. Ae echoseite quia nae, ùquĩ naa ndocoĩ. ³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandechosei quia nae, ùquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ùquĩ ja si cote ra. ⁴ —¿Mbaerã jëingo bei eã mbae icuã naa naa urerese re? i nandere-senda ñiinda quia nande je ã. Nyebe eriqui nguiã ñee icuã icuãte nande je ã. ⁵ —¿Mbaerã ùquĩ jësaã nde? i chee ra Dios ùquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ùquĩ je que Jesucristo Dios cheẽ nenei nenei nda. Eaĩ siqui turã sacua Dios rã si. Erete mano ndaque huĩcuã je.

⁷ Achite mbae ñi ua ja a cote. Nyebe jëingo mbae turã naa naa ja bei. Nyebe jëingo ñee ñee mbei Dios je. ⁸ Jenyesequa tuchi quiatu quia jenyiese. ùquĩ mose ra jëtesarei jenongue icuã si. ⁹ Jenongue jëisi turã ño nguia nyoĩ mose jenyuchua. Jëya chõ jëingo eisi mose. ¹⁰ Dios que nandechisaã saana mee nande ae ae je ra. ùquĩ jësaã turã turã ño nguia jëataque je. Dios uaquiato mee mose jëje mbae mo naa sacua, ùquĩ jësaã turã turã ño nguia jëataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quirãcuã ñi. Ae jësaã saã nguia mbae nae, Dios je chõ jësaã. Ì nda mbia ñee turã mbei Dios rĩ. Jesucristo rĩ abe no. Sã mbia ñee turã mbei Dios rĩ. Amén.

Mbae icuã tuutu mose jëje, jëya cho jëingo

¹² Mbae icuã tuutu mose jëje, “¿mbaerã eriqui seje re?” jenyechĩ nda nyuruirate, Seresenda. Eĩ mbei chõ mbae icuã nguiã tuutu Jesús quiato je. ¹³ Mbae icuã tuutu mose jëje, jëya chõ jëingo. “Cristo rã si chõ nandeico nguiã mbae rasi raã”, jenyechõ nguia ñimbia. Cristo nininya tu mose, aque mose abe nda jëya tuchi chã. ¹⁴ Mbia ñee icuã icuã mose jëje Cristo rĩ, coche ñene. Jëya chõ jëingo. Espiritu Turã ño jëichu ichu nguiã ùquĩ. ¹⁵ Mbia jembaasi asi chooño mose Cristo rĩ, jëya chõ jëingo. Jëicuã ñi mbia jembaasi asi mose, ùquĩ nguiatu aba ireĩte re. Jë mbia mo iquia mose. Jë mbae mo mbuquiachã mose. Jë mbia mo mbupaama i mose. Jë ùquĩ icuã mo naa mose, aba ireĩte ùquĩ. ¹⁶ Mbia jembaasi asi mose Cristo rĩ, jëireĩ ireĩchĩ nda ùquĩ mose. Cristo resendate quia jë nde. Nyebe jëya chõ jëingo. ¹⁷ Dios ra mae ja chee mbia chisaã ja rese. Achite Dios ñi mae quiato chisaã ndese a. Nan-

dechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. ùquĩ nguiatu ra embasi tuchi nandesĩ quiatu. Dios cheẽ turã nguiatu ngue eisiãchĩ nguiã. ¹⁸ Dios quiato riqui ñim-birãcuãyã arõ arõte mbae icuã tuutu bei mose ee ã. Dios quiatote raque. Dios quiatoã nguiatu ra ñim-birãcuãyã tuchi mbae icuã si. Dios ra emondo chee tata cuasu. ¹⁹ “Mbae rasi jësaã”, i mose Dios nande je, nandesaã turã ño nguia ee. Mbae turã nandesaã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

Jesús quiato jëteaquiatu turã ño nguia

5 Jëñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siqui quia jendese nae, ùquĩ jëteaquiatu turã nguia. Sã ovejas raarõsa riqui ovejas raarõ turã no. Eĩ jenyechõ nguia Jesús quiato raarõ. Jëteã teã eã ño nguia mbia mbaaquiato quiatu. Jendua ndua eã ño nguia mbae isiquia rese. ³ Jëingo tochi chõ nguia Jesús quiato chimunua nua je. Mbiacha ra jësaã saã techĩ ee jë. Jëingo turã ño nguia eresa rae. Ì nda jë na sí eriqui. ⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jëje premio. ùquĩ nda ua eã mbei. ⁵ Acuanĩndu je tacheẽ cote. Amei ñee jemumbayã ño nguia jë. Jë ja jëataque cheẽ jemumbayã ño nguia jë. Jëingo tochi ja chõ nguia jenyue jë. Sã embesa ji riqui ñee no:

Ae ucuasu saã saã nguia nae, Dios biã tuchi chõ ùquĩ nde.

Ae siqui tochi quia nae, ùquĩ je quiatu ra Dios turã mbei riqui, i que embesa ji ra.

⁶ Jëingo tochi chõ nguia Dios je jë. Equirãcuã tuchi chõ ae re. Ae ra mbia mumae turã nyee jendese emo mose cote. ⁷ Jendua ndua ia eã si jëhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸ Jëñimbaaracua chõ nguia jë. Jëtesa bei chõ nguia jë. Aba checuayã nderecua riqui ngata beite co jë. “Mbia tambĩcuã icuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no. ⁹ Aba checuayã nderecua jësiquisã ño nguia jenyese. Dios jëicua tuchi chõ nguia jëñiangui re. Sã jendesenda ishonda ja riqui mbae rasi raã tuchi no. Jë na si no. ¹⁰ Sã Dios turãte riqui nande je no. Mbae rasi ra jësaã ndaque nyii. Aquere ra Dios jembitorõ cote. Jembirãcuã tuchi cote. Dios sí chõ ngue ñee nguiã nande je. “Taemingo bei serese ibate Jesucristo rĩ”, i nguiã nande je. ¹¹ Dios quiarei equirãcuã mbei. Eeturã mbei. Amén.

Pedro ñee hui bei sacua cote

¹² Co ambesa quia jėje co. Jemingo i i sacua Dios rese. Jembaaquiatu sacua Dios turã nii. Jëingo bei chõ nguia erese. Co ambesa mondo quia jėje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³ Jesús quiato Babilonia jenda salu-

dos mondo quia jėje aque. Dios chiirabo chõ ã nde. Jë na si. Marcos abe saludos mondo quia jėje aque no. Seriiĩ na ño aico nguia ee co. ¹⁴ Saludar jenye turã turã ño jenyue mambi. Jenongue ritii abe jësiite ite chõ nguia mambi. Jesucristo quiato jate quia jë nde. Sã jëya beite riqui. Amén.

2 PEDRO

Pedro ucheë mbesa mondo Jesús quiato je

1 Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jêje co. Ure rã si chõ jêingo nguiã Jesucristo icua ùquĩ. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jembia tuchi mingo. Jesucristo jêicua i i tuchi bei oso quia.

Jeñimbaaquiatu i i tuchi Dios rĩĩ

³ Jesucristo nandeicuate quia ã. Nyebe Dios riqui nguiã mbae raã ja tuchi nande je co. Nandemingo bei sacuaã. Nandeico sacuaã erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheë turã mee nande je ra: —Co tasaã jêje. ã tasaã jêje. Co abe, i tuchi que equia nande je ra. Ûquĩ ngue esaã ja nande je cote ra. Jesucristo rã si que nanderaã nda. Ae mbae icuaã mbia chosei chosei quia nae, ùquĩ si eriqui nanderiquisã quisã co. ⁵ Jêingo Dios icuate ùquĩ. Jêingo turã ño nguia jê. Jeñimbaaquiatu i i tuchi quiatu quia Dios rĩĩ jê. ⁶ Jendeco jêingo turã ño nguia i co jê. Jêingo mingue chõ nguia jê. Dios rã si chõ jêingo jê. ⁷ Jêingo turã ño nguia jenyue. Jenyesequa chõ nguia jenyese no. ⁸ Eĩ jenyese mose, eturãte ùquĩ. Eĩ jenyese i i tuchi chõ nguia jê. Ûquĩ mose ra Jesucristo jêicua chooño eã. Mbae ra jesaã saã tuchi quia ee. ⁹ Eĩ jenyese eã mose, mbia resayã na ño jêingo nguiã ùquĩ. Eĩ jenyese eã mose, jêtesarei chõ ndei equia jeñia irei ji si ùquĩ. Jesús jêicuaã cose ndare mbutiã mose. ¹⁰ Ûquĩ jesaã saã tuchi chõ nguia jê. Jê ùquĩ naa mose, jê sí chõ nda jenyicua quia. “Dios chiirabo chõ nande re”, jenyese tuchi ra equia. Jêhui eã mbei ra equia Dios si cote. ¹¹ Dios ra jêisi tuchi mingo Jesús récuua cote. Huee ra jêingo bei erese.

¹² Nyebe ra aico bei jemundua ndua ùquĩ ndese.

Jêicuate raque. Jêingo turãte raque Dios cheë ndese.

¹³ Coche aico rei jemundua ndua ùquĩ ndese a. Sereco siqui mose a ra aico jemundua ndua bei ùquĩ ndese.

¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. Ì nda jêtesareiaã mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue uresenei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùquĩ nde. Mbia ñee ñooño je eã tuchi chõ ùquĩ nde. Se sí chõ ngue amae Jesucristo nininya rese ra. ¹⁷ Dios que unininya mee ee síta ibátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriiĩ ño co re. Sechesequa chõ co re. Seyate erese, i que Ibatenda ñee aque mose ra. Echeë ngue achandu se abe ra. ¹⁹ Eĩ sí tuchi que Dios cheë mbuchecuaa chimbesa nyii ra. Echeë mbesa ji chooño eã ño ùquĩ nde. Jêingo tuchi quia echeë mbesa ji rese. Mbae resaesã tuchi chõ echeë mbesa ji re. Sã tata rendi riqui itondaru resaeete nyaashĩ nyee no. Jêingo tuchi mose echeë mbesa ji rese, Cristo ra jendique tesae tuchi quia jêje. Sã nyasitata riqui nanderesae no. ²⁰ Dios cheë mbuchecuaa mo ngue ñee ñooño eãte quia emo mose ra. Ucheë ae que embesa mbesa eãte quia ra. Espíritu Turã ño ngue embucheë nguia ra. Espíritu Turã ño ngue Dios cheë mbesa mbesa uquia quia ee ra.

Ae mbia mbĩĩĩ irĩĩ nguia embaaquiatu quiatu mose

2 Mbia mo ngue Dios cheë mbuchecuaa saã ñooñote quia cose ra. Espíritu Turã ae que embucheë eã nda. Eĩ sí ra emo jembĩĩĩ irĩĩ ñooño name. Ñee ñooño nda equia Dios rĩĩ jêje. Hui huite chõ nda equia Jesucristo sí. Ae mano nguia erĩĩ. Nyebe ra Dios ùquĩ mbutiã asi. ² Mbia ra siqui tuchi mbae icuaã ndese ùquĩ ñee nguire. Mbia ra siqui chooño ño cuña mo ndese ùquĩ ñee nguire. Nyebe ra mbia ñee icuaã icuaã Jesús cheë turã ñĩ. ³ Ûquĩ nda mbae isiquia choosei osei tuchi chõ nguia jembae. Nyebe ra jembaaquiatu icuaã icuaã. Dios que ñee ùquĩ ñĩ coose ra. —Ûquĩ nda ambasi tuchi je, i que ra. Achite ùquĩ ñĩ a cote.

⁴ Angeles mbae icuaã naa mose, ùquĩ nyee que Dios tiisu isu ãte quia ra. Ecuã ji que emombo tata cuásuu ra. Itondáruu que emombo ra. Siqui bei sacuaã huee, Jesús tu chee mae eicuã ndese. ⁵ Mbia cose ndare abe que Dios tiisu isu ãte quia ra. Noé mosenda. Ûquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasuu mbia iquia ja sacuaã. Noé mĩĩ ngue Dios iquia eã nda. Mbia siete

rese. Dios cheẽ nenei neneisate quiatu ngue Noé nde. ⁶ Sodoma jenda abe que Dios tiisu isu áte quia ra. Gomorra jenda abe no. Mbia icuã tuchite quiatu ngue re. Nyebe Dios ùquĩ ndei ja nguiã tata je. Echuchua ja resebe. —Eĩchĩ nda nande abe je re, nandeico eã mose erese, i sacuã mbia icuã. ⁷ Lot miĩ ngue Dios iquia eã nda. Eaturãte quiatu ngue eriqui nguiã Dios je. Eya eãte que eriqui mbia hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeite riqui ra. Ae miĩ ño ngue echiã turã Dios je ra. Nyebe Dios ae miĩ iquia eã nguiã. ⁹ Ae siqui beite quia Dios rese nae, Dios riqui ùquĩ ndeaquiato beite co. Mbae icuã jea je esi tã i mose ee. Ae mbae icuã saã nguia nae, ùquĩ nda Dios mbasi tuchi. Jesucristo ra tu chee mae eicuã ndese. ¹⁰ Ae siqui quia mbae icuã ndese ubi nae, ùquĩ nda Dios mbasi tuchi. Ae aba cheẽ mumba quia, ùquĩ abe ra Dios mbasi no. Ae eĩ ñooñote quia mbia je nae, ùquĩ. Ae ñee ñooñote quia mbae ibatenda je nae, ùquĩ abe no. ¹¹ Mbae ibatenda rĩ ngue ángeles ñee icuã eãte quia Dios je ra. Angeles quirãcuãte raque mbia si. ¹² ã mbia quiarei mbae quiaa rĩnda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa rĩnda rã ño nda ã mano cote. Dios ra eiquia tuchi. ¹³ ã nda mbae rasi saã tuchi quia cote. Ubi icuã miĩ ndese chõ eriqui nguiã ndua ã. Jembiĩrĩ irĩ ño nguiã ã. Quiaru chooño ño nguiã jendese ã. Jesús quiato raã ñooño jẽje. Aba ireingua tuchi chõ ùquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae oseĩ oseĩ jate equia ã. Dios ra embasi tuchi cote. ¹⁵ Ishote eriqui Dios si ã. Nyĩcuasẽ equia Dios si ã. Sã Balaam ndiqui nyĩcuasẽte esi no. Beor riiĩ. Sã mbae icuã naa mbae isiquia isi nonde no jẽ. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuã iru rã ño ã mbia re. Sã quirĩriã ndiqui ibeishĩ mbucuatate no. Eĩ si chõ ã mbia re. Hue bei eã chĩ. Nyebe ra Dios emombo bei itondáruu. ¹⁸ Uchisaã mbae icuã niĩ ñee ñee ja mbia je. Ucuasu raã naate equia ã. Mbia mbĩrĩ irĩ mbeite equia mbae icuã je ã. Ae hui ramo ndei mbae icuã si nae, ùquĩ abe mbĩrĩ irĩte equia mbae icuã je ã. ¹⁹ —Jẽingo mose urerese, jẽingo turã ndae, i bei rei equia mbia je ã. Mbae icuã nimba sí chõ ñee ñee nguiã ee ùquĩ. Ae rui nandeico quia nae, ùquĩ nimba quiatu nande re. ²⁰ Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embĩrĩ irĩ mose ùquĩnde, eicuã tuchi ra cote. Mbae icuã nimba tuchi ra ae cote. Ñiinda si. ²¹ Dios quia nda ùquĩ icuayã mbei nyii re chã. Dios icuare quiatu ngue hui nguiã echeẽ si. ²² Siqui mbĩrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu soci

mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

Jesucristo ra tube

3 A aico segunda carta mbesa jẽje a. Jemundua turã sacuã ño ùquĩ nde. Ae acheẽ jẽje nyii nae, ùquĩ ndese jemundua sacuã ño aico nguiã ã mbesa jẽje a. ² Ae Dios quiato senei senei mbia je nyii nae, ùquĩ ndese jendua. Ae Jesús chĩmbaaquiato ñee mbia je nae, ùquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ùquĩ achõ ndese chõ nda eriqui. ⁴ ùquĩ nda ñee jẽje: —Sã Jesús tu áte no jẽ. Sã ucheẽ mbuchebe chõ jẽ. Sã eĩ mbei chõ Dios chisaã ima jẽ, i ra ùquĩ ñee icuã icuã jẽje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuasú ra. Mbae iquia ja nonde cote. ⁷ Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aque mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ miĩ na ño mil años Dios je re. Mil años na ño nyaashĩ miĩ Dios je no nde. ⁹ —Jesús ra tu áte rei no. Ucheẽ embuchebe rei quia mambi, i raque emo emo nguia Jesús rĩ ã. Ico minguete equia mbia je pe. —Emo nda quiachãyã Dios si chã. Siqui ja nda erese chã, i equia eriisu isu pe no. Nyebe eriqui nguiã tu jei eãte. ¹⁰ Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. ùquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquieĩ tuchi. Mbae ja ra oquieĩ ibi jenda.

¹¹ Nyebe Dios nandesichã tuchi quiatu quia. Dios rã si quiatu nandeico mbae turã ndese. ¹² Jesucristo ru jenyosei quiatu quia. Ae Dios bite nae, ùquĩ ndese quiatu jẽingo. ã nda Jesucristo ru jei. ùquĩ mose ra ibei oquieĩ ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. ùquĩ ño nandesaarõ arõ nguiã ã. ùquĩ mose ra mbae turã achõ cote.

¹⁴ Nyebe jẽingo turã ño Dios rese. Mbae icuã je ra jeñimbĩcuãchĩ jẽ. Jeñimbĩcuã eã mose ra Dios iate jendese eru mose chã. ¹⁵ Dios siqui minguete quia mbia je co. Mbia rirõ sacuã eicuã si chõ ùquĩ nde. Eĩ si chõ ngue Pablo abe embesa nguiã jẽje no. Ae Dios ñee Pablo je nae, ùquĩ sí que Pablo mbesa jẽje ra. Nanderesenda tuchi chõ Pablo re. Nandechesecua chõ nguiã erese ã. ¹⁶ Pablo carta mbesa mbesa bei mose, mbia mundua ndua sacuã ã ndese chõ ñene. Aba chĩcuayãte raque Pablo chĩmbesa emo emo. Ae eaquiatoãte Dios rese nae, ùquĩ Pablo cheẽ nyabi chabi chõ nguiã. Sã embesa ji ataque abi abi no.

Nyebe ũquĩ sí chõ ñĩmbĩicuã icuã nguiã ũquĩ. ¹⁷ Sehesecua, a aĩco jembiirandu jei a. Mbia icuã jembui eã sacuã Dios si. Mbia icuã nda jembiĩrĩ irĩchĩ jẽ. Jẽĩngociatu tuchi quiatu jẽ. Huee jẽĩngo turãte Dios rese

namo hue. ¹⁸ Jesucristo rei nandererecua tuchi. Jẽicua i i tuchi quiatu jẽ. Jenyesecua i i tuchi quiatu erese jẽ. Ae que nanderirõ mbae icuã si ra. Eturã mbeite que eriqui nande je ra. Sã mbia ñee turã mbei quia erĩ. Amén.

1 JUAN

Mbia mingosa

1 Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheë ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheë, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je ibii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, ùquĩ abe uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese. ⁴ Jêya tuchi sacua ño ureico nguia ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Ûquĩ si chõ uresaã saã nguia jemiirandu sacua ã: Dios rei nyaashĩ na. Itondaru rã jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechëë ñooño ño nguia ùquĩ. Nande i mose, mbia mbiĩrĩ irĩsa chõ nande re. ⁷ Dios rã nandeico mose nyaashĩ, nandeico turã ño nguia nandechiese ùquĩ. Dios rã nandeico mose nyaashĩ, Jesús ruqui nandeicua mbutiã ja quia nandesĩ ã no. ⁸ “Mbae icua asaã eãte rese” nande i mose, nandechimbiĩrĩ irĩ ño nguia ùquĩ. Nande i mose, ñee ñooñosa tuchi chõ nande re. ⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesĩ ucheë nguire. ¹⁰ “Mbae icua asaã eãte resẽ” nande i mose, “Dios ñee ñooñosa” nandesã ño nguia ee. Nande i mose, Dios cheë iqueã ño nguia nandechiangui re ùquĩ.

Jesús ñee turã Dios je nanderĩ

2 Mbae icua jesaã eã sacua ño aico nguia co mbesa jêje co, seriiĩ. Jemo mbae icua naa mose, Jesucristo ra ñee turã Dios je aque rĩĩ. Eicua mbutiã sacua esi. Jesucristo quia rei eturã mbei. ² Jesucristo rĩĩ ño Dios nandeicua mbutiã nguia nandesĩ. Ae rei nandeicua ndibishoronda. Nande miĩ icua ndibishoronda eã ño ñene. Mbia ja icua ndibishoronda chõ ñene. ³ Nande Dios cheë mumba eã mose, “Dios aicuate quia

co” nande ra nandechiangui re cote. ⁴ “Dios aicuate quia co” i mose emo, Dios cheë mumba mose, ñee ñooño je chõ ùquĩ nde. ⁵ Ae Dios cheë mumba eãte nae, ùquĩ nguiatu nyesequate nguia Dios rese ùquĩ. ⁶ Ae “aico tuchi Dios rese co” i quia nae, sã ùquĩ siqui tuchi quiatu quia Jesús rã.

Dios cheë yasu

⁷ Dios cheë yasu eã ño ambesa nguia jêje co, Sechesequa. Dios cheë ñiinda sí chõ ambesa mbesa nguia jêje a. Jê echeë mumbayã sacua. Ae jeñandu nyii nae, ùquĩ. ⁸ Jêingo Jesucristo icuate ã cote. Nyebe eyasu raãte eriqui nguia jêje. Jesucristo que nyesequa mbia rese ra. Jê abe jêingo nyesequa jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico co, i mose emo, nguesenda ucuãyã cuãyã mose, itondaru bei chõ siqui nguia ùquĩ je aque. ¹⁰ Ae nyesequate quia nguesenda rese nae, ùquĩ ndiqui nyaashĩ mbei ùquĩ. Ûquĩ nda siqui icua eã. ¹¹ Ae nguesenda ucuãyãte quia nae, ùquĩ ndiqui itondaru bei ùquĩ. Itondaru eresa chati chõ nguia ùquĩ. Nyebe eriqui nguia ngueco icuayãte ùquĩ.

¹² Jesucristo rĩĩ ngue Dios jêicua mbutiã jêsi ra, Seriiĩ. Nyebe aico nguia co mbesa mbesa jêje a. ¹³ Ae siqui beite quia nyii nae, aque jêicuate quia ùquĩ, Mbiaru. Nyebe aico nguia co mbesa jêje a. Jêingo mbia mbiĩrĩ irĩsa riqisã quisã ùquĩ, Acuanindu. Nyebe aico nguia co mbesa jêje a. Nanderu jêicuate quia ùquĩ, Echo. Nyebe aico nguia co mbesa jêje a. ¹⁴ Ae siqui beite quia nyii nae, aque jêicuate quia ùquĩ, Mbiaru. Nyebe aico nguia co mbesa jêje a. Jêirãtãte jêingo jeñiangui re ùquĩ, Acuanindu. Dios cheë ngue jêisi turãte jeñiangui re ra. Jêingo mbia mbiĩrĩ irĩsa riqisã quisãte ùquĩ. Nyebe aico nguia co mbesa jêje a.

¹⁵ Jenyesequate chĩ nda mbae ibi jenda ja rese jê. Mbae ibi jenda ja rese jenyesequa mose, jenyesequa eãte ra Dios rese. ¹⁶ Ibi jenda icua ja chõ ñene. Nanderesa mbae icua oseĩ oseĩ mose, eicuãte ùquĩ. Nanderete abe mbae icua oseĩ oseĩ mose, eicuãte ùquĩ no. Nandecuasu abe nandesã saã mose, eicuãte ùquĩ no. Ibi jendachõ ño ùquĩ nde. ¹⁷ Mbae icua nda ua ja ibi jenda. Ae mbia choseĩ choseĩ quia ibi jenda nae, ùquĩ abe ra ua no. Ae Dios cheë mumba eãte quia nae, ùquĩ nguia ra siqui bei.

Cristo ucuãyãsa

¹⁸ Achite mbae ñi ua ja a, Seriiĩ. Cristo ucuãyãsa ra tu mbia mbiiĩĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i.

¹⁹ Cristo ucuãyãsa tubiriãte riqui ã. Nanderesenda rei que nyii ra. Nanderesenda chooño ño ngue ra. Nanderesenda tuchi mose, eĩ nda hui ãte rei nandesĩ. Hui chõ ngue echoi uresi ra. “Eresenda eã ño eriqui re” i sacua mbia. ²⁰ Jẽje quiatu que Cristo Espĩritu Turã mondo nguiã. Nyebe jẽingo nguiã mbae icua jate ũquĩ. ²¹ Ae bei, jenyẽ eã ño nguiã ichõĩñosa je ũquĩ. Dios quia ichõĩñosa reã tuchi re. Dios cheẽ jẽicuate quia ũquĩ. Nyebe aico nguiã ã mbesa mbesa jãaquiatu je a. Eaquiatuã je eã aico nguiã ã mbesa mbesa a.

²² ¿Aba chõ ichõĩñosa chã? “Dios chimondo eã ndei Jesús” ae i quia nae, ũquĩ ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chõ ũquĩ nde. ²³ Ae siqui sereãte quia Dios riiĩ ndui nae, Dios abe rui eriqui ãte ũquĩ. Ae Jesús isi turã nguia nae, eru abe eisi turã ño nguiã no. ²⁴ Ae rese jẽingo jirandu beite nyii nae, ũquĩ ndese jẽingo bei. ũquĩ ique tuchi mose jeñiangui re, jẽingo bei ra Dios riiĩ ndese. Eru rese abe no. ²⁵ Taemingõ bei, i que nande je ra.

²⁶ Ae jembiiĩĩ irĩ serĩte quia nae, ũquĩ ñi ño aico nguiã ã mbesa mbesa jẽje. Jembiiirandu sacua. ²⁷ “¿Aba quiatu ra nandembaaquiatu quiatu re?” jenyẽ aroneate quia ũquĩ. Espĩritu Turã ndiqui tuchi jeñiangui re jembaaquiatu quiatu ũquĩ. Jesucristo que emondo jẽje ra. Ae chõ jembaaquiatu quiatu nguiã mbae ja rĩĩ ũquĩ. Ñee ñooñoa tuchi chõ ñene. Cristo rese jẽingo bei, Espĩritu Turã ñee nguire.

²⁸ Seriiĩ, jẽingo bei equia erese jẽ. Nandesiquicheã nda esi eru mose chã. Nandeireĩ ngũĩã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eriiĩ ño ũquĩ nde.

Seriiĩ, i Dios nande je

3 Dios que nyesecua tuchite nanderese ra. Seriiĩ i tuchi que nande je ra. Nyebe mbia Dios quiatoã ndiqui nandeicua eãte ã. Dios abe icua eãte equia ã.

² Dios riiĩ ndei nande, Sechesequa. Dios ra nandembu-turã tuchi core. ũquĩ nandeicua eãte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumbasa. Eicuãte Dios cheẽ mumba. ⁵ Jesucristo que tu mano nandeicua mbutiã nandesĩ ra. Mbae icuã ngue esaã jiri jiriã tuchi quia ra. ũquĩ jẽicuate quia ã. ⁶ Ae siqui quia

Jesucristo rese nae, ũquĩ nda mbae icuã mo saã eã. Ae siqui quia mbae icuã ndese, ũquĩ nguia eicua eãte nguiã. ⁷ Seriiĩ, emo nda jembiiĩĩ irĩchĩ ñee ñooño jẽje jẽ. Ae mbae turã saã saã nguia, eturã ño ũquĩ nde. Jesucristo rã sí chõ ũquĩ nde. ⁸ Ae mbae icuã saã saã nguia, diablo rimba chõ ũquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacua ño ngue Dios riiĩ ndu ra. ⁹ Nande Dios riiĩ mose, mbae icuã nandesã aroneate. Dios quiatu ngue ngueco mee nguiã nande je. Nyebe nandeico nguiã mbae icuã naa aroneate ã. Eriiĩte quia nande re. ¹⁰ Ae Dios riiĩ nae, ae Dios riiĩã no nae, ũquĩ abe aba chiicuate. Emo nyesecua eã mose ngõngue rese, diablo riiĩ ño ũquĩ nde. Emo mbae turã naa naa eã mose, diablo riiĩ ño ũquĩ no nde.

Nandechesequa chõ nguia nandechiese

¹¹ Cose ndare bei que jẽingo ã andu ra: nandechesequa bei chõ nguia nandechiese. ¹² Caĩn na nda jẽingochĩ jẽ. Diablo resenda chõ ae re. Nyebe ngõngue iquia nguiã. ¿Mbaerã ño ngõngue iquia chã? Echisaã saã icuãte quiatu ngue eriqui nguuiã. Enongue chisaã nguiatu ngue eturãte riqui nguiã. ¹³ Jesús quiatoã jẽucuaỹã mose, jenyuruirate chĩ nda mae erese jẽ. ¹⁴ Nanderaaque rã eã ño nandeico nguiã ã cote. Dios nandereco mingõ tuchi quia co cote. Nandenongue rese nandeico nyesecua ã cote. Nyebe nandeico nguiã “nanderaaque rã eã ño nandeico nguiã ã cote,” i. Ae nyesecua eãte quia ngõngue rese, eraaque rã mbei tuchi chõ ũquĩ ndiqui nguiã ũquĩ. ¹⁵ Emo ngõngue ucuãyã mose, mbia iquiasa rã tuchi chõ ũquĩ nde. Dios ra aba iquiasa mingõ bei eã. ¹⁶ Jesús que mano nande je ra. Nyebe nandeico nguiã “Jesús riqui nyesecuate nanderese co” i. Eĩ nande quiatu quia nyesecua nandenongue rese. Nandeteã teã eã ño mano sacua nandenongue rĩĩ. ¹⁷ Nandequeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesecua Dios rese uchiangui re? ¹⁸ “Aico nyesecuate mbia rese co” nande chooñochĩ nda equia jẽ. Mbae turã quiatu nandesã saã tuchi quia ee.

Nandeireĩ ireĩ eãte equia ñee Dios je ã

¹⁹ Nandechesequa mose mbia rese, Dios resendate quia nande re. Nandechiã ngoi turãte. ²⁰ Nandechiangui renda nandemundua ndua mose nandeicua ndese, Dios quia rei equirãcuã tuchi ũquĩ sí. Ae quia mbae icua jate nguiã. ²¹ Nandechiangui renda nandemundua eã mose nandeicua mo ndese, nandeireĩ ireĩ eãte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguiã ã. Nyebe ra emondo nande je. ²³ Ñ ndei Dios cheẽ ã, nande emumbayã sacua ã: “Seru-

cucha jëicua Jesucristo jë. Jenyesequa chõ jenyiese Jesucristo cheë nguire jë”, i Dios quia nande je co.

²⁴ Nande echeë mumbayã mose, nandeico beite quia erese ã. Ae abe riqui beite nanderese co. Espíritu Turã Dios mondo quia nande je nae, aque chõ nandembiirandu nguiã ùquĩ ndese. —Dios riqui beite jeñiangui re co, i Espíritu Turã nguia nande je co.

Eñ nande ra Dios quiato icuã; Dios quiatoã abe icua

4 —Aico Dios cheë nenei nenei co, i ja jate raque mbia quia ã. Ñee ñooñote quiatu nguiã ã. Ûquĩ ñee nda jëisi chooñochĩ nguia jë. —¿Ma Dios cheë nenei neneisa tuchi ma nde? jenye tuchi rã eicua nyii. ² “Jesucristo que tu ibate si mbiarã nda” i mose ùquĩ, Espíritu Turã ndiqui erese ùquĩ cote. Eñ jenye ra eicua. ³ “Jesucristo que tu mbiarã nda” i eã mose, Espíritu Turã siqui eã tuchi chõ nguiã erese. Cristo ucuãyãsa chõ ùquĩ nde. Se rei Cristo, ichõño ño nguiã ã. Cristo ucuãyãsa ra tu, i jeñandu quia nyii nae, aque riqui a cote. ⁴ Dios resenda rei jë, Seriiĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheë senei ñooño nguia nae, jë quiatu que jëquirãcuã tuchi ùquĩ si ra. ⁵ Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguiã ñee mbia je. Mbia ibi jenda achõ ño echeë ñandu nguiã. ⁶ Nande quiatu Dios resenda tuchi re. Ae Dios icua quia nae, ùquĩ ndiqui nandechë andu ùquĩ. Ae Dios icua eãte quia nae, ùquĩ nguiatu nandechë andu sereãte nguiã ùquĩ. Eñ nande ra Dios quiato icua. Dios quiatoã abe icua.

Dios nyesequa tuchi mbia rese

⁷ Sechesequa, nandechesequa ja chõ nandechiese jë. Dios chõ nandembuchesequa nguiã nandechiese. Nandechesequa mose nandechiese, Dios riiĩ ño nande re. Ûquĩ mose chõ nandeico nguiã Dios icua ã. ⁸ Nandechesequa eã mose nandechiese, ã nguia nandeico nguiã Dios icua eãte ã. Dios quia siqui nguiã nyesequate nanderese co. ⁹ Dios que nguiĩ mĩ mbu ibii ra. Nandemingo bei tuchi sacua erĩ. Nyebe nandeico nguiã “Dios riqui nyesequate nanderese co” i. ¹⁰ Dios ae nyesequa aquiatute. Nande rane nguia nandechesequa eãte nguiã erese. Ae rane nguiatu ngue nyesequa nguiã nanderese. Nyebe nguiĩ mundo nguiã nandeicuã ndiquicharõ sacua. ¹¹ Sechesequa, Dios nyesequa tuchite quia nanderese co resë. Nyebe nande abe quiatu nandechesequa nandechiese. ¹² Nandechesequa mose nandechiese, Dios riqui tuchi nandechiangui re co. Dios riqui nandembuchesequa tuchi nandechiese co. Aba mo mae eã ndaque erese. ¹³ ã nandeico tuchi Dios rese ã. Ae abe siqui tuchi quia nandechiangui re co. Espíritu Turã ngue Dios mondo nande je, ae chõ nandembiirandu nguiã ùquĩ

ndese co. ¹⁴ Dios que nguiĩ mundo mbia rirõ ja sacua huicua si ra. Uremae ngue erese ra. ã ureico erenei nenei ja mbia je ã. ¹⁵ “Jesús rei Dio s riiĩ” nande i mose, Dios riqui tuchi nandechiangui re co. Ûquĩ mose nande abe nandeico tuchi erese ã. ¹⁶ Dios riqui nyesequa tuchite nanderese co. Ûquĩ nandeicua tuchi quia ã cote. Nandechesequa bei mose Dios rese, ã nandeico tuchi erese ã. Ae abe riqui tuchi nandechiangui re co. ¹⁷ Nandeico mose Dios rese, ae riqui nandembuchesequa uchiese co. Nandechesequa tuchi mose erese, nandeico siquicheãte esi ã. Nandesiquiche ãte ra esi mbia icua mbasi mose. Nandemba ãte ra mbia chabe. Jesucristo raãte quiatu nandeico nguiã nande ã. ¹⁸ Nandesiquiche mose Dios si, nandechesequa tuchi ãte quiatu nguiã erese nandechiangui re ã. Nandechesequa tuchi mose erese, nandesiquicheã nda esi. Nandesiquiche mose Dios si, nandesiquiche chõ nda nandemba. ¹⁹ Dios rane ngue nyesequa nanderese nyii ra. Nyebe nande abe nandeico nguiã nyesequa erese ã cote. ²⁰ “Achesequa quia Dios rese co” i mose emo, ngõngue ucuãyã mose, ñee ñooño je chõ ùquĩ nde. Nandechesequa eã mose nandenongue rese, Dios abe rese chõ nandeico nguiã nyesequa eã no. Dios rese quia nandeico nguiã mae aroneate. ²¹ ã i que ñee nande je ra: Ae nyesequa quia Dios rese nae, sã nyesequa ngõngue abe rese.

Jesús quiato “qui jë” i mbae icuã je

5 “Dios chimondo rei Jesús” nande i mose, Dios riiĩ ño nande re. Emo ndese nandechesequa mose, eriiĩ abe rese ra nandechesequa. ² Nandechesequa mose Dios rese, echeë nandemumba eã mose, Dios riiĩ ja rese abe chõ nandeico nguiã nyesequa ã. ³ Dios rese nandechesequa mose, echeë nandemumbayãte quia ã. Echeë mbaranguiatuã eãte riqui nande je co. ⁴ Dios riiĩ mose nande, ibi jenda icuã nandesiquisã quisã ño nguiã nandechesi ã. Nandeico Jesucristo icuate ã. Nyebe nandeico nguiã “qui jë” i mbae icuã ibi jenda je. ⁵ Jesús icuasa achõ nda “qui jë” i mbae icuã ibi jenda je. —Dios chimondo rei Jesús, i je ra “qui jë” i ibi jenda icuã je no.

Dios siqui ñee mbei Jesús quiato chiangui re

⁶ Jesucristo que tu íbii ra. I je que Juan bautizar i ee ra. Eruqui que uchë emano mose ra. Ûquĩ Espíritu Turã senei nguia nande je ã. Ae ñee ñooño eãte quia co. ⁷ Tres riqui nandembiirandu randu Jesús rĩ ã. Espíritu Turã nane. I abe no. Jesús ruqui abe no. Ûquĩ ja riqui nandembiirandu randu Jesús rĩ ã. Hue rĩ ja chõ ùquĩ tres riqui nguiã ñee. ⁹ Eñ sĩ que Dios ñee Jesús rĩ nande je ra. “Ae bei”, nande chõ nguia ee. Sã nandeico mbia cheë mo isi turã no. Dios cheë nguiatu nandembiirandu tuchi. ¹⁰ Ae Dios riiĩ icua quia nae, ùquĩ je quia

Dios riqi nguiã ñee mbei echiangui re Jesús rĩĩ. Ae “eno” i ãte quia Dios cheẽ je nae, “ichõĩñosa chõ Dios cheẽ nde”, isa chõ ãquĩ nde. “Eno” i ãte quiatu nguiã Dios ñee mose Jesús rĩĩ. ¹¹ Dios nandemingo bei quia co. Nguiĩ rĩ ño eriqui nguiã nandemingo bei co. ãquĩ ñi ño Dios riqi nguiã ñee nande je. ¹² Ae chiangui re Dios rĩĩ rĩ ndiqui nae, ãquĩ nda Dios mingo bei. Ae chiangui re eriqui eãte nae, ãquĩ nguiatu ra emingo bei eã.

Juan embesa hui bei

¹³ A aico ã mbesa jẽje a. Dios rĩĩ rĩ icuasa je a. “Dios ra semingo bei” jeny sacua eicua jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ãquĩ icuate ã. ¹⁶ Nandemae mose

nandenongue rese mbae icuã naa naa mose, nandechẽ Dios je erĩĩ. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩĩ”, ae ãte quia jẽje co. ãquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mii mbae icuã nguiarei mbia mbuquiachã mbei mondo tata cuásuu.

¹⁸ Dios rĩĩ rĩ mose nande, nandeico ãte quia mbae icuã ndese ã. Jesús riqi nanderaarõ mbeite mbae icuã si co. Satanás nandembaicua eã sacua. ¹⁹ Nande rei Dios resenda. ãquĩ nandeicuate quia ã. Mbia ataque quiarei Satanás ndesenda tuchi. Eicuã ndesenda tuchi.

²⁰ Dios rĩĩ rĩ ngue tu nandembaaquiatu sacua Dios rĩĩ nda. Dios ichõĩñosa reã ñi. Ichõĩñosa reã ño erĩĩ rĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Serĩĩ rĩ, Dios aba reã ndese ra jẽingochĩ. Amén.

2 JUAN

Achesecuate jendese, i Juan

1 Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderi-irĩ je abe aico ã mbesa mbesa a. Co aico nyesequa tuchi jendese co. Dios rese quia jëingo tuchite nguiã ùquĩ. Nyebe Dios quiato riqui nguiã nyesequa jate jendese ùquĩ. ² Achesecua tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eririĩ. Sã ùquĩ ndiqui turã jendese. Sã ùquĩ ia eã tuchi riqui jendese. Sã ùquĩ ndiqui jembia bei tuchi. Ùquĩ ndiqui nyesequa tuchi jendese ùquĩ. Ùquĩ ñee ñooño eã tuchi quia ùquĩ.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ùquĩ mose ra. ⁵ Nandechesequa ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesequa mose nandechiese, nandeico Dios cheẽ ndui sí ã. —Jenyesequa chõ jenyiese, i quiatu ngue Dios nande je re. Cose ndare bei chõ jëingo nguiã ùquĩ andu ã.

Aba mbiirĩ irĩsa

⁷ Mbia tubiriã ndiqui aba mbiirĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùquĩ je re. Aba mbiirĩ irĩsa, i abe que ùquĩ je ra. ⁸ Cochee chõ jëingo. Mbae jësaã iru iru eã sacua Dios je. Ùquĩ mose ra Dios jenyisaã sibishorõ turã tuchi jëje. ⁹ Emo icha mose Cristo cheẽ si, Dios resenda eã ño ùquĩ nde. Emo siqui bei mose Cristo cheẽ ndese, Dios resenda tuchi chõ ùquĩ nde. Cristo resenda abe no. ¹⁰ Emo mbia mbaaquiato quiatu mose Cristo cheẽ ndui si eã, ùquĩ jëisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã nguia ee ùquĩ ñi nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jëje, ae rei que se ra. Ambesa oco sereãte mondo jëje. Tambuchecua tuchi chõ oso ñee jëje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriirĩ ja saludos mondo quia ndeje aque. Amén.

3 JUAN

Gayo turâte que eriqui Dios je ra

1 Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩ co. Dios nemingo turã sacua. Nderete abe mingo turã sacua no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra. ⁴ —Nderiirĩ nyi tuchi Dios rese pee, i mose seje, sembia beite equia co. Ũquĩ nguiatu sembia tuchi nguiã mbae mo si co. ⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que ecuaẽ ñee ure je ra. Mbae turã emondo mondo bei ee, embucuata turã sacua. Eĩ mose ra Dios ia tuchi nderese. ⁷ Jesús riĩ nguiatu ũquĩ ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia ũquĩ nde.

Diótfes ucuasu raã ñooño

⁹ Papel jua que ambesa rei mondo jeñumunua ji je ra. Diótfes quiatu seosei chiãte nguiã. —Se mĩ ño

ererecuarã, ite. ¹⁰ Huee seso mose ra Diótfes icuã asenei jẽ ja je. Ae icuã esaã ure je nae, ũquĩ. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. ¹¹ Sechesequa, ereicochĩ nda eicuã mo ndui. Eturã ndui chõ eico. Eturã nduinda quiarei Dios resenda. Ae siqui quia eicuã ndui, ũquĩ ndei Dios resenda eã.

Eturã tuchi, i Demetrio je

¹² Demetrio quiarei eturã tuchi. Co eriqui tuchi Dios rese co. Mbia ja abe ñee turâte quia erĩ ũquĩ. Se abe acheẽ turâte quia erĩ co. Acheẽ ñooño ãte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namó jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

JUDAS

Judas embesa Dios chiirabo je

1 Judas rei se. Jesucristo rimba. Jacobo nongue rei se. ã ambesa quia jêje a. Dios chiirabo je. Dios que jêirabo ñno icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³ Jesucristo nandemingo beisa rîñ ngue ambesa seese rei nguiã jejê. Ae mbia mbaa tambesa jêje. Jêingo eã nonde erese. Ûquĩ ñee icuã icuã mose Dios cheẽ ñi, echeẽ jêsibishorõ. —Dios cheẽ tuchi chõ ñene, jenyê tuchi quiatu quia Dios cheẽ ndiquisã quisã mbia icuã si. Dios quiatu ngue ucheẽ mondo ja nguiã nguesenda ja je. ⁴ Dios quiato raã naasa mo ndiqui mbia mbaaquiato icuã icuãte ùquĩ. Ûquĩ siquiã tuchi chõ nguiã Dios rese ùquĩ. —Sã Dios riqui aba icuã mbutiã uturã je c o no jê. Nyebe mbae icuã nandesã ñi chõ jê, ñ chõchĩ nguiã ùquĩ. Jesucristo cheẽ ndui eã tuchi chõ ùquĩ nde. Nandererequa cheẽ ndui eã. Cosete que Dios ùquĩ mbiçúe embasi sacuã nda. Mbasì mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirõ ja rei nguiã Egipto si cose. Mbìa hue jenda icuã icuã mose ee. Ûquĩnde que siqui sereã Dios rese cote ra. Nyebe Dios eiquia nguiã. ⁶ Sã ángeles mo je Dios ñee ndei no jê. “Aa jêingo aa”, sã ñ rei ee no jê. Sã Dios cheẽ mumba chõ no jê. Sã Dios riqui etarõi nderequia itondaruqui re co no. Embasi mbasi bei sacuã cote. ⁷ Sã Sodoma jenda no. Sã Gomorra jenda no. Sã ùquĩ ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios ùquĩ mombo tata cuásuu ra. Mbae rasi ra esaã mbei u huee cote. Mbìa mundua ndua sacuã ño ùquĩ nde.

⁸ Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguiã nguete mbiçúã ùquĩ. Aba cheẽ mumba. Ñee icuã ángeles ibatenda abe rîñ no. ⁹ Sã Miguel ángel rerequa no. Sã ñee asi asi nyue diablo rese no. Moisés rete rîñ. —Mbae icuã tasaã ndeje, ñ eã ngue diablo je ra. —Dios quiatu ra mbae rasi saanguquia ndeje, ñ chõ ngue ñee diablo je ra. ¹⁰ Ae Dios quiato saã saã nguia nae, ùquĩ ndiqui

ñee ñooño mbae uchicuayã ñi ã. Ae eicuate quia mbae nae, ùquĩ ndese siqui turã eã. Siqui chooño eã ùquĩ ndese. Nyebe ra Dios embasi tuchi cote. Quiaa rînda quia mbae icua jiri nguiã ùquĩ si. ¹¹ Aba mbia eã tuchi chõ ùquĩ nde. Caín na tuchi chõ eriqui nguiã mbae icuã naa naa ùquĩ. Balaam abe rã si chõ eriqui nguiã icha icha Dios si ùquĩ. Mbae isiquia achõ ndese siqui sacuã. Aba cheẽ mumba mumba bei chõ nguiã Coré rã ùquĩ. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba ireingua tuchi chõ ùquĩ nde. Jeñumunua nua mose quiaru sacua nyiese, ùquĩ ndiqui quiaru chooño ño ùquĩ. Mbae abe mbei chooño. Íco chooñoa abe mbia mo je. Mbìa reaquiatusa mo na eã. Nguete mñ ño ùquĩ teaquiato nguiã ùquĩ. Sã ibei rondei riqui raque pã ñ mose no. Sã eriqui nyaaquíã no jê. Sã quiririã ndiqui ibei rondei rerao no jê. Ûquĩ na ño Dios quiato raã naasa riqui nguiã ã. Mbae iabae je rã abe chõ eriqui nguiã ã. Ira shñ rã abe no. Ira riqui ji rã abe no. ¹³ Ama ndebera rã abe chõ ùquĩ ndiqui nguiã ùquĩ. Mbìa mbaaquiato quiatu mose, ñ richoi rã ño ùquĩ nde. Sã nyasitata riqui oso ngüenda recha no. Eñ si chõ ùquĩ nguiã ùquĩ. Nyebe ra mbae rasi raã tuchi itondaruqui re.

¹⁴ Enoc abe que ñee ùquĩ icuã ñi nda. Adán ndiirĩ nducucha rei ae. Eñ ngue ñee nda: “Dios ra tu ngüimba tubiriã ndese. ¹⁵ Mbìa icuã mbasi ja ra eu. Ae icuã mbia saã saã nguia nae, ùquĩ ndese ra mae ja. ‘Mbae icuã asaã áte resê’, ñ aroneate ra ùquĩ cote. Ae ñee icuã nguia Dios rîñ nae, Dios ra echeẽ icuã senei a e sí je cote. ‘Eñ ere que equia ñee icuã serîñ nda’, ñ ra Dios ee. Echisaã icuã tuchi chõ ùquĩ nde”, ñ que Enoc ñee cose ra. ¹⁶ Echiichati tuchi chõ ùquĩ nde. Ñee icuã mbei equia emo ñi ùquĩ. Ae rese eriqui sete nae, ùquĩ mñ ndese chõ eriqui nguiã ndua ùquĩ. Ucuasu raã ñooño. Uchuru mondo chooño. Ñee turã abareã nea emo je. Mbiirĩ irĩ ño nguiã ñee turã abareã nea ee.

Ã jêsaã saã, ñ Judas Jesús quiato je

¹⁷ Jê nguia rei Jesús quiato tuchi. Jesús chimbaaquiato cheẽ si jêtesarei eã. ã ndei echeẽ ã: ¹⁸ “Mbae ua ja nonde ra mbìa iquia iquia Dios cheẽ je. Ae icuã ndese eriqui sete nae, ùquĩ mñ ndese chõ nda eriqui nguiã ndua”, ñ que Jesús chimbaaquiato ñee cose ra. ¹⁹ Mbìa mbuqueta quetasa tuchi chõ ùquĩ nde.

Ae ebite mbae icuã nae, ũquĩ ndese achõ ño eriqui nguiã ndua. Espíritu Turã siqui ãte echiangui re. ²⁰ Jẽ nguia jeñimbirãcuã tuchi quia Dios rui. Dios jẽicua tuchi. Jeñee mbei Dios je. Sã Espíritu Turã ndiqui jem-bucheẽ mbei Dios je. ²¹ Jẽingo bei quia Dios rese. Ĩ nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. ũquĩ jẽsaarõ mbei quia. ²² Ae Dios tiisu isu quia nae, ũquĩ jembuti mbuti quiatu quia Dios cuti. ²³ Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jẽingo tuchi quiatu quia Dios rese. ũquĩ icuã uba eã sacua jendese.

Judas ñee turã Dios rĩ

²⁴ Dios miĩ ño jendeaquiato bei nguiã jembiiicha eã sacua. Dios miĩ ño jeñiangui renda icuã mbuchicuabo nguiã jemingo sacua uchiase. Dios miĩ ño jembia bei nguiã no. ²⁵ Dios miĩ ño mbae icua ja nguiã. Dios miĩ ño nandemingo bei nguiã Jesucristo rĩ no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS

Jesucristo mbae mbuchecua

1 Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacuaã erese cote ra. Se jembiirandu sacuaã erese cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguia sechimbresa rese nae, Dios turã tuchi ra eriqui ùquĩ je. Ae ra nyiisaquia turã sechimbresa rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue chooñoa ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesequa tuchite nanderese co. Ae que nandembui nandeicuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacuaã Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei si. Mbia ra mae ja tuchi equichi rese. Mangue jenda chooñoa tuchi ra mae ja erese. Ae Jesús iquia nyii nae, ùquĩ abe ra mae erese no. Mbia ra siquichete nyeseo mae mose erese. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbirãcuã jate mbia icuã icuã mose nande je ã. Jesucristo riẽ. Ae sí chõ nandembiirãcuã nguiã co. Ae sí chõ nan-

dererecua ja riqui nguiã co no. Ama ndisha joõ ngue mbia sereru aa ra. Aa semingo isho mbia si a. Se Dios cheẽ nenei nenei eã sacuaã. Mbia mbiirandu eã sacuaã Jesucristo rese. Patmos, i que a ejoõ acua je ra. ¹⁰ Aa sereco mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quti cuu ra. Echeẽ ngue serasate ra. ¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbresa emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbresa emondo, i que ñee seje cuu ra.

¹² —¿Aba ñee nguia seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbia raanguia mo ñi juã nda. Dios ririĩ ño eriqui reaẽ. Huiirao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi que eresa ra. ¹⁵ Ei nininyate que ra. Bronce rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Eruba nininya tuchi que ra. Sã tenda nininyate riqui nandeite re mose no.

¹⁷ Semae mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. —Eresiquichechĩ nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab e co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no. ¹⁹ Ae rese eremae nae, ùquĩ embesa rã. Ae ateacuquia cuquia quia ndeje namo nae, ùquĩ abe embesa no. Ae ra nyecua nyecua emo mose nae, ùquĩ nonde embesa jei rã. ²⁰ Siete candeleros rese que eremae namo, siete iglesias rã ño ùquĩ nde. Siete nyasitata rese que eremae séoo, siete iglesias rerecua rã ño ùquĩ no nde. Jesús quiato rerecua rã ño ùquĩ nde, i que ñee seje ra.

Cristo ucheẽ mondo uquiato Efeso jenda je

2 Jesús que ñeembe seje ra. —Dios quiato rerecua Efeso jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco

oo nae, aque. Ae ngata quia siete candelero ite rĩ nae, aque sí chõ ñee nguiã jėje aque. ² Ñe ngue Cristo ñee jėje ra: 'Jenyisaã turã aicuate quia co. Ñe jęingo quiei quiei tuchite seje ã. Jeñimbirãcuã tuchite quia mbae icuã si ã. Ñe jęingo jiri jiriãte mbia icuã ndese ã. Ae sequiato rerecua saã ñooño nguia nae, jęe ngue ũquĩ jęisiã nda. "Ma Jesús quiatote", jenyet turã tuchi que ra. "Tchõiñosa chõ ñene" jenyet chõ ngue erĩ nda. ³ Jeñimbirãcuã turãte que equia ra. Mbae rasi que jęsaã nguia serĩ nda. Jęquiei quiei tuchite que seje ra. Jęhui eã mbeite equia sesi ã. ũquĩ jęsaã turã jate rei nguiã ã. ⁴ Ñe nguiatu sembia eãte nguiã ã. Jenyesequa eã jirichĩ equia serese jęe nguiatu ã cote. Seicua ramo mose que jęote serese nyii. Jenyesequate que equia serese nyii. Eĩ jenyet eã ñochĩ equia ã cote. ⁵ Jendua rã ũquĩ ndese ae. Jenyesequabe jiri serese ae. Jemba eã mose serese, jaembutiã nda u. Sequiato eã nda jęe cote, jemba eã mose serese. ⁶ Ñe abe sembiante quia jendese ã. Ae siqui quia Nicolás rese nae, ũquĩ nyisaã jęucuyãtequia ũquĩ. Se abe aucuyãte quia co no. ũquĩ nyisaã icuãte riqui ũquĩ. ⁷ Jęisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã: Ae "qui jęe" i beite quia Satanás quirãcuã je nae, ũquĩ nda amingo turã mbei ibate Dios rese', i que Cristo jęje ra", ere chõ embesa mondo sequiato Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. Ñe embesa rã mondo ee: "Cristo que ñee jęje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beit e co no. Aque sí chõ ñee nguiã jęje co. ⁹ Ñe ngue Cristo ñe e jęje ra: 'Jenyisaã turã aicuate quia co. Mbia icuã icuãte riqui jęje serĩ ũquĩ. Mbaecha reãte jęingo ũquĩ. Dios quiatu siqui tuchite nguiã jendese co. Ae Dios chiirabo saã ñooño nguia nae, ũquĩ ndiqui ñee icuã mbeite jenĩ ũquĩ. Satanás chiirabochõ ño ũquĩ nde. ¹⁰ Ae ra jęsaã saã mbae rasi nae, ũquĩ mo si ra jęsiquichechĩ jęe. Satanás nda jemo tarõ mĩ. "Ma nyao Dios sí", i sacua ño ũquĩ nde. Diez días ra jęingo mbae rasi raã naa. ũquĩ mose, jęingo bei Dios rese. Mbia ra jęiquia serĩ. ũquĩ mose nda jaemingo bei Dios rese cote chã. ¹¹ Jęisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã: Ae "qui jęe" i beite quia Satanás quirãcuã je nae, ũquĩ nda Dios mondo eã tata cuásuu', i que Cristo jęje ra", ere chõ embesa mondo sequiato Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. Ñe embesa rã mondo ee: "Cristo que ñee jęje ra. Ae

espada rimbe chobei quereco nae, aque sí chõ ñee nguiã jęje co. ¹³ Ñe ngue Cristo ñee jęje ra: 'Sucha tubiriã jendecua aicuate quia co. Mbia hue jenda siqui tuchite quia Satanás ndese ũquĩ. Jęe ae chõ jęingo nguiã serese ũquĩ. Jęhui eãte equia sesi ũquĩ. Mbia icuã sequiato iquia raque huee jendecuaa. Antipas, i rei ngue aque sequiato je re. ¹⁴ Ñe nguiatu sembia eãte nguiã ã. Balaam na tuchi chõ jemo jemo ndiqui nguiã ũquĩ. Balaam nguiarei Balac mbaaquiato icuã icuã nyii. Balac Israel jenda mbiãcuã icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jembiãcuã icuã nguiã ũquĩ. ¹⁵ Ae siqui quia Nicolás rese nae, ũquĩ mo siqui chõchĩ nguiã jendese ũquĩ. ũquĩ ñee aucuyã tuchi quia co. ¹⁶ Jendua si rã jęicuã ndese. Nicolás resenda jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese. ¹⁷ Jęisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã: Ae "qui jęe" i beite quia Satanás quirãcuã je nae, ũquĩ nda amingo tuchi Dios cheẽ ndese. Dios cheẽ nda ũquĩ mingo bei. ũquĩ je ra si-tashĩ ñetẽ mo amee. Sita ñetẽ ndese ra nombre yasu ambesa mĩ. Eme sacua ee. Emo nda sechimbasa icuayãte nombre yasu. Ae je ra amee, ũquĩ achõ nda eicua', i que Cristo jęje ra", ere chõ embesa mondo sequiato Pérgamo jenda je.

Cristo ucheẽ mondo uquiato Tiatira jenda je

¹⁸ Dios quiato rerecua Tiatira jenda je ã embesa rã. Ñe embesa rã mondo ee: "Dios rucucha que ñee jęje ra. Ae resa tata rendi saãte quia nae, aque. Ae i nininyate eriqui bronce rã nae, aque sí chõ ñee nguiã jęje co. ¹⁹ Ñe ngue Cristo ñee jęje ra: 'Jenyisaã turã aicuate quia co. Jenyesequate quia mbia rese ũquĩ. Mbae jęsaã saã turãte quia Dios je ũquĩ. ũquĩ jęingo Dios icua tuchite ũquĩ. Jeñimbirãcuã turãte equia mbae icuã si ũquĩ no. Jenyisaã turã tuchite riqui cose ndare si ũquĩ. ²⁰ Ñe nguiatu sembia eãte nguiã ã. Jezabel naanguia siqui chõchĩ nguiã jendese ũquĩ. ¿Mbaerã aque cuña jęteachõ nde? Emombo rocoĩ jenyesi. Dios cheẽ esenei senei ñooño ño nguiã aque. Sequiato mbaaquiato icuã icuã ño nguiã aque. Sequiato mingo chooño ño nguiã cuña icuã ndese aque. Sequiato mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. "Sã ndua sí huãcuã ndese. Sã eriqui chooñoa mbia rese", ae rei que se nyii ra. Hui eã mbei chõ equia ũquĩ si aque re. ²² Nyebe ra ambasi tuchi cote. Ae siqui siqui quia erese nae, ũquĩ abe ra mbae rasi saã tuchi cote, ndua si eã mose huãcuã ndese. ²³ Ae siqui Jezabel icuã ndui nae, ũquĩ abe ra aiquia. ũquĩ mose ra sequiato jirandu ja sequirãcuã ndese. "Jesús mbia chiangui renda icua ja chõ nguia

re. Mbia ndua ndua eicua ja chõ nguia re”, i ra sequiato serĩ cote. Jẽingo bei mose mbae icuã ndese, se abe ra mbae icuã amee jẽje. ²⁴ Ae siqui eã nguia Jezabel cheẽ ndui jemo nae, ùquĩ je chõ tacheẽ cote. Jẽ nguiatu que jeñimee ãte Satanás je ra. Nyebe ra acheẽ tuchiã jẽje. “Mbae mo ndese ra jẽingochĩ jẽ”, ae eã nda jẽje mbae mo nii cote. ²⁵ Ae jẽicuate quia serĩ nae, ùquĩ ndese jẽingo bei querabe. Achu chee nda jẽje chã. ²⁶ Sã seru uquirãcuã me e seje no. Ae ra secheẽ mumbayã mbeite quia nae, ae ra “qui jẽ” i beite quia Satanás quirãcuã je nae, ùquĩ je ra sequirãcuã amee tuchi. Ùquĩ nda mbia rerecuarã cote. Ùquĩ nda mbia icuã mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ùquĩ je. ²⁹ Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ùquĩ jeñandu rã’, i que Cristo jẽje ra”, ere chõ embesa mondo sequiato Tiatira jenda je.

Cristo ucheẽ mondo uquiato Sardis jenda je

3 Dios quiato rerecuã Sardis jenda je ã embesa rã. ã embesa rã mondo ee: “Cristo que ñee jẽje ra. Ae siete nyasitata quereco oo nae, aque. Ae rese Espiritu Turã ndiqui nae, aque. ã ngue Cristo ñee jẽje ra: ‘Jenyisaã aicuate quia co. Mbia raaque raãte chõ jẽingochĩ nguiã ùquĩ. Siqui eã Dios rese. Jẽingo arõte raque equia Dios rese mbia je ùquĩ. ² Secheẽ ndese jenyiisaquia rã. Jeñimbirãcuã ño nguia siqui i Dios rese. Jẽhui serĩ serĩte chõchĩ nguiã Dios si ùquĩ. Jenyisaã ndese aico mae maete co. Jenyisaã saã icuãte riqui Dios je ùquĩ. ³ Jendua jiri mbae rese ae. Ae rese jeñim-baaquiatu nae, ùquĩ ndui jẽingo tuchi jiri ae. Jẽicuã si jẽhui tuchi jiri ae. Jẽ secheẽ mumba mose, jaembuate ra ngasẽ jẽje. Jendua eã mose ra asochĩ jẽje re. Sã mbae mbuquiachãsa riqui aba mbuate no. ⁴ Jemo mii mii mbae icuã saã saã eãte quia ùquĩ. Ùquĩ ño nda siqui bei serese. Eiraoshĩ nda amee ùquĩ je. Mbae icuã ndese quiatu que eriqui oco oco ãte ra. ⁵ Ae “qui jẽ” i beite quia Satanás quirãcuã je nae, ùquĩ nda huiiraoshĩ quereco quia serese. Ùquĩ nda siqui bei serese ibate. Ùquĩ mbae nombres ra achusi eã mbei. “ã ndei sequiato tuchi ã”, ae ra Paba je. Angeles abe je. ⁶ Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ùquĩ jeñandu rã’, i que Cristo jẽje ra”, ere chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecuã Filadelfia jenda je ã embesa rã. ã embesa rã mondo ee: “Cristo que ñee jẽje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecuã tuchi riqui David rã si nae. Cristo eiquesa mbuquiata mose, emo ematã

aroneate. Cristo ematã mose, emo embuquiata aroneate no. ⁸ ã ngue Cristo ñee jẽje ra. ‘Jenyisaã aicuate quia co. Jẽquirãcuã miiite jẽingo raque ùquĩ. Seisi teã eãte que equia ra. Ùquĩ jẽingo secheẽ mumbayãte ùquĩ. Nyebe que mbae ambuquiata mii eiquesa rã jẽje ra. Jẽingo tuchi sacuã serese. Emo nda ematã eã. ⁹ Judíos ñee ñooño je ra amumae turã nyee jendese. Ùquĩ ndiqui Dios chiirabo raã ñooñote ùquĩ. Ùquĩ eriqui tuchiẽ Satanás rese ùquĩ. Ùquĩ nda ñee turã nyee seje jeni. “Dios nyesequa tuchi chõ nguia ã ndese re. Judíos eã ndaque”, i chee ra jeni. Ngoi turã nyee ra jendese ñee seje. ¹⁰ Jeñimbirãcuã turãte equia secheẽ nguire ùquĩ. Nyebe ra jaendeaquiatu turãte serequia. Mbia mangue chooñoa jenda mbae rasi raã ja mose ra jaendeaquiatu tuchi serequia. ¹¹ Achu jei ra se. Ae jẽicuate quia serĩ nae, ùquĩ ndese jẽingo bei querabe. ã nda emo jembui eã Cristo si. ¹² Ae “qui jẽ” i beite quia Satanás quirãcuã je nae, ùquĩ nda amingo bei Dios récuã. Sembae marca ra amii tuchi ùquĩ ndese. “Dios quiato” i tuchi ra mbia quia ùquĩ je. “Dios recua jenda” i tuchi ra mbia quia ùquĩ je no. “Jerusalén yasu”, i chõ nguiã Dios recua je ã. Jerusalén yasu ra nguichi u ibate si. ¹³ Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ùquĩ jeñandu rã’, i que Cristo jẽje ra”, ere chõ embesa mondo sequiato Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecuã Laodicea jenda je ã embesa rã. ã embesa rã mondo ee: “Cristo que ñee jẽje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae. ¹⁵ ã ngue Cristo ñee jẽje ra: ‘Jenyisaã aicuate quia co. Seya eãte aico jendese co. Jẽhui tuchi ãte raque equia sesi ùquĩ. Jẽingo tuchi eã ñochĩ equia serese ùquĩ no. Eĩ jenyete chõchĩ equia ùquĩ. I ribebe rã ño jẽingochĩ ùquĩ. ¹⁶ Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no. ¹⁷ “ã ureico tuchiẽ Dios rese ã”, jenyete chooño ñochĩ equia ñimbiĩrĩ irĩ ùquĩ. Aba mbia eã tuchi chõ jẽingo nguiã ùquĩ. Mbaecha reã na ño jẽingochĩ nguiã Dios je ùquĩ. Eresayã na ño jẽingochĩ nguiã Dios je ùquĩ no. ¹⁸ Jẽingo chõ nguia serese ae. ã nda oro turã naanguia amee jẽje. ã nda mbae amee tuchi jẽje. ã nda tirushĩ naanguia amee tuchi jẽje. ã nda jẽireĩ nguiãte jẽirao eã si. ã nda Dios cheẽ ambuchecua tuchi jẽje. ¹⁹ Ae rese aico nyesequate nae, ùquĩ icuã icuã mose chõ aico nguiã eiruã nua. Emundua si sacuã mbae turã ndese. Jẽicuã si jẽhui. Jendua sí Dios rese. ²⁰ Aico jẽiquesa mbuu mbuu a. Jemo seandu mose, huiiquesa mbuquiata mose seje, aique ra ee. Aico bei ra erese cote. Aqiaru qiaru ra se quia erese cote.

Ūquĩ abe ra quiaru quiaru quia serese cote no. ²¹ Ae “qui jẽ” i bei quia Satanás quirãcuã je nae, ũquĩ nda siqui bei serese se ererecu tuchi mose. Ūquĩ abe ra amĩ mbia rerecuarã. Sã ñi aico “qui jẽ” i beite Satanás quirãcuã je nyii no. Sã ñi Paba semĩ mbia rerecuarã no. ²² Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã, i que Cristo jẽje ra”, ere chõ embesa mondo sequiato Laodicea jenda je, i que Cristo ñee seje ra.

Mbia ibatenda ñee turã ja Dios rĩĩ

4 Aquere que amae ibate quti ra. Eiquesa raanguia que nyeequia mĩ seje ibei ra. Ae ñeemombo sequite quti serasate nyii nae, aque que ñee si seje cote ra. —Echu rã ibate. Mbae tateacuquia ndeje. Ae ra jẽĩ jẽĩ mbia je nae, ũquĩ tateacuquia rã ndeje, i que seje ra. ² Aque mose tuchi que Espiritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra. ³ Enininya tuchi que seje ra. Sita rendi rã jaspe rã. Cornalina na abe no. Ibei asa que chĩ trono mama nda. Ibei asa nininya tuchite que chĩ nda. Esmeralda rã. ⁴ Veinticuatro tronos que chi Dios mama nda. Veinticuatro amei ngue chi tronos tose ja ja ra. Huĩraoshĩ ngue ecunui ja ja ra. Coronas oro ao ji que chi chi ja eãquĩ ndese ra. ⁵ Ama ngue sieu tuchi Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chi Dios ruba quti ra. Ūquĩ ndei Espiritu Turã na ũquĩ. ⁶ Ama ndisa raanguia que chĩ Dios ruba quti no nda. Eibera tuchi que ra. Mbae reco cuatro que chi Dios mama nda. Eresa ata atate que ũquĩ nda. Eruba quti que eresa ra. Equite quti abe que eresa no nda. ⁷ Nyacua rã tuchi que ũquĩ mo nda. Ticuasu rĩrĩ na ngue enongue no nda. Mbia ruba rã ngue enongue no nda. Nguira risha rã ngue enongue no nda. Aque que mbebe quia ra. ⁸ Seis ja ja que ũquĩ jeo ra. Eresa ata tuchi que ejeo rese ra. Ūquĩ cuatro que ñee turã mbeite quia Dios rĩĩ nda. Isa abe que eriqui ñee turãte Dios rĩĩ nda. Eĩ ngue equia ñe e nda:

Ndeturãte. Ndeturãte. Ndequirãcuãte ereico co, Dios. Co ereico beite co.

Nyii que ereico beite no nda.

Mbae ua ja mose abe ra ereico beite no, i que ũquĩ nguia ñee ñee Dios je ra. ⁹ Ūquĩ ndeco cuatro que ñee turã mbeite quia Dios je ra. Ae siqui beite quia co, aque je. ¹⁰ Amei veinticuatro abe que ngoi ngoi quia ngũĩã ndese ra. Ñee turã turã Dios je. Umbae coronas que echono chono ja Dios jii ra. ¹¹ Eĩ ngue equia ñee ñee Dios je ra:

Urererecu turãt e ereico co, Dios.

Nyebe ureico nguĩã ñee turã mbeite ndeje ã.

Mbae que erechao jate nembraerã nda.

Erendua turãt e que mbae ao nonde nyii no nda, i que ũquĩ nguia ñee turã turãte Dios je ra.

Emo libro equia aronea

5 Dios que libro quereco quia oo cuu ra. Uquiato-cuti que enunui trono tose ra. Libro mbesa ji. Equitera quti abe que embesa ji ra. Siete sellos je que ematã ji ra. ² Angel quirãcuã mo ngue ñee nda. —¿Aba ra sellos ndoso libro equia re? i que ángel ñeemombo ra. ³ Mbia mo ngue sellos ndoso aroneate ra. Ibatenda. Ibi jenda. Ibi qui rĩnda. Ūquĩ mo ngue sellos ndoso aroneate cuu ra. Nyebe mbia riqui nguĩã mae aroneate libro rese. ⁴ Nyebe que acheseo tuchi cuu ra. Mbia ja libro equia aronea mose. Mbia ja mae aronea mose erese. ⁵ Ūquĩ amei mo ngue ñee seje ra. —Erecheseochĩ nguĩã. Jesucristo ra libro equia. Ae quia equirãcuãte re. Ae quia Dios chiirabo rerecu tuchi re. David rĩrĩ tuchi chõ ae re. Ae quiatu que mbae rasi saã tuchi mbia icuã ndiquicharõ nda. Ae quia ra sellos ndoso. Ae quia ra libro equia, i que amei ñee seje cuu ra. ⁶ Jesucristo que chĩ huee cuu ra. Oveja iquia ji rã ngue eñi seje huee cuu ra. Siete que erambashĩ nda. Siete que eresa no nda. Siete eresa rei Espiritu Turã. Sã Espiritu Turã mae mbae ja rese no. Jesucristo que chĩ Dios ruba quti ra. Mbae reco cuatro joõ ngue eñi nda. Amei abe joõ ngue eñi no nda. ⁷ Dios que libro mondo Jesucristo oo cote ra. Dios chĩ mose trono tose. ⁸ Jesucristo libro isi mose que ũquĩ mbae cuatro ngoi ngũĩã ndese ejii ra. Amei veinticuatro rese. Arpas que amei quereco reco ja ra. Mbae riru oro ao ji abe no. Incienso resebe. Incienso, i que mbae mbushimbusa oquiei mose ra. Dios quiato ñee mose Dios je, eĩ sĩ chõ incienso ee re. ⁹ Ūquĩ amei ngue irasei rasei canto yasu mo je ra. ã ño ngue irasei rasei nguĩã:

Nd e que mbia ndeiquia ra.

Nde que mbia mangu choõoa jenda ereisi Dios mbaerã nda.

Mbia cheemo ja ja eriqui nae, ũquĩ abe que ereisi ja Dios mbaerã no nda.

Mbia mbuae ja abe no.

Nyebe nde mĩ ño libro ereisi arõte nguĩã co.

Nde mĩ ño sellos erendoso arõte nguĩã co.

Libro rese mae sacua.

¹⁰ Nde que uremĩ Dios rimbarã nda.

Ure mbae raã naa sacua Dios je.

Mbia ibi jenda rerecuarã nda ureico cote, i que amei irasei rasei Jesucristo je ra. ¹¹ Angeles cheẽ ngue achandu cot e ra. Angeles que chi ũquĩ mama tuchi cuu ra. Dios mama. Mbae reco cuatro abe mama. Amei veinticuatro abe mama no. Angeles tubiriã tuchi que ra. Millones y millones tuchi que ángeles ra.

¹² Ūquĩ ngue ñee nyecuate Jesucristo je re:

Oveja rĩrĩ na ño ereico nguĩã nde.

Leví riirĩ ndei doce mil.
 Isacar ndiirĩ ndei doce mil.
⁸ Zabulón ndiirĩ ndei doce mil.
 José riirĩ ndei doce mil.
 Benjamín ndiirĩ ndei doce mil.
 Ũquĩ ja rese que ángeles Dios mbae marca mii nda.

Mbia tubiriã iraoshĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumbarate que ra. Mangue chooñoa jenda abe tubiriãte que ra. Echeẽ ñumumbarate que ra. Dios ruba quti que ũquĩ chi jate juã nda. Cristo ruba quti abe no. Eiraoshĩ ja que chi ra. Sindo que equeru ja oo ra. ¹⁰ Ũquĩ ngue tasẽ tasẽte u ñee Dios je ra. Cristo abe je. ã i chõ ngue equia ñee nda:

Nde ae ereico nguiã mbia rirõ eicuã si co.
 Nde ereico trono tose mbia rerecurã co.
 Jesucristo rese chõ ereico nguiã mbia rirõ ndirõ eicuã si co,
 i que ũquĩ ja ñee Dios je ra. ¹¹ Angeles que ñumbui jate u Dios mama cuu ra. Mbae reco cuatro abe mama. Ae amei veinticuatro chi nae, ũquĩ abe mama no. Ũquĩ ángeles que ngoi jate ngũĩã ndese Dios ruba quti ra. Ngũĩã ndese que echi ñee turã jate Dio s je ra:

¹² Dios turã tuchite riqui mbia je co.
 Sã mbia riqui ñee turã mbei erĩ.
 Dios aquiatu tuchite riqui co.
 Sã mbia riqui “gracias” i bei ee.
 Dios quirãcuã tuchite riqui co,
 i jate que ñee turã Dios je ra. ¹³ Ũquĩ amei mo ngue ñee seje cote ra: —¿Aba ã nde? Ae eiraoshĩ chi a. ¿Ma si ecuaẽ a re no? i que ñee seje cuu ra. ¹⁴ —Ereicuate nde resẽ, Amei, ae que ee ra. Ae que eicua seje cote ra. —Ã ngue mbae rasi saã tuchi quia resẽ. Tiru irei ji rã ño ã ñia ndiqui nguiã ã cote. Jesucristo echiã mbitirõ nguqui je resẽ. ¹⁵ Nyebe eriqui beite nguiã Dios rese ã. Nyebe eriqui nguiã mbae raã naa mbei Dios je echuchúaa ã. Dios ra siqui bei erese. Teaquiatu bei ra mingo. ¹⁶ Ũquĩ nda ngũĩãcuã irara eã mbei. Huĩsei abe ra eirara eã no. Tenda abe ra eiro eã. Huĩriei abe ra eucuyã eã cote. ¹⁷ Jesucristo quia ra etequiatu bei mingo. Sã oveja raarõsa riqui oveja reaquiature no. Sã eriqui oveja rerao rao mbiu no. Eĩ si ra Jesucristo ũquĩ ndequiatu mingo. Dios ra echeseo mbutiba bei cote, i que amei ñee seje ra.

Mbae rei ji shimbu turã ndetashĩ ngasẽ oso Dios je

8 Jesucristo que sello nongue ndoso libro si cote ra. Séptimo sello. Mbae ibatenda que quiriri tuchi selo ndoso mose ra. Quiriri arete que ra. Media hora chee. ² Siete ángeles chi quia Dios ruba quti nae, ũquĩ

ndese que amaembe cuu ra. Emo ngue trompeta mee ja ja ũquĩ je ra. Siete que trompetas ra. ³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chĩ oro ao ji ra. Aque arõ ngue ángel incienso ñono nda. Dios ruba quti. Ae Dios quiato ñee ñee nguia Dios je nae, ũquĩ ñee ngue ngasẽ nguia Dios je ra. Incienso rei jí shimbu turã ndese. ⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra. ⁵ Angel que incienso riru mombisẽ tata reteĩ je ra. Altar jenda je. Ichusẽ ngue ibi quti cuu ra. Ama ngue sieu tuchi cote ra. Pirirã pirirã i tuchi que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ũquĩ ngue icoquiato cote ra. Trompeta mbucheẽ sacuaã.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. I ireĩ tuchi que cote ra. Mbae ruqui rã. Ibi tercera parte que oquiei tuchi ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã. ⁹ Ama ndisha riinda tercera parte que mano ja ra. Ae ngata quia ama ndisha rui barcos nae, ũquĩ tercera parte abe que ñĩmi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. I mbũcuã tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyebe e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuyãte tercera parte ra. Nyasi tercera parte abe. Nyasitata tercera parte abe no. Nyebe mbae checuyã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Ngaira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que ngaira risha ñee nda.

9 Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbia raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra. ² Eequia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ mangue chooñoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri j a abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ùquĩ. ⁵ Ùquĩ je mbae rasi jẽsaan-guquia tuchi cinco meses. Jẽiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguia nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiato guerra raã naa sacua no. Corona naanguia que siqui tucu mbuae ãquĩ ndese ja ja ra. Oro ao ji ereae. Mbia ruba raãte que tucu mbuae ruba ra. ⁸ Cuña a raãte que ea ra. Nyacuareĩ naate que ereĩ nda. ⁹ Eishia ãtã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra. ¹¹ Angel icuã mo ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiasa, i chõ nguia embae nombres je.

¹² Tucu mbuae que ua chee cote ra. Mbae rasi ñiinda chõ ùquĩ nde. Mbae rasi nyeremo tasenei jẽje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. —Cuatro ángeles embui rã mondo. Aecua jí chĩ Ama Eufrates nae, ùquĩ embui rã mondo, i que ee ra. ¹⁵ Cuatro ángeles que embui mondo cote ra. Aque mose sacua ngue Dios ùquĩ nderecoquiato ra. Ùquĩ ngue mbia iquia iquia tuchi tercera parte cuu ra. ¹⁶ Soldados tubiriã tuchi que ùquĩ ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chĩ ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Eireĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no. ¹⁸ Ùquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ùquĩ. Ùquĩ ngue mbia iquia iquia tuchi quia tercera parte ra. ¹⁹ Ngocoi je que eriqui mbia mbasi

mbasi tuchi ra. Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰ Nyebe mbia riqui nguia mano mano tuchi ùquĩ ndasi je. Mbia ataque quiato que siqui beite quia huicua ndese ra. Eicuã icuã mbei nyue. Nyiquia iquia. Brujería raã naa mbei. Siqui icuã icuã cuña mo ndese. Mbae mbuquiachã quiachã mbei. Uchisaã icuã si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ùquĩ ja rese chõ ngue eriqui ra. Ùquĩ mae aroneate raque Dios abareã. Mbae andu aroneate raque. Ngata aroneate raque no.

Angel libro mo quereco

10 Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru huiira-orã nda. Ibei asa que chĩ eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Eequia ji que equereco ra. Utima ndibisho que emi ama ndisha ye ra. Utima ndibisho que emi íbii no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴ —Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ùquĩ nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chĩ ama ndisha ye nae, aque que oo uquiato cutinda mee ibate qiti ra. ⁶ Ñee ngue cote ra: —Dios que sembu ra. Ae siqu i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote. ⁷ Séptimo ángel nda nyuihuĩ cote. Trompeta mbucheẽ. Dios cheẽ ique ja mose r a nyuihuĩ cote. Ae Dios ñee uquiato ñiinda je nae, ùquĩ nda ique ja echeẽ cote. Mbia rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheẽ achandu ibatenda nyii nae, aque que ñeembe seje ra. —Eso rã libro ñetẽ isi. Ae tima chĩ ama ndisha ye nae, ae tima ndibisho chĩ íbii nae, aque si libro ñetẽ eisi rã. Eequia ji eisi, i que seje ra. ⁹ Ae aso nguia ñee ángel je. —Libro ñetẽ emee na seje, ae que ee ra. Ae emee nguia ñee seje cote. —Co libro ñetẽ jẽ. Eu ja. Irao raãte raque ra eachã namo mose. Etei tuchite quiato ra nderie je cote, i que seje ra. ¹⁰ Angel que libro ñetẽ mee seje cote ra. Au que se ra. Etura tuchi que sechuru je ra. Irao rã. Se eu tuchi mose quiato que eteite serie je cote ra. ¹¹ Emo ngue ñee seje cote ra. —Dios cheẽ nda eresenei senei sí mbia ja je. “Co ra Dios saã. ã nda Dios saã no”, ere ra mbia je. Is-honda abe je. Mangue chooñoa jenda abe je. Mbia

cheẽ ñumumbara abe je. Mbia rerecua jate abe je, i que seje cuu ra.

Dios quiato nyeremo Dios cheẽ senei senei

11 Dios que uu mo mondo séoo cuu ra. Ñee ngue seje ra. —Eso Dios chuchua mbuchechea checha. Altar abe embuchechea. Ae mbia chi huee ñee ñee Dios je nae, ũquĩ abe je contar ere rã. ² Itaicuee ra erembuchechachĩ jẽ. Patio ra erembuchechachĩ jẽ. ũquĩ ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee. ³ Sequiato nyeremo je ra sequirãcuã amee. ũquĩ nda secheẽ senei senei tuchi quia mbia je 1,260 días chee. Tiru rondei ra ũquĩ quereco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato je no. Uquiato nyeremo abe ra eteaquiato no. ⁵ Dios ra uquirãcuã mee ũquĩ nyeremo je. Emo embasi serĩ mose, tata ra embu embu uchuru si. Ucuãyãsa mbasi tuchi sacua. Eĩ nda mbia mano mano, ũquĩ Dios quiato nyeremo ucuãyã mose. ⁶ ũquĩ Dios quiato nyeremo ama mbuchaaqui eã arõte, Dios cheẽ nenei nenei mbei mose mbia je. Mbae ruqui rã nda ama naa. Mbia ra embasi mbasi arõte uquirãcuã je. Ibi jend a mbasise mose, mbasi tuchi rae. ⁷ ũquĩ Dios quiato nyeremo Dios cheẽ nenei nenei ja mose mbia ja je, icuã nda tu icuãte ee cote. Ibicua yenda. Icuã nda Dios quiato nyeremo iquia cote. ⁸ Emo ũquĩ Dios quiato raaque nyati aroneate. Erete tiquia iriã nda chichõ itaicuee rĩ. Mbia mangue choõñoa jenda abe tuchi r a mae ja eraaque rese. Tres días y medio chee rae. Jerusalén ndei ra ũquĩ. Ae mbia Jesucristo mbucha ira rese nae, huee. Hue jenda quiarei eicuã tuchi mbia. Sodoma jenda rã. Egipto jenda rã abe no. ¹⁰ Ae mbia siqui quia ibi rĩ nae, ũquĩ ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ũquĩ ngue mano cote ra, i r a eyate ñee nyue. Nyebe ra eriqui mbae mondo mundo tuchi nyue. ¹¹ Dios quiato nyeremo ndaaque que chi tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra. ¹² Ibatenda que ñee nyecua ũquĩ Dios quiato nyeremo je cote ra. —Jenyu aa quiato ibate, i que Dios ñee ee ra. Nyoĩ que ibate ibei ye cuu ra. Eucuãyãsa que mae mbeite u echui rese ra. ¹³ Aquere mose tuchi que ibi nyere icuã nda. Sucha tubiriã ndibisho que ngoi ngoi jate ra. Mbia tubiriãte que mano nda. Siete mil que mbia mano nda. Mbia ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jẽje cote.

Séptima trompeta mbucheẽ cote

¹⁵ Séptimo ángel que trompeta mbucheẽ cote no nda. ũquĩ mose que mbia ñeemombo ja ja ibatenda ra. Eĩ ngue tasẽ tasẽ nda:

Mbia mo ibi jenda mo nda siquíã ererecuarã cote. Dios ae chõ nda siqui ererecuarã cote. Nguirĩ ndese. Ae ae chõ nda siqui ererecuarã mbei cote, i que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ũquĩ ngue ngoi ngũĩã ndese ñee Dios je cuu ra. Eĩ ño ngue ñee nguĩã:

¹⁷ Gracias ure tuchi quia ndeje co, Dios. Ndequirãcuã mbae saã ja arõte quia co. Ereico beite que equia nyii ra. Namó abe no. Ereico beite ra eno.

Ereico ndequirãcuã naanguquate mbia je co cote. Ereico mbia rerecuarã tuchi co cote.

¹⁸ Mbia rerecua que paama ite ndeje ra. Co mose ra ndequiatoã erembasi cote. Ndequiatoã mano je abe ra erembasi cote. Ndequiato abe ra erembuquera cote. Mbae turã mee mee sacua ee. Ae ndecheẽ senei senei mbeite quia mbia je nae. Ae ñee turã turã nguia ndeje nae. Ndequiato cuasu je. Ndequiato ñetẽ je abe no. Ndequiato ja je ra mbae turã ereme mee cote. Ae mbia mbicua icuã nguia nae, ũquĩ nda erembutiã co mose cote, i que veinticuatro amei ñee turã Dios je cuu ra. ¹⁹ Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aquere rei contrato riru Dios mbae aque. Aquere que ama pirirã pirirã i ra. Ama ngue sieute ra. Ama ngue ñeete ra. Ibi que nyere ra. Iquitã abe que ngoi ngoi chee ra.

Dragón icuã icuã cuña je

12 Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra. Nyasi que chĩ ei quiti ra. Corona ngue equereco uãquĩ ndese ra. Nyasitata doce que chĩ corona ndese ra. ² Nañimbae que cuña nda. Tasẽ tasẽ tuchi que equia nguirĩ ndasi je ra. ³ Aquere que amae mbia mae sayã mo ndese ibate no nda. Dragón ireĩ mo ndese que amae nda. Siete que aque dragón ãquĩ cuu ra. Diez que erambashĩ nda. Corona ngue chĩ eãquĩ ja rese ra. ⁴ Dragón ngue nyasitata tubiriã siichã tuchi imbu ibii ngocoi je ra. Cuña ji que eñi eraarõ cote ra. —Sã nyaacuquia. Eriirĩ tau, i que huĩ ejii ra. ⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriirĩ isi ra. Querao que Dios je ibátee ra. ⁶ Cuña ngue uchã oso turuquia ñi nda. Dios echuchua saã ño nguia huee reaẽ. Huee

que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuã icuãte que ángeles je ra. Miguel nimba ángeles abe que ucuu a dragón nimba ángeles rese no nda. Nyiiquia serĩ jate que cuu ra. ⁸ Dragón ngue ganar i aroneate umbae ángeles rese ra. Nyebe eriqui aroneate nguiã ibate cote. ⁹ Dios que dragón mombo bei ibate si cote ra. Mbei ima ndei dragón. Diabolo. Satanás, i abe que ee ra. Ae chõ mbia mangue chooñoa jenda mbiĩrĩ irĩ mbeite nguiã co. Dios que ae mombo ibii cuu ra. Ngũimba rese. ¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: —Coche ñene. Dios riqui mbia rirõ mbei huũcuã si co cote. Namu tuchi mbia riqui mae Dios quirãcuã ndese co. Cristo riqui mbia rerecuu tuchi co cote. Dios quiatu que diablo mombo nguiã. Ae Dios mbuqueta queta beite quia equiato rĩrĩ nyii. ¹¹ Ũquĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquĩ senei mbeite quia mbia je Jesús cheẽ nae, ũquĩ je chõ eriqui nguiã eriquisã quisã. Ũquĩ Dios quiato que siquicheãte quia umano si ra. “Tamano ndei Dios je”, i jate que equia ra. ¹² Mbiambatenda ia tuchite cote. Mbiambi jenda quiatuchĩ eya eãte. Mbiamndisha yenda abe no. Diabolo quiatu que nguichichĩ u nguiã jẽje, ibi jenda. Paama i tuchite equia co. Achite quiatu Dios ñi nguiã embasi a cote, i que ibatenda mo ñee cuu ra.

¹³ Dios dragón mombo mose ibii, dragón icuã icuã ngue cuña je cote ra. Ae eririĩ nacue nyaacuquia nae, aque cuña je que dragón icuã icuã cote ra. ¹⁴ Emo ngue mbae jeo nyeremo mondo cuña je ejeorã nda. Nguira risha jeo raanguia. Cuña mbebe sacua. Eso chee sacua turuquia rĩ. Ae Dios saã echucharã turúquiaa nyii nae, huee eso chee sacua diablo si. Mbei si. Emo embuquiaru sacua tres años y medio huee. ¹⁵ Mbei que i mombo tuchi uchuru rĩ nda. Iãcuana. Cuña iquia sacua ndaque chõ ũquĩ iãcuã nde. ¹⁶ Ibi ia eãte que cuña ndese ra. Nyebe ibi nyiequia nguiã i mocõ ja dragón nyuru jenda. ¹⁷ Nyebe dragón paama i tuchi nguiã cuña je. Eicuã icuã mbeite que eriqui cuña ndiirĩ ataque ja je cote ra. Ae Dios cheẽ mumba eãte quia nae, ũquĩ je chõ eriqui nguiã cuña ndiirĩ i. Ae siqui beite quia Jesús cheẽ ndui nae, ũquĩ je dragón icuã icuã mbeite riqui co.

Icuã nyeremo

13 Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete que eãquĩ nda. Diez que erambashĩ nda. Corona ngue chĩ erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra.

² Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. —Ererecuarã nde, i tuchi que dragón icuã je ra. ³ Icuã ãquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbiamangu e chooñoa jenda nyuruira jate nguiã mae erese cote. Mbiam que siqui jate erui cote ra. ⁴ Mbiam que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: —Co icuã turã na eãte mbiam mo. Aemii ño equirãcuã ndiqui nguiã mbiam si co, i jate que mbiam quia ee ra.

⁵ Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbiam je ra. Dragón ngue emii mbiam rerecuarã cuarenta y dos meses ra. ⁶ Aque mose bei que eriqui ñee icuã icuã Dios rĩrĩ nda. Echuchua rĩrĩ abe no. Dios rimbambatenda rĩrĩ abe no. ⁷ Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbiam mangue chooñoa jenda rerecuu tuchi cote ra. Mbiam cheemo abe rerecuu tuchi que cote ra. ⁸ Mbiam Dios quiatoã ja tuchi que siqui icuã ndese ra. Ae embiam nombre mbesa iriãte riqui Jesús mbae libro rese nae, ũquĩ ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde erĩrĩ. ⁹ Jẽisa mose, secheẽ jeñandu rã. ¹⁰ Dios mbae icua ja chõ nguiã, mbae tã i nonde equiato je. —Co sequiato ra mbiam iquia tiquise je, i mose Dios, mbiam ra eiquia tiquise je. —Co sequiato ra mbiam tarõ, i mose Dios, mbiam ra etarõ no. Sã Jesucristo rimbam ñimbirãcuã ño. Sã Jesucristo icua tuchi. Icuã icuã icuã mose ee. ¹¹ Aquere que amae icuã mo ndese no nda. Ibi si qu e co icuã ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda. ¹² Equirãcuã tuchi que ra. Icuã ñiinda rã sí. —Icuã ñiinda rimbarã ño jẽingo, i tuchi que equia mbiam mingo ja icuã ñiinda rese ra. Ae ãquĩ sia ji nyerõ nguia nae, aque. ¹³ Mbiam mae sayã ngue esaã saã tuchi quia ra. Tata que embucoi ibei si mbiam resa rae ra. ¹⁴ Mbiam mae sayã ngue esaã saã tuchi icuã ñiinda rese eico mose ra. Eĩ ngue equia mbiam mbiĩrĩ irĩ tuchi ra. —Icuã ñiinda raanguia mo mbae mo jenyao jẽ, i que ñee mbiam je ra. Mbiam que echao ra. Ae ãquĩ sia ji tiquise je nae, ae nyerõ nguia nae, aque raanguia que mbiam chao ra. ¹⁵ Icuã ngue ereco mee mbae ao ji je ra. Mbucua que ra. Mbucheẽ ngue ra. Mbiam rã ngue eriqui cote ra. Ae ngoi sereãte quia ngũĩã ndese mbae ao ji resaa nae, mbae ao ji que ũquĩ iquia cote ra. ¹⁶ Icuã ngue umbae marca mii jate mbiam rese ra. Mbiam ruba rese. Mbiam o rese equiatocutinda. Mbiam riirĩ ndese. Mbiam cuasu rese. Mbaecha rese. Mbaecha reã abe rese. Mbiam rimbam rese. Mbiam rimbam eã ndese abe no. Icuã ngue marcar i ja mbiam ja je cuu

ra. ¹⁷ Mbia mo marcar iriã mose, ùquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no. ¹⁸ Ae ndua tuchi eãte quia nae, ùquĩ nda ã icua eã. Ae mbae icuate quia nae, sã ùquĩ icuã mbae número icua. Mbia mo ñi ño ñene. Embae número rei 666.

Mbia 144,000 irasei rasei Dios je

14 Mbae mo ndese abe que amae cuu ra. Jesucristo que chĩ juã Ibi Ibate Siòn seje cuu ra. Ae je eriqui Cordero i. Mbia cuabẽ tuchi que chĩ erese ra, 144-000 que mbia chĩ erese ra. Ùquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no. ² Mbae rieu que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbia tubiriãte riqui arpas mbucheẽ ñee no jẽ, ùquĩ naate que erieu riqui ra. ³ Ùquĩ mbia cuabẽte que irasei rasei quia Dios rêsaa ra. Mbae reco cuatro rêsaa abe no. Amei veiticuatro rêsaa abe que eriqui irasei rasei no nda. Eirasei rasei yasu que ra. Mbia mo ngue ñim-baaquiatu aroneate quia eirasei rasei yasu je ra. Mbia 144,000 achõ ño ngue ñimbaaquiato aque irasei rasei yasu je ra. Dios ùquĩ sirõ nguiatu quia mbae icuã si reaẽ. ⁴ Ùquĩ ngue ñimbicua eãte quia mbae icuã je ra. Ñimbicua eã siqui cuña mo ndese no. Siqui turã mbei equia Jesucristo rese ùquĩ. Dios que esirõ mbei mbia ibi jenda si ra. Ofrenda turã na tuchi chõ ùquĩ Dios je re. Jesucristo abe je. ⁵ Ùquĩ nguiarei ñee ñooño eã tuchi ùquĩ. Ùquĩ turã tuchite eriqui Dios je ã.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Ereni nenei sacua mbia ja je. Mangu chooñoa jenda ja je. Mbia cheẽ ñumumbara abe ja je. ⁷ Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiatu ngue mbae chao ja nguiã. Ibei. Ibi. Ama ndisha. Ama ndicoĩ. Nyebe ra mbia ñee turã ee, i que ángel ñee cuu ra.

⁸ Angel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mbicua eã cote. Mbia mbicua tuchichĩ equia nyii, i que aque ángel ñee cuu ra.

⁹ Angel nongue abe rese que amae no nda. Ñee asite que ra: —Icuã ndese chõ nda jẽingochĩ jẽ. Icuã naanguia mbae ao ji rese abe chõ nda jẽingochĩ jẽ. Icuã mbae marca ra jemichĩ jenduba rese jẽ. Jẽo abe rese ra jemichĩ jẽ. ¹⁰ Emo emi mose, Dios ra paama i tuchi

ee. Emo emi mose, Dios ra embasi tuchi. Dios ra ùquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹ Ùquĩ nda Dios mbasi bei. Mbae rasi ra eucua mbirĩ jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ùquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Ã embesa rã: “Jesús quiato mo mano mose, eyate riqui co”, ere chõ mi embesa. Espiritu Turã ñee abe chõ ùquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ùquĩ si ra Dios tesarẽã mbei, i que ibatenda ñee seje ra.

Dios uquiatoã mbasi mose, mbae a riamĩ ami na ño nda esaã ee

¹⁴ Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese oro ao ji ra. Tiquise raanguia rimbete que equereco oo ra. Quiata a ucua ucua sacua. ¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangu chooñoa jenda ja, i que ee ra. ¹⁶ Ae chĩ ibeishĩ tose nae, aque que tiquise raanguia mee ibi quti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacua. ¹⁸ Angel mo ngue tu altar si cot e ra. Tata raarõsa altar jend a rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Mangu chooñoa jenda ja eucua ucua. Equiche jate, i que ra. ¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchia mo nda. Eriami ami sacua. Dios uquiatoã mbasi mose, mbae a riamĩ ami na ño ùquĩ nde. ²⁰ Isho jiri que eriqui uvas riamĩ ami sucha tubiriã si ra. Dios uquiatoã mbasi mose, uvas riamĩ ami na ño ùquĩ nde. Eruqui riquiraa tuchi que ra. Caballo mbuchecha tuchi que eruqui riquiraa ra. Trescientos kilómetros tuchi que eruqui seje cuu ra.

Angeles mbae rasi siete quereco ja eriru ye

15 Aba siquichesa mo ndese que amae ibei rĩ cuu ra. Mbia mbiirandu sacua. Siete angeles rese que amae nda. Mbae rasi chumumbarate que ecurucuaẽ cuaẽ nguia íbii ra. Siete que mbae rasi ra. Mbae

rasi tuchi. Ūquĩ siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquiã mbei icuã ndui Jesús quiato nae, ūquĩ ndese que amae no nda. Icuã naanguia rese abe siquiã. Icuã mbae número abe que equerecoã nda. Ūquĩ ndese que amae ama ndisha arõ nda. Arpas Dios mbae je que echi tocar i ra. ³ Ae Moisés irasei rasei nyii nae, ūquĩ sí je que echi irasei rasei ra. Ae mbia irasei rasei Jesús je nae, ūquĩ sí je que echi irasei rasei ra. ã ngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde miĩ ño ererecua tuchi re.

Mbia ra ngaẽ ja tuchi nderea. Ñee turã sacuã ndeje.

Ndechiao turã ndese quiatu ngue mbia mae nguiã, i que mbia irasei rasei ama ndisha arõ cuu ra.

⁵ Aquere que mbae mo abe atea cuu ra. Dios chuchua ibatenda eiquesa que quiata seje cuu ra. ⁶ Siete ángeles mbae rasi quereco quia nae, ūquĩ ngue usẽ nyoĩ Dios chuchua si cote ra. Eiraoshĩ tuchi que nyoĩ usẽ nda. Oro que equereco huiishia ati ra. ⁷ Ae rese ama e mbae reco cuatro nyii nae, ūquĩ m o ngue mbae riru mee mee ja ūquĩ ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacuã. ⁸ Dios nininya tuchi que seje cuu ra. Equirãcuã tuchi que ra. Nyebe que tatashĩ Dios chuchua mboo ja tuchi ra. Mbia mo ngue ique aroneate rã huee ra. Ūquĩ ángeles mbae rasi icherẽ cherẽ ja eã mose.

Ángeles mbae rasi icherẽ cherẽ ja

16 Dios chuchua jenda mo ngue ñee asite ūquĩ ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacuã, i que ñee siete ángeles je ra.

² Angel ñiinda que oso umbae mbae riru yenda icherẽ íbii ja ra. Ae siqui quia icuã ndese nae, ae ngoi coi quia ngũiã ndese icuã naanguia je nae, ūquĩ ire rasi rasi que cote ra. Mbae asi tubiriã ngue erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã ngue ama ndisha cote ra. Ama ndisha riinda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndiicoĩ ñi abe que eicherẽ no nda.

Mbae ruqui rã tuchi que ama ja cote ra. ⁵ Angel ama ndaarõsa que ñee Dios je cuu ra. —Coche rei mbia icuã erembasi. Dios turã tuchi chõ nde re. Ndeturã mbeite que eriqui ra. ⁶ Ūquĩ mbia icuã nguiatu ngue ndequiato iquia iquiate nguiã nyii. Ndecheẽ nenei neneisa abe iquia iquia. Coche rei mbae rasi eresaanguia ūquĩ je cote. Coche rei mbae ruqui eresaanguia ee, i que ángel ñee turã Dios je ra. ⁷ Altar jenda mo abe que ñee Dios je cuu ra. —Ae bei. Coche mbia icuã erembasi nguiã cote. Ndeturã mbeite chõ ereico nguiã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiã mbia rei ja ngacu je cote. ⁹ Tenda que mbia sei tuchi quia embasi ra. Ūquĩ mose abe que mbia riqui ñee turã eãte Dios je ra. Dios embasi raque. Mbia que uba eã mbei Dios rese ra. Ñee icuã icuã mbei chõ ngue equia erĩ nda.

¹⁰ Quinto ángel que umbae mbae riru yenda icherẽ icuã nenda rese ra. Itondaru tuchi que icuã nimba ja je mbia cote ra. Mbia que hueecõ shiu shiu tuchi quia mbae rasi mose ee ra. ¹¹ Ūquĩ mose abe que mbia uba eã Dios rese ra. Huiicuã ngue esecha eãte quia ra. Ñee icuã mbeite que equia Dios rĩ nda. Ngasi rerequia mose abe que eriqui ñee icuã mbeite Dios rĩ nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacuã. ¹³ Aba checuayã icuã tres rese que amae nda. Emo ngue tu usẽ dragón nyuru si ra. Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyui rã tuchi que ūquĩ aba checuayã icuã nda. ¹⁴ Ūquĩ aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñumunua ja sacuã pelear i sacuã Dios rese. ¹⁵ Sã Jesús ñee no: “Mbia ndua eã mose serese ra achu. Jẽtesa tesa bei equia serese jẽ. Jẽingoquiato bei equia jẽ. Ĩ nda jẽireĩ ngũiã sechu mose”, sã Jesús i no. ¹⁶ Aba checuayã icuã ngue mbia rerecua munua ja huee ra. Pelear i sacuã Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra. ¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rã eã tuchi que ra. ¹⁹ Sucha tubiriã Babilonia ngue obo obo nyibite rĩ nda. Tres partes. Hue jenda tuchia que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiatu ngue tesareĩate nguiã Babilonia jenda chisaã icuã si. Nyebe eriqui nguiã paama i tuchi ee cote. Embasi mbasi uquirãcuã je cote. ²⁰ Islas

abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ũquĩ iquitã nda. Iquitã ngue mbia iquia iquia tuchi quia ra. Nyebe mbia riqui nguiã ñee icuã icuã tuchi Dios rĩ. Ñee turã ndocoĩ ee.

Cuña icuã mbae rasi saã tuchi

17 Ae mbae riru quereco ángeles nae, ũquĩ mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate quia erese ra. Mbia ataque abe no. Ae que mbia mbĩcuã jate quia ra, i que ángel ñee seje cuu ra. ³ Ángel que sererao turuquia rĩ cuu ra. Huee que amae cuña icuã ndese ra. Icuã ireĩ átoo que eñi nda. Embesa ji tubiriãte que chĩ icuã ndese ra. Nombres mbesa ji icuã tuchi que ũquĩ Dios je ra. Icuã ãquĩ atate que ra. Siete que eãquĩ nda. Diez que erambashĩ no nda. ⁴ Mbia rerecua irao raãte que cuña icuã irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetẽ aba queteamba abe no. Mbae riru abe que equereco oo ra. Oro ao ji. Huĩcuã ngue equereco ja quia aque mbae riru ye cuu ra. ⁵ Embesa ji que chĩ eruba rese ra. Aba chiicuayã tuchi que ra. ã i chõ ngue huĩ nguiã: “Babilonia ño co re. Sucha tubiriã icuã ño co re. Cuña icuã nderecua ja chõ co re. Mbae icuã nderecua ja chõ co re”, i chõ ngue embesa ji huĩ nguiã eruba rese. ⁶ Quiacuate quia cuña icuã ndiqui reaẽ. Jesús quiato uninya ruqui quia embei quia quiacua nonde reaẽ. Achuraira tuchi que mae erese cuu ra.

⁷ Ángel que ñee seje cote ra. —¿Mbaerã ereico nyuruirate mae erese re? Tarembiirandu cuña icuã ndese. Ae átoo eñi nae, aque rese abe tarembiirandu. Ae siete eãquĩ ndiqui nae. Ae erambashĩ diez riqui nae. ⁸ Ae rese eremae icuã cuu nae, aque ngue siqui rei nguiã cose. Emoate namo cote. Siquibe rae. Usẽ nda ibicua si. Aque icuã quera si mose, Jesús quiatoã nda nyuruirate tuchi mae erese. Ae embae nombre mbesa ji eãte Jesús mbae libro rese nae, ũquĩ. Icuã nda oso mbae rasi raã tuchi tata cuasu cote. ⁹ Earacua achõ nda ã secheẽ icua: Eãquĩ siete rã sí rei ibi ibate siete. Cuña icuã ñi ngoi ibi ibate siete tose hue. ¹⁰ Eãquĩ siete rã sí rei mbia rerecua siete no. Cinco que mano nda. Aque mii ndiqui namo co. Emo mii nda siqui emo mose cote. Aque ra siqui mbirĩ ño mbia rerecuarã. ¹¹ ũquĩ siete mo ndei icuã ireĩ mo. Siqui que equia nyii ra. Emoate namo cote. Siqui i ra ũquĩ siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashĩ ndese eremae

diez nae, mbia rerecua diez rã sí chõ ũquĩ nde. Mbia rerecua eã ño ũquĩ namo nde. Emo mose quia ra mbia rerecua cote. Ererecua mbirĩ ño ndae. Icuã ndese quiatu ra ererecua. ¹³ Hue rĩ sí tuchi ra ũquĩ ererecua ndua ndua. —Ererecuarã ño icuã jẽ, i ja ra ũquĩ ererecua. Uquirãcuã nda emee ja icuã je. ¹⁴ ũquĩ nda pelear i ja Cristo rese cote. Cristo quia ra i tuchi ũquĩ ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ũquĩ nde. Eturã tuchi chõ ũquĩ Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuã ñi ngoi nae, mbia chumumbara rã sí chõ ũquĩ nde. Mangue chooñoa jenda ja rã ño ũquĩ nde. Sucha tubiriã jenda ja rã ño ũquĩ nde. ¹⁶ Erambashĩ diez rese que eremae nae, mbia rerecua diez na sí chõ ũquĩ nde. ũquĩ nda cuña icuã ucuãyãte cote. ũquĩ nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra. Hue rĩ sí ra ũquĩ ererecua diez ndua. Umbae ra emondo ja icuã je. Icuã mii nda mbia rerecuarã ja cote. Aque mose ra Dios cheẽ ique. ¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

Babilonia jenda ra mbae rasi saã tuchi

18 Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Ángel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguiã hue cote. ³ Hue sucha tubiriã Babilonia jenda que mbia mbĩcuã jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “ũquĩ na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. ã nda hue jenda chisaã icuã jesaã eã jẽ abe. ã nda mbae rasi jesaã eã jẽ, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co. ⁶ Hue jenda que mbia ataque mbasi mbasi tuchi quia ra. ũquĩ sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ũquĩ

mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquiei ja. Mbia ra mano ja. Dios quiatu ra mbae icuã saanguquia tuchi mbia je eicuã ñi cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ùquĩ ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquiei rese mae mose. ¹⁰ Isho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite que jenyuchu a cote ra. Mbae rasi tu asi chõchĩ nguia jẽje ã, i ra maesa erese ñee ee. ¹¹ Comerciantes mangue choõñoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbia quia nda embae isi eãte nguia cote. Nyebe ra eya eãte cote. ¹² ã je nda vender i nguia ña:

oro
plata
sita ñetẽ aba queteamba huirã
perlas
tiru turã tuchi
tiru ireĩ
tiru seda
ira simbu turã mo
marfil ao ji
ira turã ao ji
bronce ao ji
hierro ao ji
sitashĩ ao ji
¹³ canela
aba mbushimbusa
perfumes
tuchua mbusimbusa
vino
mbae quira
mbae cui
trigo
ovejas
caballos
ira nambacua
mbia nimba

Ùquĩ ja je nda vender i nguia ee chã.

¹⁴ Mbia ra ñee Babilonia jenda je cote. —Ae mbae jenyoseite quia nae, ùquĩ mo nda tu ãte jẽje cote. Jembae tubiriãte riqui nyii nae, ùquĩ mo nda jendecoã cote, i ra mbia ee cote. ¹⁵ Ae ã mondo mondo quia vender i Babilonia jenda je nyii nae, ùquĩ abe ra chi mae isho erese no. Esiquichete ra chi mae mbae rasi raã ndese. Nyeseo ra erese. ¹⁶ Ñee nda Babilonia jenda je. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite jenyuchua cote. Jẽirao turã tubiriãt e rei ngue nyii re.

Oro ao ji tubiriãte rei ngue adornos jembae nyii no nde.

¹⁷ Jembae ua asi chõchĩ jẽ mbae rasi raã mose, i ra ee. Ae comerciantes nyoĩ choi quia canoa ye nae, ae nyoĩ choi quia barco ye nae, ùquĩ nda chi isho mae Babilonia jenda mbae rasi raã ndese. ¹⁸ Babilonia sucha tubiriã oquiei mose ra ùquĩ nyi isho mae erese. —Sucha tubiriã tuchichĩ Babilonia. Babilonia na eãte emo, i ra nyeseo sucha tubiriã oquiei mose Babilonia jenda. ¹⁹ Ibi tuba ra emombo mombo uãquĩ ndese. Nyeseo tuchi rae. Sucha tubiriã oquiei mose Babilonia jenda. Ñeemombo mombo ra Babilonia jenda je. —Ureya eãte riqui jendese ã. Mbaechate que jẽingochĩ nyii ra. Ure abe que mbaechate ureico jeni nyii no nda. Mbae ua asi tuchi chõchĩ co mose cote, i ra ñee Babilonia jenda je. ²⁰ Babilonia sucha tubiriã ua mose ra ibatenda iate cote. Jesús chimbaaquiatu abe ra eya cote. Ae Dios cheẽ senei senei quia nae, ùquĩ abe ra eyate cote. Dios quia ra mbae rasi mondo tuchi Babilonia jenda je uquiato riĩ.

²¹ Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote. ²² Nyebe ra mbia música saã eã mbei huee cote. Mbia ra irasei rasei eã mbei huee cote no. Mbia ra nyuao eã mbei mbae rese huee cote. Mbia ra mbua tocho eã mbei huee cote no. ²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbia mbaecha hue jenda que aba chiicuate riqui nyii ra. Hue jenda que mbia ataque mbiĩĩ i rĩ jate rei quia brujería je nyii no nda. ²⁴ Hue jenda que Dios quiato iquia iquia bei quia ra. Dios cheẽ mbuchecuada que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19 Aquere que mbia cheẽ tubiriãte achandu ibate cuu ra. Ñeemombo mombo que ñee turã Dios je ra.

Dios turã tuchite riqui mbia je co.

Dios ae riqui mbia rirõ eicuã si co.

Dios ae chõ equirãcuã ndiqui nguia co.

² Ae siqui sereãte quia Dios rese nae, ùquĩ nda Dios mbasi.

Mae tuchi ra erese embasi nonde.

Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbia mbiĩcuã icuã ja.

Ae que Dios quiato iquia iquia quia no nda. Nyebe Dios embasi nguia cote, i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquiei beite hue, i que ñee nda.

⁴ Aquere que veinticuatro amei ñee turãte Dios je cote

ra. Mbae reco cuatro rese. Ngoi que ngũĩã ndese Dios nonde ra. Dios chĩ mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩĩ. Ae Dios cheẽ jemumba eãte quia jẽ nae, jeñee turã ja erĩĩ no. Ae ecuasú nae, ae eñetẽ nae, jeñee turã ja chõ nguia erĩĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbia tubiriã ñee ño ndei ngue re. Ñ ño ngue mbia ñee nguia:

Dios turã tuchi riqui mbia je co.

Equirãcuã tuchite riqui co.

Ae riqui mbia rerecua tuchi co cote.

⁷ Nandechĩmbia tuchi quia erese jẽ.

Nandechẽ turã ño nguia erĩĩ jẽ.

Jesús ra uquiato isi bei cote.

Sã emo ndiqui ngũinisirã isi bei no.

Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngũinisirã isi rã, i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. —Co embesa rã: “Jesús ngũinisirã isi raanguia chõ nda esaũ uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ñquĩ je”, ere embesa mi, i que ángel seje ra. —Dios cheẽ tuchi chõ ñquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacuaã ee. Angel que ñee ño seje ra. —Adorar erechĩ nda seje jẽ. Dios rimba chõ se re. Nde rã sí. Ndequiato rã sí. Ae siqui tuchi quia Jesús rui nae, ñquĩ mo na ño se re. Dios miĩ je chõ adorar ere. Ae Dios cheẽ senei senei nguia mbia je nae, Jesús mbuchecua sacuaã mbia je chõ ñquĩ nde, i que ángel seje ra.

Ae siqui caballosĩ átoo

¹¹ Ibei que obo seje cuu ra. Caballosĩ mo ndese que amae huee ra. Emo ngue chĩ eátoo ra. “Ñee ñooñosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda.

¹² Tata rã tuchi que eresa ra. Corona tubiriãte que eãquĩ ndese ra. Embae nombre mbesa ji que chĩ ndei ra. Mbia mo ngue embae nombre icua eãte quia ra.

¹³ Eirao mondo ji eruqui ye que equereco ra. “Dios cheẽ” i que embae nombre ra. Jesús chõ eriqui reaẽ.

¹⁴ Ejército ibatenda que nyoĩ jate eruĩ ra. Eiraoshĩ turã achõte que nyoĩ eruĩ ra. Caballo átoo que echoĩ quia eruĩ ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ñquĩ mbasi sacuaã ño tiquise rerequia nguia uchúruu

aque. Ae ra mbae rasi saanguquia tuchi Dios quiato eã je cote. Dios ra paama i tuchi mbia je aque mose. Mbia quia siqui sereãte nguia Dios quirãcuã ndese. ¹⁶ Ae chĩ caballo átoo nae, aque irao rese que embesa ji ñi nda. Eu rese abe que embesa ji ñi nda. *ERERECUA TUCHI* i que embesa ji huĩ nda.

¹⁷ Angel mo ngue chĩ juã tenda re cuu ra. Urubu je que eñi ñeemombo mombo ra. Ae mbebe ja quia.

—Jenyu ja quiaru. Dios ra jembuquiaru ja tuchi cote.

¹⁸ Mbia chumumbara roo ra jẽu cote. Mbia rerecua roo. Soldados rerecua roo. Mbia quirãcuã ndoo. Caballo roo abe no. Caballo ato jenda roo abe no. Mbia cuasu roo abe no. Mbia ririĩ ndoo abe no. Ae ererecua riqui nae, ñquĩ ndoo abe no. Ae ererecua eã ndiqui nae, ñquĩ ndoo abe no. Ñquĩ ndoo ra jẽu ja cote, i que ángel urubu je ra. ¹⁹ Icuã ndese que amae cote ra. Mbia rerecua tubiriã ndese uquiato rese. Ejército tubiriãte que chi erese ra. Ñquĩ ñumunu a ño nguia eicuã icuã nonde Jesús je reaẽ. Ae siqui caballosĩ átoo, aque je. Jesús rimba soldados je abe no. ²⁰ Jesús que icuã isi tarõ nda. Dios cheẽ nenei ñooñosa abe no. Aque chõ mbia mae sayã saã saã ño nguia icuã ndeco mose nyii reaẽ. Aque chõ mbia mbĩĩĩ irĩĩ nguia reaẽ.

Ae mbia marca quereco quia icuã mbae nae, ñquĩ mbĩĩĩ irĩĩ ño equia reaẽ. Ae adorar i quia icuã naanguia mbae ao ji je nae, ñquĩ mbĩĩĩ irĩĩ ño equia reaẽ. Nyebe Jesús icuã mombo nguia tata cuásuu cote. Dios cheẽ nenei ñooñosa rese. Azufre rese eriqui sendi hue.

²¹ Jesús que icuã nimba iquia ja cote ra. Ae equereco quia tiquise uchúruu nae, aque je que eiquia ja cuu ra. Urubu ja que eroo u tuchi quia ra.

Dios ra Satanás tarõ mi mil años

20 Aquere que amae ángel mo ndese cuu ra.

Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacuaã nda. Abismo i equia hue ibicua je.

² Angel que dragón isi nyucua ra. Satanás, i que equia dragón je ra. Mbei iima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Angel que dragón mombo ibicua ye ra. Tarõ ngue llave je huee ibicua ye ra. Eiquesa que ematã nda. Ñ nda dragón mbia mangue chooñoa jend a mbĩĩĩ irĩĩ si eã. Mil años ua mose, ángel nda embui mbĩĩĩ na mondo.

⁴ Jesús quiato iquia ji rese que amae nda. Ae ñquĩ mbia nyisia sia quia Jesús rĩĩ. Mbia rerecuarã tuchi que ñquĩ cuu ra. Siqui eãte quiato ngue icuã ndese re. Icuã naanguia mbae ao ji je abe que eriqui adorar i ãte ra. Icuã mbae marca abe que equerecoãte quia nguba rese no nda. O abe rese. Ñquĩ ndaaque que quera si cuu ra. Cristo que emiĩ ererecuarã mil años nda. ⁵ Ñquĩ ndei mbia quera je rane ñquĩ. Mbia raaque ataque que

quera eã aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ũquĩ ia tuchi rae. Dios quiato tuchi chõ ũquĩ nde. ũquĩ nda nyoĩ eã mbei tata cuasu. Siqui bei ra Dios rese. Cristo abe rese. Errecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si. ⁸ Satanás nda mbia mangue choñoa jenda mbĩĩrĩ irĩ ja quia cote. Gog abe mbĩĩrĩ irĩ. Magog abe mbĩĩrĩ irĩ no. Dios quiatoã ja mbĩĩrĩ irĩ. Etubiriã tuchite ũquĩ. Satanás nda ũquĩ munua nua ja quia. Guerra raã naa sacua Dios je. ⁹ Mbia tubiriã tuchi ra Satanás munua nua nguia ibi jenda ja cote. ũquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ũquĩ sei ja cote. ¹⁰ Diablo quiatu nda mbia mbĩĩrĩ irĩte nguia. Nyebe ra Dios emombo tata cuásuu cote. Ae eriqui icua mombo. Ae eriqui icua naanguia mbae ao ji abe mombo. ũquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chĩ ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimĩ Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbia cuasu rese. Mbia ririĩ abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que eequia ra. Ae mbia ra siqui bei nae, ũquĩ mbae nombres que chĩ aque libro rese ra. Ae mbia saã saã nguia mbae nyii nae, ũquĩ mbesa mbesa ji qu e chi ũquĩ libros rese ra. Dios que mbia chisaã mbucheche checha cote ra. Embasi sacua. ¹³ Ae mbia mano ama ñi nae, ũquĩ ja que chi ra. Ae mbia mano ibii no nae, ũquĩ abe que chi ja no nda. Ae mano mano mangu e choñoa jenda nae, ũquĩ abe que chi ja no nda. Dios que ũquĩ nyisaã mbucheche checha ja cuu ra. Embasi sacua. ¹⁴ Aquere ra mbia mano eã mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriãte aque libro rese nae, ũquĩ ngue Dios mombo ja tata cuásuu seje cuu ra.

Dios ibi mbiasu, ibei abe

21 Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra.

Sã emo ninisirã quiche riqui i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mbia mumbara co cote jẽ. Siqui bei ra equia erese. Mbia rerecua turãte ra eriqui ee. Erimbarã tuchi ra mbia cote. ⁴ Dios ra mbia mbia tuchi cote. Mbia mo nda manoã tuchi cote. Emo ndasiã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae rĩĩ aico ñee nae, ũquĩ nda asaã ja, i que ñee seje ra. ⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo iseĩ mose, i turã nda amondo ee. I mbia mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ũquĩ je ra mbae turã ja amondo. ũquĩ nderecua tuchi ra se. Seririĩ tuchi ra ũquĩ. ⁸ ã ja ra nyoĩ tata cuásuu: Esiquiche. Jesús icuasa reaẽ. Mbia nyaba chaba reaẽ. Mbia iquiasa. Ae siqui choõnote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. ũquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ũquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sererao ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu. ¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huĩ nda. Muralla, i que etaronda je ra. Eicoĩ tuchi que ra. Ibate tuchi que ra. Doce que eiquesa ra. Angel miĩ ngue chi eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chĩ jaaja eiquesa rese ra. ¹³ Eiquesa tres que chi tenda chuisa quti ra. Tenda sosa quti tres no. Norte quti tres no. Sur quti tres no. ¹⁴ Doce sita cuasu que chi muralla qui ñi nda. Etaronda irã. Doce apóstoles mbae nombres mbesa ji que chĩ ũquĩ sita rese ra.

¹⁵ Angel que uu mo nguereco oro ao ji ra. Dios recua mbucheche sacua. Eiquesa abe mbucheche sacua no. Etaronda abe mbucheche sacua no. ¹⁶ Angel que Dios recua mbucheche uu je ra. Cuadrado tuchi que Dios recua ra. Eoco que 2,200 kilómetros ra. Eicoĩ que 2,200 kilómetros no nda. Ibate quitinda abe que 2,200 kilómetros no nda. ¹⁷ Angel que muralla abe mbucheche ra. Sesenta y cuatro metros que eicoĩ ra.

Sã mbia riqui mbae mo mbuchechea no. Eĩ sĩ que ángel muralla mbuchechea no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chi quia muralla irã nae, ũquĩ arõ ngue sita ñetẽ nininya chiichi ja ra. Embarõsa chõ ngue ũquĩ nde. Jaspe mbitee ji rane ngue ra. Zafiro mbitee ji que chĩ jaspe arõ cote ra. Agata mbitee ji que chĩ cote ra. Esmeralda abe no. ²⁰ Onice. Cornalina. Cristólito. Berilo. Topacio. Crisoprassa. Jacinto. Amatista. ũquĩ ja sita ñetẽ nininya que chi ja ja sita cuasu arõ nda. ²¹ Eiquesa riquisã jate que perla ao ji chi ra. Perla miĩ miĩ ja que chĩ eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je. ²³ Tenda eãte abe que eriqui Dios récuua seje cuu ra. Nyasi eãte abe que seje cuu ra. Dios nininya ae chõ ngue mbae tesae ja quia ra. Jesucristo nininya abe no. ²⁴ Dios nininya ra uquiato tesae ja ino huee. Mangue chooñoa jenda ja. Mbia rerecua ra ñee turã turã ja Dios recua rĩĩ cote. ²⁵ Dios recua chiquesa tarõ iriã mbei rae. Itondaru eã mbei ra huee. ²⁶ Mbia mangue chooñoa jenda ja ra ñee turã turã Dios recua rĩĩ. Mbae turã ja ra chi huee. ²⁷ Mbia icuã nda iqueã mbei huee. Mbia mbiĩĩ irĩsa abe ra ique eã mbei huee no. Ae embae nombre mbesa ji Jesucristo mba e libro rese nae, ũquĩ achõ ño nda ique Dios récuua.

22 Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no. Sucha tubiriã ite rĩ ngue iãcuã irãtã mo ñi nda. ² Ama nimia nguiti ja que ira ñi nda. Mbia mingo beisa que ũquĩ ira ra. ũquĩ ngue ia beite quia doce veces en el año nda. Nyasi mbuchechea quiatu bei que eriqui ia ia bei ra. ũquĩ iraro que mbia chumumbara mbucherõ cherõ tuchi quia ra. ³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee. ⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja. ⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja huĩ nguiã huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguiã co. Ae rĩĩ aico ñee nae, ũquĩ nda Dios saã ja. Sã Dios ucheẽ mbuchecuaa mondo mbia je cose no. Eĩ si que sembu namo no nda. Ae ra nyecua namo jiri nae, ũquĩ ndeacuquia sacua mbia je chõ ngue sembu nguiã.

⁷ “Se ra achu jei”, i que Jesús ra, i que ángel ñee seje ra. Ae ra ñ mumba eã Dios cheẽ mbesa ji nae, ũquĩ ia tuchi rae.

⁸ Se rei Juan. Ñ ndese que amae nda. Ñ ngue achan-du no nda. Aque ángel ñ teacuquia quia seje nae, aque jii que acoi rei senia ndese ra. Adorar i sacua ee. ⁹ Ñee ngue seje ra. —¡Adorar erechĩ nda seje jẽ! Dios miĩ je chõ adorar ere. Dios rimba chõ se re. Nde rã sĩ. Ndequiato rã sĩ. Ae Dios cheẽ mbuchecua checua quia nae, ũquĩ na si. Ae ñ mbesa ji mumba eãte quia nae, ũquĩ na sĩ, i que ángel ñee seje ra.

¹⁰ Angel que ñee si seje no nda: —Ae erembesa co libro nae, ũquĩ nda erembuchecuayã cuayãchĩ mbia si jẽ. Eteaquiato ee. Ae rĩĩ erembesa nae, achite eñi tu a cote. ¹¹ Sã mbia icuã mbae icuã naa naa ño na. Ae siqui quia mbae rondei rese nae, sã eriqui rã erese. Ae siqui quia mbae turã ndese nae, siqui i i tuchi ra mbae turã ndese. Ae siqui Dios rese nae, siqui i i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ũquĩ je ra mbae turã aru. Echisaã na sĩ. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echia irei ji Jesús ruqui je nae, ũquĩ ia bei ra eriqui. Eirao ituquia jí na ndei echia irei jí. ũquĩ nda ique Dios récuua. Siqui turã mbei ra equia huee.

¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui chooñote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbiĩĩ irĩ nguia nae. ũquĩ mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. Ñ nenei nenei sacua iglesias ja je. David i chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatushu” i co. Jesús ninisira abe riqui “quiatushu” i co no. Sã secheẽ andusa abe “quiatushu” i. Emo isei mose, sã ecuaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ñ ñandu quia Dios cheẽ co libro resenda nae, ũquĩ je tacheẽ tuchi: Emo co libro resenda mbirõ mose emo ñee je, Dio s ra ũquĩ mbasi tuchi. Ae mbae rasi chi ja co libro rese a nae, ũquĩ nda esaã ja tuchi. ¹⁹ “Dios cheẽ eã ño co re”, i mose co libro resenda je, ũquĩ abe ra Dios mbasi tuchi. ũquĩ nda Dios mingo bei eã nguécuaa.

²⁰ Jesucristo cheẽ ño ñ nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererecua. Sã uturã mondo tuchi jẽje. Amén.